



14,2014



John Carter Brown
Library
Brown University

JOHN CARTER BROWN
LIBRARY

Purchased from the
Trust Fund of
Lathrop Colgate Harper
LITT. D.

Ex libris Henrici Duclaux de 1771

LES
MARQUES
INSEPARABLES

de la
VRAIE EGLISE,
Euidentes en l'Eglise Romaine,
et incogneues de la Reformée,
despuis leur premiere origine
iulques aujourdhuy.

Ex libris
A

MESIEURS
LES PRETENDUS REFORMES
interieurement appellés à la Foy Catholique.
DISCOVRS solide, facile & diuertissant,
non moins vtile aux Catholiques, qu'aux
Pretendus Reformés

Par le R. P. Jaques Marcel, Religieux
de la Doctine Chrestienne.




A NISMES

Par la vefue de FRANÇOIS MARTEL,
Imprimeur de la dicte Ville M. DC. XLIV.

Handwritten text at the top of the page, possibly a title or header, which is mostly illegible due to fading and bleed-through.

Main body of handwritten text, consisting of several lines of cursive script. The text is extremely faded and difficult to decipher, but appears to be a continuous paragraph or list of entries.

Lower section of handwritten text, possibly a signature or a concluding note, also heavily faded and illegible.





A

MONSIEVR,

MONSIEVR IEAN DE MORGES,
SIEVR DE GARGASET PRIEVR DE VENTAVON.



MONSIEVR,

Permettés que ie vous fasse l'offre de ce Liure, comme vn Tribut de mes redeuances & comme vne marque de mes soumissions. Je serois le plus ingrat des hommes, si ie ne recognoissois pas, comme ie peus, les grandes obligations que iay a vostre illustre Maison & particulièrement a vostre singuliere Bonté pour tant de faueurs que ien ay receuës despuis le iour que i'eus l'honneur de vostre cognoissance. Et vous series par trop rigoureux (ce me semble) si vous menpechiez de les publier a tout le monde aux occasions fauorables. Vous scaues MONSIEVR, qu'il est difficile de retenir

*

les pensees & iniuste de les etoufer, lors que
notre deuoir nous oblige de les produire.
Il est vray, que ce Liure n'est pas digne de
vous, & mesmes qu'on pourra dire, qu'il
n'est pas a propos d'escrire contre nos Ad-
uersaires, aujourdhuy, qu'ils sont aux abois
& n'en peuuent presque plus. I'espere tou-
tesfois que mes Combats contre eux ne se-
ront pas vn Spectacle importũ & facheux
a vos yeux, si vous les considerés comme
vne suite de ceux de vos Ancestres, puis
que ie fais durant la paix ce qu'ils ont faict
pendant la guerre. Car comme ils ont au-
tresfois combatu l'Herésie l'Espée au poing
ie le fais apresant, la plume a la main, Et
comme ils ont employé la force des armes
pour la destruire, i'employe celle de la Ve-
rité pour la confondre. I'espere encore que
mes petits efforts ne seront pas tout a faict
inutiles au salut de ceux que i'attaque, s'ils
ont l'esprit de se laisser vaincre à la Verité,
avec laquelle ie les combats, Car perdant
les tenebres de leurs erreurs ils treuueront
heureusement les esclatantes lum^{es}es de

la Foy & de la grace Diuine: Vos Merites
& les rares Exemples, que vous donnés a
chascun de toute sorte de Vertus Chref-
tienes, entés sur l'ancienne noblesse de
vostre sang (celebre dans tout nostre Dau-
phiné) demanderoient beaucoup dauanta-
ge que ie ne fais pas en ce Liure. Ie le con-
fesse franchement ainsi, mais celuy la fait
tout ce quil doit, qui faiét tout ce quil
peut. Au reste ie mets la iustice de nostre
Creance deuant les yeux de ces Messieurs
dans ce Liure, tout simplement, comme ie
le proteste des l'entrée du Liure, cest a dire
sans aucun artifice de Rhetorique & sans
aucune pompe de Langage, craignant que
~~d'employer~~, l'Eloquence sur vn subiect, ou
l'embellissement seroit peut estre iugé ca-
ptieux, ne fust prise pour vn babil & caio-
lerie, & desrogeat a la pureté de la Foy &
a la candeur de mon Esprit. Daignés s'il
vous plait, MONSIEVR de receuoir ce pe-
tit Ouurage avec la mesme affabilité, dont
vous aues tousiours accueilli son Autheur,
qui ne le vous consacre que pour protester

plus ouvertement a tout le monde, quil
est & veut estre a iamais, autant par de-
voir que par inclination.

MONSIEVR


Vostre tres humble tres obeissant
& plus obligé seruiteur en IESVS
CHRIT.

IAQVES MARCEL.

Religieux de la Doctrine Chrestienne

D'Auignon ce 15. May.

1644.



PERMISSION DV R. P. PROVINCIAL,

LE soubigné Prouincial & Visiteur General de la Doctrine Chrestienne veu l'Approbation de deux de nos Religieux, permets au R. Pere Jaques Marcel Religieux de nostre Congregation, de faire imprimer les Marques inseparables de la vraye Eglise diuisez en deux parties fait en Auignon ce six Octobre. 1644.

APROBATION DES THEOLOGIENS
DE LA CONGREGATION DE LA
DOCTRINE CHRETIENNE

NOVS soubignés ayans eu Commission de nostre R. Pere Prouincial de lire les Marques inseparables de la vraye Eglise diuisees en deux Parties composés par le R. Pere Jaques Marcel Religieux de nostre dicte Congregation, certifions les auoir leués atentiuellement & ny auoir treuue aucune chose, qui ne soit conforme a la Doctrine de l'Eglise Catholique Apostolique & Romaine, Au contraire nous les iugeons fort vtilés au seruice de nostre Seigneur & au salut des Ames, fait en Auignon ce 4. Aoust, 1643.


IAQVES BEA VVAIS Theolog. de la Doct. Chrest.
BARRAV Religieux & Theolog. de la Doct. Chrest.

CE Liure est vn Ouvrage, dont la lecture est tres
vtile, & merite de paroistre par tout, comme con-
forme a la Doctrine de l'Eglise Catholique Apostolique
Romaine, Fait a Nismes ce huictiesme de Mars 1644.

CALVET. Vicaire. General & Official

LE soubigné Docteur en Sainte Theologie, Chanoine
& Archediacre en l'Eglise Cathedralle de Nismes cer-
tifie auoir veu & leu le presant Liure, composé, par le
R. P. Iaques Marcel Religieux de la Congregation de la
Doctrine Chrestienne, & ny auoir rien trouué qui ne
soit conforme a la Doctrine Orthodoxe de la Foy Ca-
tholique Apostolique & Romaine, mais au contraire
qu'il est remply de grande erudition, conceptions rares,
& raisons fort preignantes pour desfiller les yeux des
aueuglés, Partant l'ay iugé tres vtile au public, & digne
destre imprimé pour seruir a la deffence de la Religion,
& confirmation de la Verité; En foy dequoy Iay donné
ce Temoignage souscrit de ma main. ce dixhuictiesme
May mil six cens quarante trois.

TRIMOND Archre.



NEMPECHE, point pour le Roy,
que le present Liure soit imprimé,
faict a Nismes ce dix-huictiesme May
mil six cens quarante quatre.

ESCVDIER,

Aduocact du



PREFACE APOLOGETIQUE.

L'APREHENSION que j'ay eue, que nos Aduersaires, ne se plaignent de quelques petites seuerités, qui se treuvent parsemées en diuers endroits de ces Discours, plustost apparentes que veritables (car elles ne vont précisément que contre leurs Maximes & les Actions qu'ils pratiquent par Religion,) m'a suggeré, apres les auoir releus, comme pour me iustifier puissamment enuers eux-mesmes, ie n'auois qu'à leur produire l'exemple de nostre Maistre IESVS-CHRIST, de ses Apostres, & des plus celebres Peres de l'Eglise primitive, agissans contre les Heretiques & deserteurs de la Foy; Le plus seueré desquels, tant s'en faut que ie deuançe en rigueur, parlant contre ces Messieurs, qu'au contraire, ie n'aproche que de bien loin le plus doux de tous eux. C'est ce que j'ay à faire voir en peu de paroles au Lecteur dans cette Preface.

Et pour commancer par nostre Maistre, il est aisé

de voir au chap. 7. de S. Mathieu, comme il charge les Heretiques de tous les vices du monde, lors qu'il leur donne le nom de Loups : Car le Loup à la superbe du Lyon & la pusillanimité du Lieure, la fureur du Tygre, & la finesse du Renard, l'enuie du Mastin & la lasciueté du Sanglier, la gourmandise de l'Ours & la paresse de l'Asne. Il n'en dit gueres moins en S. Iean 10. lors qu'il les appelle Larrons, Qualité qui change la nature de l'homme de bien en celle de Loup garou.

Pour S. Pierre & S. Paul, ils disent ouuertement contre telles Gens, celuy-la en sa 2. Epistre ch. 2. & 3. & celuy-cy en sa 1. à Timothée ch. 4. & en sa 2. au mesme Timothée ch. 3. tout ce que IESVS-CHRIST en dit tacitemēt dans sa comparaison, lors qu'ils les appellent, Sectaires de perdition, Renieurs de la Diuinité, & vrais Disciples du Diable: Il ne faut que lire attentiuement les lieux que ie cite icy de ces Princes des Apostres, pour y voir en termes expres cette verité.

L'Euangeliste S. Jean ne veut pas que nous les receuions chez-nous, non pas mesme que nous leur disions Bien vous soit, ainsi qu'appert en sa 2. v. 10. ce que luy mesme a pratiqué tout le beau pre-

P R E F A C E.

3

mier. Car ainsi que nous assure S. Irenée, comme l'ayant appris de S. Polycarpe son Maistre, ce grand Apostre ayant un iour rencontré Cerinthus dans les Bains où il alloit, il recula d'abord, tout ainsi que s'il eu la rencontre d'un Dragon. Fuyons d'icy (dit-il aussi tost) de peur que les Bains ne s'abissent sur nous. Et le mesme S. Polycarpe Religieux, observateur des Enseignemens du mesme Apostre son Maistre, ne voulut iamais ressaluer Marcion qui l'auoit le premier salué, ny séjourner en sa compagnie: A cause dequoy cét Heresiarque tout irrité luy demanda; Sçauoir-mon, s'il ne le cognoissoit point. Fort bien, ie te cognois, (luy dit-il) N'es-tu pas le fils aîné de Satan? Ainsi l'escrit Eusebe en son histoire Ecclesiastique, l. 4. c. 14.

Tous ceux qui ont leu les Peres, sçauent comme S. Irenée ne pouuoit traiter gueres plus asprement & plus rudement qu'il a fait les Gnostiques, Tertulien les Marcionites, S. Basile les Eunomiens, S. Athanase & S. Hilaire les Arriens, S. Ierosme les Heluidiens & les Fouinians, S. Augustin les Manichéens & les Pelagiens, &c.

Sainct Ierosme estime les Heretiques de beaucoup pires que les Payens, c'est sur S. Mathieu, ch.

13. expliquant ces paroles. Cum autem immundus spiritus, &c. Et sur le Psal. 139. il les compare aux Serpens, & sur le ch. 23. de Ieremie, il les appelle Renards, & sur le 5. d'Osée, il assure qu'ils vsent de l'art du Diable: & sur le 5. d'Habacuc, il tient que les prieres qu'ils presentent à Dieu se conuertissent en peché, selon le Prophete en son Psal. 108.

S. Ambroise de quelque douceur & discretion dōt il fut doüé, appelle cependāt les Heretiques Bestes, & veut qu'ils soient traittez en Bestes. C'est en son Epistre 4. aux Empereurs Gratian, Valentinian & Theodose, ex Concilio Aquileiensi, & au sermon 3. des Saints, ils les appelle Renards, & en l'Epistre 6. du liu. 1. ad Syricium, il les appelle Chiens, & sur le Psal. 118. Loups, & sur le Symbole, ch. 5. Impies, & au ch. 25. du mesme Symbole, Hommes perdus.

Saint Augustin qui fut tousiours extremement debonnaire, comme ses œuures le tesmoignent ouuertement, escrit neantmoins en la Cité de Dieu, liu. 1. ch. 25. Que les Heretiques sont de beaucoup pires que les Infidelles, & sur le Psal. 80 il les nomme Renards, & sur le Psal. 67. Taureaux.

P R E F A C E. §

*Et sur le Psal 57. Serpens & Basilics, Et contre
 Fauste Manichéen, l. 13. ch. 12. Fols manifestes,
 Et au l. 2. du Genese contre Manes, ch. 25. Et 26.
 il assure qu'ils tiennēt leur doctrine du Dia-
 ble. Authoritez que ie supplie bien fort le Lecteur
 de ne reuoquer point en doute, sur l'assurance que
 ie luy donne de les auoir leües sur les propres lieux,
 avec plusieurs autres semblables que i'ay obmises
 pour ne l'ennuyer point.*

*Enfin, il n'y a paroles rudes, dont ces grands
 Hommes n'ayent vsé, parlant contre les Heretiques.
 de leurs temps. Et croy-ie que s'ils eussent vescu dans
 ce dernier siecle, ils auroient assurément forgé des
 nouveaux termes pour censurer l'insolence de Lu-
 ther, de Calvin, Et de leurs semblables.*

*Que cecy soit dit, non pour vouloir authoriser
 ma rigueur Et seuerité par celle de ces Oracles de
 l'Eglise primitiue, faute d'auoir imité leurs excel-
 lentes Vertus, mais seulement pour faire voir à
 nos Aduersaires, comme ie ne suis pas si reprehen-
 sible qu'ils se pourroient bien figurer. Que si i' vse de
 quelque petite rigueur Et mespris en ces Discours,
 ce n'est pas par haine que i'aye contre aucun d'eux.
 A Dieu ne plaise, c'est seulement par ce que i'ay*

*affaire à des Apopletiques spirituels, qui se flattent
 malheureusement depuis long-temps, au grand
 prejudice de l'honneur de Dieu, & de son Eglise, au
 peril des foibles, & perte de leurs pauvres ames.
 En quoy i'ay pour Patron, outre nostre Maistre, ses
 Apostres, & les Peres Anciens que ie viës d'alleguer:
 les plus excellens Escrivains & Predicateurs de ce
 temps: lesquels nous voyons tous les iours estre non
 moins aspres & sevéres aux pecheurs obstinés, qu'ils
 sont doux & debonnaires à ceux qui se soumettent
 & rangent à leur deuoir: Le vinaigre, comme di-
 sent quelques Naturalistes, ressuscite les abeilles,
 que la douceur de l'huile auoit fait mourrir. Et si
 nous pouuons suiure le conseil de S. Augustin au l. de
 l'Vtilité du Ieufne, nous ne deuons pas laisser de
 corriger les pecheurs endurecis, encore que par acci-
 dent nostre correction les offence, non plus que nous
 ne deurions pas laisser de secouër, voire de fraper
 nostre propre Pere s'il estoit tombé dans quelque
 Apoplexie, iusques à ce que nous l'eussions éveillé, &
 tiré du peril mortel de son insensibilité.*

*Que si mon procedé ne sert de rien à ceux d'entre
 ces Messieurs, qui sont par trop delicats & douilletts,
 (que le Sage colloque en ses Proverbes c. 17. v. 10.*

P R E F A C E.

7

*Et ch. 18. v. 2. au rang des Fols) si fera bien,
Dieu aydant aux autres, qui aiment la verité,
quoy qu'elle ne soit pas si courtoise & si complai-
sante. Lesquels le mesme Sage loge parmy les vraye-
ment Sages en ses Prouerbes ch. 9. v. 8.*

*Je sçay bien qu'il y a une fausse charité, la-
quelle est accompagnée de passion & de colere,
comme la vraye est accompagnée de compassion &
de zele: Car ainsi que dit saint Gregoire en l'Ho-
melie 34. sur les Euangiles; Aliud est quod agi-
tur typho superbiæ, aliud quod zelo disci-
plinæ: Et que ie dois autant hayr & fuyr la pre-
miere, que ie dois aymer & practiquer la deuxieme.*

*Je sçay bien encore que le trop de rigueur
tient de la fureur, & que le trop de douceur
tient de la flatterie, c'est pourquoy ie tascheray de
tenir l'entre-deux, qui consiste en la Correction, la-
quelle pour estre vtile, & profitable, doit auoir du
vin, aussi bien que de l'huile, pour guerir les Sa-
maritains, comme l'a sagement remarqué saint
Bernard. C'est au reste avec l'intention de seruir à
tous ces Messieurs, & nommément aux ames inte-
rieurement appellées à la Foy Catholique & choisies
de Dieu pour le Ciel; Lesquelles ayment mieux com-*

me dit le Sage en ses Prouerbes ch. 27. v. 6. les Blessures d'un vray Amy, que les Baifers plus tendres d'un Ennemy. Dieu qui s'est seruy de la vehemence d'Elie, aussi bien que de la debonnaireté de Moysse, des estincelles du feu de S. Paul, aussi bien que des gouttes de rosée celeste de S. Barnabé, daigne s'il luy plaist se seruir de mon ardeur innocente, aussi bien que de la suauité complaisante de quelque Escriuains du Siecle, non seulement pour sa gloire (à laquelle ie vise dans toutes mes pretendues seueritez:) mais encore pour la Conuersion des meilleurs d'entre ces Messieurs, & pour la confirmation des Catholiques, qui liront ces Discours. Dont ie l'en supplie tres-humblement, les genoux en terre, apres luy auoir offert mon sang & ma vie, pour le Salut des vns & des autres au besoin.





MARQUES
 INSEPARABLES
 DE LA VRAIE EGLISE:
 DE L'VNITE DE L'EGLISE.

Premiere MARQUE.

CHAPITRE I.

*A MESSIEURS les Pretendus Reformez,
 interieurement appelez à la Foy Catholique.*



MESSIEURS,
 Continuant opiniastrement à dire,
 comme vous faites, *Que la vraie
 Eglise est seulement chez-vous; Nous*
 persistant au contraire à prescher à
 tout le monde, *Qu'elle ne se treuve
 que parmy-nous; Quel moyen, ie vous supplie de fai-
 re voir, qui de nous, ou de vous dit la Verité, &
 doit l'emporter sur son Aduersaire, à fin de tomber
 d'accord de nos differens? Vous ne voulez pas vous*

B

arrester à ce que nous disons, Nous prenans, non pas pour vos Iuges, (bien que nous le soyons en effect, puis qu'en effect nous composons la vraye Eglise, à l'exclusion de vous, & de tous vos semblables :) mais pour vos Parties aduerses. Nous ne voulōs pas croire à ce que vous dites, puis que vous n'avez non pas mesme vn passage formel de l'Escriture, ny vn seul miracle euident en vostre faueur. Pour la mesme Escriture sainte, outre que ses Originaux & ses Versions sont aujourd'huy grandement dissemblables, chacun de vous l'expose & l'interprete encore diuersement, à cause dequoy, elle ne scauroit toute seule resoudre nos differans. Pour la Tradition vous n'en voulez pas mesme entendre parler, comme estant à vostre dire vne pure Doctrine des hōmes. Pour les Peres Anciens, vous ne les receuez qu'en tant qu'ils ont parlé conformément à vostre goust & sentimēt reformé, Qui n'est pas les prendre pour Iuges de nos querelles, cōme vous estes obligez de le faire, expliquans l'Escriture sainte, mais au cōtraire, vous rendre leurs Iuges, ainsi que l'a doctement & subtilemēt remarqué le grand Cardinal du Perron. Pour les Escrivains de l'Histoire Ecclesiastiques, vous ne leur adjoustez non plus de foy, quand ils sont contraires à vostre Reformation Pretenduë, qu'a Tite Liue. Il n'y a point de Troisième au mōde aujourdhuy pour nous appointer & mettre d'accord, comme vous scauez fort bien. Arriere les Infideles, les Turcs & les Iuits, pour la resolution d'une

Controuerse de foy Catholique: Car qui oseroit faire l'Ennemy de l'Eglise de IESVS-CHRIST, Iuge des querelles de ses Sujets? Quel moyen donc encore vn coup, ie vous prie, de resoudre & terminer les nostres, quidurent desia despuis si long-temps? Viurons-nous tousiours dans vne guerre irreconciliable, avec l'opprobre du Christianisme. le scandale des foibles, & la risée des Ennemis de la Foy?

Faisons bien, & voici la meilleure, la plus courte & la plus agreable voye d'accord, pour assoupir & terminer nos vieilles querelles de Religion: Recherchons nous-mesmes ensemblement, (au reste avec vn tres-ardant desir de la gloire de Dieu & de nostre Salut) Laquelle de nos deux Eglises, la Nostre ou la Vostre, se peut approprier avec plus de raison & de iustice les quatre Marques, que vous & nous donnons en commun à l'Eglise de IESVS-CHRIST, (lesquelles prises, non separément, mais conjointement, font vne preuue moralement euidente & demonstratiue de la Verité de l'Eglise qui les possede:) Par ce que de la resolution de cette seule Question depend celle de toutes les autres, que nous auons aujourd'huy & scaurions iamais auoir en matiere de Religion; Car où est celuy, tant soit-il Insolent, qui osast contester la moindre des Maximes que la vraye Eglise nous auroit proposées à croire comme de foy, puis qu'escouter cette Eglise, c'est escouter IESVS-CHRIST mesme, ainsi que luy mesme le dit en S. LUC. 10. *Qui vous escoute, m'escoute, qui vous mespri-*

se, me mesprise. Recherchons, disie, nous-mesmes ensemblément, qu'elle des deux a plus visiblement & palpablement les Proprietez d'Vne, d'Vniuerselle, de Saincte, & d'Apostolique, que nous luy accordons & les vns & les autres sans dispute & debat.

Je dis sans dispute & debat, puis que nous n'auons, les vns ny les autres iamais disputé ny debatues ces Proprietez à la mesme Eglise, bien que vous leur ayez donné pour compagnes la *Sincerité de la Predication & la pure administration des Sacremens*; Lesquelles bien entenduës se treuent implicitement dans les deux dernieres, *de Saincte & d'Apostolique*. Iamais vous ne dites que la vraye Eglise ne fut *Vne, Vniuerselle, Saincte & Apostolique*, entendans fort bien, que ces Proprietez sont inseparables de sa Nature & de son Essence. Je suppose que vous croyez à nostre commun Symbole, & à vostre grand Catechisme, qui le disent ainsi, comme font encore la Confession de Foy d'Ausbourg, art. 7. la Cōfession de Foy de Saxe, art. 12. celle des Suisses, art. 17. celle d'Angleterre, art. 19. & finalement celle d'Vvitemberg, dont voici les paroles: *Nous croyons l'Eglise Catholique, qui est Vne suiuant le Symbole des Apostres & celui de Nicée. Nous croyons qu'elle est tellement gouvernée par le Sainct Esprit &c. afin qu'elle ne perisse point par le moyen des erreurs & pechez*: Confessions qui toutes accordent ces mesmes quatre Marques à l'Eglise de IESVS-CHRIST.

Je scay bien, que vostre Ministre du Moulin,

n'ayant iamais sceu treuver & desesperant eneoire de pouuoir treuver à l'advenir les moindres vestiges de ces quatre Marques en vostre Eglise Pretenduë, & descourant d'ailleurs les euidentes Consequences de sa Nullité, lesquelles nous tirons aisement de là, a iugé qu'il estoit non seulement expediant pour vostre honneur, mais encore absoluëment necessaire de les arracher à la vraye Eglise. Ce qu'il a tasché de faire dans son *Bouclier de la Foy*, & dans sa *Nouueauté du Papisme*, nonobstant que les Liures sacrez, le Symbole des Apostres, les premiers Conciles, les Peres, les Schismatiques & les Heretiques ses Associez recognoissent toutes les mesmes 4. Marques en icelle. Mais tant s'en faut qu'il les luy ait arrachées, comme il pretendoit de faire, qu'au contraire il les luy a plus fortement attachées par ses chicanes, ainsi que ie l'ay clairement fait voir à la fin du deuxieme Tome du *Triomphe de la Foy Catholique*, au Traitté, intitulé, *Les Marques inseparables de l'Eglise Catholique, garanties des plus violents efforts, dont le Ministre du Moulin a creu les luy pouuoir arracher*; Que ie supplie le sçauant Lecteur de voir, s'il desire de tirer tout le fruit, qu'il s'attend de la lecture de cettuy-cy, puis qu'ils visent tous deux à mesme fin.

Or attendant cette Recherche, commune & charitable, que ie souhaite de tout mon cœur, voicy celle que ie viens de faire avec l'ayde du S. Esprit, & de mes lectures sur ce subiet, laquelle vous treuuez grademēt facile & familiere, ainsi que i'estime:

Car i'en ay vniuersellement banny toutes les Questions de Droit, & toutes les choses arduës & difficiles. Point de Scholastique; Point de Syllogisme ny d'Enthymeme, Point de Controuerse ny de chicane; Point mesme d'ornemēt de Rhetorique, ny d'amplification, afin d'estre plus court & moins ennuieux; Me contentant de la seule & nuë Histoire & du simple raport des choses qui sont arriuéés en ce Siecle, & chez-nous & chez-vous, & lesquelles nous voyōs encore aujourd'huy, comme de nos propres yeux, plaines au reste de verité: Car l'honneur de Dieu, ny celuy de son Eglise, ne s'appuyent point sur des impostures & des faussetez: Mais sur la seule, nuë & toute innocente verité. *Pensez-vous* (dit le saint Homme Iob au chap. 13. de son li. v. 7. *que Dieu aye besoin de vos mensonges pour la deffence de la verité, & que pour gagner sa cause, vos artifices luy soient necessaires.* Et ie le proteste haut & clair à chacun, de ne dire chose quelconques en icelle, que ie n'aye veu de mes propres yeux, ou leu chez vos propres Auteurs, ou entendu des personnes tres-dignes de foy. Commençons par *l'Unité*, la premiere des Marques inseparables de l'Eglise de IESVS-CHRIST.

Suite du present Chapitre.

IE ne deuois point preuuer, que la vraye Eglise est *Vne*, puis que cette verité m'est ingentemēt accordée de tout autant de Reformez que vous estes au

monde; l'employeray toutesfois icy les authoritez & raisons que i'ay peu recueillir de mes lectures, pour faire voir aux plus aueugles mesmes cette verité qu'elle est *Vne*. le dis *Vne*, en toute façon, & de toutes les sortes d'Unité dont elle est capable; *Vne d'Authheur*, *Vne de Chef visible* (outre l'invisible *IESVS-CHRIST.*) *Vne de Corps*, *Vne de Foy & de Creance*, *Vne de cœur*, & de volonté; *Vne de Baptisme*, & finalement *Vne de Culte externe ou de Ceremonies*. Soyez s'il vous plaist attentifs à la force de mes preuues.

L'Espoux aux Cantiques ch. 6. v. 8. *Ma Colombe est Vnique*, elle est seule à sa mere. Et le grand Apostre aux Ephesiens ch. 4. v. 1. *le vous prie donc*, moy qui suis prisonnier au Seigneur, que vous marchiez comme il est seant à la vocation, à laquelle vous estes appelez, estans soigneux de garder l'unité d'Esprit, par le lien de paix. Il n'y a qu'un Corps & qu'un Esprit. Il n'y a qu'un Seigneur, vne Foy, un Baptisme. Et quelques lignes apres il appelle l'Eglise un Corps bien vny & serré ensemble par toutes les iointures &c. Mais plus authentiquement *IESVS-CHRIST*, en saint Iean ch. 10. v. 10. *I'ay aussi d'autres Brebis* (dit-il) *qui ne sont point de cette Bergerie*. Il me les faut aussi amener, & elles orront ma voix, & il y aura vne Bergerie & un Pasteur. Et le mesme saint Iean au c. 11. v. 52. *Et non seulement pour cette Nation*, (deuoit mourir *IESVS-CHRIST*,) *mais aussi afin qu'il assemblast en un les Enfans de Dieu qui estoient dispersz*. Et au chap. 17. du mesme Euangeliste, *IESVS-CHRIST* encor, *Or ie ne prie pas seulement pour eux*,

mais aussi pour ceux qui croiront en moy par leur parole, afin que tous soient un en Nous. Il est aisé de voir aux Actes ch. 2. comme tous les premiers Chrestiens, n'auoient qu'un cœur & qu'une ame en plusieurs corps.

Or que tous ces passages se doiuent entendre de de l'Unité numerique de l'Eglise de Dieu, comme nous l'entendons & preschons, il suffit des seuls Commentaires de vos Ministres sur iceux, & du septième Canon du premier Concile de Constantinoble, que vous receuez comme Orthodoxe, Qui definit au Symbole, dont il est composé; *Que la vraye Eglise est Vne selon toute consideration.*

Pour les Peres, outre S. Cyprian & S. Augustin, qui ont chacun d'eux escrit vn liure entier de *l'Unité de l'Eglise*, S. Irenée dit au liu. premier ch. 3. de *Heresibus*. *Que les Espagnols ne croient point autrement que les Celtes, que ceux du Midy, d'Egypte, de Lybie &c.* S. Ierosme ad Eustochium. Epist 2. *Pour autant l'homme laissera Pere & Mere, & adherera à sa femme, & non à ses femmes.* saint Chrysostome Hom. 1. au Corinth. *Le nom de l'Eglise ne denote point de separation, mais vne parfaite union & consonance.* S. August. Epist. 66. ad Donatist. & in Psal. 101. *Les promesses sont faites à Abraham, & à sa semence. Il ne dit pas à ses semences, comme à plusieurs, mais comme à vne seule.* L'Eglise nous est aussi representée, à cause de cette Unité par la ville de Hierusalem, laquelle vaut autāt en langue sainte, que *Vision d'union & de paix.*

Mais à quel propos eust IESVS CHRIST laissé si particulièrement la paix à ses Apostres & Disciples, montant au Ciel, en S. Iean 14. *Je vous laisse ma paix, ie vous donne ma paix*, s'il n'eust voulu conseruer son Eglise dans vne parfaite & perpetuelle paix, c'est à dire dans vne parfaite & perpetuelle Vnion, Vnité & Vniformité. Vos Ministres mesmes ne decreterent-ils pas en leur Synode National de l'an 1598. tenu à Montpelier. *Qu'il n'y a qu'une seule Eglise au monde.* Ainsi l'asseure Cayer en la page 103. de sa Deffence, contre les calomnies que vos Ministres (selon leurs charitez accoustumées) luy auoient imposé en hayne de sa conuersion : Mais comment oseriez-vous dire autrement, apres auoir receu comme Orthodoxe le grād Concile de Nicée qui le determine ainsi.

L'Eglise ne fut, ny ne sera iamais diuisée, non plus que l'enfant présenté à Salomon, & que la robe sans couture de IESVS-CHRIST. Que si elle a esté quelque fois diuisée par les Schismatiques & Heretiques (dit le grand & celebre Cardinal du Perron, la merueille de ce siecle, en sa Replique au Roy de la grande Bretaigne) sa Diuision n'a esté que materielle, & nullement formelle. C'est à dire que les membres de l'Eglise peuuent bien estre materiellement separez de son corps, mais formellemēt, point pour tout. La raison est par ce que la forme de l'Eglise. non plus que les autres spirituelles ne se diuise point, mais reste tousiours toute entiere dans vne

seule des Parties diuisées. De la vient, qu'ils ne sont plus apres telle separation les membres, que materiellement, qu'impropremēt & que par equiuoque, cōme ne participant plus que materiellemēt, qu'improprement & que par equiuoque à la forme substantielle du Corps. Car tout ainsi qu'en la separation des mēbres d'un corps Organique parfait, tel qu'est par analogie l'Eglise de Dieu, l'ame reste toute d'un costé, sçauoir est du costé de la Partie, qui constituë & cōserue le corps en vie; Ainsi en la separation des Heretiques l'ame, la forme & l'essence de l'Eglise (sçauoir est la Foy & la Doctrine) restent toutes d'un costé, sçauoir est du costé de la Partie qui n'a point fait la separation actiue & reelle, mais la seulement soufferte, Autrement on pourroit faire d'un homme deux hommes en le diuisant, & d'une seule Eglise, deux Eglises indiuiduelles & numeriques par le Schisme & la separation. Ce qui est euidement faux. *L'Eglise est en tout temps, & en tout lieu, ou Vne ou Nulle. Tout Royaume diuisé sera desolé,* dit IESVS-CHRIST en S. Mathieu 12. & 25. Or l'Eglise ne doit iamais estre desolée selon la Prophetie d'Isaye c. 62. v. 4. & mesme selon la plus grande partie de vos diuerses Confessions de Foy, que ie viens de citer. Doncques ny iamais diuisée.





DE L'VNITE' DE L'EGLISE ROMAINE,
& Multiplicité de la Pretenduë Reformée
touchant leur Autheur.

CHAPITRE II.

C'Està presupolé, comme vne verité de Foy, Que
la *vraye* Eglise est souuerainement *Vne*, voyons
maintenant, s'il vous plait, qu'elle de nos deux
Eglises, la Romaine ou la Pretenduë Reformée a
toutes les Vnitez, que ie viens de remarquer en la
vraye Eglise. Quant à la premiere, ie veux dire l'*V-*
nité d'Autheur, il n'y a point de doute que la Romaine
ne l'ait avec toute la perfection que nous sçaurions
iamais desirer. En effet elle ne reconneust iamais
point d'autre Autheur, ou premier Fondateur que
IESVS CHRIST mesme. Ce qu'elle preuue par le fil
d'une deriuation & generation continuelle de ses
Enfans, & par la suite non interrōpuë de ses Eues-
ques, depuis le mesme Seigneur iusqu'à nous. *Jamais*
le peuple Catholique n'a receu son nom de ses Euesques (dit
S. Athanase Serm. 2. *contra Arianos*) *mais du Seigneur,*
auquel elle a creu. Point d'eclipse, point de parenthe-
se, point de diuision actuelle & formelle en sa durée
visible, depuis son premier establissement. Elle ne
fait aussi qu'une seule chaine d'Enseignans & d'En-
seignez, de Docteurs & de Disciples, de Bergers &

de Brebis ; Dequoy toutes les Histoires rendent fidelletémoignage auiourd'huy.


La vostre Reformée par pretétion, peu soigneuse de cette premiere Vnité, tire son origine d'autât d'heretiques qu'elle a des Dogmes opposez & cōtraires à ceux que la Romaine enseigne. Et de fait iusqu'aux enfans mesme, sçauent auiourdhuy cōme sa Doctri- ne n'est rien qu'un assemblage, & qu'un pot pourry des Erreurs qui ont trauaillé l'Eglise de Dieu, depuis son Berceau. Cerdon & Marcion, qui empestoient le monde au deuxiême Siecle, & Manes au troisiême, combattoient cōme vous, *la Saincteté de Dieu*, pre- chans tout haut qu'il est *Authéur du peché*. les Gno- stiques au second Siecle, les Arriens au quatriême, & les Talmudistes au sixiême, combattoient com- me vous *la Sapienee de IESVS-CHRIST*, soustenant qu'il est en tant qu'homme ignorant. Cerinthus & Ebion au premier, & Heluidius & Iouinian au qua- triême cōbattoient comme vous *la perpetuelle Virgi- nité de sa Mere*. Manes au 3. Iulian l'Apostat & Eustha- tius au 4. avec Vigilance au 5. *l'Inuocation des Sainctz*. Nestorius au 5. & Clement l'Escossois au 8. *l'Autho- rité des Sainctz Peres*. Les Armeniens & Maccaire d'Antioche au 7. avec les Grecs au 9. *la Primauté de l'Euesque de Rome, sur tous les autres Euesques du monde*. Sabellius au 3. Donat. au 4. & Vigilance au 5. *l'Estat Monachal & Religieux*. Simon Magus au 1. Manes au 3. & Mahomet *la Croix & le signe d'icelle* : Ce mel- me Iulian, & Pierre d'Apamée au 6. Mahomet & les

Iconoclastes , qui viuoient au 8. *les Images de IESVS-CHRIST, de la Vierge & des Saincts.* Manes, Eusthatius & Vigilance , *les Sainctes Reliques.* Donat , les Henriens & Vaudois , qui viuoient au 12. *les Chants Ecclesiastiques.* Manes & les Vaudois *les Festes & Solemnitez.* Les Bongomilhes au 12. *la Repetition de mesme Oraison.* Les Eustathiens , Arriens , Messaliens & Iouinianistes , qui subsistoient au 4. *les Ieusnes.* Les Albanois au 8. & les Grecs au 9. *attaquoyent la restitution des Vsures.* Simon Ebion , les Messaliens , les Manichéens , les Iouinianistes , & les Vaudois , *le Celibat des Prestres.* Les Nicolaïtes au 1. & Mahomet au 7. *la possibilité de se contenir.* Les Ptolomaites au 2. & les Simachians au 3. *la possibilité de garder la Loy de Dieu.* Les Simonians, Ebionites , Eunomians , qui infectoient l'air au 4. & les Predestinez au 5. avec les Begards au 14. *la nécessité des bonnes œures.* Les Vaudois au 12. & les Flagellans au 13. *les Benedictions Ecclesiastiques.* Les Armeniens, Albanois & Photius qui viuoit au 9. *le Purgatoire.* Judas Iscariot , & Simon au 1. & les Vaudois au 12. *la verité des Miracles.* Cerinthus, Manes, les Messaliens , Pelagiens & Albanois, *la nécessité du Baptesme.* Les Vaudois *le Sacrement de Confirmation.* Les Iacobites au 6. les Albanois, les Vaudois & Albigeois, *la Confession Sacerdotale ou Sacramentelle.* Nouatian au 3. & Ascesius au 4. *les Clefs pour la remission des pechez.* Les Vaudois, *les Indulgences.* Judas , Mahomet , les Armeniens, avec les Albanois, & Berangier, qui viuoit

au 11. siecle, la Realité Eucharistique. Les Acephalés au 5. la Hierarchie Ecclesiastique par le moyen de l'egalité des Pasteurs, qu'ils preschoient. Les Albanois & Vaudois, le Sacrement d'Extreme Onction, & les Arméniens, le Sacrement de Mariage. Qui font les principales Erreurs dont vous avez fagoté vostre nouvelle Reformation, les Auteurs desquelles ont esté condamnez vniuersellement comme Heretiques de tous les Conciles, Peres, & Docteurs, & de tous les Chrestiens, qui sont venus apres eux, voire de vous mesmes.

Et quand par supposition, vostre Pretenduë Reformation ne seroit souillée d'aucune Erreur, elle ne pourroit point toutesfois se louer avec verité d'auoir pour vnique Auteur & Fondateur IESVS-CHRIST, attendu la discontinuation de mille ans en sa durée visible; laquelle vous-mesmes nous estes venus chanter: Car comme le mouuement discontinué ne peut iamais estre le mesme mouuement, selon la Maxime de Philosophie, *motus discontinuatus non est idem numero motus*, non plus que la ligne coupée en deux, ne peut estre la mesme ligne. Ainsi l'Eglise notoirement interrompuë, telle que vous accordez estre la vostre, ne peut iamais estre la mesme Eglise en nombre, comme vous l'entendez tres-bien, si la passion ne vous priue de iugement.





DE L'VNITE' DE L'EGLISE ROMAINE,
& Multiplicité de la Pretenduë Reformée,
touchant leur Chef visible.

CHAPITRE III.

Quant à la deuxième Vnité, ie veux dire celle du Chef visible, ministeriel & instrumentel, (qui est essentiellement differant de l'inuisible & principal IESVS-CHRIST,) il appert que l'Eglise Romaine se peut sans vanité vanter de Pauoir, puis qu'elle n'a iamais recogneu comme tel en terre, aucun autre que le seul Euesque de Rome (i'entends de Chef visible, Souuerain & Supreme, dont il est question à present.) l'appelle en preuue de cette verité le frequent & continuel recours, que tous les Catholiques des quatre Parties du monde, grands & petits, doctes & ignorants, ont tousiours eu, & ont encore aujourd'huy à luy, en affaires spirituelles de quelque importance. Le Gouvernemēt Monarchique, qu'elle a tousiours retenu, tant pour respondre à celuy d'un Royaume, d'une Armée, d'une Maison, d'un Nauire, d'un Parc, où il n'y a qu'un seul Chef, (ausquels IESVS-CHRIST compare son Eglise en plusieurs lieux du Texte Sacré) que pour se conformer à celuy de la Synagogue (sa figure) ou plustost à celuy de l'Eglise Triomphante (sa realité;)

Ce gouvernement disie, en est vn autre preuue inuincible à chacun.

La vostre Pretenduë Reformée au contraire, recognoit tout autant de Chefs visibles Souuerains aux choses Spirituelles en terre, qu'il y a des Princes Souuerains Temporels, qui la professent & protegent aujourd'huy, excepté en Boheme, en Hongrie, & en France, ou vous estes encore en pire estat; comme nous allons dire tout maintenant.

Vous n'oseriez pas nier à mon advis; 1. Que le Serenissime Roy d'Angleterre ne contraigne & force ouuertement ses Sujets à le recognoistre, comme Souuerain & suprême, aussi bien au Spirituel qu'au temporel dans tous ses Estats, & comme vn autre Melchisedech, grand Prestre & grand Roy tout ensemble; Se preualant de la pretenduë puissance que vos Confreres luy ont donnée, tant pour le separer pour iamais de l'obeissance, qu'il doit comme Chrestien au Pape, que pour l'interessier au soustien de leurs Heresies, & vnir en vne mesme Personne la puissance spirituelle & la temporelle, afin de faire subsister plus long temps ses Estats, Qui sont raisons, non du Ciel mais de la terre, non de l'esprit, mais de la chair.

2. Vous n'oseriez-pas non plus nier, ainsi que j'estime, Que les Estats d'Holande, Zelande & Friesland, ne donnent en Souuerains spirituels, & la Foy & la Loy qu'ils agrément dauantage à leurs pauures Ministres: Celà est euident aux Ordonnances par eux faites

faites à Vtrecht le 24. Aoust 1612. dans l'une d'elles ils veulent, Que les grandes difficultez, dont leurs Ministres ne pourroient tomber d'accord entre eux, leur soient fidellement raportées, pour en iuger en dernier ressort.

3. Vous n'oseriez pas non plus nier, car la chose est trop manifeste, Que tous les Princes Allemans, qui ont embrassé l'Euangile de Luther, ou le vostre, ne se comportent comme Papes dans leurs Estats, selon cette Loy fondamentale d'Allemaigne; *Que leurs subjects doiuent ou fuir, ou suivre la Religion de leur Prince, & s'agit-il de la damnation eternelle.*

De laquelle Loy nous auons veu l'observation & la pratique, l'an 1625. en la ville de Marpurg en Hesse, où les subjects du Land graue de Darmstad, de Caluinistes qu'ils estoient, furent contraints d'embrasser à son exemple les erreurs de Luther. Iean Guillaume Duc de Saxe fit imprimer à Ienne l'an 1569. vn liure intitulé *la Reformation de la Religion, faite par Iean Guillaume Duc de Saxe*: où il dit, *Qu'en la puissance des clefs, que Dieu luy a baillées en main, il ordonne &c.* Le Duc Louys de Vvitemberg son voisin, vn autre intitulé, *l'Ordre que le Duc Louys de Vvitemberg, veut estre gardé pour la Religion dans ses Terres*, imprimé à Tubingue l'an 1588. Les Comtes Palatins du Rhein ont fait changer par quatre ou cinq fois de Religion à tous leurs subjects, selon qu'eux-mesmes l'ont fait les premiers. Et le Marquis de Brandebourg, qui soustient luy appartenir

de droict le soin de la premiere & seconde Table du Decalogue, voulut-il pas forger vne nouvelle Religion, l'an 1614. mitoyenne entre celles de Luther & de Calvin, contenant quatorze Chefs. Bref tous les autres Princes, voire-mesme les villes Imperiales & franchises, & iusques aux Bourgs Maistres d'Allemagne, ont fait imprimer chacun d'eux sa Confession de Foy, sa Discipline & son Droit Canon à part.

4. Vous n'oseriez pas encore nier, que les Magistrats des Suisses ne iugent également des affaires Ecclesiastiques & des Politiques, de l'Eglise & de l'Estat, depuis que Zuingle print le Conseil de Ville de Zuric pour Iuge de la Religion; & que les Seigneurs de Geneue ne croient d'auoir receu de Calvin, ainsi qu'apert en leurs Ordonnances de l'an 1562. le pouuoir & l'authorité de iuger definitiue-ment des differans, qui naistroient parmy leurs Ministres touchant la Foy, s'ils n'en peuuent demeurer d'accord entr'eux: Et de fait, ils le pratiquent ainsi tous les iours. Touchant le petit Sedan, combien de fois a il esté sur le point de declarer à l'imitation de ses voisins, le feu Duc de Bouillon Patriarche, & peut estre Pape dans son Distroit & Iurisdiction, depuis qu'il a demembré les Eglises, des vostres de France?

5. Pour vous; celuy qui est Seigneur de Fief (dit le Sieur de Remond liure 8. ch. 7. de la Naissance de l'Herésie) s'il pense auoir la suffisance & la

capacité, peut à l'exemple de George d'Enhalt, petit Prince Allemand prescher en personne ses subjects sans mandier l'authorité d'autre que de soy-mesme. Ainsi, (dit le mesme Autheur) en ont vsé le Sieur de la Cotondiere pres Falaise, & le Sieur de Rothes pres Condé sur Noireau, le tout selon la Doctrine de Luther, Calvin, & Beze, qui pour contrecarrer l'Eglise Romaine, ont actuellement transporté leurs pretenduës Souuerainetez spirituelles aux Souuerains temporels. Luther fit tout ce qu'il peut, à ce que l'Empereur conuoquat le Concile & y presidat, parce, (disoit-il) *que l'Eglise luy est commise de Dieu.* Calvin escriuit au Roy François premier en l'Epitre Dedicatoire de son *Institution*, comme à son Iuge souuerain au fait de la Religion. Beze s'offrit de prendre au Colloque de Poissi Charles IX. âgé seulement de quinze ans, le Roy de Nauarre, Pere du Grand Henry, & la Royne Catherine de Medicis pour Iuges souuerains des matieres de la Foy, dont il estoit question pour lors. Vous n'oseriez pas nous disputer ces indubitables & toutes manifestes veritez: car nous en auons les preuues formelles en main, en cas de besoin.

6. Vous estes encore en pire estat, que tout ce que ie viens de dire, puis qu'aucun de vous ne reçoit comme Chef & Superieur spirituel sur soy, que soy-mesme. De là vient, que vous ne reconnoissez parmy vous aucune Superiorité spirituelle iusqu'à la consciēce, ainsi que ie vous preuerois par Vitacher

Sibrandus, Gesnerus, les plus graues d'entre vos Autheurs, & par toute autre sorte de preuues, si ie doutois que vous en voulussiez encore douter. Mais comment en douteriez vous, si l'article 14. du chap. premier de vostre Discipline defend tres estroitement aux Ministres, de prendre ny pretendre aucune Superiorité l'vn sur l'autre; & qu'en l'art. 16. du mesme chap. elle excommunie & anathematise le nom mesme de Superintendance & de Superiorité spirituelle.

Mais qui oseroit se vanter d'estre le Chef visible d'une Eglise essentiellement Acephale, telle qu'est la vostre Gallicane, toute anarchie & confusion (fols en feste, & rats en paille) puis qu'aucun de vous ne reconnoit en qualité de Souuerain spirituel, sur soy, que soy-mesme. Je sçay bien qu'il y a par fois des Presidences ou Moderations de trois ou quatre iours parmy vous, (que vous appelez d'un mot plus doux, Conduites.) Mais outre qu'elles sont comme les festes des fols, lesquelles passent & le fou reste, que les Presidences, Moderations ou Conduites s'en vont, & le pauvre Ministre demeure le mesme qu'auparauant, elles ne passent point iusques à la conscience, Vous estant permis à tous tant que vous estes, de croire tout ce que bon vous semble, de ce qu'on vous presche, afin de pouuoir à iuste titre vous dire vrayement libres, ou plustost *Libertins.*



DE L'VNITE' DE L'EGLISE ROMAINE,
& Multiplicité de la Pretenduë Reformée,
touchant leurs membres en un corps.

CHAPITRE IV.

L'Eglise Romaine n'est pas seulement Vne
d'Autheur & de Chef visible, supreme, ainsi
que ie viens de monstrier à l'œil, elle l'est encore de
corps, tous ses membres ensemble ne faisant qu'un
seul & mesme corps avec leur Chef. Il est vray,
Tous ses Euesques & Sujets n'aspirent & ne respi-
rent qu'apres l'vnité d'un seul & mesme corps, &
d'un seul & mesme nom, quoy qu'espars de demeu-
re & de residence par tout l'Vniuers. Et il ne faut
point d'autre preuue en cecy, que le nom de Catho-
lique qui luy est tousiours demeuré sans dispute, &
l'experience de quinze siecles entiers en tous les
Conciles vniuersels.

Mais pour vostre pretenduë Eglise, vous n'igno-
rez pas ses diuerses appellations. Vous n'ignorez
pas (laissant à part les titres de Lutheriens, Calui-
nistes, Protestans, Pretendus, Gueux, Hugueuots,
Frelots, Parpaillots, & autres, dont on vous quali-
fie aujourd'huy en diuers endroits de l'Europe) que
vous ne soyez distinguez des Catholiques par le ti-
tre d'Euangeliques en Allemaigne, par celuy de

Puritains en Angleterre, d'Orthodoxes en Flandres, & Pais bas, de Reformez en France, & de plusieurs autres titres ailleurs, comme de Spirituels, de Biblistes, Scripturaires, Paulins, Pacifiques &c.

Vous n'ignorez pas encor, que vous ne soyez diuisez en autant de corps d'Eglise, que vous habitez de diuerses Nations ou Prouinces: Chaque Nation ou Prouince de celles que vous habitez faisant son corps d'Eglise à part.

Ie laisse que les Lutheriens sont diuisez aujour-d'huy en treize diuerses Bandes, comme vous scauez, & les Anabaptistes en quatorze, pour vous reprocher avec verité, comme Vous seuls, qui vous croyez la fine fleur & la Chresme de la reformation, faites autant de diuers corps d'Eglise, que vous habitez de diuers Estats. Chaque Estat, où vous habitez, ayant sa Confession de Foy, & sa Discipline à part. Les Royaumes d'Angleterre, d'Escosse, d'Irlande, de Boheme, d'Hongrie, de Pologne, de Danemarc & de Suede ont chacun d'eux sa Confession de Foy, sa Discipline & son Droit Canon à part. Les Prouinces vnies du Pais bas en ont desia quatre ou cinq toutes diuerses à part. Quelques contrées d'Allemagne ont encore chacune la sienne à part, le Palatinat encore la sienne à part, les Suisses ont encore la leur à part: Et pour finir par où ie deuois commencer, vostre Mere grand Geneue a encore la sienne à part; telmoïn Chamier, qui sommé plusieurs fois par le R. P. Jacques Gautier en la

Conferance qu'il eut avec luy à Allan proche le Montelimar de respondre s'il estoit associe à la Religion de Calvin, Beze & Geneue, ne voulut iamais l'accorder, quelque instance que ledit Pere luy en sceut faire.


Pour Vous, qui viuez dans la France, vous auez encore la vostre à part. Toutes lesquelles Confessions vous auez fait imprimer l'an 1612. ensemble avec celle de Saxe, de Vvitemberg & Magdebourg en vn gros Volume sous ce titre, *Harmonie des Confessions*, pour nous faire accroire, si vous le pouuiez, que vous estes bien d'accord entre vous; De quoy i'en fay iuge les liures que vous escriuez les vns contre les autres, presque tous les iours, avec ce que ie m'en vay produire au chapitre suiuant.

Mais de grace, où sont les Conciles Generaux ou Vniuersels, que vous conuoquates iamais, depuis vostre sortie de l'Eglise inuisible, auxquels toutes ces diuerses Nations se soient rencontrées? Nommez nous en vn tout seul, ie vous prie. Je sçay bien que vous auez fait au dela de vostre possible diuerses fois, pour tomber d'accord des differens, qui deschirent honteusement vostre pretenduë Reformation, afin de vous disposer à la celebration de quelque Concile General parmy vous: Et comme vous vous estes assemblez à cet effet à Constance l'an 1534. à Vvitemberg l'an 1536. à Berne l'an 1554. à Alberstad l'an 1562. à Malbrun l'an 1564. à Montbelliard l'an 1586. & ailleurs fort souuent selon

Geneb. in Paulo 3. Mais ie sçay bien aussi, que vous en estes tousiours sortis plus confus, plus diuisez & plus aliennez, iusques à vous excommunier & maudire les vns les autres. Ie sçay bien encore que les Ministres de vostre Synode de Gap de l'an 1603. ne pouuant supporter les reproches que nous vous faisons d'ordinaire sur vos sanglantes diuisions & cruelles execrations des vns contre les autres, conclud au chap. 5. *Des faits generaux*, d'escire à toutes les diuerses Sectes d'Allemaigne, d'Angleterre, d'Escosse, du Pais bas, de Suisse, & de Geneue; mesme de chercher le moyen de vous vnir tous au plustost en mesme creance, afin de venir plustost, & plus aisement à bout du Pontife Romain, vostre commun ennemi. Conclusion que le sieur du Plessis a souuent remise deuant les yeux à plusieurs de vos Synodes tenus apres. Mais ie sçay bien aussi que la pluspart se sont à iuste raison mocquez de vous, en ce que les sollicitans à la paix, vous ne la sçauiez ny treuuer, ny conseruer parmy vous.

Pour le Synode de Dordreth (où le Roy empescha vos Ministres François de se treuuer, commandant aux Seigneurs de Geneue d'arrester ceux qui s'y en alloient) outre qu'il n'est pas general, les conuoquez n'y sont tombez d'accord que sur quelques points, touchant la Predestination seulement, demeurant diuisez en tout le reste beaucoup plus qu' auparauant: Car c'est l'ordinaire de vos Synodes, que pensant arracher vne erreur, ils en plantent plusieurs

plusieurs pires que celles-là dans les Esprits, & pensant fermer vn trou ils en font quatre, comme l'expérience l'a fait voir à l'œil iusques à present.



DE L'VNITE DE L'EGLISE ROMAINE,
& Multiplicité de la Pretendue Reformée,
touchant leur Creance.

CHAPITRE V.

Touchant la quatrième *Vnité*, l'Eglise Romaine est *Vne de Foy & de Creance*; Tous ses enfans n'ayant, quoy qu'esendus par tout le rond de la Terre aujourd'huy, que les mesmes Principes de Foy, non seulement quant à la lettre, mais encore quant à l'explication & application de la lettre. Je veux dire, que les Catholiques ne s'accordent pas seulement à tenir la mesme Escriture Sainte, les mesmes Traditions, les mesmes Canons des Conciles & Decrets des Papes, les mesmes Resolutions vniuerselles chez les Peres & Docteurs, mais encore à tenir la mesme Version de cette Escriture, & le mesme Sens litteral qu'elle demande, pour conseruer l'Vnité de la Foy; voire qui plus est, la mesme pratique ordinaire de tous les autres Principes de Foy.

Il est vray, ils ne sont pas seulement d'accord du

nombre des Liures de l'Escriture Sainte, du nombre des Traditions Diuines, Apostoliques & Ecclesiastiques, du nombre des Conciles Generaux, & des Canons contenus en iceux, du nombre des Decrets des Papes, & du nombre des Resolutions des Docteurs approuuez touchant la Foy: Mais encore de la Version de la mesme Escriture, & de l'explication & application de tous ces Principes de Foy, lors qu'il s'agist de conseruer l'vnion de la Foy. Car pour les Controuerses purement scholastiques, qu'on agite aucunes fois avec tant de chaleur parmy nous (lesquelles du Moulin nous reproche sans entendre ce qu'il dit) elles ne nous diuiserent iamais ny en la Foy, ny en la Charité, ny en la Communion externe: Elles ne touchent point en sorte quelconque aussi, ny la Foy ny les bonnes mœurs.

Et de fait, Il n'y a Docteur, quelque fameux & celebre qu'il soit chez nous, qui ne soit tres prest & tres appareillé de mettre la plume bas, voire de la tourner contre soy-mesme, c'est à dire, contre son iugement propre, lors & quand le Pape ou le Concile diront autrement que luy. Tout ce dequoy on dispute aujourd'huy parmy nous, soit de viue voix, soit par escrit, ne sont que Questions metaphysiques, propres pour exercer les beaux Esprits, ou si vous voulez Propositions problematiques, l'Affirmatiue ou Negatiue desquelles il est permis à chacun de tenir, pour n'auoir iamais encore esté décidées & resoluës en Article de Foy par l'Eglise, ou

son Chef le Pape, ou par quelque Concile sous l'authorité du Pape: Et chercher de diuision en la Foy parmy nous, comme fait ignoramment du Moulin, c'est chercher des nœuds dans vn iong, & d'humilité dans l'esprit d'vn Ministre, puis que nous nous soumettons tous tant que nous sommes, au Iugement de l'Eglise sur quelque subiect ou matiere de la Foy, qui puisse tomber en dispute chez nous.

Mais pour vostre Pretenduë Reformée, elle n'est pas Vne de Foy, ny quant à la lettre, ny quant à l'explication ou application de la lettre. Non quant à la lettre, car plusieurs d'entre vous reçoient des Liures de l'Escriture Saincte & des Traditions, que les autres rejettent tout à fait, ainsi que ie diray à l'entrée du chapitre suiuant, quoy que vous le scachiez beaucoup mieux que moy: Aucuns rejettent tout à fait les Conciles & les Peres, cōme les Lutheriens; autres reçoient vniuersellement tous ceux des cinq premiers Siecles, comme les Anglois; autres en reçoient vne partie comme les Holandois & Provinces vnies. Vous en receuez vn autre en l'article 6. de vostre Confession de Foy, &c.

Elle n'est non plus Vne quant à l'explication & application de la lettre: Et de fait, vous ne pouuez pas nier, sans perdre le front; Premièrement, que vous n'ayez desia septante ou quatre vings diuerses Versions de l'Escriture Saincte, chacune desquelles condamne tacitement toutes les autres au feu; Secondement, que chacun de vous ne baille son di-

uers sens litteral aux Textes, que vous faites semblant de receuoir vniuersellement, également & en commun, & ne les expose conformement aux humeurs de son particulier Sainct Esprit; car personne de vous ne veut ployer, non pas mesme à son Ministre, non pas mesme à son Consistoire, non pas mesmes aux Synodes plus fameux.

Je m'en raporte aux treize diuerses Sectes des Lutheriens, aux quatorze diuerses des Anabaptistes, qui subsistent encore aujourd'huy dans l'Allemagne, Hongrie, & Poloigne; & sur tout aux douze ou treize diuerses Confessions de Foy, que vous seuls Calvinistes professez en diuers endroits de l'Europe; Chasque Estat de ceux que vous habitez ayant la sienne à part, ainsi que ie viens de toucher, voire chasque Eglise & tantost chasque Maison, si vous n'y pourroyez. Ce que i'infere necessairement de ce que plusieurs des vostres, m'ayant autres fois nié des manifestes Propositions, m'enquerant d'eux s'ils ne s'arresteroient pas à leur Ministre, en cas qu'il osat le porter pour Iuge de nostre differant, ce qui n'arriue presque iamais; Nullement me respondoient ils; A qui donc leur demandois ie? A l'Escriture Saincte, me repartoyent ils. Mais qui iugera que les passages de l'Escriture Saincte, dont nous ferons en dispute, veüillent dire ce que vous me direz, Moy-mesme avec l'ayde du Sainct Esprit, me repliquoyent ils: Mais quel tesmoignage inuincible me fournirez vous, pour me faire accroire que le

Sainct Esprit vous aura suggeré l'explication que vous me donnerez des mesmes passages cōtentieux: Car personne ne peut authentiquement tesmoigner de foy-mesme, comme dit fort bien IESVS-CHRIST en Sainct Iean ch. 5. v. 31. parlant de vous & de nous. *Si ie porte tesmoignage de moy, mon tesmoignage n'est point vray. (Muli pisces) Silence.*

Que si plusieurs d'entre vous conuiennent encore exterieurement en mesme Creance & Doctrine, c'est, ou parce qu'ils ne sçauroient rien inuenter de leur teste, & moins soustenir ce qu'ils auroient inuenté, ou parce que les Princes des Estats, que vous habitez, s'opposent d'ordinaire à la multiplication des Sectes & Religions en iceux, comme vous sçaez. Mais qui n'establiroit vne Religion selon son humeur, s'estimant entierement independant de tout autre, & veritablement dispensé de croire & de tenir en conscience la Doctrine que bon luy sembleroit (comme on professe tacitement en vostre Reformation) s'il auoit Pesprit & la suffisance de Pinuenter, de la debiter, & de la deffendre, & la permission de la prescher publiquement aux autres. Je m'en raporte aux cinq ou six Forcenés, qui ces années dernieres ont fait diuers Schismes dans vostre Schisme en Holande & Prouinces vnies.





DISSENTIONS DES PRETENDVS
Reformez en matiere de Foy.

CHAPITRE VI.

ET parce que cette Vnité de Foy, me semble la plus importante de toutes les Vnitez dont l'Eglise de Dieu doiue sainctement se glorifier, il est à propos de voir plus au long quels vous estes, touchant icelle: A cet effet, tenant l'ordre des articles de vostre Confession de Foy Gallicane, nous tacherons de vous faire voir succinctement icy, comme il y en a fort peu, dont vous soyez entierement d'accord avec tous vos Confreres Reformez. Et pour commencer.

1. La Secte de Conrad Vorstius, successeur d'Arminius en la premiere chaire de Professeur & de Ministre à Leyden en Hollande, vous contredit formellement le premier, niant haut & clair la Simplicité, Eternité, Immensité, Immutabilité & Infinité de Dieu, lesquelles vous y confessez en termes formels,

2. Les Lutheriens vous disputent le troisiéme, qui est des Liures sacrez. Car comme vous sçauéz, ils rejettent le liure de Job, l'Ecclesiaste, l'Epistre aux Hebreux, celle de Sainct Iacques, la 2. de S. Pierre, la 2. & 3. de Sainct Iean, celle de Sainct Iude &

l'Apocalypse, que vous y receués, comme Liures appartenans au Canon des Escritures Sainctes.

3. Les Estats de Holande tenus l'an 1612. à Vtrech. vous ont renuersé de fonds en comble le quatrième, où vous promettez le S. Esprit à chacun des vostres en particulier, pour dicerner & connoistre clairement les mesmes Liures sacrez, & tacitement toutes les veritez de la Foy: Car, comme vous sçauiez, ils s'y sont reseruez à eux seuls, priuatiement à tout autre, la resolution des Questions & Controuerses plus difficiles touchant la Foy. Signe euident qu'elle n'appartient point à chacun des vostres, comme vous dites en cet article.

4. Le Serenissime Roy de la Grand' Bretaigne vous nie tout à fait le cinquième, où vous établissez l'Escriture Saincte, l'vnique Reigle & le seul Iuge des Controuerses de la mesme Foy, puis qu'il reçoit au commencement de sa Meditation sur l'Oraison Dominicale, & en plusieurs autres lieux de ses Escrits, les Peres des cinq premiers siecles, comme Iuges des Controuerses de la mesme Foy, ainsi que vous sçauiez.

5. Le Ministre du Moulin vous bouleuerse entierement le septième, où vous enseignez que le Diable s'est corrompu par sa propre malice; car il escrit (apres Mannes) en son Bouclier de la Foy page 112. tout le contraire, sçauoir est, qu'il est naturellement mauuais, c'est à dire, qu'il a esté crée de Dieu mauuais & tel qu'il est à present.

6. Melancton en ses lieux communs de l'an 1555. avec les Adiaphoristes sortis de luy, & le susdit Serenissime Roy, en la mesme Meditation p. 40. & 46. (asseurant en icelle que plusieurs se bandent les yeux à escient & refusent la clarté, en laquelle ils pourroient viure) vous contredisent apertement le neufuième, où vous ne reconnoissez plus de Franc arbitre à l'homme depuis la cheute d'Adam.

7. Le mesme Roy en la mesme Meditation pag. 23. (chargeant d'un blasphème detestable ceux qui enseignent que IESVS-CHRIST nous a donnez des preceptes impossibles à garder) & M. Pierre du Moulin en sa Responce au 23. art. du R. P. Cotton, que vous trouuerez à la fin de son Bouclier de la Foy, vous combattent à descouuert l'onzième, où vous dites, Que l'observation de la Loy de Dieu, vous est tout à fait impossible, voire mesme avec la grace, selon le Catechisme des Enfans, & que vous ne produisez d'ordinaire que fruiets de rebellion & de malice.

8. Le mesme Roy en la mesme Meditation, expliquant la derniere Demande de l'Oraison Dominicale (suiuy d'Arminius premier Professeur & Ministre à Leyden) attaque visiblement le deuxième, où vous dites tacitemēt, Que Dieu damne les hommes sans auoir aucun égard à leurs demerites, & sur tout le dernier, qui appelle Turcisme, voire Atheisme cette belle Doctrine.

9. Piscator & Tilenus vous controuersent à

pleine bouche, & Peyrol avec quelques autres Ministres François entre les dents, le 17. & le 18. où vous parlez en aveugles de la Justification des pecheurs en Christ, l'appellant imputative, au lieu de l'appeller infuse, intrinseque & formelle avec l'Apostre aux Romains 5. Je m'en rapporte au liure de Tilenus, intitulé *Examen Dogm. P. Molinæi.*

10. Les Sectes Lutheriennes, qui preschent l'absoluë necessité du Baptesme comme nous, & P. du Moulin en sa Responce en l'art. 11. du R.P. Cotton, que vous trouuerez encore à la fin de son Bouclier de la Foy, assaillent rudement la vingtième, où vous établissez la Justification sur la seule Foy, à l'exclusion mesme du Baptesme.

11. Luther, & le mesme Serenissime Roy d'Angleterre s'opposent fort & ferme au vingt-vnième, puis qu'ils veulent que la Foy se puisse perdre, voire qu'elle se perde tout à fait selon le premier par vn seul peché mortel, contre ce que vous enseignez en cet article. Voyez le deuxième en la susdite Meditation.

12. Les Majoristes, Secte de George Major, & les Adiaphoristes, issus de Philippe Melancton, condamnent comme Heresie le vingt-deuxième, où vous exclués de la Justification les bonnes œuures. Car ils les reçoient comme absoluëment necessaires à nostre Justification, voire mesme à celle des petits enfans, selon les premiers.

13. Plusieurs de vos Confreres se bandent con-

tre le vingt-quatrième, où vous cassez, *Primò*. L'Inuocation des Saints. 2. le Purgatoire. 3. les Ieusnes Ecclesiastiques. 4. les Festes; & finalement la Confession auriculaire. Luther se bande contre le premier chef, ainsi qu'apert en l'Oraison funebre, qu'il fit sur la mort de Iean Duc de Saxe, suiuy d'Oecolampade selon Surius en l'an 1534. Le mesme Luther se bande encore contre le deuxième en plusieurs parts de ses escrits. Les Anglois & Holandois qui preschent & pratiquent annuellement diuers Ieusnes apres Pasques & autres temps determinez, contre le troisième. Les Lutheriens, les Picards, les Anglois & les Holandois, qui tous solemnisent plusieurs Festes hors le Sainct Dimanche, contre le quatrième. Et les mesmes Lutheriens & Anglois qui se confessent au Ministre, comme nous au Prestre, contre le cinquième & dernier.

14. Vous mesme destruisiez le vingt-cinquième article, où vous dites que l'Eglise ne peut consister sans Pasteurs & Predicateurs, lors que vous preschez Qu'elle a esté durât mille ans entiers inuisible, c'est à dire, qu'elle a esté sans Pasteurs & Predicateurs, d'autant que les vrays Pasteurs & Predicateurs doiuent estre visibles, & veus & ouys de leurs sujets. En quoy vous verifiez merueilleusement bien le 13. v. du Psalme 26. *Que l'iniquité a menty à soy-mesme.*

15. L'Eglise d'Angleterre vostre bonne Sœur, vous sappe rudement le 29. où vous bastifiez vostre

chetifue Hierarchie de seuls Ministres, Surueillans & Diacres, en ce qu'elle excommunie au Synode de Londres de l'an 1603. tous ceux qui condamnent la sienne, presque pareille à la nostre, comme vous sçavez fort bien.

16. La mesme Eglise condamne au mesme Synode le 30. où vous établissez l'égalité des Pasteurs parmy vous: Car elle admet & reçoit l'Estat Monarchique spirituel, composé comme vous sçavez de Primats, Archeuesques, Euesques, Doyens, Archidiares, Chanoines & simples Ministres sous la Souueraineté spirituelle & Papale du Serenissime Roy d'Angleterre.

17. Toutes les Confessions Reformées, que ie viens de vous alleguer à l'entrée de cet Escrit, croissent de faux aux articles y cotez le trente-vnième de la vostre, où vous dites que l'Estat de l'Eglise a esté interrompu, lors qu'elles enseignent ouuertement, que l'Eglise fut & sera tousiours visible au monde.

18. Luther & Melancton, qui reçoient la Penitence, celuy-là en sa Captiuité babylonique, & cettuy-cy en ses Lieux communs de l'an 1555. Le mesme Melancton & Zuingle, qui reçoient le mariage, celuy-là au liu. *De Libero Arbit. contra Albertum Pighium*, & cettuy-cy en son Sermon du Mariage; les Theologiens de Lypse, qui reçoient la Penitence: Les Theologiens de Vvitemberg, qui reçoient l'Ordre, & Pierre du Moulin, qui s'offre de le recevoir en la

pag. 60. de la 2. partie de son Bouclier de la Foy, comme vray & formel Sacrement de l'Eglise, mettent à l'enuers & des pieds en l'air le 25. où vous reformez les sept Sacremens de l'Eglise à deux seulement, au Baptesme & à la Cene.

19. Tous les autres Calvinistes du monde reformé (les Polonois exceptez) sont prests de croiser de faux le 26. & le 27. où vous croyez de receuoir reellement & substantiellement le Corps & le Sang de IESVS-CHRIST, au point que vous faites vostre Cene. Car comme vous sçauiez tres-bien, ils tiennent, que croire nuëment en Christ, c'est le manger. Du Moulin mesme vfa toute sa pauvre Rhetorique, & pensa perdre la ceruelle au Synode de Gap, pour faire rayer ce mot de *Substance* dans vostre Confession, & dans vostre Catechisme, alleguant, Qu'il ne se trouue en aucune autre Confession de Foy reformée du monde, destruit la Creance de vos Eglises de France, & fauorise la Doctrine de la Transubstantiation. Ainsi l'asseurent les Sieurs Ieremie Ferrier en son *Antechrist*, & Barbier en sa *Ministrographie*.

20. Vos Deputez de l'Assemblée de Nismes de l'an 1615. qui s'vnirent avec Monseigneur le Prince de Condé au Camp de Sansay en Poictou, pour faire passer en article de Foy dans les Estats, le premier article du Tiers Estat; *Que personne ne peut dispenser les subjects du Roy du serment de fidelité; & sur tout du Moulin en la page 252. de son Bouclier de la Foy, choquent furieusement le 40. où vous n'entendez*


d'obeyr aux Roys, que sous vn, *Moyenant*, de pair à pair: *Moyenant* (dites-vous) que l'Empire de Dieu demeure en son entier. Paroles, sous lesquelles vous entendez ordinairement vos Interests, que vous appelez sacrilegement *Empire de Dieu*; conformément au Synode des Ministres tenu à Berne l'an 1572. où fut decretté, que vous n'obeyriez point aux Roys, si les mesmes Roys n'obeyssioient tout premierement à Messieurs les Ministres. Qui est le Comentaire & l'explication de cet insolent *Moyenant*.

Pour le dernier, conclu au Synode de Gap de l'an 1603. auquel vous appelez le Pape Antechrist, il vous est contredit par l'Eglise Anglicane, & par toutes les autres Euangeliques & Reformées, qui reconnoissent leurs Souuerains temporels, comme Papes dans leurs Estats (qui ne sont pas en petit nombre) voire mesme par celle de Geneue vostre grand Mere: Car elle a souuent escrit à vos Synodes de France, qu'outre que cette Proposition estoit difficile à preuuer par l'Escriture Sainte, qu'il y auoit des raisons d'Estat, qui vous la deuoient faire supprimer, comme vous auez depuis sagement fait au Synode de la Rochelle de l'an 1607. Chamier mesme apres auoir parlé avec Henry le Grand, & le grand Cardinal du Perron à Paris, changea tellement d'opinion qu'il a dit souuent depuis à ses amis, qu'il n'auoit iamais creu cet article. En preuue de quoy traitant la Controuerse, *De Oecumenico Pontifice*, il auoit laissé à dessein celle de *Antichristo*. Du

Moulin, qui fut l'un des Cyclopes & forgerons du mesme article au mesme Synode de Gap, pour ne perdre pas les cinq cens escus, qu'il exige tous les ans de son Canoniat de Londres, a depuis escrit, qu'il ne faut point trop s'attacher à ces choses, c'est en la *Preface de l'accomplissement des Propheties*, c'est à dire, Qu'il ne faut rien croire de cet article.

Contradictions, qui font qu'à tous les Synodes, vos Ministres remettent cette Confession à la fournaise d'un nouveau Examen; Et Dieu sçait (dit un certain) si chacun s'efforce d'y faire valoir son particulier S. Esprit, afin d'obtenir la gloire d'auoir fait changer, adiouster ou diminuer quelque chose en icelle. A cause de quoy on peut, sans aucune iniure, appeller vostre Religion, non pas Religion Reformée, mais Religion à reformer; qui seroit un titre autant louable, si vos frequentes Reformations regardoient les mœurs, qu'il est honteux & vituperable regardant la Foy; laquelle, comme vous deuriez sçauoir, ne peut estre reformée non plus qu'estre deformée, puis que de sa nature elle est absolument indiuisible, & par consequent incapable de plus & de moins; ou saine au tout, ou veritablement morte au tout. Semblable en cecy aux deux autres Vertus Theologales, la premiere d'esquelles ne peut souffrir, que nous esperions ny plus ny moins, que ce qui est de son Object, ny la deuxieme permettre que nous aymions ny plus ny moins que ce qui est du sien. Semblable encore à l'honneur, qui ne peut

souffrir le moindre dechet sans perir : ie veux dire, que nous ne pouuons commettre ou obmettre vne seule chose ordonnée par les loys de l'honneur, sans perdre tout à fait l'honneur.



Suite des mesmes Dissentions.

CHAPITRE VII.

VOus n'ignorez-pas que les Lutheriens, vous appellent *Heretiques condemnez, Mahometans Demoniaques, vos Martyrs les Martyrs du Diable, & vostre Doctrine sacrilege execrable, abominable & Diabolique.* Vous n'ignorez-pas non plus que vos Eglises pour reuanche appellent les Lutheriens, *Antropophages, Bourreaux, Artolatres, ou Adorateurs du pain, Nestoriens, Eutichiens, & par fois pis que tout cela; Les Lutheriens & Calvinistes s'escriment à grosses iniures, en sorte que vous les prandries pour lauandieres qui disputent de quelque advantage au ruisseau, dit Surius à ce propos en l'an 1538. Je laisse à part les maledictions que vous vous entredonnez tous les iours, les vns aux autres en vos reciproques Excommunications. Ce que i'ay en partie aprins de la bouche d'un Seigneur Allemand dans Lyon, lequel aymoist beaucoup mieux aller prier dans nos Eglises, & y ouyr la*

Predication, que d'entendre seulement parler d'un Calviniste.

Les Luthero-Calvinistes & les Puritains d'Angleterre, se condamnent mutuellement tous les iours d'Herésie, ainsi qu'il est aisé de voir en la conference d'Haptamcour, voire s'excommunient comme Mammelus. Je m'en rapporte au Synode de Londres de l'an 1603.

Les Remonstrans & les Contre-Remonstrans du Pais bas, ou si vous aymez mieux les Arminiens & les Gomaristes se traictent avec pareille animosité. De quoy font foy les Esmotions & Tempestes, qu'ils ont suscitées ces années passées en Holande, Zelande & autres Prouinces vnies.

Vos Eglises de France & celles de Sedan, qui se sont diuisées depuis peu par les artifices du feu Duc de Bouillon (lequel aspiroit à la Primatie spirituelle de celles de Sedan) n'ont pas aprehendé de se charger d'erreur & d'herésie. Tilenus accuse du Moulin & tous ses Consors d'estre Eutychiens & Vbiquitaires en son liure intitulé *Examen Dogmat. P. Molinai.* Du Moulin au contraire accuse Tilenus d'estre Nestorien; Et leur animosité en est venuë iusques là, qu'on n'a iamais sceu les mettre d'accord & faire amis.

Demeurons dans les limites de vostre Reformation Gallicane. Le Synode de la Rochelle tenu l'an 1607. voyant que Chamier ne pouuoit acheuer la Refutation de Bellarmin, à laquelle il auoit trauaillé

18. ans, distribua les matieres de ce gros Dessin aux Prouinces, c'est à dire, aux principaux Ministres de France, croyant de voir plustost au iour cette pretenduë Refutation. Mais qu'arriua il de là? Rien autre que confusion & desordre: Car les Synodes suiuaus, ayant rassemblé les Escrits des vns & des autres en vn Volume, & treuant tant de contrarietez & de contradictions en iceux, il fut dit, qu'on rendroit à chacun son trauail, & qu'on differeroit l'execution de cette entreprise à vn autre temps, c'est à dire, à la venuë du vray Antechrist; Lequel pour autant qu'il doit estre homme sans comparaison plus sçauant que tous vos Ministres ensemble, & le principal deffenseur de vostre Foy Reformée, aydera grandement ceux qui viuront en ce temps là, pour venir à bout de ce labeur tant desiré.

Ce n'est pas tout, la pluspart d'entre vous, conduits par l'esprit vniuersel du Christianisme, ont horreur & fremissèr, quoy que crient & clabaudent Messieurs vos Ministres, lors qu'ils leur entendent prescher. 1. *Que Dieu est Autheur du peché.* 2. *Que IESVS-CHRIST s'est desesperé en l'arbre de la Saincte Croix.* 3. *Qu'il a esté damné quelque temps.* 4. *Que sa Saincte Mere a perdu sa Virginité en son enfancement.* 5. *Que l'homme est destitué tout à fait du Frac arbitre au bien surnaturel; Et finalement que les bonnes œures ne meritent du tout rien enuers Dieu, contre cet Axiome que vous-mesme auez si souuent en bouche, Qui bien fera, bien treuuera.*

Tout au contraire ils tiennent. *Que c'est tres-bien & tres-sainctement fait, de baptiser promptement les petits Enfans, qui se trouuent dans quelque peril de mort. 2. De s'abstenir de la chair aux Vendredys, en memoire de la Passion de nostre Sauueur IESVS-CHRIST. 3. D'observer les Fêtes de la Conception, Naissance, Circoncision, Apparition, Passion, Resurrection, & Ascension du mesme Sauueur. 4. De prier Dieu le matin, à midy & sur le soir, au son de la cloche: Et finalement, d'auoir des Croix & des images de IESVS-CHRIST, de la Vierge, des Apostres & autres grands Saincts avec honneur & respect.*


Il y a bien plus; C'est qu'il n'y a piece de vous, qui soit entierement d'accord avec soy-mesme: Ce que ie preuue de ce qu'il n'y a piece de vous qui osast condamner aucune des autres Sectes, avec lesquelles vous n'avez point de Communion ny de Communication: Car qu'est cela ie vous prie, qu'appreuer ouuertement diuerses Religions & Creances; & viure par consequent en discord chacun avec soy-mesme? De grace, où est cette Eglise, hors de laquelle on soit damné selon vostre belle Doctrine? Aucune. Or qu'est cela encore vne fois, qu'appreuer ouuertement diuerses & contraires Religions & Creances en mesme temps, & viure par consequent en discord chacun avec soy-mesme. Nottez ie vous supplie cecy.

Que quand par supposition vous seriez parfaitement vnis en Foy & Creance dans quelque Estat, ce que ie ne croy pas, en suite de ce que ie viens de di-

de la vraye Eglise.

SI

re; cela ne suffiroit pas, si quant & quant vous n'estes tous prests & resolus d'obeyr à la voix de vos Pasteurs, & de vous soumettre à leurs iugemens en matiere de Doctrine de Foy (ce qui n'est point en effet parmy vous.) D'autant que la mesme liberté de conscience ou plustost libertinage, qui vous a diuisez de l'Eglise Romaine, vous diuiseroit sans doute encore de la vostre Pretendue, pour faire comme l'on dit, chacun pot à part. Ce que vous avez esté souuent sur le point de faire; D'où ie vous supplie de conclurre avec moy la Multiplicité de vostre Creance, laquelle ie vous reproche icy.



*CONTRADICTIONS MANIFESTES,
dont chacun de ces Messieurs s'entretaille
presques en tous les principaux
Points de sa Creance.*

CHAPITRE VIII.

Lest vray, Messieurs. Vous n'estes pas seulement contraires les vns aux autres, vous l'estes encore chacun à soy-mesme. N'y ayant piece de vous, qui ne s'entretaille, s'entrecoupe, & se contredise presques en tous les principaux Chefs de sa Creance, tant la diuision & dissention vous sont propres &

naturelles. Marque infaillible, que vostre Doctrine n'est point de Dieu, mais du Pere de mensonge, dont le propre est de se dementir en la bouche de ses Disciples. Je voy bien qu'il me faut fournir des preuves de cette accusation, plus claires & plus resplendissantes que les rayons du Soleil mesme, si ie veux estre creu; Et c'est ce que ie me promets de faire icy, avec l'assistance du Ciel; au reste le plus succinctement qu'il me sera possible, me contentant à cette raison d'une douzaine de telles à cette heure.

Je dis donc, que chacun de vous se contredit en plusieurs Chefs de sa Creance, s'il professe ric à ric tout ce qui s'enseigne chez vous.

1. En ce que d'un costé, vous dites en vostre Confession de Foy article cinquiesme. Que l'Escriture Sainte est la seule Reigle de la Foy, parce qu'elle contient (dites vous) tout ce qui appartient à la Foy: Et de l'autre vous tenez comme veritez de Foy, tous les articles contenus dans la mesme Confession de Foy, encore que la plus part ne se treuuent point dans la mesme Escriture Sainte, ainsi qu'on vous a desia fait voir plusieurs fois. Qui est vne manifeste contradiction.

2. En ce qu'apres auoir admis dans l'article 6. de la mesme Confession, la Doctrine de S. Hilaire, de S. Athanase, de S. Ambroise, de S. Cyrille, vous rejetez generalement tous les Peres & Docteurs de l'Eglise; Ce que vous faites fort expressement en la Discipline c. 6. art. 4. deffendant qu'on donne au-

en un lieu à leurs Escrits, pour la decision de la Doctrine dans les Disputes reiglées. Qui est vne autre contradiction manifeste.

3. En ce que pour authoriser vostre Reformation pretenduë, vous soustenez d'un costé, que l'Eglise vniuerselle a erré, & peut encores errer: Et de l'autre, que la vostre particuliere n'a peu, ny ne peut point errer, encore qu'elle soit vn membre de l'Vniuerselle. Qui est vne autre manifeste contradiction. Car ce qui peut arriuer au Tout, peut bien encore arriuer à la Partie du Tout de mesme nature: selon l'Axiome de Philosophie; *Quod conuenit Toti, conuenit & Parti eiusdem nature.*

4. En ce que d'un costé vous dites Que l'Eglise de IESVS-CHRIST n'est composée que des Saints; & de l'autre: Que vous, qui la composez en partie (ainsi que vous dites) n'estes pas Saints, mais grands pecheurs & prophanes. Qui est encore dire choses contradictoires.

5. En ce que d'un costé vous admettez souuent des Superintendances & des Primautez, ainsi qu'apert en vostre Confession de Foy art. 32. Et de l'autre vous les rejettez tout à fait, ainsi qu'apert en la Discipline c. 1. art. 16. où vous excommuniez non seulement l'action, mais encore le nom de Superiorité & de Primatie. Qui est vous entretailer tout ouuertement.

6. En ce que d'un costé vous rejettez vniuersellement toutes les Ceremonies Ecclesiastiques,

ainsi qu'apert en la mesme Confession art. 23. Et de l'autre vous en admettez appreuuez & pratiquez quelques vnes, ainsi qu'apert en la Discipline c. 10, sous le titre, *d'Exercices Sacrez*. Qui est encore vous entretailer en effet.

7. En ce que d'un costé vous dites ouuertement de n'auoir aucun Franc-Arbitre au Bien surnaturel, c'est à dire, aux actions qui regardent le Salut; Et de l'autre, vous demandez à toute heure qu'on vous permette de professer la Foy & Religion Reformée, que vous estimez estre vn Bien surnaturel, & vne action laquelle regarde le Salut. Qui est encore vous dementir vous-mesmes apertement.

8. En ce que d'un costé vous dites: Que l'observation de la Loy de Dieu vous est absoluëment impossible, estans mesmes assistez de sa Grace; Et de l'autre, vous vous cholerez cõtre ceux qui vous prenans au mot, vous appellent des Rebelles, des Homicides, des Incontinans, des Calomniateurs & des Perfides. Qui est choquer imprudemment vostre Doctrine propre.

9. En ce que d'une part vous preschez tout haut, Que toutes vos meilleures œuures sont en effet peché, Et de l'autre vous dites hardiment. Que la Reformation que vous auez pretendu faire en l'Eglise, tant s'en faut qu'elle soit peché, qu'au contraire c'est vne œuure toute surnaturelle & diuine. Qui est *soufler le froid & le chaud de mesme bouche*.

10. En ce que d'un costé vous improuuez &

condamnez sans exception toutes les Images de IESVS-CHRIST. Apert en ce que vous les brisez, ou bruslez par tout où vous estes les Maistres. Et de l'autre vous les apprenez & reuerrez, apprenant & reuerant le pain de la Cene, qui n'est parmy vous, rien autre que l'Image & la Figure de IESVS-CHRIST, ainsi que vous-mesmes le dites à tout propos.

11. En ce que d'un costé vous improuuez comme nul, le Baptesme conferé par celuy qui n'a aucune vocation de vos Synodes, selon le Synode National de Gap. Et de l'autre vous l'apprenez, comme bon & valable, puis que vous apprenez celuy des Prestres Catholiques, lesquels vous sçavez n'auoir aucune Vocation de vos Synodes. En effet, vous ne rebaptisates iamais aucun de ceux qui ont esté baptisez chez nous par iceux.

12. En ce que d'une part vous croyez, qu'on ne reçoit en vostre Cene le Corps de IESVS-CHRIST, que par foy, c'est ainsi que vous parlez d'ordinaire. Et de l'autre, que vous le receuez vrayement, reellement & substantiellement. Ce sont les propres termes de vostre Confession de Foy Gallicane, lesquels ne peuvent compatir avec le terme *par foy*, si vous n'vsez d'equiuoque, ou plustost de fraude & de tromperie, comme il est à craindre, ou plustost à croire.

13. En ce que d'une part vous dites, Que la Vocation de l'Eglise Romaine ne vaut rien, à cause des erreurs dont elle est souillée. Et de l'autre, Que la

vostre est bonne, encore que vostre du Moulin accorde en son Traité de la Vocation, de la tenir de la mesme Eglise Romaine. D'où s'en suit euidemment qu'elle est bonne & mauuaise tout ensemble.

Lisez les Institutions de Calvin, & vous y treuuez comme il confesse & nie la mesme chose en cent endroits, dit le *pro* & le *contra* d'une mesme bouche, & paroist estre tantost Catholique, & tost apres Heretique. Qui est le propre du mensonge, comme le propre de la verité, c'est d'estre tousiours la mesme.



DE L'VNITE' DE L'EGLISE ROMAINE,
& Multiplicité de la Reformée,
touchant leur Volonté.

CHAPITRE IX.

Pour la cinquième *Vnité*, les Catholiques croiēt non seulement tout ce que les Conciles generaux & les Papes leur ont enjoint & commandé de croire; mais qui plus est, ils sont resolus de croire à l'aduenir tout ce que l'un & l'autre leur ordonneront de croire. Car n'ayans tous ensemble qu'un mesme Entendement en la Doctrine de Foy & des bonnes mœurs, ils n'ont par suite necessaire qu'une mesme Volonté, la Volonté marchant d'ordinaire

par la direction & conduite de l'Entendement son guide. Ils n'aspirent & ne respirent tous aussi, qu'apres vn mesme Vouloir & non Vouloir, pour tout ce qui regarde la Foy & la Doctrine des mœurs. Conformement à la recommandation de l'Apostre en la 1. aux Corinth. ch. 12. & en la 2. ch. 13. & sur tout à l'exemple des premiers Chrestiens, qui n'auoient tous, *qu'un cœur & qu'une ame en plusieurs corps*, ainsi qu'apert aux Actes ch. 2.

Vous au contraire n'eustes iamais cette Vnion de de Volonté parmy vous, comme vous l'éprouuez en plusieurs cas tous les iours. Car, qui de vous ne s'attribue l'autorité, non seulement de croire au choix de son particulier S. Esprit, afin de ne faire point de tort à la Liberté de Conscience, qui vous permet à tous tant que vous estes de viure chacun à sa poste; mais qui plus est, de iuger & de condamner toute l'Eglise Primitiue & Moderne en corps. Vous ne demandez pas des preuues en cecy, car la chose parle assez haut d'elle-mesme depuis long temps. En effet, où sont vos Conciles Generaux, dans lesquels vous soyez iamais veritablement tombez d'accord de toutes vos Controuerses & querelles de Religion, les particuliers y cedans au General? Nommez nous en de grace vn seul, s'il vous plait.

Il est vray que vous auez tenté fort souuent de vous assembler, pour arriuer à cette Vnion de Cœur & de Volonté, ainsi que i'ay remarqué cy-dessus,

selon le dessain du Synode National de Gap, & celuy du sieur du Plessis vostre grand Achilles : mais qu'avez vous pourtant aduancé iusques icy ? Rien pour tout, puis que vous vous treuuez encore aujourd'huy mesme plus diuisez de cœur que de corps, faute de Volonté maistresse, à laquelle vous soumettez toutes vos particulieres Volontez, ainsi que vous-mesmes iugerez estant chez vous. Semblables en cecy aux Madianites, qui se deffailloient eux-mesmes, pensant deffaire leurs ennemis, aux Iug. ch. 7.



DE L'VNITE' DE L'EGLISE ROMAINE,
& Multiplicité de la Reformée,
touchant le Baptesme.

CHAPITRE X.

TOuchant la sixième *Vnité*, l'Eglise Romaine s'en peut encore veritablement glorifier, nonobstant la grande diuersité des lieux ausquels elle est, & se treuue establie: Car tous ses Prelats, Docteurs & Predicateurs sont entierement d'accord de la Forme, Matiere, Ministre & Necessité du Baptesme. Ouy, tous ses Prelats, Docteurs & Predicateurs croient, & crient tout haut. 1. Que la Forme de ce Sacrement ne consiste qu'en ces paroles. *Je te baptise au nom du Pere, & du Fils, & du Sainct Esprit.* 2. Que

sa Matiere n'est autre que l'Eau naturelle ou elementaire. 3. Que son Ministre ordinaire c'est le propre Pasteur, & en necessité toute autre personne doiée de raison & de iugement, laquelle vsant de la Forme & de la Matiere déterminées par IESVS-CHRIST aura l'Intention de faire ce que l'Eglise de Dieu fait; Et finalement qu'il est absoluëment necessaire à tous sans exception, ou en effet, ou par vœu & desir, dont les seules personnes âgées, & non les petits enfans sont capables. Que si quelques-uns de nos plus celebres Docteurs se sont autres fois escartez de cette Canonique & Catholique Doctri-
ne, ce ne fut iamais que dans la soumission deuë à l'Eglise, c'est à dire, qu'avec la resolution de s'en departir, de dire & retracter au premier de ses Aduertissemens.

Mais pour vostre Pretenduë Reformée, elle est aujourd'huy partagée en deux, en tous ces quatre Chfs, comme vous sçavez. Quant au premier, Quelques vns de vos Ministres tiennent comme nous, Que la Forme de ce Sacrement ne consiste qu'en ces paroles. *Je te baptise au nom du Pere, & du Fils, & du Sainct Esprit.*

Je m'en rapporte aux Ministres Huebert & Mercure, & à plusieurs autres semblables, qui ont autres fois baptisé sans prescher, conformément à la pratique des Ministres Holandois, qui baptisent desia dés long temps à toute heure, & dans la maison mesme les petits enfans, qu'on ne peut point porter sans ha-

zard de la vie au Temple. Procedure ouvertement autorisée par le Synode National de S. Meyxant, tenu l'an 1609. qui appreuua le Baptesme avant le presche, & mesme par le Ministre du Moulin, qui pour ne se faire des Ennemis, s'est desia rendu tout à tous, *Chrestien indifferant*; ou si vous voulez le *Brodequin de Theramene, & vne vraye selle à tous chevaux*, Lequel soustient; cōme le presche n'est point de l'essence, mais seulement de la bien-seance de ce Sacrement. Quelques autres tiennent qu'elle consiste au presche, qui se fait en sa celebration; C'est la raison pour laquelle ils n'oseroient baptiser aujour-d'huy sans prescher. Controuerse que le Synode dernier de Charenton n'a point osé decider & resoudre.

Quant à la Matiere, Calvin & Beze ont esté d'avis, qu'on pourroit baptiser avec toute autre liqueur que de l'eau naturelle ou Elementaire. Plusieurs de vos Ministres ne croyent rien de cette prophane Doctrine aujourd'huy, à cause qu'elle combat ouvertement l'Institution du mesme Baptesme.

Pour le Ministre de ce Sacrement, vos Ministres n'en sont pas non plus d'accord, que de la Forme & de la Matiere, ainsi qu'il est aisé d'inferer, de ce qu'apres auoir declaré dans le Synode de Gap, de l'an 1603. le Baptesme conferé par tout autre, que par vn Ministre accompli, veritablement nul; ils ne rebaptisent point pourtant ceux d'entre nous qui se caluinisent, bien qu'ils ayent esté baptisez par des

Prestres, & peut estre par des Lays, voire par des sages Femmes mesmes, non toutesfois qu'en necessité. Procédure qui monstre à l'œil, cōme vous admettez deux Ministres du Baptesme essentiellement differans, aussi bien que deux diuerses Formes & deux diuerses Matieres.

Pour la Necessité, vous sçauiez les estrifs, que vos principaux Ministres eurent au Synode de S. Maixan de l'an 1609. & en celuy de Priuas de l'an 1612. plusieurs d'entre eux (sur tout les Ministres de Poictou) soustenans fort & ferme, comme ils font bien encore aujourd'huy, que ce Sacrement est absoluëment necessaire aux petits Enfans : A cause dequoy ils permirent de les baptiser auant le Presche, voire sans Presche, c'est adire aux Prieres publiques, qui se font sans presche. Ce qu'ils ont depuis iniquement & sacrilegement reuoqué au Synode de Thonains de l'an 1614. & autres Synodes tenus apres. Et vous sçauiez bien que la seule apprehension que ces Messieurs ont d'estre descricz en Chaire par les Predicateurs Catholiques, & non la verité, laquelle ils recognoissent fort bien, leur a fait remettre & restablir ceste Loy barbare & impie, sçauoir est de refuser le Baptesme aux petits Enfans, hors du Temple, & sans Presche : Laquelle ils auoient abrogée par l'espace de six ans. Miserables gens, qui aiment mieux pecher que se corriger, perseverer au mal que de le quitter, leur reproche vn de leur Confreres, conuertý despuis quelque temps à

la foy Catholique. Et qu'elle Eglise est celle-cy, qui a honte de se reformer? Ainsi Luther, conuié par son Achates Melancton, de se desdire de quelques abominables Propositions, ny voulut iamais entendre, à l'instar d'Arius, pour ne rendre, disoit-il, tout le reste de sa Doctrine douteux & suspect, & donner du subject aux Catholiques de le blasmer d'inconstance.



DE L'VNITE' DE L'EGLISE ROMAINE,
 & Multiplicité de la P. Reformée touchant
 leur Culte externe.

CHAPITRE XI.

A Cheuons les diuerses *Vnitez de l'Eglise* par celle du Culte externe. Or que l'Eglise Romaine n'en ait qu'un & le mesme par tout l'Vniuers, il paroît en ce qu'elle ne reçoit que les mesmes Sacremens avec les mesmes formes de les administrer, les mesmes Missels & Breuiaires, les mesmes Offices, les mesmes Solemnitez & les mesmes Ieufnes partout. Et s'il s'y rencontre (comme il fait pour encore: dans quelques Chapitres & dans quelques Ordres Religieux) ie ne sçay quelle differance; elle est si petite que rien.

Tout ce qui se pratique à Rome pour le Culte

Diuin, se pratique encore aux Italies, aux Gaules, aux Allemagnes, aux Espagnes, bref en toute l'Europe, comme encore en Asie, en Affrique, aux Indes Orientales, en la Chine, au Iappon, aux Isles Philipines, en l'Amérique, au Mexique, au Bresil, au Peru, & se practiquera bien-tost, Dieu aydant, en la Terre Australe, laquelle d'incogneuë qu'elle estoit auant l'année 1617. commença d'estre cogneuë par les Nauigations de Ferdinand de Quio Espagnol; Elle ne tasche aussi selon son Esprit d'Vnion, que de tendre à l'Vniformité, principalement en ce qui regarde la Foy, la Religion & le Seruice de Dieu.

Vostre Pretenduë Reformation au contraire vse presque d'autant de Cultes diuers, qu'elle habite de diuers Estats en l'Europe. Et semble en cette diuersité de Cultes, qu'elle ait diuers Dieux à seruir. Les Sectes Lutheriennes d'Allemagne practiquent presque toutes les Ceremonies de l'Eglise Romaine; Les vostres Gallicanes, tout au contraire n'en practiquent presque pas vne, ou si elles en practiquent quelqu'vne, c'est presque merueille. Les Anglois en practiquent vne partie, & les Holandois en practiquent l'autre, comme vous sçauetz.

Les Lutheriens ont retenu les Eglises, les Croix, les Crucifix, les Images en platte peinture & en relief, les Heures Canoniales en latin, les Fons Baptismaux, les Autels & tous leurs ornemens, les Vestemens Sacrez, les Hosties, les Calices, les Lu-

minaires, les Encensemens, les Festes, les Ieunes, les Exorcismes, & presque toutes les Ceremonies du Baptesme, de l'Eucharistie & du Mariage, & finalement l'ordre des Euangiles, ainsi qu'on l'observe en l'Eglise Romaine auiourd'huy.

Quant à Vous, vous n'avez retenu que les genuflexions & les leuemens de bonnet en priant, la celebration du saint Dimanche, la coustume de donner des Parrains & Marraines au Baptesme, les Annonces aux Mariages, & d'auoir des Tēples pour vous assembler. Encore est-ce avec le regret de plusieurs des vostres, notamment de Napeir, qui n'aduouë en sa Proposition 26. autres Ceremonies Ecclesiastiques que le Baptesme & la Cene.

Les Anglois ont retenu iusqu'a cette heure les Eglises, la Hierarchie Ecclesiastique, la Consecration des Euesques, des Prestres, & Diacres, les Letanies, la reuerence & leuement de bonnet à la prolation du sacré Nom de IESVS, la genuflexion en comuniant, le Signe de la Croix en baptisant, les Veilles & les quatre Temps, les Festes, les Surplis, Bonnets carrez & capuchons, la Confirmation & la Confession auriculaire au Ministre.

Pour les Holandois, ils ordonnerent l'an 1612. aux Estats tenus à Vtrecht; Qu'aux Villages où il n'y a gueres souuent de Preche, qu'on y pourroit baptiser deux iours en chaque sepmaine les petits Enfans. 2. Que lors que les mesmes petits Enfans ne sçauroient estre portez sans hazard de leur vie au Temple,

Temple, qu'on les pourroit aller baptiser en la maison à toute heure. 3. Que les Ministres iroient celebrer pour le moins deux fois l'an, la Cene aux moindres villages. 4. Qu'aucun ne seroit esleu Ministre, qu'apres 25. ans accomplis, qu'apres auoir esté solidement examiné par les Deputez des Estats, & qu'apres qu'il se seroit obligé d'observer leurs Ordonnances (l'vne desquelles porte de s'abstenir des subtilitez scholastiques en chaire) & d'exposer tous les Dimanches apres disner le Catechisme de Hilderberg. 5. Que le iour de Noël & le lendemain, la Circoncision, le Vendredy saint, les seconds iours de Pasques & de Pentecoste, & celuy de l'Ascension seroient celebrez aussi religieusement que celuy du Saint Dimanche. 6. Qu'on observeroit tous les ans quelques Ieunes generaux apres Pasques &c.

Nous oseriez vous bien nier, Que les Allemans & les Anglois ne prennent la Cene à genoux; Que les Escossois & les Holandois ne la prennent assis à Table, comme pour disner; Que les Suedois & quelques autres Peuples Septentrionaux ne la prennent tout debout, sans se remuer non plus que les piliers de leurs Temples, & que vous ne la preniez tout chemin faisant, & comme en reueue. A cause de quoy, les Lutheriens appellent par risée vostre Cene *deambulatoire & trotense*. En fin il ne vous reste plus que de la prendre couchee par terre, pour la prendre en toutes les principales postu-

res ordinaires d'un corps humain.

Nous oseriez vous bien nier mille autres diversitez, qui se rencontrent tous les iours entre vous & les autres Sectaires de nostre temps, vos Confreres. A Geneue la matiere de la Cene c'est vne oblie quarree & du vin blanc. Chez vous c'est du pain du premier Bolanger, & du vin rouge du premier cabaret. En quelques endroits chacun prend le pain & le vin de la Cene à discretion. En quelques autres le seul Ministre donne l'un & l'autre à sa volonté. En quelques autres, pour le moins au Languedoc, (ou il y auroit du changement depuis peu) les escorceurs des cheures y donnent la coupe, voire apres auoir beu tous les beaux premiers, dont le dernier Synode de Charenton s'est plaint. L'entends parler icy de plusieurs Villages, où le Boucher est souuent du Consistoire. Finalement chaque Ministre vse des paroles que bon luy semble en donnant la Cene; car il n'y en a point encore de determinées chez vous, que ie sçache.

Ie ne veux rien dire de vos ordinaires Diuisions d'Etat; non pas mesme de celles que vous fites esclater en la celebre Assemblée de Saumur, & aux Synodes Nationaux de Priuas & de Thonnains où vous fustes par trois ou quatre fois sur le point de faire vn Schisme dans vostre Schisme.

Deuine qui pourra, quel de vos trois Estats a davantage esté diuisé depuis la mort du grand Henry. Pour les Grands, vous n'ignorez pas ce que leurs

riotes vous ont cousté. Pour les Ministres ils ne se treuvent iamais d'accord, que comme Herode & Pilate; Sçauoir est, à faire mourir, non pas IESVS-CHRIST, car il est immortel depuis sa Resurrection; mais son Vicaire General en terre le Pape de Rome. Et comme seroit d'accord vne troupe confuse de Ministres sans deuotion & sans humilité, si deux peuuent à peine habiter en mesme Eglise vn an entier, sans la scandaliser par le moyen de leurs ordinaires contentions & debats? De là vient, qu'il les faut presque aussi tost separer, qu'on les a conjoints, comme on a fait autres fois Caille & Cresson Ministres à Grenoble, Chamier & Canto Ministres au Montelimar, Valier & Appaix Ministres à Die, Maurice & Rossel, Ministres à Orange, Brunier & Codur Ministres à Vsez, Chambrun & Fauchier Ministres à Nismes, du Moulin & Durand Ministres à Charenton, (qui se sont reconciliez cent fois en apparence, & iamais vne vraye en effet,) Baile & Blanc Ministres à Lyon, Beraud & Clement Ministres à Montauban. Je laisse que le Ministre Oliuier & le Ministre Fauchier faillirent à s'égorger dans le Tēple de Nismes à la presence du Cōsistoire le propre iour de Pasques de l'an 1617. au sortir de faire la Cene, dont les assistans furent estrangemēt troublés. Je laisse encore les estrifs d'entre les Ministres Chauue & Codur, qui les ont separez pour long temps.

C'est le mesme de vos Eglises qui ont deux Ministres, que des Maisons seculieres qui ont deux fem-

mes rioteuses, où il y en a toujours vne & demie de trop. Et croy ie, que si on ramassoit dix Ministres sous vn mesme toit, qu'il y en auroit assez pour faire le principal faux bourg d'Enfer. Le Sieur Barbier autres fois Ministre, assure en sa *Ministographie*, que les Synodes ne sont en chose aucune tant occupez qu'à l'appoinctement des Ministres. Je puis dire en verité (escriit-il) en la page 183. de ne m'estre treuvé en aucun Synode, où il n'ait fallu plus de temps à composer les differans des Ministres, qu'à tout autre chose. De quoy les Deputez estoient scandalisez.

Pour le peuple; Tout le monde sçait, qu'oultre le grand nombre qui renoncèrent par serment solennel les années 1622. & 1623. presque en toutes les Prouinçes de France à la scditieuse & rebelle Assemblée de la Rochelle, (en quoy ils ont tres-bien fait) que presque toutes les Eglises & Villes d'ostage attaquées, ont fait chacune sa paix à part avec sa Majesté, quoy que la Discipline deffende tres-estroitement à chacun de vous au ch. 6. art. 3. de se procurer en temps de persecution vne paix à part avec les Catholiques, afin de donner dauantage à penser à tous ceux dont vous pretendez estre persecutez, & continuer plus long temps par ce moyen en vos rebellions & felonies. Ce que ie dis, non pas pour reprendre ceux qui se sont départis d'un tel Serment, au contraire ie les en louë bien fort; mais pour faire voir la des-vnion & la discorde qui regne vniuersellement parmi vous. Passons à la deuxieme Marque.



DE L'VNIVERSALITE
DE L'EGLISE.

DEUXIESME MARQUES.

CHAPITRE I.

VOylà, *Messieurs*, quelles sont l'Eglise Romaine, & la P. Reformée, touchant la premiere Marque, qui doit marquer & monst^rer au doigt à tout le monde l'Eglise de Dieu, ie veux dire l'*Unité*. Passons s'il vous plait à la deuxieme, Laquelle ie ne croy pas se rencontrer plus heureusement chez vous, que celle dont ie viens de parler, si tous les Escrivains de ce Siecle & nos yeux propres ne nous trahissent ouuertement.

Or cette deuxieme Marque sera selon l'ordre que ie me suis proposé de tenir en cette Recherche, l'*Universalité*. Marque laquelle peut estre considerée au regard du temps, au regard des lieux, au regard des personnes, au regard des faueurs diuines requises à sa perfection essentielle; & finalement au regard des aydes & secours necessaires à sa perpetuelle conseruation & durée, Qui sont toutes les Vniuersalitez qu'on peut desirer à l'Eglise de Dieu, selon S. Cyrille de Ierusalem en la 18. *Catechese des Illuminés*, & Vincent de Lerinx en son *Admonition contre les Heresies*,

avant le milieu. *Tenons cela, (dit ce celebre Docteur) qui a esté creu de tous, en tout lieu, & tousiours. Nottez s'il vous plait ces paroles.*

Que cette Marque soit l'une des quatre, dont l'Eglise de Dieu doive estre marquée, selon le Symbole des Apostres, & ceux des Conciles de Nicée & de Constantinople, il n'y a que douter. Neantmoins parce qu'il s'agit icy, non seulement de vous convaincre & reduire au silence; mais encore de confirmer les Catholiques Romains en leur Foy, il n'y aura point de danger d'establir par diuerses authorities & raisons cette importante Verité. Commençons par l'Vniuersalité qui regarde le temps.

Le Roy Prophete au Psal. 95. v. 2. *Chantez au Seigneur, & benissez son nom. Annoncez sa gloire entre les gens, & ses merueilles entre les peuples.* Isaie au ch. 59. v. 21. *Telle est mon alliance avec eux, dit le Seigneur; Mon esprit qui est en toy, & mes paroles que j'ay mises en ta bouche, ne se retireront pas de ta bouche, ny de la bouche de ta posterité, ny de la bouche de la posterité de ta posterité, dit le Seigneur, dès maintenant iusques à tousiours.* Notez cet aduerbe, *iusques à tousiours*, qui marque vne suite de temps non interrompue. Et au ch. suiuant v. 11. *Aussi tes portes seront continuellement ouuertes, elles ne seront point closes ny nuit ny iour.* Et au ch. suiuant v. 4. *Et esleueront (sçauoir les Chrestiens,) les anciennes ruines, & restaureront les Citez desertes & dissipées de generation en generation.* Et au ch. suiuant v. 5. *Ierusalem j'ay constitué des gardes sur tes murailles, tout le iour &*

toute la nuit, i jamais elles ne se rairont &c. A qui appartiennent, ie vous prie ces promesses, à vne Eglise inuisible, à vne Eglise muëtte, à vne Eglise sans Ministre, à vne Eglise interrōpuë, s'escric le grand Cardinal du Perron, en sa Replique au Roy d'Angleterre, parlāt à vos Ministres touchant leur Vocation.

Au Nouveau Testament, c'est en S. Math. 28. v. dernier. *Je seray avec vous iusques à la consommation des Siecles.* Notez encore cet aduerbe de temps continué. Et en S. Iean 14. *Je prieray le Pere & il vous donnera vn autre Consolateur, pour demeurer avec vous eternellement.* S. Paul en la 1. aux Corinth. 11. *Vous annoncerez la mort du Seigneur iusques à ce qu'il vienne.* Notez encore icy le mesme aduerbe du temps continué, *iusques*; Et au ch. 1. *Qui annoncera vn autre Euangile que celui-cy, (c'est à dire, non encore ouy) qu'il vous soit anatheme.* Et aux Eph. 4. il dit, *que Dieu donnera des Pasteurs & Docteurs à son Eglise iusques à ce que nous nous rencontrerons tous en l'Vnitè de la Foy, qui sera seulemēt à la fin du monde.* S. Iean dit en son Ep. 1. v. 24. *Ce que vous auez donc ouy dès le commencement soit permanent en vous:* C'est à dire, arriere les nouvelles Doctrines. Et en son Ep. 2. il ne veut pas mesme, qu'on saluë celui qui apportera vne autre Doctrine que la sienne.

Quant aux Peres, ils ont tousiours fait vn tel estat de cette *Vniuersalite de temps*, c'est à dire, de la succession non interrompuë, de la Predication & des Predicateurs en l'Eglise, qu'il n'est pas possible de

mieux. Tertullien parlant aux nouveaux Dogmatiseurs de son temps, *libr. de prescript. heres. ch. 37. Qui estes vous, d'où, & quand estes vous venus.* S. Irenée *liu. 4. ch. 42. de hæresib. Il faut seulement ouyr ceux là (dit il) qui ont la Succession depuis le temps des Apostres.* S. Cyprian *l. 1. Ep. 6. ad Magnum. Nouatian n'est point en l'Eglise, ny ne peut estre reputé Euesque d'aucun, lequel apres auoir refuse la Tradition Apostolique, ne succedant à aucun, il a esté ordonné par soy-mesme.* Sainct Ierolme *ad. Pamach. & Oceanum de errorib. Orig. Qui-conque tu sois, qui presches des Dogmes nouveaux, ie te prie que tu veuilles espargner les oreilles Romaines, &c. Pourquoy est ce qu'apres 400. ans t'efforce tu de nous enseigner ce que nous ne scauions point auant toy.* Et in *Dialog. vlt. aduersus Luciferum. Il faut demeurer en cette Eglise, laquelle fondée par les Apostres, dure iusques aujourdhuy.* S. Augustin *19. Epist. fundam. c. 4. La Succession non interrompue des Prestres me retient en l'Eglise Catholique, &c.*

Voilà l'Vniuersalité qui regarde le temps: Pour l'Vniuersalité qui regarde les lieux, ce ne seroit iamais fait, si nous voulions rapporter tous les passages de l'Ancien & Nouveau Testament, qui la marquent en termes exprés. Le Roy Prophete au *Psal. 2. Demande moy, & ie te donneray les Gens pour ton heritage, & pour ta possession les bouts de la Terre.* Et au *Psal. 18. Leur son est allé par toute la Terre, & leur parole a passé iusques à ses derniers bouts.* Et au *Psal. 21. Tous les bouts de la terre auront memoire & se conuertiront au Seigneur.* Et

au Psal. 49. *Es il a appelé la Terre dès le Soleil leuant iusques au couchant. Et au Psal. 71. Et il dominera de la Mer iusques à la Mer, & du fleuve iusques au bout de la terre. Et au Psal. 97. Toutes les fins de la terre ont veu, (c'est à dire,) verront le Salulaire de nostre Dieu. Ces passages ne peuvent pas conuenir aux Iuifs, ny aux Schismatiques, Grecs, Nestoriens, Eutychiens, ny moins encores à Vous; non encore aux Turcs, comme vous mesmes nous accordez librement; Doncques à l'Eglise Romaine.*

Et aux Actes ch. 1. *Vous me serez tesmoins tant en Ierusalem qu'en toute la Judée & iusques au bout de la terre. S. Paul aux Romains ch. 1. rend-il pas graces à Dieu, de ce que la Foy des Romains commença de son temps d'estre annoncée par tout le Monde. Mais plus expressement IESVS-CHRIST en S. Marc ch. 16. v. 15. Allez par tout le monde, & preschez l'Euangile à toute Creature, c'est à dire, à tous les humains. Passage que S. Augustin employe avec plusieurs autres semblables en l'Ep. 66. ad Donatistas, en faueur de l'Vniuersalité des lieux de l'Eglise. Et saint Chrysost. Hom. 15. in Math. sur le milieu. Je ne vous enuoye point à deux Villes, ou à dix, ou à vingt, ny à une Nation, comme i'enuoyois autrefois les Prophetes: mais par toute la terre, & par tout le monde, chargé d'crimes, dit ce saint Docteur, parlant en la personne de IESVS-CHRIST.*

Pour l'Vniuersalité qui regarde les Personnes, elle est encores plus expresse & plus formelle dans le


Texte Sacré, dans les Peres, & dans la raison mesme. Voyez comme elle est promise à l'Eglise Chrestienne en la personne d'Abraham au Genese ch. 12. 15. & 18. & depuis au Psal. 71. *Et toutes les Nations de la terre seront benites en luy, c'est à dire en IESVS-CHRIST.* Et au Psal. 2. *Demande moy, (dit le Pere Eternel à son Fils) & ie te donneray les peuples pour ton heritage.* Et au Psal. 95. vers. 3 1. *Annoncez sa gloire entre les gens, & ses merueilles entre tous les peuples.* Et Psal. 96. v. 8. *Les Cieux ont annoncé sa Justice, & tous les peuples ont veu sa gloire.* Isaie ch. 60. vers. 3. *Et les Gentils chemineront en ta lumiere, & les Roys à la splendeur de ta naissance.* Ioel ch. 2. *Et apres ces choses ie rependray mon esprit sur toute chair.* En S. Luc 24. v. 46. *Et il leur dit, Il est ainsi escrit, & ainsi falloit que CHRIST souffrit & resuscitast des morts au troisieme iour, & qu'on preschast en son Nom Penitence & Remission des pechez à toutes les Nations, commençant depuis Ierusalem.* Et en l'Apocalypse ch 5. v. 9. *Tu nous as rachetez à Dieu par ton Sang de toute lignée, & langue, & peuple, & nation.* Et au ch. 7. v. 9. *Apres ces choses ie veis, & voicy vne grande multitude, laquelle nul ne pouuoit nombrer de toutes gens, & lignées, & peuples, & langues, &c.* Ceux (dit S. Augustin sur le Psal. 21.) *qui ne veulent pas reconnoistre l'Eglise espandue par toutes les Nations, doiuent quereler la Sainte Escriture.*

Mais comment se pourroit-il faire, que Dieu qui est vn Bien vniuersel, s'abstint de se communiquer vniuersellement, c'est à dire, à toute sorte de Sexe,

d'âge, de nation, de condition & de profession des personnes, si elles trauaillent de leur costé, comme il est probable que plusieurs d'elles font, moyenant sa grace, à se rendre capables de sa communication, luy qui les preuient, les presche, les presse, & les y porte presque sans cesse, comme nous en assure S. Iean en l'Apocalypse 3. vers. 20. le passerois aux preuues des autres deux Vniuersalitez, mais ce ne seroit iamais fait. C'est pourquoy ie m'en vay fermer ce Chapitre par le titre & PEloge de *Catholique*, dont l'Eglise de Dieu fut tousiours sans controuerser honorée, voire mesme de ses plus grands ennemis, selon S. Augustin au liur. de vera Relig. c. 7 & contra Epist. fundam. c. 4. & de unitate Ecclesie c. 25. & ailleurs.

Mais à quel propos tant & de si puissantes preuues pour l'Vniuersalité de l'Eglise, puis que vous mesmes tenez par article de Foy, qu'elle est Vniuerselle? le ne veux que le neufuième article de nostre commun Symbole. *Je croy l'Eglise Vniuerselle*, & les diuerses Confessions de Foy, dont i'ay desia fait mention à l'entrée de cette Recherche, qui le disent fort expressement, ainsi que ie l'ay souuent veu de mes yeux.





DE L'VNIVERSALITE' DE L'EGLISE ROMAINE,
 & Particularité de la Pretendue Reformée
 quant au temps.

CHAPITRE II.

Que s'il est ainsi que la vraye Eglise soit Vniuerselle, (cōme vous-mesmes ne le nous disputez pas,) il n'y a point de doute que la Romaine ne soit la vraye, puis qu'elle possede heureusement aujourd'huy toutes les Vniuersalitez, qu'on scauroit iamais demāder en la vraye Eglise. Pour l'Vniuersalite' de tēps, dont il est question à present, il ny a celuy, tant effronté soit il, qui luy olast contester & debattre, qu'elle ne prenne sa naissance de IESVS-CHRIST & de ses Apostres. Sur tout apres qu'on luy aura produit en preuue de cette indubitable Proposition le Catalogue de ses Souuerain euesques, chez S. Irenée, S. Optat, S. Epiphane, S. Augustin, & tout autant qu'il y eust de Chronologies Ecclesiastiques depuis le mesme IESVS-CHRIST & ses Apostres iusques à Nous, Notamment celle de Eusebe, de S. Ierosme, de S. Prosper, de Theodoret, de Socrate, de Sosome, d'euagrius, de Nicephore, de Paul Diacre, poursuiuies depuis, de temps en temps par plusieurs autres celebres Historiens, & particulierement par Genebrard, Gautier, Gourdon, Sponde, lesquels

ont vescu dans ce dernier Siecle. Qui toutes contiennent le mesme Catalogue de ses Souuerains zuesques: Preuve, outre laquelle elle exhibe ses Temples, ses Autels, ses Monasteres, & plusieurs autres Monumens de son Antiquité, cōme encore les Liures de tous les plus nobles Escriuains de quatorze ou quinze Siecles passez, contenant la mesme Foy & Creance que nous professons encore aujourd'huy: Et finalement sa possession immemoriable, & non iamais encore interrompuë par aucune action cōtraire de l'estenduë de trois iours seulement, quelques chicānes & pointilles, que scachent inuenter Messieurs vos Ministres: Qui fait que nostre Creance est non seulement conforme à celle des Apostres, mais est encore sa Consanguine selon le desir de Tertullien.

Il y a bien dauantage, Elle défie tous ses ennemis ensemble. 1. de luy dire le nom du premier Hérésiarque qui la fait errer, supposant selon vostre opinion qu'elle ait erré; ce qui n'est point. 2. le nom du iour, ou du mois, ou de l'an, auquel elle fit entendre la premiere de ses erreurs. 3. le nom de la Ville, ou de la Prouince où elle la fit premiere-ment entendre. 4. le nom des premiers Autheurs qui s'en sont plaints & formalisez: celui du premier Concile qui l'a condamnéc, celui de la Societé qui luy a disputé le tiltre d'Eglise Catholique, & sur tout celui de l'Eglise qui luy a immédiatement succedé: Car pour les Nestoriens, & Eutichiens, qu'on ten-

ue encore aujourd'huy au Leuant & Midy, vous ne dites pas nō plus que des Grecs, qu'ils ayēt succedé à l'Eglise Primitiue Orthodoxe, puis que Vous-mesmes les chargez aussi biē que nous de plusieurs d'estables erreurs cōtre la seconde & troisiēme Personnes de la Sainte Trinité, des leur premiere Origine. Nestorius croyoit deux Personnes en IESVS CHRIST, comme deux Natures : & Eutichés au contraire vne seule Nature, comme vne seule Personne. Qui sont erreus que vous-mesmes condamnez dans vostre Confession de Foy Gallicane articles 6. & 14. Aussi s'appent-elles les premiers fondemens de la Religion Chrestienne Pour les Grecs, vous detestés leur erreur sur la Proceſſion du Saint Esprit aussi bien que nous, comme il est encore aisé de voir dans la mesme Confession de Foy, au mesme art. 6.

Mais pour vostre P. Reformée, vous n'oseriez pas luy donner cette premiere sorte *d'Vniuersalité*, puis que vous mesmes confessez qu'elle n'est visible que despuis Luther & Calvin. Or il y a des personnes qui viuoient, il n'y a pas encore dix ans, qui ont veu Luther, & d'autres qui viuent encore aujourd'huy, qui ont veu Calvin, le premier estāt mort l'an 1546. & le deuxiēme l'an 1564. Et pour ceux qui tiennent qu'elle estoit auparauant ces deux Pretendus Reformateurs, ie les voudrois bien supplier de nous dire la part du monde, où est-ce qu'elle nicheoit. Où residoient Messieurs les Ministres, sur tout où se celebroident ses Conciles Nationaux, où s'assi-

gnoient ses Assemblées d'Etat, où se treuvoient les Citadelles & ses Villes de Seurté: Et finalement qui payoit les gages de ses Ministres & de ses Capitaines. Il n'y a presque personne aujourd'huy, qui ne sçache comme la Confession de foy d'Ausbourg fut publiée l'an 1530. celle des Suisses l'an 1536. celle de France l'an 1559. celle d'Escoffe l'an 1561. celle d'Angleterre l'an 1562. Tesmoignages indubitables de la nouveauté de vostre Creance.

Que si cette pauvre Chauue-fouris d'Eglise n'osoit paroistre & professer publiquement sa Foy, comme elle ne l'osoit pas avant Luther & Calvin: car autrement elle auroit esté visible, ce que vous n'accorderez iamais? Comment est-ce qu'elle meritoit le nom d'Eglise, veu que la Confession publique de la Foy, est aussi necessaire que la mesme Foy, pour obtenir le Salut, selon la Doctrine de l'Apostre aux Romains 10. *Car on croid de cœur pour estre iustificié, dit-il, & on confesse de bouche pour auoir Salut.* Comment est-ce qu'elle n'estoit pire que la Synagogue, voire que les Sectes de Nestorius, d'Eustichez & des Grecs, qui toutes trois ont duré visibles à tous les Chrestiens despuis leur sortie d'Enfer. Ce que ie vous prie de remarquer, non pas en courant, mais avec attention, car la chose le merite bien, puis qu'il s'agist du Salut.

A tout rompre vostre P. Reformée n'est pas plus Ancienne que ces Heresiarches, des Heresies desquels vous l'avez fagottée, qui ne sont pas encore si

vieux que les Apostres; que nous recognoissons pour Fondateurs apres IESVS-CHRIST de la nostre. Vous avez beau faire; vos Dogmes ont quelque commencement, quand bien vous les voudriez faire aussi vieux que leur premier Autheur, (le Pere de mensonge) les nostres au cōtraire n'en ont point: car ils sont nais avec la premiere verité mesme, comme estans Propositions, que nous pouuons appeller librement avec les Metaphysiciens, *Propositiones sempiterna veritatis*. Propositions d'eternelle Verité.



**DE L'VNIVERSALITE' DE L'EGLISE ROMAINE,
& Particularité de la Pretendüe Reformée,
quant aux lieux.**

CHAPITRE III.

ET quant à l'*Universalité des Lieux*, il est tout euident chez les plus celebres & fidelles Historiens du Christianisme, que la Foy & Doctrine de l'Eglise Romaine a esté tousiours annoncée par toutes les diuerses Regions & Contrées de l'Europe; del'Asie & de l'Affrique depuis sa premiere promulgation en icelles. Laissons les Siecles passez, & parlons seulement de celuy que nous venons d'acheuer; Auant que Luther sortit en campagne, elle estoit preschée par toute l'Europe, excepté quelques

ques Prouinces frontieres de l'Asie, qui sont sous la puissance du Moscouite ou du Turc. Pour l'Asie, elle y estoit depuis long temps en plusieurs Prouinces & Royaumes celebres. Premièrement aux Isles de Cypre, de Candie, de Zantho, de Chio, de Naxo, & autres Isles Asiaticques. Secondement, en la Palestine, où la garde du S. Sepulchre est demeurée depuis 250. ans aux Religieux de Saint François, en ayāt esté faits cōme les Depositaires sacrez. Troisièmement, aux enuirons du Mont liban, où se tiennent les Maronites, Peuple tres-obeyssant depuis quelque siecles à l'Eglise Romaine, composé d'environ quinze ou vingt mille familles, & conduit au Temporel par vn Prince tributaire du Turc, & au Spirituel par vn Patriarche de l'Ordre de S. Basile, que l'Eglise Romaine confirme. Quatrièmement, en toute la petite Armenie, dont le peuple est encore grandement Catholique depuis l'an 1319. que le Pere Barthelemy Petit Bolonois, Religieux de l'Ordre de S. Dominique, le conuertit du Nestorianisme à la Foy de l'Eglise Romaine, Peuple conduit encore aujourd huy pour la Religion, par vn Archeuesque de mesme Ordre, qui vient de dix en dix ans à Rome visiter nostre Saint Pere. Cinquièmement aux Royaumes d'Ormus, de Calicut, de Goa, de Cochin, & en plusieurs autres des Indes Orientales aux dernieres extremittez de l'Asie, depuis la glorieuse conqueste qu'en firent les Portugais.

Pour l'Affrique, la mesme Foy & Doctrine y

estoyent desia, dès l'an 1502. publiquement annoncées au Royaume de Congo, & en plusieurs Provinces, Villes & Ports sur les lisières de cette grande partie du Monde, allant par la Mer Australe du Portugal aux Indes Orientales. Elle estoit encore preschée en Ethyopie, où il y a depuis quelques siècles, des Religieux de l'Ordre Saint Dominique admirez du peuple pour leur Sainteté. Ce que j'ay appris dans les Vies des Saints du mesme Ordre. Il n'y a desia personne qui ne sçache, comme Daud Empereur d'Ethyopie escriuit l'an 1524. au Pape Clement VII. tout ainsi qu'au Souuerain Chef de l'Eglise de Dieu, & Pasteur vniuersel des Chrestiens.

La mesme Foy & Doctrine estoient encore annoncées aux Indes Occidentales par les Religieux de S. Dominique, & de S. François, & nommement au Mexique, ainsi que nous dirons plus à propos cy-dessous.

Depuis les fanfares de Luther, cette mesme Foy & Doctrine se sont encore heureusement espanduës en depit du Diable & de luy, parmy les Schismatiques, Grecs, Nestoriens, & Euthychiens du Leuant & Midy; comme encore parmy les Payens en la haute Guinée, en l'Empire de Monomotapa, en celuy d'Ethyopie, en celuy de Mogor, en celuy du Pegu, de Narsinga, de Bengala, en Tartarie, en la Chine, au Iappon, & en cent & cent autres grandes Monarchies, & dans plusieurs celebres Villes de l'Asie & de l'Affrique, comme encore en l'Amerique, au

Brasil, au Peru, en la nouvelle France, en la nouvelle Espagne, & en plusieurs fameuses contrées de ce nouveau Monde, nommemēt depuis l'année 1524. iusques en l'année 1544. & depuis l'an 1600. iusques en l'an 1610. c'est à dire, au quadruple de ce qu'elle estoit auparauant Luther: De sorte que le Soleil ne se couche long temps y a sur tous les sujets de l'Eglise Romaine, mais en éclaire continuellement vñ grand nombre, en quelque endroit du Globe celeste qu'il luise aux mortels.

Vostre Pretenduë Reformée tout au contraire, au lieu de s'estendre & de s'espandre par tout le rond de la Terre, comme elle feroit asseurement, si elle estoit vne œuure de Dieu; elle s'estrecit & s'estenuë tous les iours, & peu s'en faut qu'elle ne se rende encore inuisible vne fois, & s'aneantisse du tout; tant par les journalieres Conuersions des meilleurs des vostres, que par vos frequentes diuisions & sousdiuisions. Tant s'en faut que vous passiez dans l'Amérique, au Brasil, au Peru, au Mexique, aux Indes, en la Chine, au Iappon, voire d'ans l'Asie, & dans l'Affrique, que vous n'avez pas mesme sçeu donner iusques dans l'Italie, dans l'Espagne, & dans plusieurs autres Royaumes de l'Europe, qui ne sont qu'à trois pas de vous. En sorte que vous vous treuuez tous les iours du mōde au cōtraire des Catholiques Romains, tous entēble à l'ombre. Cōbien mesmes auons nous de Villes dans ce Royaume, de la Reformation d'esquelles vous avez tout à fait desef-

peré depuis fort long temps, & dans lesquelles vous n'attendez de voir iamais, ny Ministre, ny Ministerie.

De me respondre icy ce qu'un Docteur Reformé, lequel ie pressois viument sur ce point, me respondit vn iour à Lyon: Qu'il se trouue des Reformez cachez & couuerts par tout le monde; ie n'attens pas cette sottise de vous; Car outre que cela n'est point en effet, il ne suffit pas à vne Congregation Chrestienne, pour se dire vniuerselle, qu'elle ait quelques-vns de ses sujets esendus par tout l'Vniuers, s'ils n'y pratiquent ouuertement leur Creance, parce que IESVS-CHRIST ne dit pas à ses Apostres & à ses Successeurs, les enuoyant prescher sa Doctine. Allez par tout le monde, & tenez vous y cachez & couuerts comme les Filoux dans Paris; mais au contraire, *Allez & preschez à toute Creature;* Et ailleurs, *Vous me serez Tesmoins en Iudée, & par tous les quartiers de la terre,* c'est à dire, Vous vous y ferez voir & connoistre à chacun, comme mes Disciples.





DE L'VNIVERSALITE' DE L'EGLISE
Romaine, & Particularité de la Reformée
selon les Personnes.

CHAPITRE IV.

Quant à l'Vniuersalité des personnes, il n'y a Sexe, Aage, Condition, Profession, Nation, & Religion d'hommes sous le Ciel, dont l'Eglise Romaine n'ait tousiours grossi & grossisse encore aujourd'huy son Corps. Je ne veux pas rappeler les quinze siecles passez depuis IESVS-CHRIST; En tous lesquels elle a tenu visiblement sous son Empire Spirituel de toutes les Conditions, Professions & Nations d'Hommes de l'Europe, de l'Asie & de l'Affrique. Je me contente de dire, qu'elle est aujourd'huy reconnuë & suiuiue de toutes les mesmes sortes d'Hommes qui viuent, non seulement dans l'Europe, l'Asie, l'Affrique; mais encore dans le nouveau Monde; Elle est mesme si populeuse par la faueur & bien-veüillance de son Autheur, au veu & sçeu de tout l'Vniuers, que cette verité n'a point besoin de preuue, tant elle est euidente & manifeste à chacun.

Plusieurs tiennent, & ie le tiens encore avec eux, que le nombre des nouveaux Chrestiens surpasse desia celuy des vieux. Ce que nous pouuons facilement recueillir de ce que le seul Saint François

Xavier conuertit douze cens mille Infidelles aux Indes Orientales dans dix ans, & le B. Martin de Valence de l'Ordre de Sainct François, accompagné d'onze de ses Freres Religieux autant aux Indes Occidentales, en six ou sept ans qu'il y fut; & le Pere Herrada Augustin deschaux cent mille aux Isles Philippines en fort peu de temps. Et il ne faut plus conter à milliers, voire à centaine des milliers, ny à millions; il faut conter à milliasses, parlant des Infidelles conuertis à la Foy Catholique en ce dernier Siecle. Surius escrit en l'année 1558. qu'il y auoit desia quatorze millions d'Idolâtres conuertis à IESVS-CHRIST, au seul Royaume du Mexique, par les trauaux & labeurs des Religieux de Sainct Dominique, & de Sainct François; Lesquels ont esté si agreables en leur zele Apostolique à sa Diuine Majesté dans ce grand Royaume, qu'il leur a donné plus des Monasteres & des Sujets en iceluy, qui les imitent en leur sainte vie, qu'ils n'en ont peut-estre dans toute l'Europe aujourd'huy.

Vostre Pretenduë Reformée n'est pas si fertile & si feconde que cela. Car où sont, ie vous prie, les milliasses d'Infidelles que vous auez encore amenéz à vostre Creance. Que dis-ie, les milliasses; le ne vous en demande pas tant, car ce seroit vous assassiner; le ne vous en veux demander qu'un tout seul: De grace donc, où est l'Americain, où le Mexicain, où le Brasilien, où le Peruan, où le Iapponnois, où le Chinois, où l'Indien, où l'Asiatique, où l'Affri-

cain, où est mesme l'Italien, l'Espagnol, le Lorrain, ou l'Auignonois, qui ne sont qu'à trois pieds de vous, que vous ayez (excepté quelque Apostat, que la faim, ou la vie desbordée a banny d'entre nous) encore reformé à vostre moule? Où est le Iuif, où le Schismatique, que vous vous estes encore acquis & gagné ie vous prie? Nulle part qu'en vostre Esperance imaginaire & fantastique. Mais le moyen de vous acquerir aucun de ces hommes, si vous apprehendez de sortir de chez vous, pour faire seulement trois pas vers eux.



DE L'VNIVERSALITE' DE L'EGLISE
ROMAINE, ET PARTICVLARITE' DE LA
*P. Reformée, quant aux faueurs Diuines, requises
à la perfection essentielle de l'Eglise
de Dieu.*

CHAPITRE V.

Pour la quatrième *Vniuersalité*, laquelle regarde les Faueurs Diuines, requises à la perfection de la vraye Eglise, c'est vne verité notoire à tous les Sçauans, que la Romaine en fut tousiours tant & tant aduantagee par dessus toutes les autres Congregations & Societez Chrestiennes du monde, depuis son establissement, que ce seroit tomber dans l'ex-

tremité de l'impudence, que de penser seulement à luy comparer la plus excellente de toutes icelles. Sçachons quelles sont ces Faveurs & Graces Diuines, afin que nous puissions mieux entendre cette Proposition. Je les reduis toutes aux huit suiuan-
tes, *La Parole de Dieu; les Vies de IESVS-CHRIST, & des Saints; les Sacremens; les Conseils Euangeliques; les Oraisons & Sacrifices; les Merites infinis de IESVS-CHRIST & de ses Saints; les Ceremonies; & finalement les Graces gratuites*: Instrumens tres propres & tres efficaces. Le premier pour éclairer, guider & conduire les Enfans dans les sentiers du Salut: le 2. pour les eschauffer & émouuoir au bien: le 3. pour les sanctifier, & rendre dignes membres de l'Eglise Militante, afin de l'estre vn iour de la Triomphante au Ciel; le 4. pour les perfectionner, chacun en son Estat & selon sa Condition de vie; le 5. pour leur impetrer de Dieu le pardon de leurs pechez, & tout le reste, dont ils ont de besoin en cette vie: le 6. pour pouuoir entierement satisfaire à la peine deuë à leurs pechez: le 7. pour rendre la mesme Eglise venerable, non seulement à ses Enfans, Mais encore à ses Apostats: & le 8. & dernier pour la faire admirer à tous les mortels. Qui sont toutes les faueurs requises & necessaires à la perfection de l'Eglise, voyageante encore icy bas.



De la Parole de Dieu.

ARTICLE I.

VOyons maintenant en quels termes sont pour le regard de toutes ces Diuines Fauers aujourd'huy l'Eglise Romaine & la Pretendue Reformée. Quant à la Romaine: Il n'y a celuy de vous, tant incrédule soit-il, qui osat mettre en Controuerse, qu'elle n'ait tousiours esté la fidelle Depositaire de la Parole de Dieu, tant écrite que laissée par Tradition. Tous les Heretiques qui furent iamais, ont tousiours librement confessé de tenir les Escritures Sainctes de sa seule main. Ce n'est pas tout: Outre la Parole externe, elle a l'interne; le veux dire le Sens & l'Intelligence de la mesme Parole. Ce que n'eurent, ny n'auront eternellement ses Schismatiques & Deserteurs; bien qu'ils ayent le vieux & nouveau Testament en toutes les diuerses Langues & Versions du Monde. C'est la Doctrine de S. Augustin, Que l'Intelligence de l'Escriture Saincte, (laquelle nous est donnée par le Saint Esprit) ne se treuve point hors de la vraye Eglise, c'est à dire Qu'il faut le mesme Esprit pous expliquer l'Escriture, que pour l'escire. Voicy ses paroles, tirées de son Commentaire sur le Psal. 57. *En l'Eglise de Dieu seulement reside la verité: Quiconque en est se-*

paré, il faut necessairement qu'il die choses fausses. On peut bien transporter l'Escriture Sainte hors de l'Eglise, mais non pas son Intelligence. Ouy elle a non seulement l'escorce, mais encore la moëlle, non seulement le Corps, mais encore l'Esprit, non seulement le son, mais encore le Sens de la mesme Parole de Dieu. Apert aux merueilles, presque incroyables qu'elle opere par son moyen tous les iours, ainsi que nous verrons bien au long cy-dessous, conuertissant les Infidelles, les Iuifs, & les Heretiques à la Foy; les Schismatiques à l'Obeissance, les Pecheurs à la Grace, les Imparfais à la Perfection, & les Iustes à la Saincteté consommée.

Mais pour vostre Pretenduë Reformée, elle n'a, ny toute la Parole Escrite, car elle en eclipse & retranche six ou sept liures entiers de l'ancien Testament, & presque rien de la Parole non Escrite. Laquelle ne sert pas moins à l'Escrite, qu'une main sert à l'autre en trauaillant, & qu'une iambe sert à l'autre en marchant; & rien pour tout du Sens & de l'Intelligence, ny de l'une ny de l'autre: A cause de quoy, quand bien elle auroit toute l'Escriture Sainte & la Tradition sans mutilation, mutation, ou corruption quelconque; elle n'auroit toutes fois que l'escorce de la Parole de Dieu. Car à vray dire, la Parole de Dieu ne consiste pas tant en la parole externe, qu'en l'interne, & qu'en l'intelligence & au sens, disent tous les Peres. *L'Herésie* (dit Sainct Hilaire au liure 2. de Trinitate) *est de l'intelligence & non de l'Escriture.*

L'Euangile ne consiste point aux paroles mais au Sens, (dit S. Ierolme sur le ch. i. de l'Ep. aux Galates) les Heresies (dit S. Augustin in Ioan. tract. 18.) ne naissent que des bonnes escritures mal entendues.


Au reste, ie ne pense pas qu'il y ait piece de vous, qui voulut nous contester auiourd'huy; Que Luther n'ait falsifié l'Escriture Sainte en mille endroits, Tesmoin Bosius liu. 5. ch. 6. *des signes de l'Eglise*: Que les Anglois n'ayent fait le mesme en deux mille de conte fait, Tesmoing Tonstalus: Et vous en nombre presque sans nombre. Ie ne veux point vous produire icy le R. P. Coton avec sa *Geneue Plagiaire*, ny le R. P. Regourd avec ses *Ministres sans Foy*, ny le Reuerend Pere Zacharie de Saluces Capucin en son Tom. 2. liur. 2. *des Controuerses*, puis que vous les tenez pour suspects. Ie me contente du seul Serenissime Roy de la Grand'Bretaigne, (que du Moulin ne peut assez flatter dans ses Liures) lequel escrit en termes exprés au Colloque de Hamptancour, que la pire de toutes les Versions de la Bible qu'il a iamais leuës, c'est celle de Geneue: Ainsi le fit il voir à Casaubon en Angleterre.

Faites mieux: Prenez vous-mesmes vos premieres Versions de la Bible, & confrontez les avec les dernieres, & vous treuuez que comme vous estes allez en escriuisses, c'est à dire en empirant, que vous auez continuellement empiré vos Versions; Celles-cy ayant esté falsifiées en plus de 200. endroits, outre ceux que vous auiez desia falsifiez en celles-là.

Cette preuve vous sera bien aisée & facile à faire, si vous le voulez. Telle au reste que vous ne sçauriez l'eluder par vos chicanes, puis qu'elle est prise mesmes de vos propres Liures.

Mais qui ne sçait que toutes vos Traductions de l'Ecriture s'entredementent, s'entremangēt, & s'entrecorrigent les vnes les autres, ses Traducteurs vusant d'une sainte Liberté de conscience, qui les dispense (ainsi qu'ils disent) de s'assuietir à aucune Traduction precedente. Sur quoy ie vous prie de considerer, que vos Successeurs estimeront bien d'auoir autant de droict de regrater vos dernieres Versions, & les reformer à vostre exemple, que vous en auez eu de regrater celles de vos Predecesseurs, & ainsi rendre l'Ecriture Sainte douteuse & suspecte, afin d'acheuer plustost, selon vostre grand dessein le *Mystere d'Iniquité*, & preparer par ce moyen les voyes au vray Antechrist, qui doit rejeter l'Ecriture Sainte, pour establir ses impietez & ses sacrileges abominations, comme vous sçauetz.






DES VIES DE IESVS-CHRIST
& de ses Saints.

ARTICLE II.

L'Eglise Romaine a conserué fort religieuse-
ment iusqu'aujourd'huy les Vies de IESVS-
CHRIST, de la Sainte Vierge sa Mere, des Apostres,
& de tous les autres grands Saints, du Nouveau
Testament. Entendant fort bien, qu'il n'y a rien de
si energique, & de tant efficace à mouuoir les Hom-
mes à la Vertu, que l'Exemple des personnes re-
commandables en la Vertu, (l'Exemple estant vn
langage puissant, pressant, & quasi precipitant à bien
faire, ceux qui le voyent ou l'entendent raconter.)
Telsmoing ces deux Fauoris de l'Empereur, dont
parle S. Augustin au liu. 8. de ses Confessions ch. 6.
qui furent si puissamment touchez dans la lecture
de la vie de S. Antoine, composée par S. Athana-
ze, qu'ils quitterent à l'instant & l'Empereur, &
leurs nouvelles Fiancées, & se retirerent au desert,
pour vaquer tout à fait au seruice de Dieu. Tes-
moing encore S. Ignace de Loyola, le R. Pere Cesar
de Bus nostre Fondateur, Monsieur Bernard de Pa-
ris, & cent autres de ce siecle, que la lecture des Vies
de IESVS-CHRIST & des Saints, a iettez dans le pro-
pos efficace de deuenir Saints, & serui comme

d'un Trompette guerrier, pour les faire courir sur le Diable, le Monde, & leurs propres vices avec les armes Royales de la Vertu.

Vostre Pretendüe, tout au rebours, se mocque des Vies de IESVS-CHRIST, & de sa Mere, & de celles des Saincts, les appellant par derrision des *Legendes*. Et pour quelques Narrations apocryphes, qu'aucunes d'elles ont autres fois contenu, elle les condamne toutes de mensonge & de fausseté; bien éloignée en cecy de l'esprit de Charité, laquelle selon l'Apostre en sa 1. aux Corinth. ch. 13. vers. 4. *Croid tout*, excepté que la chose parut manifestement contre la Foy & les bonnes mœurs: Sur tout elle tient, comme contes faits & forgez à plaisir, tout ce qu'elles racontent de l'Humilité, de l'Austerité, de l'Abnegation de toutes choses, & semblables vertus des Saincts, lesquelles ne se pratiquerent iamais parmy vous. Et la confusion que vous souffrez en la lecture de leurs actions Heroïques & presque Diuines, fait que vous les tenez & preschez d'ordinaire comme des pures amplifications, & leurs Miracles, comme des illusions & des fourberies, imitans en cecy les Payens, lesquels imputoient à Magië tous les Miracles que faisoient les premiers Chrestiens, pour n'en pouuoir point faire de semblables aux leurs.



Des Sacremens.

ARTICLE III.

L'Eglise Romaine outre les Sainctes Escritures, Traditions & Vies des Sainctes, retient & conserue encore tous les Sacremens, instituez par IESVS-CHRIST. 1. Celuy du Baptesme, pour lauer du peché d'origine tous ceux qui par son moyen doiuent estre admis à sa Saincte Communion. 2. Celuy de Penitence, pour lauer & purifier du peché d'acte & de fait tous ceux lesquels y ont esté desia admis & receus. 3. Celuy d'Extreme Onction, pour les purifier des restes de l'vn & de l'autre sur la mort; & tous les autres pour accroistre & consommer leur Saincteté commencée, s'ils s'en sçauent ayder comme il faut, & les accompagnera pres des Vertus veritablement Chrestiennes, iusques à la mort.

Vostre Pretenduë Reformée non contente d'auoir sans aucune expresse parole de Dieu, voire re contre plusieurs de ses passages formels, & contre la Tradition perpetuelle de l'Eglise, sacrilegement retranché tout d'vn coup cinq Sacremens, *la Confirmation, la Penitence, l'Extreme Onction, l'Ordre & le Mariage*, conuertit le Baptesme & l'Eucharistie en pure ombre & figure, & tantost en Imagination & Fantosme, celuy-là de la Grace, & celuy-cy de l'Au-

theur de la Grace *Iesus-Christ*, & les presche à tout le mōde non necessaires, & dans bien peu de temps, si vous ne reuenez à vous, comme tout à fait inutiles, & peut estre nuisibles & dommageables. C'est la raison pour laquelle vos Ministres ne hasteroient point le pas allant au Temple, voire les iours mesmes qu'ils conferent le Baptesme, quand tous vos Enfans mourroient priuez de ce Sacrement, sur tout s'ils craignent de n'estre point du festin, que vous pratiquez apres les auoir faits baptiser: Comme il arriua à Ablon pres Paris, où le Ministre de Montigni (qui peut estre n'auoit point esté conuié) exercea cette cruauté, laissant mourir vn petit enfant, faute d'abreger son presche, quoy qu'on le priat par diuerses fois de couper court.



Des Conseils.

ARTICLE IV.

L'Eglise Romaine a d'abondant les Conseils Euangeliques de la propre bouche de nostre Sauueur en S. Mathieu ch. 5. & 19. au moyen & par la pratique d'esquels elle amene peu à peu ses Enfans à la perfection Chrestienne. Conseils, qui se reduisent tous à ces quatre, *la Pauvreté volontaire, la Chasteté Religieuse, l'humble Obeissance, & finalement*
le Mar-

le Martyre recherché ; A la Pauvreté se raportent les offices, habits, & viures vils & chetifs ; A la Chasteté les Ieufnes, veilles, haires, disciplines, &c. A l'Obeyssance, les Oraisons, Meditations, Lectures, &c. Au Martyre la ioyeuse souffrance des mespris, iniures, persecutions, battures, & l'Amour des ennemis. Il est vray qu'aucun de ces Conseils n'oblige personne du monde à les pratiquer, s'il n'y a quelque nécessité de ce faire : Il n'est pas toutesfois permis à aucun de les mespriser, pour quelque cause & raison que ce soit, sans encourir la haine de Dieu.

Mais pour vostre Pretenduë Reformée, elle ne se treuve pas seulement vuide de la preparation d'esprit & du ferme propos de practiquer, au besoin (qui peut souuent arriuer) le plus important de tous ces Saints & Sacrez Conseils (ce qui ne se peut, en sorte quelconque sans l'offence de Dieu.) Mais qui pis est, elle en mesprise & la speculation & l'execution à toute occurance, voire persecute & l'une & l'autre à toute outrance. Elle accuse ouuertement les Peres Recolez & les Capucins, imitateurs en leur sainte mendicité de IESVS-CHRIST & de ses Apostres, d'éleuer l'aumosne aux pauvres disetteux : Les Continens & non mariés de toute sorte de lasciuetez, quoy qu'ils ne sçachent rien en particulier de leur vie, que ce que le diable leur en sugere. Les Obeyssans, de faute d'esprit & d'entendement. Pour le Martyre, le Ministre du Moulin dit en son *Bouclier de la foy*, Qu'il est ou necessaire ou temeraire

exclusiurement ; En quoy il condāne en aueugle, vne milliasse de Saincts Martyrs de l'Eglise primitiue, qui se sont volontairement & ioyeusement offerts au Martyre, lequel ils pouuoient sainctemēt eschaper par la fuite, voire se condamne soy-mesme, en ce qu'il louë merueilleusement en son combat Chretien page 167. ceste femme, qui du temps de l'Empereur Valens, courut (ainsi qu'il dit) toute descheuellée, tenant son enfant entre ses bras, vers le lieu où on executoit des Martyrs, & qui enquisse où elle couroit, respondit, on donne auourd'huy des couronnes, & i'y veux participer.



Des Oraisons & Sacrifices.

ARTICLE V.

L'Eglise Romaine exerce encore à toute heure les Oraisons publiques & priuées, vocales, mentales & mixtes, pour obtenir de Dieu tout ce dont les enfans se treuent auoir besoin, & luy presente encore le Sacrifice de son propre Fils en la sainte Messe, à fin d'appaiser sa iuste cholere, souvent allumée contre eux pour leurs crimes & pechez. Car qu'est ce que scauroit jamais refuser le bon Pere à son Fils vnique, naturel & legitime, de pareille bonté que luy, priant pour ses freres adoptifs.

La vostre Pretenduë Reformée mesprise la perseverance à prier, & condamne d'abus, apres Maistre Jean Calvin en son Inst. liu. 3. ch. 10. §. 29. la repetition de mesme Oraison, & fut elle la Dominicale mesme. D'où vient que vous appelez nos Chapelets & Rosaires, *Superstition*, Qui est à n'en point mentir vne doctrine, non seulement sauuage & barbare à nous, mais encore (& non sans raison) à la plus-part des vostres mesmes. Car quel mal y a-il ie vous prie, de dire deux ou trois fois de suite la mesme oraison apres l'exemple de IESVS CHRIST durant sa Passion, lequel repeta par trois fois la mesme requeste à son Pere en S. Math. 26. vers. 44. Elle mesprise encore le mesme Sacrifice de la Sainte Messe, sous pretexte d'hōnorer celuy de la Croix, comme si celuy de la Messe estoit quelque autre chose en substance que celuy de la Croix. Mais ce n'est pas la premiere impertinance qu'elle nous est venue chanter.



*Des Merites infinis de IESVS-CHRIST
& de ses Saints.*


ARTICLE VI.

L'Eglise Romaine est encore la Gardienne & la Depositaire du Thresor infiny des Merites de

IESVS-CHRIST, de sa Mere, & de tous les Saincts; Lesquels merites elle distribuë à ses enfans par les mains du Pape, qui en est le premier & principal Dispensateur, selon les ordres du mesme IESVS-CHRIST, en Sainct Iean c.20. Afin de leur donner le moyen de satisfaire à la peine deuë à leurs pechez, dont la coulpe leur a esté remise dèja au Sacrement de Penitence. Car pourquoy ne pourra pas le Pape remettre la peine des pechez, s'il en peut remettre la coulpe, qui est sans comparaison beaucoup plus que la peine. Dont il faut voir le mesme lieu ja cité, le tout conformément à l'intention du mesme Sauueur, & de tous ses Saincts, esquels il a communiqué le Tresor de ses merites. Laquelle a esté de prendre part à nos pauuretez nous enrichissant de leur surabondance, la charité qu'ils ont euë en perfection, les ayant poussés à ceste cordiale & fraternelle liberalité.

Vostre pretenduë Reformée tient au contraire comme vne fable & comme vne farce apres Luther, que l'Eglise puisse conceder des Indulgences & Iubilez aux Chrestiens par les mains du Vicaire de IESVS-CHRIST, son souuerain Chef; & tout au contraire cōme vne saine & saincte Doctrine, qu'un chacun de vous se puisse ouurir luy-mesme avec la Clef de la Foy les Coffres, ou ces diuins Thresors sont enfermés, & se saisir à la reformée de tout ce dont il en peut auoir de besoin. Surquoy ie desire-rais bien de sçauoir de vous, à quel propos vostre

recours au Baptesme & à la Cene, pour vous acquitter enuers la Iustice diuine de vos crimes & forfaits, si la seule Foy vous peut mettre tous les merites de IESVS CHRIST en main au besoin, comme vous nous preschez à toute heure? O que le mensonge a de peine de se mettre à couuert contre les foudres de la verité. Il n'y a Laurier, qui l'en guarantisse à la fin.



Des Ceremonies.

ARTICLE VII.

L'Eglise Romaine à de plus, les Sainctes & Sacrées Ceremonies, dont elle se sert en la celebration des Mysteres de la Religion Chrestienne, la plus-part instituées par les Apostres mesmes, & pratiquées és premiers Siecles du Christianisme, comme ie preuueray solidement, Dieu aydant, cy-dessous, traittant la quatriesme Marque: Par le moyen desquelles elle rend le Culte diuin venerable & auguste, non seulement à ses enfans, mais encore à ses Schismatiques & separés, voire aux Infidelles mesmes. Ceremonies, qui sont à la Doctrine de la Foy, comme les Marques Royales aux Roys, les Robbes de Iustice à leurs Magistrats & les ornemens & parures aux Beutez extraordinaires (ainsi que Chamier mesme fut contraint de confesser au Cardinal du Perron) lesquelles sans changer la substance des

Myfteres qu'elles reueftent, les releuent & recommandent merueilleusement à ceux qui les confiderent avec attētion, & nous feruent, non moins contre les froideurs de l'Indeuotion, que les fueilles des Arbres feruent à deffendre leurs fruiçts encores tendres contre les iniures du temps, & que l'efcorce des amendes, noifettes & semblables fruiçts fert à leur conseruation iufques à l'entiere maturité.

Vostre Pretendüe Reformée se mocque au contraire à tout propos de ce riche & precieux ornement de la Religion. Dont vn de vos Ministres de Pologne baptifa (s'il est permis d'ainfi parler) en Carefme vn pourceau avec toutes les Ceremonies de l'Eglise Romaine. Et vn autre de Romans en Dauphiné, encore en Carefme, vn Veau, qu'il appella Brochet, dont quelque Buſſe de Ministre à double corne fust sans doute le Parrain; Adiouſtans à leur impieté la gourmandiſe d'Eſaü, qui pour vne eſcuellée de l'entilles vendit ſa primogeniture. Aucuns des vostres ont autresfois voulu contrefaire nos Prestres, en la Celebration de la ſaincte Meſſe, mais à leurs deſpens. Le Sieur de Remond raconte en la Naiffance de l'Herēſie apres Bredembachius, comme vn certain de ce nombre, voulant contrefaire l'Eleuation de l'Hoſtie avec vne aſſiette dans vn Cabaret, les bras luy deuiennent ſi roides à l'inſtant, qu'il ne les peut iamais replier en bas. Eraſme raconte d'vn autre, de meſme farine, qui voulant contrefaire la prolotion des paroles Sacramentales

sur vne Hostie , dans vn Cabaret, tomba roide mort sur la place en mesme temps. Je laisse à parler de ce Soldat , que Monsieur le Connestable de Montmorancy fist pendre pour s'estre reuestu des habits sacrés de la sainte Messe ; & conuié ses compagnons d'assister à sa Sacrilege Bouffonnerie. Punition plustost diuine qu'humaine attendu les circonstances du temps, des lieux, & des personnes, que ie n'estendray pas au long en ce lieu.




Des Graces gratuites.

ARTICLE VIII.

L'Eglise Romaine a finalement toutes les Graces gratuites , qui peuuent la faire esclatter & reluire entre les mortels , ie veux dire les Dons des Langues , de Prophetie, de Discretion des esprits & des Miracles , dont nous faisons les preuues bien au long cy-dessous sur la fin de la quatriesme Marque.

La vostre Pretenduë Reformée ne se louë pas de semblables faueurs , Elle ne se louë pas du Don des Langues , puis qu'elle se contente de la maternelle en toutes ses fonctions; Ny du Don de Prophetie; puis qu'elle ne croit autre chose que ce qu'elle a deuant les yeux; Ny du Don de discretion des Esprits, puis qu'elle l'estime Enchantement , & Magie , ny

finalement du Don des Miracles , puis qu'elle les contredit & combat à tout propos. Signe infaillible de sa nullité dont ie ne veux que Sainct Pacian en sa 3. Epist. contre les Nouatians. *Nouatian* (dit ce grand Sainct) *a il eu le Don des Langues? a-il Prophetisé? a-il ressuscité les morts ? Car il deuoit auoir quelqu'une de ces choses pour introduire vn nouveau Euangile.*



DE L'VNIVERSALITE' DE L'EGLISE
Romaine, & Particularité de la Pretendue
Reformée, quand aux aydes & secours
necessaires à la perpetuelle Conser-
uation de la vraye Eglise.

CHAPITRE VI.

ET pour acheuer les Vniuersalitez de l'Eglise par celle des aydes & secours necessaires à sa perpetuelle Conseruation , il n'y a celuy d'entre nous au iour d'huy, qui ne sçache cōme elle a plusieurs sortes d'Ennemis tandis qu'elle voyage encore icy bas, avec lesquelles elle est d'ordinaire aux prises : Et partant qu'elle a besoin de plusieurs sortes d'armes pour les cōbattre & en triompher. C'est pourquoy Dieu qui a pris comme à tasche de la guarentir de toute sorte de fascheux rencontres , passant de l'E-

gypte de ce Monde en la Terre de Promission (la Beatitude) il luy en a fourny de tres propres contre chacun d'eux. Armes, qu'il est fort aisé de voir dans l'Arсенac de l'Eglise Romaine, encore aujourdhuy mesme au besoin. Preuve indubitable, qu'elle est la vraye Eglise, & celle, contre laquelle les Portes d'Enfer ne preuandroient point: comme I E S V S-CHRIST luy a promis, en Sainct Mathieu c. 16.



Contre les Tyrans.

ARTICLE I.

Contre les Tyrans, les premiers, plus descouuerts & plus cruels ennemis, il luy communique ordinairement vne patience inuincible dans tous les Estats & Royaumes du Monde, auxquels elle s'introduit, iusqu'à ce que par la Conuersion de leurs Monarques & Souuerains, elle s'y est parfaitement establie. Dont nous en auons des exemples notables en ce temps mesme, aux Indes, en la Chine, au Iappon & ailleurs. Apres il luy despart abondamment des puissances & des forces humaines, capables non seulement d'arrester toutes la Tyrannie, qu'on voudroit exercer contre ses subjets, mais encore triompher dans les mesmes Estats qu'elle s'est acquise à l'ayde du Ciel & de sa vertu.

Il ne faut que ietter les yeux sur l'histoire de l'Eglise pour y voir fort clairement tout cecy.

Je sçay bien, qu'une grande partie des Indes Occidentales ont esté plustost combattuës par les armes materielles, que par les spirituelles, (la parole de Dieu) est traictées avec beaucoup de rigueur par les Espagnols. Mais il le falloit necessairement faire ainsi, puisque leurs habitans estoient indignes & qui plus est incapables de tout autre traictement au commencement. En effect c'eust esté folie, que de desployer & d'employer alors la Sapience, la Science, ou les Raisons naturelles pour leur persuader nostre Religion, toute surnaturelle. Les Miracles mesmes n'y eussent de rien seruy, attendu leur incroyable brutalité; Tesmoin leur vie plus approchante à celle des brutes, qu'à celles des hommes doüez de raison. Tesmoin les inhumains & barbares Sacrifices, qu'ils presentoient ordinairement au diable de plusieurs d'entr'eux. Tesmoin leurs Anthropophagies, leurs incestes & Turpitudes innomminables; leurs Rapines & Voleries sans amandement & sans chastiment quelconque; Tesmoin en fin plusieurs autres horribles forfaits, qui repugnent mesmes aux premiers Principes de la Nature raisonnable; Et c'est là la cause, pour laquelle on n'a point procedé d'abord avec eux par raison. Celuy là ne meritant point d'estre traicté par raison, qui n'vse en sorte quelconque de la raison. Dequoy ils n'ont pas esté desplaisans apres leur Conuersion.

Au contraire fort satisfaiçts & contens, considerans qu'ils se treuent deschargés aujourdhuy d'une Loy si dure & si pesante, que celle qu'ils s'estoient laisé mettre sur le dos, sans doute par quelque vn des pires Diabls d'Enfer.

Mais quant à vostre Pretenduë Reformée, elle ne nous scauroit faire monstre d'une patience de dix ans entiers, Bien dissemblable en ceste vertu à l'Eglise Primitiue, voire à l'Eglise Moderne du Iappon; car celle là estendit la sienne iusques à quatre cens ans, c'est à dire, iusques à ce qu'elle eust le droit de se deffendre, en suite de la Conuersion à la foy Chrestienne des Souuerains, sous lesquels elle se treuuoit, qu'ils accompagnoient de la permission expresse aux Chrestiens de se deffendre contre tous leurs Ennemis.

Et celle cy depuis nonante ans qu'elle trauaille à s'establir dans le Iappon. En effect depuis vostre entrée en France iusques à l'an 1562. auquel vous fistes des cheuaux eschappés, il n'y a gueres plus de dix ans entiers. Je ne veux pas vous reprocher icy, qu'au lieu de prendre à l'exemple des Chrestiens, anciens & modernes, que ie viens d'alleguer, vostre Croix, & suiure IESVS-CHRIST dans le chemin Royal de la patience, qu'il a tenu iusques à la mort, vous auez au contraire insolemment & felonement pris l'espée d'une main & le pistolet de l'autre, comme des frenetiques & desesperez par tout ce Royaume.

Je ne veux pas non plus faire rougir ce papier du sang que vous y auez si souuent espandu contre les Loix Naturelle, Diuine & humaine, par l'espace de 30. ans, que les furies semblent vous y auoir agitez, pour vous deliurer de vos pretenduës persecutions. Car de grace, qui vous authorisoit en vos leuées d'armes, en vos Rebellions, en vos Massacres & Tueries, en vos Rapines & Voleries sous François 2. Charles 9. & Henry 3. Estoit-ce le Souuerain? Mais comment le Souuerain? s'il vous declaroit coup sur coup criminels de leze-Majesté Diuine & Humaine à cause d'icelles? Estoiēt-ce vos Ministres? Mais en quel lieu de l'Escriture Saincte, est-ce que vos Ministres ont treuue de pouuoir permettre aux sujets de se rebeller contre leur Prince Legitime, sous ce pretexte qu'ils croyent d'entendre beaucoup mieux la mesme Escriture Saincte que luy? Estoit-ce la Nature, laquelle permet de resister à la force par la force? Mais comment la Nature, s'il n'y a, ny peut auoir aucune legitime resistance contre le Souuerain, Car selon l'Axiome, il faut necessairement, *ou fuir, ou souffrir sa main*, quoy que pesante.

De vous attribuer le mesme droit contre nous, que nous disons d'auoir tousiours eu contre vous, & vos semblables, vous ne scauriez le faire avec raison. Car où nous auons vne immemorale & cōme eter-nelle, & partant legitime possession de nous deffen-dre contre tous ceux qui voudroient nous aggres-ser, sur tout ayant les Souuerains de nostre costé,

vous n'en auez pas mesme l'ombre & l'Idée, comme vous sçauiez tres-bien. Vous n'auetz aussi vescu iusques aujourdhuy parmy nous, que par tolerance, & pour eiter de plus grands maux dans cét Estat. Dont le nom de *Pretendus*, que vous portez encore aujourdhuy en est vne suffisante preuue. De grace, quel de nos Roys ? quel de nos Parlemens, vous a iamais receus avec approbation de vos erreurs ? Aucun par la grace de Dieu. Et ne sert d'alleguer cõtre cecy l'Edict de Ianuier de l'an 1562. par lequel vous croyés d'estre receus avec approbation dans la France. Car outre qu'il contient ces paroles expresses, *sans approuuer deux Religions*, c'est chose veritable & sceuë desia de chacun, comme les Roys tres-Chrestiens font vn serment solennel en leur Sacre, de chasser les heresies de ce Royaume. Pour le Parlement de Paris, il a protesté qu'il ne peut, ny veut, ny doit vous approuuer, voicy ses termes, *Nec possumus, nec volumus, nec debemus.*



Contre les Heretiques.

ARTICLE II.

Contre les Heretiques ses pires & plus dangereux ennemis, qui ont tousiours tasché quoy qu'en vain, d'euenuimer de leurs erreurs la Doctrine,

Dieu luy a donné iadis des Ambroises, des Ieromes, des Augustins, des Chrysostomes &c. Et dans nostre siecle des Ekius, des Cocléés, des Lindans, des Fichers, des Stapletons, des Genebrards, des Canisius, des Suares, des Valentia, des Maldonats, des Bellarmins, des Baronius, des du Perron, des Coëfeteaux, & mille autres Cherubins en science, le moindre desquels estoit plus que capable de renvoyer à l'eschole le premier & le plus hardy de tous vos Ministres. Vostre science ne va point aussi de pair avec la sienne, comme vous mesmes, l'entendez fort bien, Et tous vos plus celebres Docteurs, cōparez à ceux-cy ne sont qu'Escoliers abecedaires. Et ie ne veux pour Iuges de ceste Proposition, que les plus habiles, qui sont encore auiourd'huy parmy vous. Ou est l'œuure digne de memoire eternelle, ie vous prie, qui soit encore sortie de vostre Boutique? Rien que chicanes & pointilles; Mais de piece de prix, & pour l'illustration des Arts liberaux, il n'en paroît pas vne seule, dont le monde ne se fust bien aisément passé.

Mais ce qui est digne de compassion chez vous, c'est que vous n'estes pas seulement foibles aux Sciences Speculatiues & releuées; Mais qui plus est, en la Controuerse mesme, bien qu'elle soit toute vostre Estude depuis le laiët. Je m'en rapporte à ce que Beze, Martorat, Viret & Martyr, les premiers de tous vos Ministres en firent voir l'an 1561. au Colloque de Poissi, où se treuerent (outre le Roy Charles &

la Reyne Mere, & diuers Princes du sang) six Cardinaux & enuiron quarante Euesques: Car outre, qu'ils n'oserent iamais disputer avec aucun des Prelats, ou Docteurs, qui se treuuerēt en ceste celebre Assemblée, des points de la Religion par Syllogismes, & raisons concises, comme il se pratique en toutes les Disputes bien réglées, ils ne sçeuvent iamais respondre au Cardinal de Lorraine, comme il leur demanda le pouuoir qu'ils auoient de prescher sans mission, ny ordinaire ny extraordinaire, contre la Doctrine de l'Apostre aux Rom. 10. & la pratique perpetuelle de l'Eglise; Ny au Docteur Claude de Xainctes, leur demandant comme quoy les femmes estoient sauuées sous la Loy de Moyse, sans circoncision.

Mais l'ignorance la plus palpable qu'ils commirent, ce fut lors qu'ils attribuerent à la Foy des particuliers la reelle presence de IESVS-CHRIST en l'Eucharistie, au lieu qu'il la falloit attribuer à la vertu des paroles Sacramentales, declarées & spécifiées par IESVS-CHRIST en l'institution de ce Sacrement adorable. Car qui ne sçait, comme la realité d'une chose surnaturelle ne depend pas de nostre Foy & Creance, *Que telle chose est*; Mais au contraire nostre Foy & Creance depend de la realité de la chose surnaturelle, laquelle est en effect selon toute bonne Theologie; Car la Foy, non plus que la Science, ne fait pas les obiets, mais les suppose desia faiçts.

Que vos Ministres les plus huppez du iourd'huy

soient frappez de la mesme ignorance, il paroît en ce, que lors, que nous leurs demandons, comme quoy ils croyent ce qu'ils croyent de la Foy, ils respondent, que c'est sur l'autorité de l'Escriture Sainte; Et quand nous leur demandons, comme quoy ils croyent que l'Escriture Sainte est de Dieu, ils respondent que c'est sur la persuasion interieure du Sainct Esprit, qu'ils disent auoir, chacun d'eux en particulier. Et quand nous leur demandons apres, comme quoy ils croyent d'auoir ceste persuasion interieure du Sainct Esprit, ils respondent, que c'est sur le tesmoignage de la mesme Escriture, laquelle les en asseure ainsi. Qui est vne marque euidente de leur Ignorance. Car qu'est-ce là qu'un Cercle honteux & ridicule, & la responce des francs Ignorans, puisque ces deux Principes (*L'Escriture & la persuasion du Sainct Esprit*) se causent reciproquement dans vn mesme Genre de Cause, sçauoir est la formelle.

Ignorance dans laquelle nous ne tombons point, graces à Dieu, preschant nostre Religion aux Infidelles. Car quand ils nous demandent, cōme quoy nous croyōs ce que nous croyōs de nostre Religiō C'est, leur respondons-nous, parce que l'Escriture Sainte & la Tradition le nous asseurent ainsi. Que s'ils nous demandent apres. Comment est-ce que nous sçauons indubitablement que la mesme Escriture & la mesme Tradition sont de Dieu. Nous respondons, que c'est parce que l'Eglise Catholique

que , laquelle ne peut errer , comme estant conduite de Dieu , le nous tesmoigne ainsi. Que s'ils nous demandent encore , comme quoy nous recevons le tesmoignage que la mesme Eglise nous donne en cecy , nous ne tournons pas arriere , ny ne faisons point de Cercle honteux & ridicule , propre des Ignorans , comme font ces Messieurs , mais respondons , Que c'est sur vn grand nombre de Motifs , que nous auons de croire ce que la mesme Eglise nous tesmoigne , comme sont *l'Antiquité* , & *l'Estenduë de sa Doctrine* , le *Nombre presque Infini de ses sujets* , la *Constance de ses Martyrs* , la *Grandeur & l'esclat de ses Miracles* ; Qui rendent ce qu'elle nous tesmoigne , non pas euidant , mais euidemment croyable , ainsi que nous le preuuerons cy-dessous par IESVS-CHRIST mesme.

Chez nous l'Escriture & l'Eglise causent mutuellement à la verité nostre Creance , mais c'est en diuers genre de cause ; Car l'Escriture la cause comme cause formelle , & l'Eglise la cause comme cause directrice , ou plustost comme Condition , sans laquelle nous ne croirions pas à l'Escriture selon la Doctrine de Sainct Paul aux Rom. 10. *La Foy est par l'oüie de la parole de Dieu , preschée par l'Eglise* , & celle de Sainct Augustin *contra Epist. fundam. c. 5.* tres-expresse pour la verité de ceste Proposition.

Le Grand Cardinal du Perron s'offrit-il pas de soustenir luy tout seul , la Foy Catholique , contre cinquante de vos Ministres , voire contre tous en-

semble en la Conferance, assignée deuant Madame la Duchesse de Bar, Sœur vniue d'Henry le Grand, à saint Germain en Laye, l'an 1601. Et pour accompagner c'est Exemple de quelques autres semblables, Est il pas tout manifeste en l'Histoire, que Iean Coclée à cent fois gourmandé tous vos Ministres d'Allemagne ensemble, selon Surius en l'année 1531. Que le doctre Maldonat mit en dérouté 23. Ministres assemblés à Sedan l'an 1572. Que le Pere Hayus impositoit silence à vos plus celebres Accademies ? Et de fraiche date ; Que le seul Pere Gontier a souuent deffié les Synodes entiers en Picardie, en Normandie & ailleurs en France. Je laisse à parler des triumphes du Pere Iacques Gautier & du Pere Alexandre Regourd, emportés sur le pauvre Daniel Chamier & ses semblables. En ce rang peut-estre mis le Reuerend Pere Campanella Dominicain, qui a souuent offert de disputer contre tous vos Ministres de France ensemble.

Et vous sçauiez bien que vos Ministres les plus huppez ont tousiours perdu leur procès, disputant avec nos Docteurs. Tesmoïn les Conuersions des vostres, qui couronnent d'ordinaire en nostre faueur, telles Conferances, si vaillamment ils deffendent vostre cause. Verité si manifeste à chacun auourd'uy qu'ils ne nieront pas d'auoir laillé d'ordinaire quelqu'un de leurs Confreres pour gage en toutes celles qu'ils ont osé auoir avec nos Prelats, ou Predicateurs. C'est la raison à mon aduis pour

laquelle l'art. 6. du ch. 6. de la Discipline deffend tres-estroittement à ces Messieurs, d'estre aggresseurs aux Disputes publiques, voire de les accepter sans permission du Consistoire, c'est à dire, iamais. (Tefmoignage irrefragable de leur ignorance.) En suite dequoy les plus hardis d'entre eux ont tousjours fait l'Office de Respondants, & bien malotrus en toutes les Disputes de la Religion. Pour picoter quelque pauvre Ignorant, ils sont à la verité les premiers gens du monde, mais pour prester le collet aux Sçauants, ie vous baise les mains.

On pourroit neantmoins dire, sans ironie de plusieurs d'eux, qu'ils sont personnes d'esprit à la verité, puis qu'ils gagnent leur vie à vn mestier, où ils n'entendent d'ordinaire grand finesse, les plus braues maistres en tous les arts du mōde; ayāt prou de peine de viure de celuy, qu'ils professēt. Foiblesse qu'ils taschent toutesfois de couvrir tāt qu'ils peuēt, avec leur Morgue de Thrason, en laquelle ils excellēt, suppleāt ainsi par mines à ce qui leur manque au jeu; Au nombre desquels il faut mettre Banfillon, disputant avec Monsieur de Fenouillet Euesque de Montpellier, & Eustache Ministre à present dudict Montpellier Disputant avec le Reuerend Pere Fichet, a Aspres en Dauphiné.

Ce n'est pas tout, combien d'Ignorances & des plus crasses descouurons-nous tous les iours dans les Escrits de Luther & de Calvin: Pour du Plessis & du Moulin, vos deux principaux Arcboutans en

ce temps , combien leur en ont marqué le grand Cardinal du Perron , Monsieur Coëfeteau Euesque de Marseille , Monsieur l'Archeuesque d'Arles, Monsieur de Raconis Euesque de la Vaur, les Reuerends Peres Richeome & Regourd , Iesuites, Le sieur Ieremie Ferrier, & moy-mesme , tout petit Escholier que ie suis , au second Tome de la troisieme Edition de la Responce , que i'ay faicte à son pretendu *Bouclier de la Foy*.

Et ie voudrois bien que vous considerassiez, que cette Ignorance ne vous est pas si particuliere qu'elle ne vous soit encore commune avec tous les autres Schismatiques , & separez de ce temps , les Nestoriens , Eutychiens , & les Grecs mesmes (qui fouloient autres fois auoir la Clef de toutes les plus belles Science du Monde) ^{si qu'ils} n'ont sçeu produire vn seul homme illustre en sçauoir, non plus qu'en vertu, depuis les Schismes , qu'ils ont fait avec l'Eglise Romaine. Ce que Thomas Bosius remarque particulièrement au liure 12. ch. 12. *des signes de l'Eglise* ; traittant de l'Ignorance des Heretiques.

Vos Ministres les plus huppez ont mille fois publié les annonces des Mariages , ia faits par paroles de presant , selon la Discipline ch. 13. art. 1. c'est à dire , apres la donation de corps , (en quoy consiste l'essence du Mariage) qui est vne intollerable Ignorance. Faisant en cela tout le mesme , que celui , qui apres auoir vendu sa Maison ou sa vigne, l'exposeroit encore en vente par criées ou plac-

cards. Et ie ne sçay pas, s'ils se sont encore pris garde de ceste Bestise. Je sçay bien qu'ils ne croyent point que le Mariage soit Sacrement. Mais ils ne peuuent pas ignorer & nier, qu'il ne soit depuis IESVS-CHRIST vn Contract indissoluble, à tous les hommes du monde (le seul Pape de Rome excepté) la donation de corps estant interuenue, selon la Doctrine de ce bien-aymé Sauueur en Saint Math. 19. *Ce que Dieu a conioint, que l'homme ne le separe point.* I'entends de parler icy, non du Mariage consommé, qu'aucun Pape ne peut valablement dissoudre, pour quelque cause & raison que ce soit, s'il est veritable en son origine, mais du Mariage que les Theologiens appellent, *ratum*, c'est à dire, contracté par paroles de present seulement & sans estre encore consommé.



Contre les Schismatiques & Factieux.

ARTICLE III.

Contre les Schismatiques & Factieux, qui se promettoient de rompre l'union & la paix de l'Eglise Romaine, en ce dernier Siecle, Dieu suscita le Saint & celebre Concile de Trente, à fin d'assembler avec son Esprit de concorde les opinions & les volonteés les plus esparées & les plus

diuiseées, ainsi qu'il a tres-heureusement faict à la honte & confusion eternelle de telles gens : Oeuure qui ne pouuoit à la verité proceder que du Souuerain Esprit d'vnion & de paix.

Mais pour vous, qu'est-ce que vous n'avez pas fait pour conuenir en mesme opinion & creance, & tomber d'accord, sur les differens qui naissent presque tous les iours parmy vous ? Qu'avez-vous pourtant, ie vous supplie, aduancé iusques icy ? Rien pour tout. Au contraire, vous estes tousiours allez de mal en pis, de diuision en sous-diuisiō iusqu'à faire prés de quatre vingts Sectes parmy vous; i'y comprens celles d'Allemagne, de Pologne & du Pays-bas, chacune desquelles se dit la plus Chrestienne & la plus Reformée de toutes. Tous semblables à ce Vaisseau Holandois, chargé d'innombrables richesses, volées par vos Freres en Christ d'Holande, & sur les Ennemis & sur les Amys, qui vint surgir au Port de Marseille, il y a tantost quarante ans, dont la moitié des Soldats vaincus par le Demon d'Auarice, conuindrent de ce deffaire de l'autre moitié, ce qu'ils executerent facilement au moyen d'vne horrible Trahison. La moitié de ceste moitié fit tout le mesme quelques iours apres, tuant, ou precipitant dans la Mer l'autre moitié. C'este moitié sous-diuisée encore en deux, l'vne d'icelles vint aisément à bout de l'autre moitié, dans quelque deux ou trois iours apres, avec le mesme moyen, & continuerent en leurs diuisiōs

& sous-diuisions, iusques à ce qu'il ne demeura, de septante ou quatre vingts Pyrates, qu'ils estoient dans le Vaisseau, que six; cinq desquels prins & conduits à Aix, furent par Arrest du Parlement rompus tous vifs sur la rouë. Plaise à Dieu par sa souveraine Bonté, que le mesme mal-heur ne vous arriue spirituellement, comme ie crains, & non sans raison.



Contre les Scandaleux.

ARTICLE IV.

Contre les Scandaleux, (les quatriesmes Ennemis de l'Eglise Romaine) desquels elle a esté grandement affligée au precedent Siecle; Dieu, qui ne cesse de veiller à sa conseruation, la soigneusement pourueüë en mesme temps de plusieurs grãds Saints, afin de combattre par la pureté de leur vie l'impureté de celle de telles gens; Ce qu'il a fait en suscitant contre les Auares, les millions des pauvres d'esprit, c'est à dire de cœur & de volonté; Contre les lubriques, vn nombre sans nombre de Vierges & Continans; Contre les Superbes vne infinité d'hommes, humbles & obeyssans: Animez par l'exemple de sainct François de Paule, de S. Ignace, de S. Xavier, du B. François de Borgia,

du B. Louys Bertrand , du B. Pierre de Cordouë & de Louys de Grenade de l'Ordre de S. Dominique, des BB. Martin de Valence, Pierre d'Alcantara, & Paschal Baylon de l'Ordre de S. François, du Bienheureux Felix Capucin, de S. Charles, de S. Philippe Nerio, du R. Pere Cesar de Bus, du tres-illustre François de Sales, Euesque de Geneue, de la sainte Mere Therese & d'un monde d'autres semblables, qui se sont courageusement opposez au vice, non tant de parole, que par mille actions heroïques des plus solides vertus Chrestiennes.

Mais où sont, ie vous supplie les Saints de vostre Reformation, si le plus parfait d'entre vous, auroit beaucoup de peine de se faire declarer homme de bien par Arrest d'une Chambre de l'Edict, s'il y estoit examiné sans faueur. Et ne criez pas au meurtre icy, s'il vous plaist. Car ie ne veux en preuue de ceste Proposition, contre vous que vous mesmes, lors que vous preschez ouuertement *l'Observation des Commandemens de Dieu vous estre absolument impossible.* Car qu'est-cela, que dire, qu'il est impossible; que vous ne soyez des Rebelles, des Homicides, des Adulteres, des Voleurs, des Calomniateurs, & partant bien esloignez de la probité d'un homme de bien. Ce que ie ne vous conseil- le pas au reste de iurer, ny de dire deux fois de suite, pour soustenir la Doctrine, que vous Professez; Car on vous croira bien à la premiere sans difficulté. Et n'en doutez pas. Vos actions passées confir-

ment assez puissamment tout ce que vous sçauriez dire en confirmation de cét article de vostre creance. Je ne doute pas , qu'il n'y ait plusieurs bonnes ames chez vous , mais si vous y prenez garde de prés , vous les verrés , où tost , où tard , se ietter parmy nous , comme ont faiçt & font tous les iours leurs semblables.



Contre les Bouffons.

ARTICLE V.

COntre Erasme , Marot , Viret , Robert Estienne , sainte Aldegonde , Pierre du Moulin & tels autres Rabellais & Bouffons de ce siecle, Dieu, la grandeur duquel esclatte continuellement dans son Eglise , selon la promesse qu'il en a faiçt en Isaie ch. 60. vers. 7. *Je glorifieray la maison de ma Majesté,* a communiqué tant de splendeur & de gloire à l'Eglise Romaine , que les plus grands de la Terre ont tousiours creu de s'honorer grandement lors qu'ils l'honoroient , comme ils ont faiçt en effect.

Plusieurs mesmes d'entr'eux la reuerent encore aujourd'huy comme vne Diuinité participée , telle qu'elle est. Et iamais le grand Alexandre ne decouurit tant de Majesté sur le front du grand Prestre Iadus , ou Ioidas ; ny Attila Roy des Huns sur

celuy du Pape Leon, surnommé le grand; ny plusieurs de nos Roys sur celuy des Papes, dont Bossius fait la Liste au liure vingtiesme chapitre cinq *des Signes de l'Eglise*, que les ames Religieuses de ce temps en ont descouvert, sur celuy des Papes, qu'elles ont approché. Pie V. (qu'on croit deuoir estre bien-tost déclaré Bien-heureux.) Gregoire XIV. Clement VIII. Paul V. & Urbain VIII. ont receu de Dieu tant d'autorité, que la parole des plus hardis leur est tarie bien souuent à la bouche en les harenguant. Je ne veux en preuue de ceste Verité, que ces cinq ou six Bouffons de vostre Reformation, qui estans allez à Rome en diuers temps, & de diuers endroits, pour se gauffer & faire vne farce à leur retour chez eux, & du Pape & de sa Cour, furent tellement esblouis de leur Majesté, qu'ils la voulurent eux mesme reuerer, auant qu'en sortir, apres s'estre au prealable conuertis avec vne ardeur incroyable à la Foy Catholique. Histoires que i'ay apprins des vostres mesmes en diuers rencontres.


Arnaud, autresfois Ministre de Geneve conduisit l'an 1600. (comme rapporte Mathieu en son *histoire de la Paix*, liu. 3. Narration premiere) trente six Francois des vostres à l'Eglise de saint Louys à Rome, où ils firent profession de la Foy Catholique, partie desquels s'en estoient allez en ceste Ville pour s'y moquer du Pape & de sa Cour. Et il ne vous faut pas estonner de cecy. Car ceste gran-

de splendeur auoit esté, comme ie viens de mon-
strer, promise de Dieu à son Eglise, Ce que le mes-
me Prophete confirme au ch. 49. *Et ceux qui te nour-
riront seront Roys, & tes Nourrices seront Roynes. Ils t'a-
doreront la face baissée en terre, & lescheront la poudre
de tes pieds.* Et au ch. 60. vers. 14. *Les enfans aussi
qui t'ont abbaissée, viendront s'inclinans deuant toy, &
tous ceux qui detracteront de toy adoreront les pas de tes
pieds.* Prophetie de la reuerence, que les Roys
mesme, rendent au Pape en plusieurs occasions,
& mesme du baisement de sa pantoufle, contre
quoy vous criez depuis si long-temps en aueugles
qui ont perdu leur baston.

Pour vostre Pretenduë Reformée, elle est en-
trée au monde avec vne grimace à la verité toute
refroignée, mais parce que tout son faict n'estoit
que beau semblant, que mine & qu'hypocrisie, ou
pour mieux dire que pure singerie, elle a bien-tost
perdu ceste retenuë: car se laissant aller au naturel,
elle à donné tout autant de sujet de risée apres,
qu'elle sembloit en vouloir donner de reuerance
& de respect au commencement. Toute sembla-
ble aux Masques, dont le Vernix s'est escoulé, qui
sont encore plus difformes apres, qu'ils ne paroif-
soient beaux auparauant.

Les Ministres, les Consistoires, voire les Syno-
des les plus fameux sont desia deuenus la bute & le
blanc des Gausseurs, & le sujet des Comediens &
Farceurs. Vous mesmes (Je parle au plus Stoïques)

estes bien souuent les premiers à rire de vostre patelinage, & vous n'avez pas, les vns & les autres faute de matiere, quand vous en voulez auoir. Les hauts faictz & gestes heroiques des Ministres & Ministresses, & les illustres actions de vos Surueillans fairoient desia des Tomes entiers, & plus gros & plus gras & plus agreables que les Comtes de la Reine de Nauarre contre les Prestres, que vous avez souuent leus ainsi que i'estime.



*Contre les faux Christs & faux
Prophetes.*

ARTICLE VI.

Contre les faux Christs & faux Prophetes, qui deuoient se leuer pres qu'en tous les Siecles de l'Eglise, selon la Prophetie couchée en saint Mathieu ch. 24. pour seduire & tromper, s'il estoit possible les Esleus mesme. Dieu, qui n'a iamais permis, ny ne permettra point à l'aduenir, que ce mal-heur aduienne, à tousiours desparty la discretion des Esprits à l'Eglise Romaine, pour les descouurer & monstrier comme au doigt à chacun. Et pour ne parler pas des premiers siecles de l'Eglise; Qui descouurit, ie vous prie, l'an 1524. le faux Prophete & faux Christ, Muntzer, (qui publioit

auoir receu de Dieu mesme, le glaiue de Gedeon, pour instituer vn nouveau Royaume) que la mesme Eglise Romaine ? Qui descouurit les trois faux Prophetes, veus l'an 1550. l'vn à Tolose, qui se vantoit d'auoir le propre esprit de saint Iean l'E-uangeliste, lequel fut bruslé ; L'autre à Paris, qui disoit estre guidé par l'Ange de saint Pierre, & le troisieme à Basle, qui selon Genebrard *in Iulio 3.* disoit auoir l'Ange de Moysé ? Qui, disie, descouurit ces trois faux Prophetes, que la mesme Eglise Romaine ? Qui descouurit encore c'est autre faux Prdphete qui parut enuiron l'an 1540. à Padoüe, lequel se vantoit d'auoir receu l'expresse Mission de Dieu pour accorder le Pape & Luther ; que la mesme Eglise.

Pour Dauid George, qui se disoit *Neuen de Dieu, Nay d'Esprit, Vray Messie, & le troisieme Dauid qui deuoit regner sur la terre*, lequel mourut à Basle l'an 1556. il est vray que ses os furent bruslez trois ans apres sa mort, par Arrest du Senat de cette ville : Mais, ne fust-ce pas avec les Regles de la discretion des Esprits de la mesme Eglise Romaine, que ce Fourbe, & celebre Imposteur fut descouuert & cogneu.

Qui descouurit encor enuiron le mesme temps le faux Prophete du Peru, qui se preschoit estre le Redēpteur du Monde quant à l'efficace, IESVS-CHRIST ne l'ayant esté (disoit-il) que quant à la suffisance; que la mesme Eglise Romaine ? Tous lesquels faux Christs apportoiēt des expositions de l'Escriture, &

des raisons si plausibles, & particulièrement cettuy-
cy, qu'il n'estoit pas possible de plus; Ainsi l'asseure
Ioseph à Costa, *de Nouiss. l. 2. c. 11.*

Pour vous, vous ne vous vâtez pas de la Discretion
des Esprits, puis que c'est vne espece de Prophetie
parmy-vous, laquelle vous méprisez à tout rencon-
tre. De faiët, combien de fois vous est-il arriué de
tourner en risée, ce qu'on vous disoit de ceux d'en-
tre nous, à qui Dieu a gratuitement communiqué ce
grand Don. Risée que vous avez souuent expiée par
des larmes, non de deuotion, mais de rage dans la
Punition que vous en avez ressentie.



Contre les Incrédules.

ARTICLE VII.

Contre les Incrédules, qui deuoient resister &
faire teste à la verité, que l'Eglise Romaine
presche à tous les peuples de l'Vniuers, le mesme
Seigneur a communiqué le Don de Miracles à plu-
sieurs de ses Enfans en ce dernier Siecle, comme
nous verrons cy-dessous, sur la quatrième Marque,
tant pour conuaincre & mettre tout à fait hors d'ex-
cuse cette sorte de Gens, que pour confirmer les Ca-
tholiques encore foibles & chācelans en leur crean-
ce. Car si bien vn miracle ne rend pas la Doctrine,

pour la preuue de laquelle il est fait, euidente, d'une euidence naturelle, ny ayant aucune connexion naturelle entre les deux, il est du moins tres-certain & indubitable, qu'il l'a rend euidente, d'une euidence morale, & comme parlent les Theologiens *euidentement croyable*. Laquelle Euidence force & contraint tout homme bien fait à la croire. Ce que n'ayant pas voulu faire les Iuifs de la Doctrine de IESVS CHRIST, accompagnée des miracles, ils en ont esté iustement & meritoirement condamnez en S. Iean ch. 15. v. 24. *Si ie n'eusse point fait les œuures, qu'autre que moy n'auoit iamais fait, ils n'auroient point de peché, mais maintenant &c.* Paroles, qui font vn Prejugé contre-vous, qui ne voulez point croire la Doctrine que nous vous preschons, bien que confirmée par plusieurs Miracles, que le mesme IESVS-CHRIST a fait & fait encore auiourd'huy par diuers Saincts Personages d'entre-nous. Que si vous ne voulez point croire à nous, croyez au moins aux œuures que nous faisons. C'est le mesme Argument, dont se sert IESVS-CHRIST contre les Iuifs en S. Iean 10.

Mais quant à vostre Pretendue Reformée, elle ne croit plus de vrays Miracles au monde, despuis qu'apres auoir tenté tous les moyens possibles d'en faire quelques vns, elle est demeurée courte. Semblable au Renard d'Esope, qui ne pouuant atteindre aux Cerises, vouloit faire accroire au Corbeau, qu'elles estoient ameres: Au reste si vous n'auiez jamais tasché d'en produire aucun, vous pourriez

en quelque sorte vous couvrir de ce Sac mouillé: Mais apres auoir employé Ciel & Terre, cōme vous aués fait, pour en pouuoir mettre quelqu'vn au iour, ainsi que i'ay monstré par diuerses Histoires en la *Reprobation du Calvinisme*, Partie 2. Marque 6. Vous deuriez rougir de honte de nous venir bailler, comme bonne excuse de vostre impuissance, cette ridicule deffaite aujourd'huy. C'est l'ordinaire des glorieux, que de mépriser ce qu'ils ne peuuent mettre en execution.



Contre la Multitude des Infidelles.


ARTICLE VIII.

Contre la Multitude des Infidelles, qui est le dernier ennemy de l'Eglise Catholique, & par consequent de la Romaine, Dieu qui la sçait pouuoir des armes propres pour triompher de cettui ci, aussi bien que des autres, a tousiours animé, plusieurs de ses Subjets d'vn Zele incomparable, afin que ce qui luy manque au nombre, soit suppléé par le courage & par la valeur. A cest effect il remplit ce Siecle dernier le cœur des B B. Martin de Valence, d'André de l'Olme & de Jean de saint François. Religieux de l'Ordre de S. François, & celuy du B. Louys Bertrand, de Pierre de Cordouë, & de Vincens

cens de la Valée de l'Ordre de S. Dominique: de S. François Xavier: d'André d'Ouiedo, & de Gaspar Barzé, Iesuites, & de cent autres hommes Apostoliques, des mesmes Ordres, & de plusieurs Religieux des Ordres de saint Benoist, de saint Augustin, & semblables; Il remplit, dis-je, leur cœur d'une si grande ferueur, qu'elle les faisoit aspirer à la conquête spirituelle de tout l'Vniuers, Voire tout l'Vniuers leur sembloit trop petit pour assouvir & satisfaire leur sainte ardeur. Car il n'y eut iamais incommodité, obstacle, menace, mal, mort, ny martyre le plus cruel, qui les peut arrester en leur genereuse resolution. Ils deffioient aussi tout ce qu'il y a de plus estrange & formidable sur la terre & dans les abysses de l'Enfer. Leur courage & leur sainte generosité leur a aussi merueilleusement reüssi: Car ils ont acquis des Royaumes & tantost des Mondes entiers au Regne de I E S U S-CHRIST, dans peu d'années.

Mais hélas, quels estes vous, ie vous prie, au regard des Infidèles, voire des Chrestiens & des Catholiques, qui ne font aucun estat ny de vous, ny de vostre Doctrine aujour'huy? Auez-vous point quelques hommes semblables au moindre de tous ceux-cy, qui trauersent les Monts & les Mers, pour aller planter l'Euangile de Calvin ez quatre coings du monde & au centre? Mais comment cela, si vos Ministres les plus hardis, ont à peine de courage, pour aller prescher à trois palmes de leur do-

micile, vne seule fois en leur vie. Mais comment iroient aux Indes, en la Chine, au Iappon, au Brasil, en l'Amerique, au Mexique, accompagnés de leurs femmes, de leurs Enfans, de leurs Nourrices, & de leur Seruante, ceux qui n'osent pas mesme entrer trois iets de Pierre dans l'Espagne, ou dans l'Italie, non pas mesme dans le Comté d'Avignon, sans se dire Medecins ou Marchands, & sans renier en vrays poltrons leur creance, s'ils craignent d'auoir esté recogneus, comme il est autres-fois veritablement arriué? Courageux, comme Panurge, qui ne craignoit rien fors aux hazards. Le pauvre Maistre Pierre du Moulin est destiné de mourrir de male peur, s'il n'y faiët autre chose, puis que les Harquebusades de saint Iean d'Angeli, l'espouuentent estant encore à Sedan, c'est à dire 150. lieuës loin, & ne cesse de fuir de Prouince en Prouince, despuis alors, au moindre bruit de persecution imaginaire qu'il entend, sa conscience l'accusant sans doute d'auoir eu intelligence avec les Ennemis de cest Estat. Comme il en est chargé.



DE LA
SAINCTETE
DE L'EGLISE.

TROISIEME MARQUE.

CHAPITRE I.



'Est vne bonne partie des choses, que i'auois à fournir en ceste Recherche, pour la preuue de l'Vniuersalité de l'Eglise Romaine, & la Particularité de la vostre Pretenduë Reformée, que celle que ie viens de produire en la precedente Marque. Passons ie vous supplie à la troisieme; Je veux dire la *Saincteté*, dont l'Eglise de Dieu doit estre marquée, & voyons laquelle des deux, la Romaine, ou la Vostre Pretenduë Reformée peut s'en glorifier, avec plus de droit & raison.

Que la vraye Eglise soit Saincte, c'est vne Proposition, qu'il ne seroit point necessaire de preuuer icy, puis qu'elle a tousiours fait vn article de Foy, tant parmy vous, que parmy nous, dont il faut voir le 9. article du Symbole des Apostres, que

nous receuons tous en commun. *Je croy l'Eglise Sainte.* Toutes-fois pour clorre la bouche aux plus exhontés, ie m'en vay produire quelques passages tirés du Sacré Texte en confirmation de la mesme Creance.

Tu es toute belle, ma bien-aymée, & nulle macule est en toy; au Cant. ch. 4. Et le Roy Prophete au Psalme 18. *La Loy du Seigneur est sans macule, conuertissant les ames.* Et au Psal. 95. *La Saincteté conuient à vostre maison, (c'est à dire à vostre Eglise) en longueurs de iours (c'est à dire eternellement.)* Mais plus expressement Zacharie en S. Luc ch. 2. vers. 75. *A sçauoir, qu'il nous donneroit, qu'apres estre deliurez de la main de nos ennemis, nous le seruirons sans crainte en Saincteté & Iustie deuant luy tous les iours de nostre vie.* Et l'Apostre en la premiere aux Corinth. ch. 1. vers. 2. *A l'Eglise de Dieu, qui est en Corinthe, aux Sanctifiez par IESVS-CHRIST, appelliez a estre Sainctz avec tous ceux qui inuoquent le nom de nostre Seigneur.* Et aux Eph. ch. 1. vers. 4. *Comme il nous a esleus en luy auant la fondation du monde, afin que nous fussons Sainctz & sans macule deuant luy en charité.* Et au chap. 5. vers. 27. *Afin qu'il se la rendit vne Eglise glorieuse, n'ayant point de tache, ny de ride, ny autre telle chose, mais qu'elle soit Sainte & sans macule.* Et aux Col. ch. 1. vers. 22. *Maintenant toutesfois il vous a reconcilieZ au Corps de sa chair par la mort, pour vous rendre Sainctz sans taches & irreprehensibles deuant soy.* Et saint Pierre en la 1. Epist. ch. 2. *Mais vous*

estes la generation esleuë, la sacrificature Royale, la gent sainte, &c. Qui jadis n'estiez point peuple de Dieu, mais maintenant estes le peuple de Dieu. Passages qui s'entendent de l'Eglise visible, voire selon vos propres Ministres dans leurs Commentaires sur ces passages.

Et pour ne surcharger pas ce papier d'authoritez, acheuons par les deux suiuanes, tirées l'une de saint Optat Mileuitain, & l'autre de saint Augustin, le premier en son liu. 2. contre Parmenian sur le commencement. *L'Eglise est sainte en ses vœux, (dit-il) sainte en ses Sacrifices, sainte en ses Ministres, sainte en ses Ceremonies, sainte enfin en toutes & en chacune de ses Observations, qui sont usurpées pour le Culte de Dieu. Le deuziesme au liu. 2. de ciuit. ch. 28. On ne professe rien en l'Eglise Chrestienne de deshoneste & de mauuais, où les Preceptes du grand Dieu sont insinuez. Mais si l'Eglise de Dieu n'estoit point sainte, qui voudroit s'arrester à ses Decrets? qui feroit cas de ses Enseignemens? qui sanctifieroit instrumentalement les fidelles? Je laisse plusieurs autres estranges inconuenians, qui s'ensuiuroient de l'erreur contraire, lesquels ie rapporterois icy tout au long, si ie ne l'auois desia fait en la Resolution finale des Controuerses.*

La *vraye* Eglise estant donc sainte, comme elle est, & comme nous le deuons croire apres les authoritez, que ie viens d'alleguer icy; il est du tout necessaire & requis qu'elle le soit en ses quatre cau-

les, 1. en ses Fondateurs & Reformateurs, 2. en ses principaux Officiers & Ministres, 3. en son Efficace & Vertu, 4. en ses moyens d'acheminer les hommes à la Saincteté, 5. en ces Fins, 6. en ses Dogmes quant à la Foy, 7. en ses Dogmes quant aux mœurs, & finalement en son Esprit de perfection, car tout cecy faiçt à sa Saincteté consommée.



DE LA SAINCTETE' DE L'EGLISE
Romaine & de l'Impieté de la Pretendue
Reformée en leurs Fondateurs &
Reformateurs.

CHAPITR II.

Que l'Eglise Romaine (car de l'Eglise en general il n'en faut plus douter) soit Saincte en ses Fondateurs (IESVS-CHRIST & les Apostres) c'est vne verité qu'il n'est point necessaire de preuuer, puis qu'elle est encore plus resplendissante que le Soleil mesme. C'est pourquoy nous ne parlerons icy que de ses Reformateurs qui sont sans dispute les Saincts personnages, dont Dieu la tousiours vouluë illustrer, & notamment en ce siecle dernier, le veux dire, *François de Paule, Ignace de Loyola, Fran-*

çois Xavier, Charles Borromée, & Philippe Nerio, la vie desquels nous opposerons & confronterons brièvement icy, avec celle des cinq premiers de vos Reformateurs, Luther, Carlostad, Zuingle, Calvin & Beze; Vous laissant apres à iuger à vous mesmes, quels des nostres ou des vostres meritent avec plus de raison & de verité l'Eloge & la gloire de Reformateurs de l'Eglise de IESVS-CHRIST en ce Siecle.

Pour le grand saint François de Paule, Calabrois, Fondateur de l'austere Religion des P. P. Minimes, qui nasquit, vesquit & mourut miraculeusement, il n'y eust iamais rien de plus mortifié, de plus humble & de plus charitable que luy. Il alla long-temps pieds nuds sur les pierres & sur les espines en Esté, & sur la neige & sur la glace pendant l'Hyuer: En memoire eternelle dequoy, il marcha depuis plusieurs fois sur les charbons ardens sans se brusler, & sur la Mer, ainsi que fit jadis nostre Sauueur, sans se mouiller tant soit peu. Il ne mangea iamais en sa vie chair ny poisson, ny autre chose quelconque qui eut eu vie sensitive, n'y œufs, ny burre, ny ne beut vin excepté qu'il fust malade. Il ieusnoit tous les iours, & pour la veille des grandes Festes de l'année, il demeuroit douze ou quinze iours entiers sans prendre aucune nourriture; Il portoit continuellement le Cilice: En son hermitage, il dormoit sur la terre nuë: En ses Conuans d'Italie il dormoit sur des ais, & estant en

France c'estoit sur des Sermans. Il prenoit la Discipline toutes les nuicts & vesquit sans iamais relâcher d'un seul point en aucune de toutes les autres austeritez iusques à la mort, portant neantmoins d'ordinaire vne face plus Angelique qu'Humaine. Pour son humilité, elle estoit incomparable. Il se comportoit aussi parmy les Religieux, comme le dernier de tous, & trauailloit d'ordinaire aux choses les plus viles de ses Conuens. Mais ce qui est le plus digne de remarque, c'est, que tous les honneurs, que les Papes, & les Roys de France luy faisoient, ne sçeuvent iamais quoy qu'excessifs (Charles huit luy parloit d'ordinaire le bonnet à la main) luy faire auoir autre sentiment de foy, que du plus abiect homme du Monde. Pour sa Charité, elle portoit iusques au rauissement tous ceux qui la remarquoient de pres. Il ne requeroit aussi personne de chose quelconque que par ceste excellente Vertu. *Par Charité ie vous supplie de faire cela*, disoit-il. Enfin sa Saincteté monta iusques à ce point, que les Roys s'estimoient heureux de le voir seulement. En tesmoignage de laquelle il n'y a sorte de Miracles qu'il ne fit. Il marcha sur les eaux & sur le feu sans s'offencer. Il guerit de toutes les sortes de maladies incurables du Monde, d'hydropisies, de Paralysies, de Lepres & semblables. Il donna le marcher aux boiteux, la parole aux muets, l'ouye aux sourds, la veuë aux aueugles, &c. Il rendit qui plus est la vie à huit morts,

'vn desquels auoit demeuré trois iours entiers véritablement mort, & l'autre escrasé par vne poutre.

Quant à saint Ignace Patriarche de la celebre Compagnie de I E S V S, qui frappé de l'amour de I E S V S-CHRIST, se rendit de braue & riche Seigneur qu'il estoit vn pauvre drilleux & queymand. Sa vie porte qu'il alla long-temps par humilité sans chapeau, & tout à fait deschaux d'un pied, & dormit durant plusieurs mois sur la terre nuë, apres auoir passé la plupart de la nuit en oraison : Elle porte encore, qu'il pleuroit continuellement ses pechez, se foüettoit trois fois chacun iour, ne mangeoit qu'une piece de pain receuë par aumosne, ne beuuoit que de l'eau, & demouroit nonobstant ceste grande austerité sept heures tous les iours en oraison à genoux. Et pour acheuer il vescu durant quinze ans entiers d'aumosnes ramassées par les portes, se couurit long-temps de meschans hillons, receus en don, & marcha plusieurs années sans porter rien du tout au dessous de ses souliers. Il faisoit en outre plus de bien à quiconque luy faisoit d'auantage du mal. Bref, l'odeur de ses diuines Vertus luy acquit dans moins de quinze ans des premiers hommes du monde pour en fournir par tout l'Vniuers avec l'estonnement & la confusion, non seulement de l'heresie naissante, mais encore de l'idolatrie, & pour fin. Apres auoir operé de toutes les sortes de miracles durant sa vie, il mourut au grand regret de tous les Chrestiens. Miracles

qui ont continué iusques à presant.

Quant à saint François Xavier ; qui d'entre tous les plus grands Saints, qui furent iamais, exposa plus librement & plus souuent sa vie, & sur la terre & sur la mer à toute sorte de perils que luy, pour estancher la soif, qu'il auoit de la conuersion des Infidelles ? Il endura fort souuent & ioyeusement à cét effect la faim, la soif, le froid, le chaud, & la nudité, tant au cap de Commorin qu'à la Pecherie, & en plusieurs autres endroits des Indes. Bien souuent il a couru les centaines de lieuës à pieds nuds sur les pierres & les espines dans le Japon. Il se resioüissoit excessiuement quand toutes les commoditez de la vie humaine luy manquoient. Sa plus grande gloire estoit de seruir les pauures dans les Hospitiaux, tant en l'Europe qu'aux Indes. Il portoit luy-mesme la clochette par les Villes, où il estoit le plus honoré, il conuioit tout haut le peuple de l'aller entendre, faisant la Doctrine Chrestienne, quoy qu'il fut Legat Apostolique dans toutes ces grandes Contrées. Et fit si bien qu'il acquit luy tout seul douze cent mille Payens à nostre Seigneur dans moins de dix ans. Enfin apres auoir resuscité vingt-cinq morts, & fait plusieurs autres grands Miracles, & conserué sa Virginité iusques à la mort, en la compagnie de toutes les Vertus, propres d'un grand Apostre, il rendit sa sainte ame à Dieu, remplissant de dueil & de tristesse tous les Chrestiens des Indes Orientales & du Japon,

dont il est dit , à iuste tiltre , l'Apostre.

Touchant le grand sainct Charles , laissant à part la modestie Angelique de son Adolescence, il ne fut pas si tost fait Archeuesque de Milan , & Cardinal , qu'il rendit sa maison plus semblable à celle de quelque Ordre Religieux Reformé , qu'au Palais d'un Prince , tel qu'il estoit , & par naissance & par dignité. Et fit d'abord si bien , qu'il changea ceste celebre Cité, d'une infame Iericho , qu'elle estoit , en vne saincte Ierusalem. Il deuint peu à peu si austere , qu'en fin il se reduisit au pain & à l'eau, & son liét, en vne meschante paillasse , viuant chez soy , comme vn chien dans la maison de son maistre , ainsi que là remarqué l'Eloquent Panigarole en l'Oraison Funebre qu'il a faite de ce grand Sainct. Qui pourroit iamais exprimer sa vigilance Pastorale & le zele , qu'il eut du salut de ses Diocesains , durant la grande contagion de Milan : Car non content d'auoir donné tout ce qu'il auoit , sa tapisserie & sa vaisselle d'argent , & iusques à ses meubles plus necessaires , il exposa cent fois sa vie à la mort , afin de pouuoir confesser & consoler les pestiferez : Sa saincteté reluisit avec tant d'esclat aux yeux d'un chacun , que les plus grands Huguenots l'appelloient communément, le *Sainct Papiste*. Il mourut enfin apres auoir embau-mé toute la Chrestienté de l'odeur de ses Vertus, & fit par la vertu Diuine plusieurs grands Miracles, qui continuent encore auiourd'huy à la gloire de

Dieu , & consolation des Chrestiens.

Pour saint Philippe Nerio Florentin, fondateur de la Congregation de l'Oratoire, il fut embrasé d'un si vehement Amour enuers Dieu (la forme , la vie , & l'ame de toutes les Vertus Chrestiennes) que sa chaleur se faisant faire place aux costes les plus proches du cœur , les eslargit bien fort , voire en rompit miraculeusement la quatriesme & cinquiesme , afin que son cœur peut recevoir quelque rafraischissement en l'ardeur celeste, qu'il souffrit l'espace de cinquante ans. La fournaise de ce bruslant Amour fust bien telle , qu'il luy falloit souuent apliquer de linges trempéz en l'eau froide sur l'estomach , tenir en plein hyuer la teste nuë , & qui plus est , ouvrir les fenestres de sa chambre durant la nuit , non seulement sur le plus vigoureux de son âge , mais encore apres huitante ans. Il reçeut au reste vn si grand don de Chasteté de Dieu , que par l'espace de trente ans entiers , il ne ressentit iamais , ny veillant ny dormant , non pas mesme vne seule pensée. Je ne veux rien dire de son humilité , de sa patience , & de ses autres Vertus , parce que le Lecteur les peut facilement recueillir des graces gratuites , qu'il receut de Dieu, sur tout de celles des Miracles , & de Prophetie, dont ie fairay mention en diuers endroits cy-dessous.

Je pourrois dire plusieurs presque semblables merueilles du B. Louys Bertrand Dominicain, du

B. Pere d'Alcantara Recolé, du B. André Theatin, du B. Iean de Dieu, du B. Fœlix de Cantalice Capucin, du B. Iean de saint Guillaume Augustin deschaux, du B. François Borgia Iesuiste, des Venerables Cesar de Bus, François de Sales, Bernard de Paris & de plusieurs autres saints Personages, que l'Eglise & les Ordres Religieux ont produit en ce mesme Siecle. A cause dequoy plusieurs l'appellent *Seculum Sanctorum*, mais ie me contenteray de ce petit nombre, à presant.

Les Reuerends Peres de S. Dominique, se loüent avec autant de modestie que de verité d'auoir eu deux cēs Religieux de leur Ordre, decedez ce Siecle dernier, dont les eminentes vertus, leur meritent tres-justement le tiltre & l'esloge de Bien-heureux & de Saint. Autant en disent & avec autant de verité les Reuerands Peres Recolez: Autant les Reuerands Peres Capucins: Autant les Reuerands Peres Augustins deschaux: Et autant les Reuerands Peres de la Compagnie de Iesus. Ce qu'ils peuuent aisement preuer, & faire voir au besoin par les Chroniques ou Annales de leurs saints Ordres.



*Abbrege de la Vie des cinq Principaux Fonda-
teurs des Erreurs de ce temps.*

CHAPITRE III.

Comparons ie vous prie à ces Miracles de Sain-
teté, les Prodiges de débauche de ce Siecle,
ie veux dire Luther, Carlostad, Zuingle, Calvin,
& Beze; ne disant que ce que nous auons leu dans
les plus moderez de nos Escriuains, afin d'estre plus
aisément creus. Et pour commencer par Luther,
(que plusieurs tiennent estre venu d'un Demon In-
cube;) Qui vid iamais rien de si débordé que cest
Apostat. Ie ne veux point toucher à son ventre,
crainte d'offencer l'oreille du chaste Lecteur. *Luther
ne haïssoit rien tant que saint Ierosme* (dit son Disciple
Auri Faber en ses propos de table fol. 377.) *par ce
qu'il parle tousiours de Ieufne & de Continence. Le Ieufne
(dit le Sieur de Remond sur le propos de l'intem-
perance de ce Sardanapale) estoit sa mort, & la Conti-
nence son Enfer.* Pour la Superbe, à grand peine pou-
uoit-elle monter plus haut; Car non contant de
mépriser & fouler aux pieds saint Ambroise, saint
Ierosme, saint Augustin, saint Chrysoftome, &
tous les autres Peres en particulier, il faisoit enco-
re le mesme de toute l'Eglise primitiue & moder-

ne en Corps , se preferant en l'exposition de l'Escriture Sainte aux Papes, aux Conciles, voire mesme aux Anges. La celebre Escole de Sorbonne, qu'il souloit autresfois regarder, comme l'un des plus grands ornemens de l'Eglise, se veit chargée de mille iniures & mespris, aussi-tost qu'elle l'eut condamné. Ce n'est pas tout. *Si le Concile* (qu'il auoit souuent demandé) *arreste par fortune qu'il faille communier sous les deux especes* (dit-il au liure de *formula Missarum*) *en despit de luy nous n'en voudrons recevoir qu'une seule, ou n'en prendre point pour tout : Et ailleurs. Il veut faire la Loy à tout le monde, & ne la prendre d'aucun. Je ne veux point de Iuge* (disoit-il) *ie veux obeissance. Quand tout le monde en deuroit creuer, ie veux que ce que i'enseigne soit tenu pour bon.*

Pour le regard de sa Foy, iugez-en Messieurs, s'il vous plaist de ces paroles. *Il deuroit estre permis à chacun de croire ce qu'il veut, s'il ne croit bien, il sera assez puny en Enfer.* (disoit-il lors qu'il pretendoit de garantir quelqu'un de ses Disciples du feu.) Pour le regard de ses mœurs. *Tant plus tu es meschant, tant plus tu es proche de Dieu, pourueu que tu retiennes la Foy;* escrit il au Serm. de *Piscat. Petro* : Je n'en veux pas dire d'auantage ; Suffit qu'il confesse en plusieurs lieux de ses Escrits, notamment au liure de *Missa angulari*, fol. 228. du Tom. 7. d'auoir esté persuadé du diable mesme, à renoncer aux Messes priuées, & ailleurs d'auoir esté son intime & familier, voire couché plus souuent avec luy

qu'avec sa Nonnain deuoilée.

Sa mort respondit fort bien à sa Vie, car apres auoir soupé à creuer, & bien bouffonné il expira, reniant le Pape. Les meilleurs Historiens de ce Siecle ont remarqué, non pas trois miracles, mais trois prodiges en icelle; Le premier c'est qu'il voulut se deffaire soy-mesme, la pressentant approcher. Scandale, pour lequel couvrir on fit iurer tous les assistans de n'en rien dire, mais vn de ses valets ne voulut pas garder le secret; Le deuxiesme c'est, que son corps deuint soudainement si puant, que bien que ce fust au mois de Feurier, & qu'on l'eust enfermé dans vne caisse de plomb, si ne laissoit-il pas pourtant de faire fuir tout le monde; Le troisieme c'est, que tous les Demons quitterent les corps de ceux qu'ils possedoiēt à cent lieuës à l'entour, pour se treuver à son conuoy funebre, & accompagner fort pompeusement son ame en Enfer, comme ils confesserent par force d'abiuration apres.

André Carlostad, Archidiacre d'Vvitemberg, & Prestre renié, se maria selon quelques vns le premier de tous ses semblables avec le Scandale de toute la Chrestienté, & la risée de tous ceux qui lisent la Ceremonie, obseruée en ce double & detestable Sacrilege. Ce fut luy, à qui le premier de ce temps, le Diable s'apparut en forme d'homme d'vne extraordinaire grandeur, pour luy enseigner la resuerie des Sacramentaires. Il s'abathisoit tout
ouuer

ouuertement, voire appelloit le Sabbath, le iour de Dieu, & le Dimanche, celui des hommes. Melancton mesme l'appelle, homme sans esprit, sans Doctrine & denué de sens commun. Quelque temps apres auoir fait Secte à part contre Luther, & banny qu'il fut de son Pays, le diable l'estrangla selon les Ministres de Basle au rapport de Bellarmin liure 4. de Eccl. c. 17.

Vlric Zuingle, Chanoine de Constance, Prestre renié, & Pere naturel des Sacramentaires de ce Siecle, si toutesfois Carlostad ne luy querele cét abominable Tiltre, suiuit les pistes de ce puant bouc, se mettant en mesnage avec vne femme, pour appaiser la fureur, où la chair le iettoit, (dit-il.) Entre autres marques de son Esprit infernal, i'ay remarqué celle d'impudence, & d'effronterie qu'il auoit en souuerain degré. Car en la version de ces paroles. *Hoc est corpus meum* il tourne. *Cecy signifie mon corps*, par vne liberté de conscience non encore iamais pratiquée par ses semblables. Il escrit *in subsidio Eucharistiae lib. 3. art. 8.* qu'un esprit s'apparut vn iour à luy, pour luy enseigner la droite exposition des mesmes paroles, la couleur duquel il ne sceut iamais bien discerner, si blanche ou noire. Il fut Nestorien, car au lieu d'escire. *Et verbum caro factum est*, il escrit, *Et verbum caro facta est*. Il fust encore Pelagien: Car il estimoit, que Thesée & Hercule, qui peut estre ne furent iamais, sont maintenant bien-heureux au Ciel. Sa Doctrine,

rēplit de troubles les Suiffes. En fin apres auoir soufflé long-temps les charbons du feu, qu'il y alluma, il en voulut s'il semble, luy mesme estre consommé, comme il fut. Car ayant au son de ses presches assemblé vne grosse armée l'an 1531. contre les Catholiques, il s'y treuua le premier à la teste d'un Bataillon, la picque à la main, & bien-tost apres estendu sur la pouffiere parmy les morts. Son Corps, apres que les goujats en eurent enleué la graisse, de laquelle ils froterent leurs bottes, fut liuré au Bourreau, pour estre bruslé. Luther fit son Epitaphe en ces mots. *Zuingle est mort & damné, voulant comme vn Larron & voleur contraindre les autres à suiure ses erreurs.*

Iean Calvin Prebendier de Noyon, fils de la Concubine d'un Prestre, selon Genebrard, apres auoir changé 2. ou 3. fois de nom, à l'occasion de ses infames pechez, & passé ses ieunes ans aux estudes, deuint peu à peu le detestable Boutefeu de sa Patrie: Il estoit vindicatif, implacable, tousiours cholere & pour couronne de l'œuure souuerainement Orgueilleux: Car il ne se preferoit pas seulement aux Peres & Docteurs de l'Eglise Catholique, mais encore à Luther, bien qu'il en eust receu toute la plus sublime Doctrine. Dit, que Luther & sa suite ont platré le mal, au lieu de le guerir, c'est à dire, qu'ils n'ont pas esté du tout si desesperez qu'il les desiroit. Voila pourquoy parlant à ses plus intimes & familiers. *Il faut apliquer à bon escient*

le caudere (disoit-il) & emporter la piece entiere. C'est à dire abbatre les Eglises & les Autels, massacrer les Prestres & Religieux, monstres les dents à ses souuerains, prendre les meilleures Villes, tuer les sujets, violer, voler, bref fouler aux pieds tout droit Humain & Diuin, comme l'ont practiqué fort long-temps apres ses Sectaires.

Et afin que le Lecteur ne iuge pas que i'impose à cét homme, est-il pas vray qu'il permet, en faueur des Libertins, la desobeyssance aux Prelats de l'Eglise: En faueur des mutins, la desobeyssance aux Magistrats Catholiques: En faueur des Incontinans, les Mariages deffendus par les Loys diuines & humaines, tels que sont ceux de nos Apostats; En faueur des Gourmands, l'usage de la chair en tout temps; En faueur des hommes Sensuels, l'usage de toutes les sensualitez au manger, boire, dormir, vestir, &c. En faueur des menteurs & calomniateurs, le mensonge, la mesdisance, le tout afin de grossir plus facilement & plustost sa Secte, comme il a fait.

Il vouloit bien honorer Luther selon ses quintes, mais il enrageoit de despit quand les autres le faisoient. *C'est nous (dit-il en sa Reformation presentée aux Roy de France fol. 64.) Qui auons remis sus l'honneur de Dieu.* Tout le monde scait au iourd'huy la cause pour laquelle il sortit de Noyon avec la fleur de lys sur l'espaule. Sa mort tesmoigna qu'elle auoit esté sa vie. Car il finit chargé

de neuf horribles maladies, outre le desespoir, avec lequel il vomit son ame, maudissant l'heure qu'il auoit iamais estudié & escrit, ce qu'il tascha neantmoins de dissimuler, afin que les assistans n'en fussent scandalizez; A cause desquelles maladies, Genebrard compare à bon droit sa mort à celle d'Herode. Je ne veux que le seul Beze en tesmoin de cecy, qui l'a fait peindre en ses pourtraicts d'une forme horrible, avec vn visage funeste, vne barbe de frenetique, la bouche beante & presque semblable à celle d'un damné.

Theodore de Beze fut Prestre & Prieur de Lonjumeau & fort long-temps l'homme des Dames. Estant encore ieune Escholier de droict à Orleans, il composa vn Poëme tres-expressif de l'amour Sodomitique, dont il aymoit vn ieune homme appellé *Audebert*, que Banfillon, Ministre d'Ayguemorte, distilleur, alchimiste, &c. tasche d'excuser, asseurant le tout auoir esté dit par Hyperbole, ou excez d'amour, ou peut-estre par charité Reformée. Digne Aduocat d'une si digne cause, Mais il se trompe, car la Cour ayant eu nouvelle de ce Poëme, Ordonna que son Autheur comparoistroit en personne, dequoy effrayé apres auoir tiré par anticipation les rentes de ses Benefices pour quelques années d'un certain, & tout de ce pas couru vendre sans reserue aucune les mesmes Benefices à quelque autre, & rauy la femme de son Tailleur, pour comble d'un indicible desbordement, il s'en-

fuit à petit bruit à Geneue, non pour euter la per-
secution (dit Cayer autresfois Ministre) mais la
meritoire punition de ses crimes, s'y faisant appel-
ler durant quelque temps, *Tibaud de May*. Nom
d'une iolie rencontre, dit le Sieur de Raymond,
qui raconte tout ce mesnage. Ses rentiers crient,
mais il leur fut force d'auoir patience iusques au
Colloque de Poissy, auquel temps les Eglises Re-
formées se cottiserent pour faire ceste restitution,
quoy que condamnée par Calvin. Il laisse qu'il se
remaria pour la troisieme fois en l'aage de 70. ans.
Action sans exemple parmy les Ecclesiastiques dans
toute l'Antiquité. Enfin il mourut l'an 1605.
comme il auoit vescu; Car ce fut apres auoir per-
du l'entendement, en punition de ce qu'il n'auoit
point daigné s'en seruir, lors qu'il le pouuoit &
deuoit faire. Ses preparations à la mort, estoient
de composer encore de follatrerries de vers; Car se-
lon ceux qui l'ont mieux cogneu, la folie le suiuit
toufiours depuis les langes iusques au Suaire.

Voila quels ont esté les plus celebres personna-
ges de l'une & de l'autre Eglise, la Romaine & la
Pretendue Reformée en ce temps. Iugez mainte-
nant, *Mesieurs*: Quels des deux, meritent plus
raisonnablement l'honneur & la gloire de la Refor-
mation de l'Eglise, les nostres ou les vostres? Iu-
gez maintenant: Quels des deux sont ces *Imparfaiets*,
que Dieu vouloit estre rebutez de son Culte au
Leuitique 21. *Quels des deux sont ses estrangers &*

incirconcis de corps & de cœur, dont il se plaint en Ezechiel ch. 44. qui s'estoient ingerez de servir en son Temple? Quels des deux, enfin, eust employé Judas Machabée à restablir & remettre sus le Culte diuin, s'ils eussent les vns & les autres vesçu de son temps, puis qu'il ne choisit que *des Prestres irreprehensibles & ayant leur volonté en la Loy de Dieu*, comme dit le sacré Texte au liur. 1. des Machab. ch. 4. vers. 42.



DE LA SAINCTETE' DE L'EGLISE

Romaine & Impieté de la P. Reformée en

leurs principaux Officiers &

Ministres.

CHAPITRE IV.

L'Eglise Romaine n'est pas sainte en ses Fondateurs & Reformateurs seulement, elle l'est encore en ses principaux Officiers & Ministres. Ce que ie preue efficacement de ce qu'ils sont separez du peuple & consacrez irreuocablement à Dieu, par le Sacrement de l'Ordre & le Sacerdoce. Qui est vne espece de Saincteté, preschée, allegoriquement pour nous, & litteralement pour les Iuifs, dans le sacré Texte en l'Exode 13. vers. 2. *Sanctifie moy ton premier nay, ouurant la matrice.* Et en saint

Luc. chap. 2. vers. 23. *Tout masle ouurant la matrice sera appellé Sainct au Seigneur.* C'est à dire, offert au Seigneur. Il ne nous faut point d'autre preuve de ceste verité, que celle que nous tirons du nom de Clerus, (qui vaut autant que part ou portion) & que la pratique ordinaire de nos Papes, de nos Cardinaux, de nos Patriarches, Archeuesques, Euesques, Prestres & Religieux, qui tous sont, non seulement separez & sequestrez du monde au principal, puis qu'ils n'y peuuent plus auoir de maison, plus de suite, plus de succession, ny de posterité legitime.

Mais en vostre Pretenduë Reformée, ses Officiers y sont-ils sanctifiez & consacrez pour iamais au Seigneur ? Y sont-ils irreuocablement dediez à son sacré Culte ? Non pas, s'il est vray, que plusieurs Ministres ayent souuent changé leur vacation en vne autre bien differante, comme ie l'ay veu en la personne de quelques-vns du Languedoc & du Dauphiné, l'un se rendant Medecin, l'autre Aduocat, l'autre Officier, l'autre Preuost dans les armées, l'autre Capitaine, l'autre Canonier, l'autre Pedant, l'autre Historiographe, &c. Y sont-ils separez en quelque chose du peuple ? N'y sont-ils pas tous volontaires en ce qu'ils font pour Dieu ? Qu'elle differance fait-on chez vous, ie vous prie entre vn Ministre, & vn Medecin, ou vn Marchand, ou vn Menestrier, quant à l'habit ? Qu'elle differance spirituelle mettez-vous entre ceux qui se di-

sont tenir le gouvernail du Navire de l'Eglise de IESVS-CHRIST chez vous, & les autres hommes lays & populaires : Quelle differance spirituelle mettez-vous encore entre le Serenissime Roy d'Angleterre, (qui se dit à l'instar du grand Moscouite, Chef de l'Eglise de ses Royaumes,) & ses sujets ? Entre Messieurs des Estats de Holande, qui president souverainement aux Controuerfes de la Foy, & le reste du peuple ? Entre les Princes d'Allemagne qui se comportent, comme Papes dans leurs Estats & les moindres de leurs Vassaux ? Entre les Magistrats de Suisse, & les Seigneurs de Geueue, qui iugent en Souverains, des difficultez, dont les Ministres ne peuvent tomber d'accord, & les moindres freres en Christ, leurs Sujets ? Point pour tout. Car ils ne sont, n'y sacrés, ny destinez au service de Dieu, non plus les vns que les autres, comme vous sçauiez tres-bien.

Pour vous, Vous ne mettez pas d'auantage de differance spirituelle en France entre vous, & vos Ministres, que ceux-cy en mettent en Angleterre, Holande, Allemagne entre eux & les leurs. Car les plus Ignorans d'entre vous y sont esgaux & bien souuent Superieurs des pauures Ministres. En effect, outre que vostre Pretenduë Eglise y est baillee à garder en commun, aux Ministres & à leurs Surueillans, comme apert au chap. 8. art. 3. de la Discipline. Vous ordonnez en l'art. 6 du meisme chap. que les meismes Surueillans pourront depo-

ser vos Ministres, s'ils disēt chose, non qui soit, mais qui sēble enorme à ces Idiots. Ce qui peut bien facilement arriuer, attendu l'enorme ignorance de la plus-part d'eux : Qui est à faire ce que faisoit ceste femme, dont parle *Epiph. Heresie* 59. laquelle mettoit son chaperon à ses pieds & ses souliers sur sa teste.

Il y a bien d'avantage, Luther & Calvin, non contans de communiquer le Sacerdoce à des hommes laïcs, l'ont encore cōmuniqué par charité masculine à des femmes, ainsi que j'ay dit plus au long ailleurs. A cause dequoy on n'a pas seulement entendu prescher de vos femmes en Allemagne, en Angleterre, voire en France auprès de Grignan en Prouence, & à Chassiers en Viuares selon le R. Pere Gautier en sa Table Chronographique: Et depuis peu Marguerite Fillonne dans Nismes durant la contagion de l'année 1640. Il est vray qu'au lieu du Temple, elle prenoit les places publiques, pour faire toutes les Fonctions des Ministres, qui auoient par excez de courage & de charité abandonné la ville. Toute la France sçait comme Madame de Rohan est montée souuent en Chaire à la Rochelle pour exhorter les Rochelois durant le Siege à manger ses Cheuaux propres, plustost que de se rendre au Roy : Il y a bien plus c'est qu'on a veu l'Eglise d'Angleterre tombée en quenouille & conduite souuerainemēt aux choses spirituelles par vne femme, laquelle s'en disoit la Pa-

peffe. Misere approachée à celles des Schismatiques Grecs, dont les Patriarchats & Prelatures sont d'ordinaire pour les plus indignes, puis qu'elles se bail-
lent par le Turc au plus offrant & dernier encherif-
seur. C'est le traictement & le chastiment, que me-
ritent ceux qui mesprisent d'obeir au Pasteur & Pere
Vniuersel des Chrestiens, que d'estre contraints d'o-
beir à des Princes seculiers, voire à des femmes, en
ce qui regarde la conscience, où ils entendent, non
plus que Maistre Guillaume en sagesse.

Tout cecy estant veritable, ie voudrois bien
sçauoir à quoy peut estre bon vn Ministre parmy
vous, possible que c'est, parce qu'il vous presche,
baptise & donne la Cene. S'il n'y a que cela, ie
m'estonne que vous en ayez vn seul, aux gages, que
vous auez les vostres quoy que petits. Car de gra-
ce; A quel propos de Ministre, pour vous pres-
cher si chasque fidelle entend, non seulement l'Es-
criture saincte aux choses qui regardent le salut,
mais la peut, qui plus est, encore expliquer à l'ayde
de son particulier sainct Esprit, sans aucune erreur
comme vous le croyez? A quel propos de Mini-
stre pour baptiser, si le Baptesme n'est point neces-
saire à salut, & si vos Enfans naissent tous Saincts,
comme vous l'asseurez hardiment? A quel propos
enfin de Ministre, pour vous donner la Cene, si
chacun de vous peut participer au corps de I E S V S-
C H R I S T par le moyen de la Foy, comme vous
le dictez encore à tout propos.




DE LA SAINCTETE' DE L'EGLISE

*Romaine en son Efficace à conuertir de toutes
les sortes d'hommes à Dieu.*

CHAPITRE V.

LE troisieme Chef de la Saincteté de l'Eglise consiste en l'efficace de son Esprit, & l'efficace de son Esprit consiste à conuertir les hommes à Dieu, & les changer par le moyen de sa sainte parole du mal au bien, & du bien au mieux, & du mieux au tres-bon & parfaict. *La Loy du Seigneur* (dit le Prophete au Psal. 18. *est sans macule, conuertissant les ames.* Et l'Apostre aux Hebreux chap. 4. vers. 12. *Car la parole de Dieu est viue & efficace, & plus penetrante que tout glaiue à deux tranchans.* Or que ceste efficace se treuve dans l'Eglise Romaine, aussi bien auiourd'huy qu'aux Siecles premiers du Christianisme, ie m'en rapporte non seulement en ce qu'elle a conuertiy vn nombre innombrable de Payens, Iuifs, Heretiques, Apostats à la vraye Foy, mais encore les millions des Schismatiques à l'Obeysance enuers le souuerain Chef de l'Eglise le Pape, les milliers de pecheurs scandaleux à la Grace & bonnes mœurs, & plusieurs iustes à la Saincteté consommée. Disons trois mots de chacune de ces conuersions.



La Conuersion des Payens & Iuifs.

ARTICLE I.

IL est vray, l'Eglise Romaine a conuertty vn nombre innombrable de Payens en plusieurs Royumes des Indes Orientales depuis l'an 1497. qu'Emanuel, Roy de Portugal en fit la glorieuse conqueste (commencée par Iean, second du nom, son predecesseur sur l'industrie & valeur de ce grand Capitaine Vasquez de Gama Portugais) apres la donation que luy en fit Martin 3. (communément dit cinquiesme) à l'instance du Prince Henry son grand Oncle, le plus excellent & le plus pieux Prince de son Siecle. Je serois ennuyeux, si ie voulois nombrer icy, ie ne veux pas dire les Villes, mais mesme les Prouinces, voire les Royaumes Idolatres, qui ont recogneu depuis à lors & recognoissent encore auiourd huy le Pape, comme Souuerain Pasteur & Pere spirituel de tous les Chrestiens, dans l'Asie, dans les Indes, & dans les Emphyres de Mogor, de Narsinga, de Bengala, du Pegu, de la Chine, du Iapon & ailleurs par tout l'Orient comme encore dans l'Affrique, en l'Empire d'Ethiopie, en l'Empire de Monomotapa, au Royaume de Congo, & presque par tout le long de la coste de ceste

grande partie du monde, allant du Portugal, aux Indes Orientales, par la mer Australe & Ethiopique. A cause dequoy ie renuoye le curieux Lecteur à l'Histoire des mesmes Indes Orientales du Pere du Iarric Iesuiste & à Thomas Bosius des *signes de l'Eglise*, liur. 4. chap. 2. & 3.

Iugez, Messieurs, s'il vous plaist, du nombre que le seul Sainct François Xauier y a conuerty, qui s'en va iusques à douze cent mille Idolatres. Quel peut-estre celuy de plusieurs autres Religieux tant de sa Compagnie, que des autres, de sainct Benoist, de sainct Augustin, de sainct Dominique, de sainct François (Recolez & Capucins ensemble.) Il y auoit desia trois cēs mille infidelles cōuertis à la Foy de IESVS-CHRIST au Iappon, auant la derniere persecution generale, le zele desquels a esté non moins admirable, que celuy des premiers Chrestiens, car iusques aux petits enfans couroient au Martyre comme à des festins. Durant ceste persecution, il y a eu plusieurs Martyrs de tous les Ordres susdits. Et les derniers aduis de la Chine portēt qu'il y a desia plus de cent mille Chrestiens, dont plusieurs sont des plus grands du Royaume.

Que si ie me tourne aux Indes Occidentales, en l'Amerique, au Peru, au Brasil, au Mexique, en la nouvelle Espagne, & dans les autres Prouinces de ce nouveau Monde, descouuert par Christoffe Colomb l'an 1494. & acquis à Ferdinand cinquiesme du nom, Roy d'Espagne par la donation que luy

en fit Alexandre V I. (dont se plaint Maistre Pierre du Moulin en la 2. Partie de son *Bouclier de la Foy*, page 236.) combien y treuverons nous d'Infidelles (entre lesquels on conte plusieurs Roys & Reynes & plusieurs Princes & Princesses) conuertis à la Foy de nostre Seigneur IESVS-CHRIST par le Pere Buc-cil, Catalan, de l'Ordre de S. Benoist, suiuy de Onze Prestres de son Ordre, non moins doctes que deuots. Combien par le B. Louys Bertrand & le pere Pierre de Cordoüe, tous deux Espagnols & Religieux de l'Ordre de saint Dominique, accompagnés de plusieurs de leurs Freres Religieux. Combien par le B. Martin de Valence Recolé, Vicair du Pape au Mexique, accompagné de Onze de ses Freres Religieux. Combien par les peres Iesuistes au Brasil & en la nouvelle France. Plusieurs bons Historiens, notamment François Loppés de Gommarra, qui a recueilly l'histoire Vniuerselle des Indes Occidentales, escriuent, que les susdits douze Religieux de saint François, baptiserent douze cents mille de ces Barbares dans moins de six ans c'est à dire, dès l'an 1524. iusques à l'an 1530.

Le mesme François Loppés de Gommarra escrit au liur. 2. chap. 95. de son Histoire, que le nombre des Ameriquains du Mexique conuertis à IESVS-CHRIST, arriua selon quelques-vns à huit millions, & selon quelques autres à dix, & selon quelques autres à quatorze. Surius Chartreux escrit en l'année 1548. de son Histoire, que le nombre de

ceux qui auoient desia receu le Baptesme en ce monde nouveau estoit si grand, qui ne cedit point à celuy des Chrestiens du vieux. Il y a long temps, (dit-il) que au seul Royaume de Mexique, il y auoit desia 80. Monasteres. Et en la marge on lit ces paroles. Quelques-vns escriuent qu'à present il y a 6000. Monasteres & 600. Eueschez. Plusieurs Royaumes Payens, proches du Iappon & de la Chine, ont esté depuis conuertis à la Foy Catholique, comme encore vn Monde de particuliers dans l'Ethyopie & du costé de Tartarie & ailleurs.

L'an 1575. les Religieux de saint Augustin, conduits par le Pere Martin de Herrada Nauarrois, natif de Pampelonne s'en vont aux Isles Philippines, où ils conuertissent dans peu de temps cent mille Infidelles à I E S V S - C H R I S T.

L'an 1585. trois Rois du Iappon, conuertis avec tous leurs Sujets à la Foy Chrestienne, enuoyent leurs Ambassadeurs à Rome tesmoigner à Gregoire XIII. leur Obeissance au saint Siege.

L'an 1605. le Roy de la Serre en l'Inde Orientale avec ses deux Freres & ses quatre enfans reçoivent le Baptesme & embrassent la Foy de I E S V S - C H R I S T.

L'an 1609. les Peres Augustins & les Peres Carmes deschaux entrent en Perse où ils conuertissent plusieurs à la mesme Foy de I E S V S - C H R I S T. Les mesmes Peres Augustins, outre cela baptisent le fils du Roy d'Ormus.

Enuiron l'an 1612. le Roy de Congo enuoye vne superbe Ambassade à Paul V. luy soumettāt sa personne , les sujets & tout son Royaume avec priere de vouloir prendre vn grand soin de leur salut l'effect de laquelle Ambassade a esté accompli sous Urbain VIII.

L'an 1614. le Pere Louys Sotelle, Recolé de Seuille en Espagne , de sang Royal , conuertit le Roy & le Royaume de Voxu au Iappon. Dont il fut Ambassadeur pour ledit Roy au Pape Paul V. afin de l'asseurer de la conuersion de ce grand Roy & de tous se Sujets.

Pour les Iuifs , outre vn grand nombre, que le pere Thomas de Iesus, Augustin deschaux, conuertit au Royaume de Marroc, enuiron l'an 1550. & ceux que plusieurs autres Predicateurs Apostoliques ont conuertis aux Indes , le Pape Pie V. non moins pie de faict que de nō, en conuertit luy tout seul , trois cens à Rome avec Elie , leur Surintendant, l'an 1566. Il n'y a celuy qui ne sçache, comme il se passe fort peu d'années , que plusieurs de telles Gens ne se conuertissent à la Foy aux principales Villes de l'Europe, qu'ils habitent & nommément dans Auignon, dont ie suis tesmoin oculaire d'vn bon nombre.


Or qu'il vous soit iamais en vostre vie arriué de conuertir à IESVS-CHRIST les millions des Payens ; C'est trop ; les milliers , c'est encore trop ; les centaines , c'est encore trop. Je n'en veux qu'vn tout
seul

seul, vous ne l'oseriez soustenir au moindre de ceux, qui font estat de sçauoir ce qui se passe dans le monde, depuis vostre naissance, aussi ne sommes nous pas gens à croire cela de vous. Je sçay bien l'Equipée de vos Ministres, que Ville Gaignon conduisit l'an 1555. en la nouvelle France, & comme ils tasterent de gagner les Barbares, qu'ils y treuuerent, non tant à vostre Eglise qu'à vostre Estat. Mais ie sçay bien aussi, comme ils furent confus & confondus, en leurs entreprises, n'ayans sçeu buriner vn seul Principe du Christianisme dans l'ame d'aucun de tous eux, en deux ans entiers qu'ils y furent; Je sçay bien encore comme la Reine Elizabeth enuoya l'an 1568. François Drac en la Virginie à mesmes fins, mais ie sçay bien aussi, qu'elle n'y receut que sa courte honte; cest Explorateur de nouveaux Mondes, se treuuant contraint de reprendre bien-tost apres les routes d'Angleterre, butiné qu'il eut tout ce qu'il peut attraper sur ces pauvres Indiens; Je sçay bien encore, comme les Anglois ont tasché plusieurs fois & nommément l'année 1577. de s'habituer en l'Amerique par les Nauigations de Martin Forbisher, mais sans aucun effect: Depuis lesquels voyages vous n'auiez iamais eu le courage d'y retourner, non pas mesme de regarder le chemin par ou l'on y va.

Nous n'ignorons pas que les mesmes Anglois, les Holandois & Rochelois, ne soient allez, & n'aillent encore aujourd'huy mesme, tant en ces Indes

Occidentales qu'aux Orientales pour y desrober, & les plus gens de bien d'entr'eux pour y marchander. Mais pour y Christianiser les Payens, ce sont besongnes auxquelles ils n'entendent notte. Cela est bon pour les pauvres Religieux de saint Augustin, de saint Benoist, de saint Dominique, de saint François, & pour les Peres Iesuistes, qui ne sçauent ny marchander, ny desrober, n'y picorer.

Des Iuifs, ie n'entendis iamais en ma vie qu'aucun d'entre telles gens se rendit Reformé, non plus que des Turcs, ou semblables personnes infidelles. Si vous sçauiez le contraire, dictes-le nous librement, mais que ce ne soient pas des contes à vostre accoustumée.



*Le Retour des Heretiques & Apostats
à l'Eglise Romaine.*

ARTICLE I I.

POUR les Heretiques, (ie veux dire vous mesmes, excusez moy s'il vous plaist,) Si ce que le R. Pere Richeomme escrit en sa *Consolation à la Reine Mere, sur la mort du grand Henry son Espoux*, est vray, comme il est. Que les Religieux de son Ordre ayent reçu du Regne de ce grand Monarque, soixante mille des vostres à la Foy Catholique, Apo-

stolique & Romaine, dans ce seul Royaume ; le vous laisse à coniecturer quel doit estre le nōbre de ceux que les Religieux de tous les autres Ordres, & que les Prelats, Predicateurs & Prestres zelés ensemble y peuuent auoir receu depuis cinquante ans, que vous estes sur le retour & le reflux. Quelques bons Escriuains assurent, que depuis la perte que vous fistes de ce Prince, de glorieuse memoire, vous auez perdu plus de cinquante mille hommes de qualité, dont la pluspart sont Gentil-hommes, Prefidens ou Conseillers du Roy, dans ses Cours souveraines, ou pourueus des plus honorables charges du Royaume.

Il ne faut point d'autres preuues du grand nombre des Conuersions des vostres à la Foy de l'Eglise Romaine, que ce que nous auons veu ces années passées de nos propres yeux. Car où vous souliez assembler autresfois comme sans peine, les cinquante mille hommes dans ce seul Royaume, contre vostre Souuerain, vous n'en auez iamais sceu mettre dix mille ensemble ; pendant vostre derniere Rebellion.

Les enfans sçauent auioird'huy, que non seulement vn tres-grand nombre de personnes particulieres d'entre vous, mais encore plusieurs centaines de familles honorables, du nombre desquelles s'en treuuent plus d'une douzaine dans la seule ville de Nismes, se sont, par la grace de Dieu, conuerties de la bonne sorte à la foy de l'Eglise Romaine

depuis trente-cinq ou quarante ans. Il y a mesme desia plusieurs Bourgs & Villages en France, où se treuuoit autresfois vn grand nombre des vostres, dans lesquels on n'en scauroit trouuer vn à presant. Ces années dernieres, Foix, Aubenas, Bagnols, saint Amand en Berry, & autres lieux du Dauphiné & Prouence congedierent pour iamais leurs Ministres, tous leurs habitans, ou la plus grande partie d'eux, s'estant iettez dans le giron de l'Eglise Catholique Apostolique & Romaine, de laquelle leurs Peres s'estoient auueuglement separez. Le celebre François de Sales à conuerty luy tout seul à la Foy Catholique quatre mille des vostres aux enuirs de Geneue, autant en a fait le Sieur Petit, Ministre de Geneue, apres s'estre glorieusement conuerty luy mesme à la mesme Foy. Le Pere Athanase Molé de Paris, Capucin, assez cogneu dans ce Royaume en a conuerty plus de douze cens, dans trois ou quatre ans, entre lesquels il faut mettre les Enfans du Sieur de Casaubon, & quelques Dames de grande naissance, & sur tout Monsieur du Fraisne premier Pair de la Rochelle. Et le Pere Ange de sainte Claire de Montfalco, Augustin delchaux en a conuerty environ cinq cens &c. Je laisse à Dieu seul toute la gloire de la Conuersion d'environ cent cinquante personnes des vostres, à laquelle sa Diuine Majesté, m'a fait la grace de cooperer depuis 30. ans en diuers lieux du Dauphiné & Prouence & sur tout dans Auignon.

Combien vous nommerions nous, (si nous en voulions faire le calcul avec vne exacte recherche) d'hommes d'entendement & de qualité nés, nourris & enuieillis en vostre Reformation Pretendue, qui luy ont tourné le dos sur les derniers Periodes de leur vie, pour se ietter entre les bras de l'Eglise Romaine, nonobstant toutes les charlateries de vos Ministres. Preuve inuincible de l'efficacité de son Esprit, à conuertir les Errans à sa creance. Mais que dites-vous des celebres Conuersions du Connestable de l'Esdiguieres & du Duc de l'Esdiguieres son petit Fils & Heretier, Gouverneur à presant du Dauphiné, & du Sieur de Canaples son Frere? Que dites-vous de celles du Duc de la Trimouille, du Duc de Boiillon, de Monsieur d'Andelot, Aysné du Marechal de Chastillon, du Marquis de Montgomery, du Marquis de Rhosni & du Comte d'Orual son frere? Que dites-vous encore de celles du Sieur Marquis de Roquelaure, du Sieur Marquis de Fontrailles, du Sr Marquis de la Charse, du Sieur de S. Priuas Seneschal de Nismes, & de plusieurs autres Seigneurs de marque, suiuis de quelques-vns des plus notables Officiers de sa Majesté, & de diuerfes Dames des plus qualifiées du Royaume, & particulièrement du Dauphiné, voire de quelques Ministres des plus celebres de France? La misere les a-t'il reduits à cela?

Quant à nos doubles Apostats, dont vous avez fait iusques à presant vos Apostres, il y a des hom-

mes fort intelligens & practicts en vos Mysteres, & qui scauent tout ce qui se passe de plus secret parmy vous, qui m'ont assure plusieurs fois, comme nous en recouurons d'ordinaire de cent, les quatre vingts & dix. A cause dequoy, vous ne vous fiez plus à telle sorte de gens; le ne le vous conseille pas aussi; Car à n'en point mentir ils ne sont que l'escume des Conuents, que les bouillons de la chair ont ietté dehors, ou si vous aymez mieux, qu'autant de corps morts, que la Mer toute pure de l'Eglise Catholique a iettez sur vostre riuage.

Touchant les hommes Laïcs qui nous ont tourné le dos, pour aller à vous, ce n'est pas vous qui les auez changez, ne vous en desplaise, ce sont leurs impenitences, qui ont fait ceste pitoyable Metamorphose. Et de fait, quand vostre Reformation n'auroit pas encore esté du temps de leur Apostasie, ils ne nous eussent pas moins dit Adieu. Car leurs vices les eussent portez à la fin à se rendre Turcs ou Athées, tel estant d'ordinaire le rendez-vous de ceux qui ont tourné le dos à la Pieté & à la vraye Vertu. I'excepte de ce nombre quelques ames simples, que le Torrent de vos fureurs, sous vn faux pretexte de Religion Reformée, nous rauit tout au commencement de vostre reuolte.



*Le Retour des Schismatiques & Separés
à l'Eglise Romaine.*

ARTICLE III.

L'Eglise Romaine, non contente d'attirer dans sa Creance, les Payens, Juifs, Heretiques & ses propres Apostats, y attire & ramene encore les Schismatiques & Separés. Or afin de donner plus de iour & de lumiere à la verité de ceste proposition, il faut sçauoir qu'il y auoit ces derniers Siecles huit diuerses Sectes des Schismatiques ou Separés en Oriēt, ou Midy. Celle des Grecs; Celle des Georgites; Celle des Armeniens: Celle des Iacobites: Celle des Maronites; Celle des Cophtes: Celle des Abyssins, & finalement celle des Chrestiens de S. Thomas. Lesquelles se peuuent toutes reduire à trois. La premiere est celle des Grecs, sous laquelle ie comprehens les Georgites & Maronites avec les Moscouites & Russiens, La deuxiesme est celle des Nestoriens, sous laquelle i'assemble les Armeniens avec les Chrestiens de saint Thomas: La troisieme est celle des Euthychiens, ou Dioscorites, sous laquelle sont les Ethiopiens ou Abyssins, avec les Cophtes, autrement Chrestiens de la Ceinture; Desquelles huit Sectes, l'Eglise Romaine en a dela ramenés deux entieres à sa creance. (Les Maronites

& les Chrestiens de sainct Thomas.) Ceux-là (qui composent environ vingt mille familles) depuis quelques siecles, par les trauaux & labeurs des Religieux de sainct François qui sont en la Palestine; Ceux-cy (qui sont plusieurs millions de personnes, dispersées en plusieurs Royaumes, dont les Roys sont Payens, ou Mahometans) depuis l'an 1598. par le zele incroyable d'Alexis de Menezés Archeuesque de Goa, Religieux Hermite de sainct Augustin, secondé par celuy des Peres Iesuites des Indes.

Pour les autres Sectes, elle a trauaillé si heureusement apres leur Conuersion en ce Siecle, qu'elle a desia ramené dans son enclos les millions de chacune des trois principales. En effect, vn grand nombre des Royaumes du Prestre Iean, infectés des erreurs d'Eutyches, commencent depuis quelque temps à recognoistre comme Souuerain Pasteur de l'Eglise Vniuerselle, l'Euesque de Rome; A ce premierement persuadez & portez par l'exemple de Dauid leur Empereur, lequel escriuit l'an 1524. au Pape Clement VII. pour rentrer avec son Estat dans la Communion de l'Eglise Romaine, *promettant (dit Genebrard in Clemente VII.) Obeysance au mesme Pontife, & requerant sa Benediction pastorale.* Ses lettres, que i'ay leuës quelquefois telmoignent vn zele & ferueur admirables enuers le Sainct Siege.

Autant en fit l'Empereur Claude, son Successeur

l'an 1557. sous Paul 4. en temoignage dequoy il receut fort charitablement & humainement les Peres Iesuistes, que le mesme Pape luy enuoya, pour le confirmer en la Foy Catholique, Apostolique & Romaine.

L'Empereur, qui regnoit dans ce grand Empire, il y a quelques 25. ou 30. ans, nommé, *Seltan Coget*, *Ceguede* & son Frere *Ras-Celachristos*, & plusieurs des plus Grands de ce mesme Empire accompagnez de beaucoup des Religieux, & des plus Doctes Abyssins & d'une multitude incroyable de peuple, sont ja Catholiques Romains, nommément aux Royaumes de Goyama, de Dambia, d'Arguia, d'Adaxa & ailleurs. Et Dieu concourant au zele de ce grand Monarque, luy a déjà donné deux ou trois signalées victoires contre ses Sujets, rebelles à l'Eglise & à luy. Par le moyen desquelles on coniecture la conuersion Vniuerselle de cette Monarchie à la Foy de l'Eglise Romaine, si l'inconstance de la nation, ne destruit l'œuure de Dieu & de ses seruiteurs, comme il est à craindre.

Et pour passer de l'Affrique en l'Asie, Estienne Patriarche de la grande Armenie, Nestorien, vint l'an 1550. treuver Iules III. à Rome; Entre les mains duquel il fit abjuration de ses erreurs, & publique profession de la Foy de l'Eglise Romaine, avec vn Archeuesque & deux Euesques, venus avec luy.

Deux ans apres, sçauoir est, l'an 1552. Simon Salacha, ou Siud, Patriarche de l'ancienne Cité de Mu-

zal en l'Assyrie Orientale, & de tout l'Orient au delà du Fleuve Euphrates iusques aux Indes, delegué des Nestoriens de Syrie, d'Assirie, & de Perse, vint aussi à Rome pour se faire oindre au mesme Iule III. qui siegeoit encore alors, avec vne Epistre en main de ceux, dont il estoit delegué, dans laquelle ils appelloient *le Pape Souuerain Pontife ; Pere des Peres, tres-grand Pasteur, & Vicaire de IESVS-CHRIST sur tous les Chrestiens.* En sa profession il receut au nom de tous les Nestoriens susdits, tous les Conciles que l'Eglise Romaine reçoit, & amena avec soy plusieurs des plus doctes Religieux & Prestres d'Italie.

L'année suyuant 1553. le Patriarche d'Antioche enuoya Moyse Mardenus, Assyrien Iacobite, au mesme Pape Iules III. pour luy protester comme il estoit resolu d'embrasser la Foy de l'Eglise Romaine. Lequel Moyse fust receu de ce Pontife avec de grandes caresses & des notables liberalités.

Enuiron dix ans apres, sçauoir est l'an 1562. Abdisu, Patriarche apres Siud, de la susdite Ville de Muzal vint encore à Rome treuver Pie IV. du nom, pour estre confirmé en son Patriarchat, par ce grand Pontife. Ce qui fust ainsi fait, apres auoir promis obeyssance au Saint Siege, & iuré de croire & tenir avec tous ses Metropolitains, Euesques & sujets en grand nombre, tout ce que l'Eglise Romaine enseigne & professe encore auourd'huy.

Trois ans apres sçauoir est, l'an 1565. le Patriarche d'Alexandrie delegua vn venerable personnage,

matif de Cologne en Allemagne, (qui se tenoit en la Thebaïde) au mesme Pape Pie I V. pour luy presenter tant en son nom, que de tous ses sujets spirituels, obeyssance, comme au Pere & Pasteur Vniuersel des Chrestiens. Ainsi l'escriit Genebrard *in Pio IV.*

L'an 1595. Gabriel Patriarche de la mesme ville d'Alexandrie delegua l'Archidiaque de son Eglise avec deux Religieux Macaires à Rome, vers Clement VIII. pour y faire, tant en son nom, qu'au nom de tous les Prelats de son Patriarchat, profession de la Foy de l'Eglise Romaine, & reconnoistre le mesme Clement, comme le Chef de l'Eglise Vniuerselle; Ce qui fut heureusement accompli l'an 1597 & le 25. Iuin.

Le mesme an, 1595. deux Euesques de Ruffie vindrent encore à Rome au nom de Michel, leur Metropolitan & de tous les Euesques de cette grande Prouince, suiuant le Decret par eux fait du deuxieme Decembre 1594. supplier tres-humblement le mesme Clement 8. de les vouloir receuoir en la Communion de l'Eglise Romaine, de laquelle leur Predecesseurs s'estoient separez depuis 150. ans, pour suiure le Schisme des Grecs. Ce qui leur fust amiablement accordé le 23. Nouembre. Dont ils firent leur Profession aux pieds du Pape & des Cardinaux en la Sale Vaticane de Constantin.

L'an 1596. le mesme Pape Clement VIII. enuoya trois peres Iesuites aux Maronites pour les

visiter de sa part, les consoler & fortifier en la Foy Catholique, & leur porter quelques presans, qu'ils leur fist, tant pour la decoration du Culte diuin que pour leurs necessitez temporelles.

Le susdit an, 1599. fust celebré vn Concile à Diamper en l'Inde Orientale par Alexis de Menezes, Archeuesque de Goa, pour la Reformation de l'Eglise de saint Thomas, laquelle estoit infectée de quelques erreurs de Nestorius: Auquel Concile George, Archidiaque du Patriarche de Babylone embrassa la Religion Catholique avec 153. Ecclesiastiques & 671. des deputez venus avec luy audit Synode, qui ont esté suiuis apres de tout le peuple.

En la mesme année les peres Iesuites s'en allerent à Constantinople pour trauailler à la conuersion des Schismatiques de Grece.

Sur l'an 1601. la foy Caholique s'estendit merueilleusement par les trauaux des peres Augustins deschaux, ou Hermites de saint Augustin, parmi les Mahometans en Perse. Ainsi l'escriit celuy qui a poursuiuy la Chronologie de Pierre Opmer, Flamand, sur la mesme année.

L'an 1612. deux peres Iesuites s'en allerent en Mingrelie & Georgie, Prouinces d'Armenie, assises entre le Pont Euxin, ou Mer Majeur, & la Mer de Bachu ou Caspie, pour y trauailler apres la conuersion de leurs habitans, Schismatiques Grecs, sujets de diuers Princes, qui sont d'ordinaire aux

risés avec le Tuc, le Tartare & le Perse, leurs voisins, Desquels ils furent grandement bien receus, ainsi qu'on peut voir par les lettres Annales que les mesmes peres escriuirent l'an 1615. à leur Pere General à Rome.

L'an 1614. Elie Patriarche de Babylone, qui preside sur trois cens mille maisons Nestoriennes se reconcilia à l'Eglise Romaine par le moyen d'Adam son Archidiacre & Ambassadeur vers paul V.

L'an 1615. pierre patriarche des Maronites enuoya des Ambassadeurs au pape, pour le recognoistre comme Souuerain Spirituel en terre & luy continuer l'obeissance que ses predecesseurs auoient renduë, iusques alors au sainct Siege.

La mesme année 1615. Gabriel, Euesque de Gangre en paphlagonie recognoit par ses lettres paul V. comme Souuerain pontife de l'Eglise Vniuerselle.

L'an 1616. fut tenu vn Synode en la ville d'Amed en Mesopotamie, par Elie patriarche de Babylone, ou fust receuë par tous les Euesques de la prouince la profession de Foy, qui auoit esté enuoyée audit Elie par le pape paul V.

Je ne diray rien icy du nombre innombrable des conuersions des Schismatiques Abyssins, Armeniens, Georgiens, Moscouites, polonois, Hongres & Allemands, que le desespoir auoit iettés parmy les Turcs, operées par le pere Gaspard Barze, Iesuite au Royaume d'Ormus, & par plusieurs autres

Iesuistes, Augustins deschaux, Dominicains, & Franciscains en diuers Royaumes des Indes, car i'estendrois ce discours au delà de vostre patience & de la briefueté que ie me suis proposée.

Et pour finir, l'Eglise Romaine attend encore la Conuersion non seulement des Schismatiques de la Moscovie, mais qui plus est, celle de plusieurs autres, leurs voisins, dont les frequentes Ambassades vers le pape, nous en sont des presages & des signes auant-coueurs.

Mais, où sont chez vous, ie ne veux pas dire de semblables merueilles, voire qui en approchent à mille iournées ? Où sont ie vous prie les Schismatiques & Separez, que vous auez encore ramenez à l'obeyssance de vostre Eglise Pretendue. Ce n'est pas, que vous ne l'ayez fort souuent tenté : Mais, comme vous n'auetz que le fourreau de la parole de Dieu, il vous a tousiours esté impossible d'auancer aucune chose sur le moindre de tous eux, non plus que sur les Payens, Iuifs, Heretiques ou detestables pecheurs, ny faire aucune chose du monde, qui merite seulement qu'on en parle.

Il est vray que vos Ministres firent tout ce qu'ils peurēt par leurs lettres reiterées l'an 1575. & 1576. & sur tout l'an 1579. enuers Ieremie, Patriarche de Constantinople, pour l'associer à vostre Reformation, Mais quelle responce en receurent-ils à la fin, ie vous prie ? Rien qu'une viue Refutation de vostre Confession de Foy d'Ausbourg ; Laquelle il

conclud par ces remarquables paroles. *Vos misistis ad Ieremiam, ille testimonium, perhibuit veritati.* Ainsi le confesse vostre Citræus, en ses Epist. imprimées à Franc-fort, l'an 1580. En hayne dequoy ils ne cesserent de le trauailler & persecuter, iusques à le rendre suspect au grand Seigneur, & le faire exiler, de ses Terres.

Il est encore vray qu'environ l'an 1570. Iean Cohita, Ministre des Ambassadeurs Polonois vers le grand Duc de Moscouie, s'enhardit de solliciter ce Prince à se reformer à vostre moule; Mais qu'elle Responce en receut-il, ie vous prie. L'histoire porte, qu'il fut si offensé de l'audace de ce Ministre, qu'apres l'auoir souuent apellé Chien, Asne, Antechrist, il le fit chasser de son Palais. Ainsi lescrit le celebre Genebrard *in Pio V.* Confusions qui vous ont osté tout a fait & le courage & l'esperance, voire le desir mesme de vous acquerir vn seul de ces Separez. Mais comment est-ce qu'vn égaré, scauroit iamais ramener de l'esgarement vn autre égaré: Rendez-vous vous mesme, tous les premiers dans le sentier battu du Ciel, par la profession de la vraye Foy, & puis efforcez-vous d'y ramener les autres avec l'ayde de Dieu, laquelle ne vous manquera point, si vous y procedez avec la sincerité qu'il faut.



*L'heureux Retour des Pecheurs à la Grace
dans l'Eglise Romaine.*

ARTICLE IV.

CE n'est pas tout, l'Eglise Romaine conuertit & ramene encore plusieurs detestables pecheurs du peché mortel à la Grace, & du vice à la vraye Vertu; mais si soudainement si vniuersellement & si parfaictement bien souuent, qu'il n'y a aucun lieu de doute, que tels changemens ne soient des effets de la toute-Puissante main de Dieu. *Ceste cy est la mutation de la dextre du Tres-haut.* Psal. 76. Combien voyons-nous tous les iours de Saincts Pauls, de saincts Augustins, & de saincts Guillaumes; de sainctes Maries Magdeleines, de sainctes Maries Egyptiennes, & des sainctes Thais? Presque autant que des Religieux & de Religieuses qui apres auoir aualé à longs traits les fausses & trompeuses douceurs du monde se sont iettez, quant aux hommes, Dans les Chartreux, Minimes, Capucins, Recolez, Carmes deschaux; Et quant aux femmes, dans les Repenties, & dans les Magdeleines: La conuersion desquelles personnes, ayant esté non moins constante & durable, que soudaine & vniuerselle, a comme rauy ou plustost épouuanté le monde. Combien pourrions-nous vous nommer,

non seulement des Religieux, mais encore des seculiers, qui ont esté changez par l'efficace de l'esprit diuin (qui sejourne perpetuellement dans l'Eglise Romaine) du soir au matin, de Courbeaux carnassiers en simples Colōbes, de Loups en Agneaux, & de Tygres ou Lyons, en Biches domestiques pour toute leur vie.

Combien pourrions nous vous en nommer par nom & surnom, qui se sont tres-parfaitement conuertis pour tout le reste de leur vie du mal au Bien, du vice à la Vertu, & de la vanité à la Verité, dans vne seule predication en ce Siecle mesme; comme fit le cinquiesme General des peres Iesuistes, lequel entendant (ieune homme) ces paroles, d'un Predicateur, *Oues mea vocē meā audiunt*; sortit aussi-tost du Siecle, pour entrer dans la Compagnie de Iesvs. Autres avec vne bonne parole comme fit celuy, que le B. pierre d'Alcantara conuertit en Espagne, dont est fait mention en sa vie, qui d'homme perdu, deuint vn miroir de Vertu, pour toute sa vie, Auquel il faut ioindre, outre celuy que le pere Gaspar Barzé conuertit dans peu de paroles à Ormus, avec l'admiration de tous ceux qui scauoient sa vie scandaleuse & perduë; le R. pere Cesar de Bus, qu'une deuote Vefue conuertit à Dieu; luy representant la seuerité du Iugement dernier, & l'Eternité des peines de l'Enfer. Autres par vn faux pas, comme fit vn des Generaux de l'Ordre des peres Capucins, lequel pour auoir condamné par erreur

vn innocent à la mort, lors qu'il estoit encore au monde, Iuge seculier, entra dans le mesme Ordre pour y faire toute sa vie penitence de ceste faute: Autres au rencontre d'une marque de pieté, comme fist le B. Pere Solutive Recolé, lequel à la veüe d'une Croix, reuint tellement à soy & à son deuoir, tenant vn pied sur le bord d'une Apostasie irreparable, qu'il ne noya pas seulement tous ses crimes dans vne mer de larmes, versées sur iceux, mais s'acquist encore vne singuliere Saincteté de vie. Autres par la lecture d'un liure deuot, comme Benoist de Canfeld Capucin Anglois: Autres voyant faire vne action Heroïque de pieté, comme ce Ministre Allemand, lequel apres auoir veu lauer les pieds de treize pauures au Cardinal Aldobrandin, Neueu du Pape Clement VIII. à Rome, fut touché d'une si grande contrition, qu'il en mourut à trois iours apres: Autres voyant vn spectacle inesperé, comme le B. François de Borgia, lequel ayant considéré l'estrange deformité de la plus belle Princesse de son temps, quelques iours apres qu'elle fut decedée, resolut de quitter le monde & toutes ses vanitez, pour se rendre Iesuiste, comme il fit: Autres par le rencontre d'un bon mot dans vn liure, comme le R. Pere Ange de Ioyeuse, lequel apres la mort de sa femme, tombant par trois fois de suite sur ces paroles à l'ouuerture de ses heures. *Dirupisti vincula mea, tibi sacrificabo hostiam laudis*, les leut & gousta, comme si elles luy eussent esté dites par quelque

Ange de la part de Dieu , dont il entra dans les RR. Peres Capucins , où il a rauy toute la France de la perfectō de sa vie & de sa mort. Exēples que ie veux clorre par celuy des premieres filles Repenties de Paris , lesquelles en nombre de deux cens des plus ieunes , & plus belles , furent si efficacement portées du peché à la grace , de la chair à l'esprit , & du vice à la Vertu par la ferueur des Predications du Pere Jean Tisserand de l'Ordre de saint François, l'an 1494. qu'il y a dequoy bastir vne histoire digne de memoire eternelle.

Combien en pourrions nous enfin nommer, qui touchez d'une vehemente contrition de leurs pechez , ont, ou rendu l'ame , ou changé pour iamais leur mauuaise vie en vne veritablement Chrestienne & pieuse , aussi-tost apres auoir entendu ces Siecles derniers , saint Vincent Ferrier, saint Bernardin de Sienne , saint Pierre le Martyr, saint Antoine , dit de Padoüe , & de nostre Siecle , le B. Louys Bertrand , Louys de Grenade & Ierosme de la Nufa de l'Ordre de saint Dominique, le B. Jean de saint Guillaume , & le pere Mathieu de sainte Françoise, Religieux Hermites de S. Augustin, le B. Pierre d'Alcantara , André de l'Olme , & le pere Solutine de l'Ordre de S. François, & les Peres, Gaspar Barzé, André Douiedo, Emond Auger, Jean Suffren, & François de Margastaud , Iesuites , & quelques autres celebres Predicateurs Capucins Italiens.

Entre tous lesquels sont remarquables & celebres

le R. Pere Lupus , (des ardantes & enflammées
 Predications duquel toute l'Europe à ouy parler)
 & le R. pere Hyacinte de Casal , faisant les quaran-
 te heures l'an 1613. à Milan ; Lequel outre les ini-
 mitiez inueterées , qu'il desracina du cœur de ses
 Auditeurs , les Concubinages qu'il conuertit en
 Mariages sacrés , les restitutions immenses , qu'il fit
 faire , il porta tant de personnes des delices à l'au-
 sterité , tant de ieunes hommes du monde à la Re-
 ligion , fit verser tant de larmes aux yeux les plus ari-
 des & les plus secs , & finalement rendre l'ame à
 tant de personnes du regret , & déplaisir d'auoir
 offencé Dieu , que toute l'Italie , & tous les Royau-
 mes voisins en ont esté rauis d'admiration & d'éton-
 nement fort long-temps apres.

Mais quant à vous , vous ne sçauiez pas mesme
 de quelle couleur sont ces Conuersions , qui est la
 cause que vous iugez , que tout ce que nous en di-
 fons ne sont que des illusions , des songes , ou des
 contes faits & forgez à plaisir. Ce que vous ne fai-
 riez pas si vous en auiez veu quelques vnes de telles
 chez vous. Il est vray que plusieurs d'entre vous ,
 ont quitté le Cabaret , ou le Ieu. Mais en quel
 temps , ie vous prie ? Apres qu'ils n'ont plus eu
 d'argent ny de credit. Autres ont mis fin à leurs in-
 fames & sales pratiques , mais apres que leurs
 moyens de mal faire ont eu prins fin. Autres ont
 dit Adieu à la vanité , mais par force , s'est à dire ,
 apres auoir esté cent & cent fois basouéz d'vn cha-

cun ; Car , que vous nous sceussiez dire le nom d'un seul d'entre tous , tant que vous fustes iamais , qui sans contrainte ou necessité quelconque, ait renoncé à ses licites plaisirs en Jeunesse, à ses aises & commoditez en vieillesse , & à sa volonté propre en aucun aage à la maniere , non pas des Chartreux , Recoletz ou Capucins , car ils vous effarouchent par leurs austeritez , mais à la maniere des Iesuistes , ou si vous voulez des premiers Chrestiens , ie vous en dédic. C'est vne vie excellente & presque Angélique parmy vous , que de n'y commettre aucun scandale digne de la main de l'Operateur des Fous. Mais pour y pratiquer aucun acte heroïque , d'Humilité , de Chasteté , de Patience , qu'on s'adresse ailleurs. Car vous n'y entendez que le haut Allemand ; Et i'espere que vous ne m'en demantirez pas, puis que ie ne dis que ce que vous mesmes nous confessez librement forcez par la verité de la chose, ou seroit que vous eussiez essuyé toute honte, ce que ie ne croy pas encore de vous.



*La Perfection des Iustes consommée dans
l'Eglise Romaine.*

ARTICLE V.

L'Eglise Romaine conduit encore plusieurs personnes iustes de la Saincteté commencée , non

seulement de celles du moindre & du mediocre estage, mais encore de celles du plus haut & sublime. Je ne dirois rien qui ne soit vray, quand ie dirois comme vingt cinq ou trente Princes ou Ducs & plusieurs Seigneurs de marque de ce Siecle, ay-mans mieux à l'imitation de Moysse & de David, viure abiects en la maison de Dieu, que grands & releuez aux Louures des Roys, sont entrez dans les Ordres de saint Dominique, de saint François & dans la Compagnie de IESVS, avec le rauissement de toute l'Europe, & particulièrement de leurs Vassaux & Sujets. Je ne dirois rien encore qui ne soit vray, quand ie dirois que plusieurs Princesses, Duchesses & Marquises, dont les noms sont celebres dans les Histoires, sont entrez dans des Monasteres de saint Benoist, de sainte Claire, de sainte Catherine de Sienne, de sainte Therese, de sainte Ursule, de la Visitation, & autres semblables.

Mais, qui a perfectionné & consommé, ie vous prie, la sainteté de saint François de Paule, de S. Ignace, de saint Xauier, de saint Charles, de S. Philippe, de la sainte Mere Therese, & de cent & cent autres celebres seruiteurs & seruantes de Dieu, partie desquels ont esté desia declarez Bien-heureux, & partie sur le point de l'estre, outre vn nombre sans nombre de vrays Religieux, sortis du monde encore Innocens; Qui a dis-je perfectionné leur Sainteté que l'Esprit de l'Eglise Romaine, duquel ils ont esté visiblement assistés ius-

ques au dernier periode de leur vie.


De nier que ceux que ie viens de nommer ayent esté de grands Saincts, il n'y a celuy tant impudant soit-il, qui l'osast à mon aduis faire, puis qu'entre nous, il n'y a pas moins de peine auiourd huy à faire declarer vn homme Sainct à Rome, que le mesme hōme en a prins pour deuenir Sainct, quoy que ce soit vne œuure toute diuine. Ouy les enfans scauent desia, qu'il n'y a chose plus serieusement & solidement examinée à Rome, que la Vie, Mort, & Miracles de celuy qu'on veut faire declarer sainct en ce Temps. Et croy-ie, que nous fairions aussi-toft canoniser vn homme, semblable à ceux que ie viens de nommer, dans Geneue, dans Vvitemberg, ou dans Londres, que dans Rome; si seuerement on y procede à presant. Les qualitez des tesmoins, qui sont ouys sur la Vie, Mort & Miracles de tels personnages sont si rares, qu'à peine s'en treuve-il d'entre cent vne dizaine d'admissibles & receuables. Et de cecy, i'en puis parler scauamment pour l'auoir veu pratiquer en l'enqueste de la vie, de la mort, & merueilles du venerable *Cesar de Bus*, nostre Fondateur, que i'ay procurée il y a desia quelque temps. Ce ne sont pas des Legendes, & des Narrations Apocryphes, que les Vies des Saincts personnages de ce Siecle; Ce sont Veritez authentiques, que la voix des grands & des petits, des Doctes & des Ignorans, des bons & des méchans, confesse & approuue à toute heure, & que personne à moins que

d'estre Huguenot n'oseroit mettre en controuerse
auiourd'huy.

Mais parmy vous, il n'y a point de tel Esprit de
Conuersion; C'est assez si vostre Pretenduë Refor-
mée peut empescher les désordres, les Scandales, &
les pechez publics en quelques vns des plus Sages
d'entre vous. Je sçay bien que vous me produirez,
comme personnes releuées parmy vous, Luther,
Melancton, Calvin, Keminice, Martyr & quelques
autres semblables hommes, Eloquens, Sçauants
& grands Esprits, qui sont morts parmy vous; Mais
vn seul, qui se soit esleué iusques à la pureté de vie
du moindre de ceux que ie viens de nommer, ie
vous en défie avec charité. Vous ne l'oseriez pas
aduancer aussi, non pas mesme comme i'estime,
penser sans effronterie, tant le contraire est mani-
feste & aparēt à tout le monde auiourd'huy. A vos
Eloquens, Doctes, & grands Esprits, nous vous
opposerons nos Caëtans, nos Soltus, nos Ekius,
nos Thomas Morus, nos Stapletons, nos Paniga-
roles, nos Genebrards, nos Bellarmins, nos Baro-
nius, nos du Perron, nos Suarez, nos Coëfeteaux,
le moindre desquels estoit capable de faire la leçon
au premier & plus hardy d'entre tous les vostres.

Et pour vos femmes illustres, où sont-elles, ie
vous supplie? Pour des hommes, vous faites mine
de nous en fournir quelques-vns, mais de femmes
égales à la moindre de cent que nous vous en nom-
merions au besoin, vous n'en avez point du tout.

De nous produire Catherine de Bore, & la Dame Candide, les Garces de Luther & de Beze, l'une rauie à Dieu au Monastere de Nimice, & l'autre à son legitime Espoux à Paris, ie ne croy pas que vous l'osassiez faire. Quoy les femmes chez vous ont elles la teste si dure, quelle ne puisse point estre amollie en quelques vnes, afin que la Saincteté y fasse (quoy qu'avec peine) quelque impression.



*DE LA SAINCTETE' DE L'EGLISE
Romaine & Impieté de la Reformée en leurs
moyens d'acheminer les hommes à Dieu.*

CHAPITRE VI.

LE quatriesme Chef de la Saincteté de l'Eglise, qui regarde la cause efficiente, instrumentale, consiste en la Saincteté des moyens, dont elle s'ayde en tout temps, pour conduire les hommes à la Iustification & Sanctification consommées. Que si les Instrumens doiuent auoir quelque proportion & raport avec l'œuure, dont ils sont instruments, les dispositions avec leur forme, & les moyens avec leur fin; Et si l'Eglise de Dieu, n'a point, d'autre fin, n'y d'autre but que de rendre les hommes Saincts, il ne nous faut pas enquerir des moyens, qu'elle a toujours prins pour cet effet, mais il les nous faut

imaginer, les plus Saints, que les hommes sçau-
roient iamais employer, voire inuenter, en ce-
ste vie.

Or pour sçauoir, si les moyens, dont l'Eglise
Romaine s'est tousiours seruie & se sert encore au-
iourd'huy, en mille endroits en la Conuersion des
Infidelles, sont tous Saints, ie vous en fais les Ju-
ges vous mesmes, *Messieurs*. Mais comment ne
feroient pas saints ces moyens, s'ils sont les mes-
mes, que ceux que les Apostres ont pris pour la
Conuersion de tout cét Vniuers, & que leurs Suc-
cesseurs ont tousiours depuis employez & mis en
pratique iusqu'au iourd'huy.

Premierement les Apostres n'entreprendrent ia-
mais de prescher, qu'apres en auoir receu le pou-
voir & l'authorité de leur maistre IESVS - CHRIST
Comme mon Pere m'a enuoyé, ainsi ie vous enuoye, leur
dit-il, en saint Iean 20. Cela mesme ont fait tous
ceux qui sont passez aux Indes au Siecle dernier.
Le Pere Bucil, Catalan, Moyne de saint Benoist, &
le Pere Henry Portugais, Religieux de saint Fran-
çois, qui s'en allerent, le premier aux Indes Occi-
dentales, accompagné de Onze doctes & deuots
Prestres de son Ordre l'an 1494. sous la conduite
de Christoffe Colomb; & le deuxiesme aux Indes
Orientales, accompagné de huit Religieux de
son Ordre l'an 1500. sous la conduite de Pierre
Aluarés Cabral, Gouverneur pour Emanuël Roy
de Portugal, en ces Indes n'entreprendrent point

leurs voyages, qu'après en auoir eu la Mission expresse d'Alexandre VI. Le B. Martin de Valence, Religieux de saint François, qui s'en alla l'an 1524. au Mexique, accompagné de onze autres Religieux de son Ordre, n'entreprint point le sien, qu'après en auoir receu la Mission de Clement VII. S. François Xavier, qui s'en alla l'an 1541. sous la conduite de Martin Alphonse de Sofa, Vice-Roy de Jean III. Roy de Portugal, aux Indes Orientales & au Iappon, suiuy de quelques vns de ses freres, n'entreprint point encore le sien, qu'après en auoir receu la Mission de Paul III. du nom. Le Pere Antoine de Roa, Augustin deschaux, qui s'en alla en l'Amérique l'an 1561. & le Pere Thomas de Iesus du mesme Ordre, qui s'en alla en Afrique l'an 1578. tindrent le mesme procedé que ces grands hommes, comme ont encore fait tous ceux qui ont pris les mesmes routes, puisque faire le contraire parmy nous, ce seroit estre, *Appellé sans Vocation, Enuoyé sans Mission, & Commissaire sans Commission*, c'est à dire, demy Heretique.

En second lieu les Apostres s'acheminèrent despoüillez de toute sorte de commoditez & faueurs humaines, parmy les Nations les plus barbares & farouches du monde, afin de pouuoir plus parfaitement practiquer la sainte Confiance, qu'ils auoient colloquées en la prouidence & conduite de Dieu, & pour parler avec plus de courage & de liberté aux Magistrats, aux Princes & aux Roys mesmes. Au-

tant en ont fait & font encore tous les iours les Religieux de la Compagnie de IESVS, & ceux des Ordres de S. Augustin, de S. Benoit, de S. Dominique, de S. François, des Carmes Deschauffez, & de quelques autres Ordres Religieux. Imittez par plusieurs celebres Prestres Seculiers, penetrans iusqu'au cœur de cent grandes Prouinces, vrayement pauvres, nuds, desarmez, & sans aucun Sauf-conduit: dans l'assurance, que celuy, qui les enuoyoit par la bouche de son Vicaire General en Terre, qui nourrit iusques aux petits pouffins des Corbeaux (abandonnez de leurs peres dans leur nid,) les scauroit bien pouruoir au besoin de tout ce qui leur seroit necessaire & requis.

Le vous serois en effect ennuyeux, si ie voulois seulement toucher en passant les plus signalez traiçts de Confiance de plusieurs de ces hommes Diuins. Vous en pourrez recueillir vn bon nombre de l'Histoire de leur Vie, & sur tout du Martyre des plus heureux & fortunez d'entr'eux. La seule Compagnie de IESVS se glorifioit déjà de cent & deux Martyrs en l'année 1600. & d'environ cent & huit despuis ce temps-là iusqu'au iourd'huy. Gloire à laquelle quelques autres Ordres Religieux sont arriuez, & quelques autres ont donné plus auant, & nommément celuy de S. François.

Finalemment les Apostres, non contans de prescher l'Amour de Dieu, la Deuotion, l'Humilité, la Patience, l'Obeissance, la Continence, l'Abnega-

tion de toutes choses, & toutes les autres belles vertus Chrestiennes aux Payens, les practiquoient encore courageusement eux-mesmes, tous les beaux premiers. Mais qui fut iamais plus deuot, plus humble, plus patient, plus obeissant, plus chaste, & plus sequestre du monde & de soy-mesme, que S. Francois Xavier, que Gaspar Barzé & qu'André d'Ouedo, Iesuistes; que les BB. Martin de Valence, qu'André de l'Olme, & que Francois Laurens, Religieux de l'Ordre de S. Francois, que Louys Bertrand, que Pierre de Cordouë & qu'Antoine Pestanna, Religieux de l'Ordre de S. Dominique. Je n'en veux point d'autres tesmoins que l'Histoire, & la voix publique, & que les grands Miracles que ces grands Seruiteurs de Dieu, ont fait dans les Mondes nouveaux. Il estoit du tout necessaire aussi, qu'ils fussent grandement parfaicts, & qu'ils marchassent visiblement sur les pas des Apostres. Car pour persuader efficacemēt nostre croyance & Religion, tant arduë & sublime en soy, & tant & tant estränge aux Payens, & pour faire l'heureux progrès qu'ils ont fait, il failloit plustost leur prescher par œuures & par exemples, que par preceptes & enseignemens, attendu que les hommes se meuvent sans comparaison beaucoup d'auantage par cela qu'ils voyent, que par cela qu'ils oyent, sur tout les rudes & les ignorans. D'ailleurs la voye des exemples est courte, ou celle des preceptes est longue, comme dit Seneque.

Mais quant à vostre Pretenduë Reformée, print

elle iamais de semblables moyens en l'introduction de sa Doctrine en aucune part du monde. Tout au rebours, des formellement contraires & directement opposez. Vos Ministres n'ont-ils pas tout premierement couru sans Mission. Je sçay bien que Calvin & au pire aller Luther les a enuoyez. Mais il faudroit que ces Pretendus Prophetes nous dissent, le nom de celuy qui les auoit enuoyez eux-mesmes. Car personne ne pouuant s'enuoyer soy-mesme, ils n'ont peu par consequent s'enuoyer, ny enuoyer encore les autres, comme ils ont fait.

Du Moulin ne pouuant plus deffendre sans Textes expres de l'Escriture Sainte, ou sans des Miracles euidens, cette Pretenduë Mission, a pensé de respondre, que c'est l'Eglise Romaine qui les a formellement enuoyez, nonobstant que le Synode national de Gap de l'an 1603. entende, que la Mission de vos premiers Ministres soit rapportée à la Mission extraordinaire & non à l'ordinaire de l'Eglise Romaine, comme estant à vostre dire corrompuë & perduë.

Si cela est, il falloit donc qu'ils ne preschassent point vne autre Doctrine que celle que l'Eglise Romaine preschoit alors. Car la puissance d'enuoyer (que du Moulin luy accorde) presuppose manifestement qu'elle estoit la vraye Eglise, & estant la vraye Eglise, qu'elle auoit la vraye Doctrine, & ayant la vraye Doctrine, qu'ils n'en pouuoient point prescher d'autre que la sienne, sans descheoir du pou-

uoir qui leur auoit esté donné de prescher. En effect l'Eglise, qui n'est point vraye, & n'a point la vraye Doctrine, ne peut non plus enuoyer prescher la Doctrine de IESVS-CHRIST aux hommes, que le Tyrā enuoyer des Magistrats aux Sujets de l'Estat, dont il s'est tyranniquement emparé, pour leur administrer la Iustice. Cela n'estoit point necessaire à ces Messieurs, repart le Ministre, parce, (dit-il) qu'il leur suffisoit d'auoir la Mission personnelle, pour pouuoir apres prescher la Doctrine que l'Esprit particulier leur inspiroit. Responce ridicule & inepte: Car qu'est-cela, que dire, qu'avec la mesme Mission, vne mesme personne pourroit legitimement prescher diuerses & contraires Doctrines à mesmes Auditeurs, (La Catholique & la Caluinistique) & les obliger qui plus est, à les croire toutes deux en mesme temps. Car n'est-ce pas ouyr IESVS-CHRIST mesme, que d'ouyr les Predicateurs, qu'il nous enuoie par l'entremise de son Eglise, comme apert en saint Luc 10. *Qui vous escoute m'escoute.* Or cela implique contradiction, & repugne ouuertement au sens commun, mais non pas à celuy de vos Ministres, le plus habile desquels est d'ordinaire, comme vn aueugle sans baston quād il se mesle de raisōner & discourir aux choses surnaturelles & diuines. Tesmoin toutes les Disputes & Conferances qu'ils ont euës iusqu'à presēt avec nos Docteurs. Je preferois icy ceste raison, si ie ne l'aucis desia fait au 1. tom. du Triomphe de la Foy Catholique. Traité 34.

En second lieu ; Que vos Ministres ayent courti desnuez de toutes les commoditez temporelles , & de toutes les faueurs & seurtez humaines , ie ne l'ay iamais encoré sceu lire , voire mesme dans vos propres Autheurs. Au contraire i'ay bien souuent leu, que Luther n'osa iamais aller de Vvitemberg à Vvormes , ny Beze de Geneue au Colloque de Poissi sans de bons Sauf conduits ; Au reste suyuis & seruis en Commissaires de Guerre ; Et que Melancton , venant à Paris l'an 1535. à la sollicitation de quelques Dames curieuses , rebroussa chemin aussi-tost qu'il entendit , que François premier auoit reuoqué son Sauf-conduit , à l'instance du Cardinal de Tornon.

Pour Calvin , il ne sortit iamais de Geneue, crainte de s'enrhumer. Mais comment fut allé ce pretendu Prophete aux Indes , en la Chine , au Japon , au Brasil , au Peru , au Mexique , priué de toutes les commoditez , faueurs , seurtez du monde , à la Iesuitique , ou à la Capucine , luy qui n'osa iamais , appellé de la Reyne Marguerite , sœur du mesme François Premier , aller en Bearn , moins encore au Concile de Trente , voire chargé de Sauegardes & de sauf-conduits ? Et où est le Ministre , afin que nous le fassions releuer en Bronze , ou en Marbre , ou du moins inserer au Cathalogue des hommes illustres , qui hazarda iamais son noble Ministere , dans l'Afrique , dās l'Asie , dans les Indes , dās la Chine , dās le Japon , ou dās l'Amerique ? Ou est
mesme

mesme celuy , qui se fist i jamais voir en Italie , en Espagne, en la Franche-Comté, voire mesme au Comté d'Auignon , qui ne sont qu'à trois pas de vous. Combien de fois a t'on exhorté Chamier & du Moulin , d'aller Euangeliser les Indiens , Chinois, Iaponois, Brasiliens, Perüans, Mexicains, sans auoir i jamais eu le courage , non pas mesme de demander le chemin par où l'on y va; non pas mesme d'y penser? Mais comment y fust allé le premier avec son corps de Buffle , & le deuxiesme avec son cœur de Lieure.

Mais on les y martyriseroit ! Pauures Apostres, pauures Religieux , pauures Dominicains , pauures Recolez , pauures Capucins , pauures Iesuites, comment ne vous estes-vous point encore prins garde de cest eschapatoire de ragasche, dont le bel esprit de Messieurs les Ministres s'est aduisé. Du Moulin a bonne grace , d'exhorter ses freres de Charenton à mourir courageusement pour la cause en son Combat Chrestien fol. 76. apres auoir fuy, comme vn Mercenaire à Sedan. *Faudra il mettre ma vie, ie l'exposeray volontiers*, dit-il en Trompette de Rebellion. Je dis en Trompette de Rebellion; Car où est celuy, ie vous prie qui vouloit vous oster la vie, obeyssant politiquement à sa Majesté, comme vous y estes obligez par toute sorte de droit & de loy , voire par vostre propre Doctrine , litteralement prinse ; Car pour la Glose, elle chante ouuertement tout le contraire, ainsi que nous l'auons

souuent experimenté, voire depuis peu. Glose, laquelle est de l'engence des viperes, puis quelle tuë sa mere, le Texte ; Pire à ce conte que celle d'Orleans.

Finalemēt, Que vos Ministres ayent iamais en leur vie pratiqué, voire mesme presché (qu'en hypocrites, & pour mieux couvrir leur mauuais desseins) la Charité, la Deuotion, l'Humilité, la Patiance, l'Obeyssance, la Contenance, & la parfaite Resignation, cela n'est point ; Au contraire, ils ont souuent presché, & plus souuent encore pratiqué l'Irreligion, la Rebellion, la Fureur, le Sang & le Sac. Et ie n'ay besoin d'autre preuue en cecy, que ce que nous mesmes auons cent & cent fois veu de nos yeux. Que si vos Ministres eussent voulu planter l'Alcoran en la Chrestienté, eussent-ils prins d'autres moyēs, que ceux qu'ils ont pris, pour planter l'Euangile de Iean Calvin. Le Turc a-il procédé d'autre façon, pour establir & conseruer la faulx & detestable Religion au monde. Jusqu'aux pierres le preschent & publient ainsi. Et ne sert d'alleguer icy le droit de deffence contre nous, dont vous taschez d'ébloüir les yeux des Ignorans. Car outre que l'exemple des Apostres & premiers Chrestiens, desquels vous vous dittes les Imitateurs, vous condamne tout à plat il n'y a, ny ne peut auoir de legitime deffence contre le Souuerain, (tel qu'est le Roy tres-Chrestien pour vostre regard, voire par vostre propre Confession & Doctrine) si tant est

que vous ne veuilliés faire tout le cōtraire de ce que vous dittes & protestés , comme il y a de la probabilité , mais pluſtoſt de la certitude & de l'euidence.



DE LA SAINCTETE' DE L'EGLISE
*Romaine, & Impieté de la Reformée
en leurs fins.*

CHAPITRE VII.

PAssons à la Saincteté de ses Fins , que l'Eglise a toujours eu , enuoyant prescher la Doctrine de son Espoux , IESVS-CHRIST aux Payens. Or de la preuuer par quelque autre voye , que par celle des Effets , ce seroit abuser du temps , qui nous est si cher , puis qu'une telle preuue est euidente, conuainquante & plus que suffisante à tout homme d'entendement , pour luy faire aduoüer qu'elles sont veritablement Sainctes ; les effets en estant si sainctes qu'ils sont. Il n'est donc question , que de sçauoir , si les Fins de l'Eglise Romaine , enuoyant prescher sa Doctrine aux Payens , prennent part à la mesme Saincteté de celles-la. Je le tiens ainsi apres plusieurs bons Esprits : Et ne veux pour preuue de ceste verité , que la mesme Saincteté des Effets. Je veux dire que le changement de vie de tous ceux qu'elle a ramenez dans son Bercail.

Outre ceste preuve nous scauons, comme Martin troisieme, communément dit cinquiesme, ne permit la iuste conqueste des Indes Orientales environ l'an 1427. à Edoüad Roy de Portugal, à l'instance & poursuite du Prince Henry son frere, l'honneur des Princes plus accomplis de son Siecle, qu'en intention & sous les Fins que ce Roy y procuraist puissamment la Conuersion des Indiens à IESVS-CHRIST. Alexandre VI. ne permit encore la iuste conqueste des Indes Occidentales l'an 1493. au Roy d'Espagne, Ferdinand cinquiesme, qu'avec la mesme intention & sous les mesmes Fins, ainsi qu'il resulte des Bulles sur ce publiées.

Et pour entendre comme la Conuersion des Indiens estoit encore la principale Fin, que ces grands Princes ont eüe dans leurs entreprises, outre que l'Histoire nous en assure en termes expres, il suffit de considerer la diligence, qu'ils ont fait de la procurer, non seulement dans les Prouinces, qu'ils ont conquises & subiuguées, mais encore dans les autres qu'ils n'ont point subiugué, ny ne subiugueront peut-estre iamais. Car qu'est-ce qu'ils n'ont pas fait & leurs successeurs apres eux, pour recouurer des hommes capables d'exercer ce saint Œuvre? A quel prix en auroient ils acquis d'auantage s'ils les eussent peu recouurer?

Pour les Religieux qui sont allez prescher ces Barbares, qu'elle autre Fin & quel autre Obiet, pouuoient-ils, de grace, auoir en cela, que la gloire

de Dieu, & le salut de leurs ames, quittans chez eux toutes les commoditez temporelles, pour aller deuorer toutes les incommoditez, mesaises, & miseres du monde, parmy des hommes, qui n'auoient rien d'humain que la face; le veulx dire, la faim, la soif, le froid, la nudité, la pauureté, la maladie, & la mort, accompagnée bien souuent de plusieurs horribles tourmens.

Mais pour les Fins, que vous auez euës, tous tant que vous estes, establisant vostre Pretenduë Reformation, il ne faut pas aller aux Deuins pour les deuiner, n'y ayant rien de si aisé que de les recueillir, de ce qu'on vous a veu pratiquer, tant en l'establisant, qu'apres l'auoir eu establie. Mais qui ne deuinerait ce que vos Predicans, vos Princes, & vostre Populace cherchoient sous le manteau de la Pretenduë Reformation, dans leur Apostasie & Reuolte, les ayant veu courir à bride abbatuë, les Predicans au Concubinage, que vous appelez, Mariage Reformé, les Princes au pillage du bien de l'Eglise, & la populace au Libertinage.

Sainct Fulgence au Serm. 5. de l'Epiphanie sur le commencement. *O finesse trompeuse; O cruauté impie. O meschanceté frauduleuse* (dit ce Sainct Docteur, apostrophant le cruel Herode.) *Le sang que tu as espandu atteste assez ce que tu as voulu de c'est Enfant, scauoir est, IESVS-CHRIST.* La mesme Apostrophe pourrions nous vous faire auourd'huy à tous tant que vous estes de Reformez. Ouy, la desbordée In-

continance de vos Predicans , la desreglée Auarice de vos Princes , & l'effrené Libertinage de vostre populace , preche assez haut à tout le monde , ce qu'ils pretendoient Apostasiant de la Foy Catholique, si tant est, que par les Effets ont puisse monter à la cognoissance de la Cause, comme le Philosophe enseigne & l'experience confirme.

Pour vos Predicans , vous mesmes iugerez bien si vous scauez vser de vostre entendement , & discours à les voir passer si hastiuement de la Continance au Concubinage , ou si vous aymez mieux, de la Vie Monastique à vn Mariage pretendu , & d'vn tel Mariage à vn autre semblable , aussi tost qu'ils se treuent huit iours sans femme , plusieurs des principaux d'eux s'estans mariez trois fois, comme Beze , Buccer , Viret , & Chambrun & de nouvelle datte , Rousselet Suisse , Ministre de Nismes, Faucher Originaire d'Vsez , Ministre encore à Nismes. Vous iugerez bien , disie , quelle estoit leur fin & leur visée s'en allant à vous. Il ne le vous faut pas d'auantage expliquer. Et vous n'ignorez pas, que si le Pape eut voulu permettre au commencement de vostre Pretenduë Reformation aux Prestres & Religieux plus charnels de se marier librement chez nous , que de cent , qui ce sont Reformez à vostre dire , à peine en eussiez vous acquis vn seul.


Pour vos Princes , nous oseriez-vous bien nier, que la fin des premiers , qui se reformerent en Alle-

magne, ne fust l'vsurpation des grands Reuenus de l'Eglise, que Luther leur bailla, dès le commencement de son Apostasie, au pillage? Que la fin de Christierne 2. Roy de Danemarc, Apostasiant de nostre saincte Foy, ne fust l'assouuiffement d'un extreme & plus que scythique cruauté? Que celle de Gustaue, Roy de Suede, abandonnant la Religion de ses Peres, presque au mesme temps, ne fust l'assouuiffement de son insatiable Auarice, & pour s'emparer plus specieusement des biens Ecclesiastiques de son Royaume, dont il estoit demesurement alteré. Que celle d'Henry VIII. Roy d'Angleterre, faisant tout le mesme, l'an 1534. ne fust la jouissance ouuerte d'Anne de Boulen, qu'il ne pouuoit auoir autrement, qu'en l'espousant sacrilegement; Car le Pape s'opposoit fort & ferme au diuorce, qu'il pretendoit de faire (& qu'il fist depuis de son authorité priuée) avec la Reyne Catharine sa femme legitime, pour se ioindre sous apparence de Mariage avec ceste effrontée.

Nous oseriez vous bien encore nier, que nos Princes François changeassent leur ancienne & venerable Religion, pour la vostre toute infantine, l'an 1562. en autre intention, que pour empescher, que le Roy ne fust point tant absolu, comme il estoit, & qu'il ne leur coupast point les morceaux si petits, qu'il faisoit? Non pas si vous n'avez perdu toute honte. Car l'histoire ne remarque rien plus expressement que cela. Et qu'est ce qui retient en-

core aujourdhuy chez vous les Grands, qui suiuent vostre Party, que les pures raisons d'Estat, que les aduantages & les passedroits, qu'ils en recueillent, ou esperent d'en recueillir, si leurs desseins pouuoient reüssir encore vne fois, qu'à Dieu ne plaise. Car en effet, la Religion ne leur seruit iamais que de masque & de cresse, pour couvrir plus specieusement l'Independance en plusieurs cas, dont ils sont extremement affamés & sitibonds.

Pour vostre populace, qui l'a, ie vous supplie, portée avec tant de precipitation & d'impetuosité à le reformer au moule de Calvin que la douceur du Libertinage que vous appelez pour en dormir les niays; *Liberté de Conscience*, composée de ses Articles. *Point de Confession de pechez au Prestre*, quoy qu'en dient IESVS-CHRIST & son Eglise; *Point de remords de Conscience*, qui travaillent tant les pauvres Papistes, pour la moindre faute qu'ils ayent commise. *Point d'Obeysance au Roy*, nonobstant que l'Escriture le commande en plusieurs lieux en termes expres. *Point de Restitution*; *Point de Ieufnes*, ny de Carefme; *Point enfin d'obligation à bien faire*, puis que les bonnes œures sont impossibles & ne seruent du tout de rien, comme disent Messieurs vos Ministres.



DE LA SAINCTETE' DE L'EGLISE
Romaine, & Impieté de la Reformée en leurs
Dogmes, touchant la Foy.

CHAPITRE VIII.

LEglise de Dieu ne deuoit pas estre seulement Saincte en les Causes externes, Efficiente & Finale; Elle le deuoit estre encore en sa cause Formelle; ie veux dire en sa Doctrine, touchant la Foy & les Mœurs, par ce qu'autrement elle seroit plustost la Synagogue de Sathan, que l'Eglise de Dieu. De perdre le temps apres la preuue d'une verité si manifeste & si esclatante, ie m'en estimerois contable à Dieu, comme d'une action oiseuse; Voyons seulement, quelles sont en leur Doctrine touchant la Foy & les mœurs, l'Eglise Romaine & la Pretendue Reformée, pour entendre, quelle des deux est veritablement l'Eglise de Dieu.

L'Eglise Romaine n' imagine pas mesme l'ombre & l'idée du mal en Dieu, estime au contraire le plus hautement & le plus sainctement de sa diuine Majesté, qu'on le sçait & qu'on le peut faire icy bas.

La vostre Pretendue Reformée presche tout haut au contraire, Premierement. Qu'il n'est pas Tout-puissant, *ne pouuant faire* (dit son Autheur Jean Cal-

uin au liure 2. de son Institution chap. 7. §. 5.) *ce qu'il n'a iamais encore fait , ou déclaré vouloir faire;* Deuxiesmement , *Qu'il n'est pas Tout Sage ; en ce qu'il commande* (comme dit le mesme Calvin sur saint Luc chap. 10. vers. 26.) *plusieurs choses absolument impossibles aux hommes.* Ce qui seroit (s'il disoit vray) vn manifeste defaut de Sagesse en luy, selon tous les Principes de la vraye Sagesse , Troisiesmement qu'il n'est point Tout Bon , puis qu'il *damne* (comme dit encore le mesme Calvin) en son Inst. lib. 3. chap. 23. §. 1. & 9.) *plusieurs hommes, non pour autre raison , si ce n'est parce qu'il les veut exclurre de son Heritage.* Quatriesmement , *Qu'il est Auteur du peché, mesmes en tant que peché, puis qu'il dirige, secourt & seconde, non seulement physiquement, mais encore moralement les pecheurs, pour commencer, continuer & finir leurs plus execrables pechez.* Ce que non seulement les Catholiques , mais encore les Arminiens & Remonstrants du Pais bas , vos Confreres , vous ont reproché publiquement au Synode de Dordrecht.

Conrad, Vorstius, celebre Ministre Holādois nie tout à plat la Simplicité de Dieu, sō Infinité, son Immēsité, son Eternité, &c. Atheismes que Martin Becā Iesuite refute en la premiere partie de la *Somme Scholastique, Traicté des Attributs diuins.* Du Moulin dit tout net en son pretendu *Bouclier de la Foy*, pag. 112. apres Manes , que les diables sont naturellement mauuais ; ç'est à dire, que Dieu, qui les a créez,

est Createur d'une Nature mauuaise, qui est vn horrible Blaspheme. Car comme dit l'Escriture, au Genele, c. 3. *Il n'a rien créé qui ne soit grandement bon;*

On tient encore en vostre Reformation Pretendue, que I E S V S - C H R I S T s'est desesperé en l'arbre de la sainte Croix, & mesmes qu'il a esté damné durant quelque temps. Puis qu'on ny condamne point au feu les Escrits de Calvin qui l'enseigne ainsi sur Sainct Matthieu chap. 26. vers. 9. 36 47. 57. & chap. 27. vers. 26. & dans son Institut. au liur. 2. chap. 16. §. 10. & dans son grand Catechisme au Dimanche dixiesme. l'ay entendu moy-mesme prescher avec horreur la premiere Proposition à Michel le Faucheur, Ministre de Montpellier, enuiron le 20. du mois de May 1623. & quelque temps auparauant soustenir fort & ferme la deuxiesme à vn certain Raphelis d'Orange, qui venoit de prendre le Ministère à Geneue l'an 1621. avec lequel nous fusmes en dispute sur ce sujet, descendans, de Lyon en Auignon par le Rhosne.

Luther le mocque à pur & à plein du saint Esprit au liure des Conciles sur celuy de Nicée. Voicy ses propres paroles. *Je ne scay que veut dire le saint Esprit en ce Concile (dit-il) car si d'un costé, ceux qui se chastrent ne peuuent estre Prestres, & d'autre part, ceux-la ne peuuent estre maintenus en l'Ordre de Prestrise, qui ont leurs femmes, que fera-on ? Il faudra donc que les Prestres bruslent d'un embrasement insupportable. (Et proche de-là) Le saint Esprit n'a-il autre chose à faire aux*

Conciles, que d'obliger ses Ministres à des Loys impossibles, perilleuses, & qui ne sont point nécessaires? Notez ce discours d'Epicure & d'Athée, s'il vous plaist.

L'Eglise Romaine admire, ayme, & adore les Mysteres de nostre Redemption, *l'Incarnation, la Natiuité, la Passion, la Resurrection, & l'Ascension de nostre Sauueur IESVS-CHRIST.*

La vostre Pretenduë Reformée, outre qu'elle profane avec delice les iours auxquels ces diuins Mysteres ont esté sainctement operés, témoin d'Aruiou Ministre de Nismes qui s'irrita de voir que son Auditoire fust plus grand que de coustume vn iour de Noël iour de Vendredy, elle les denigre encore autāt qu'il se peut. 1. Le Mystere de l'Incarnation de IESVS-CHRIST, refusant d'adorer son Humanité, quoy qu'elle soit intimement, substantiellement & personnellement vnie à sa Diuinité, & quoy qu'elle puisse & doieue (par la communication des Idioms) en tant qu'elle compose vn mesme Supost avec la Diuinité, estre ditte Dieu. Car ces Propositions en IESVS-CHRIST, sont non seulement vrayes, mais qui plus est, de Foy, voire mesme parmy vous: *Ce Dieu est homme, & cét homme est Dieu.* 2. Le Mystere de sa Natiuité refusans de croire, que ce Seigneur soit sorty, ou peut sortir des sacrez flancs de la sainte Mere, sans violer les seaux virginaux de son corps, quoy que vous accordiez, que la fleur sorte de la plante sans l'ouuir, & la lumiere d'vn phanal vitré sans le percer. 3. Le Mystere de la *Passion*, la foüillant

de plusieurs notables vices & pechez, ainsi qu'il est aisé de voir chez Calvin sur saint Mathieu chap. 26. & 27. & dans l'*Institution* liur. 2. chap. 16. §. 10. Entre autres, d'auoir oublié nostre salut, d'auoir apprehendé la damnation & malediction de Dieu, d'auoir presque desespéré de son salut sur l'arbre de la Croix, & d'auoir esté damné quelque temps, dont le Synode d'Annonay de l'an 1604. a eu honte & horreur. 4. Le Mystere de sa *Resurrection*, rauissant à son corps les doüaires d'un corps glorieux, nommément la *Subtilité*, lors que vous niez, qu'il soit peu sortir de son Sepulcre, que la pierre n'en ait esté renduë molle comme beurre, dit Calvin. Et finalement le Mystere de son *Ascension*, faisans sa montée au Ciel toute metaphorique, mais plustost fantastique & imaginaire; Ce qui s'inferre apertement de la Doctrine du mesme Calvin sur saint Marc chap. 16. vers. 19.

L'Eglise Romaine recognoit avec l'Escriture sainte & les Peres en Marie, la qualité de Mere de ce Sauueur, la Virginité perpetuelle & de cœur & de corps, voire l'Innocence & la Sainteté consommées dès sa naissance iusques à sa mort.

La vostre Pretenduë Reformée ne fait point de conscience d'enseigner tout le contraire. Maurice Ministre d'Eyguières en Prouence, treuua si estrange qu'une honneste femme eust appellé ceste sainte Vierge, *Mere de Dieu*, qu'il ne le peut supporter, dont il la condamna de superstition & dit tout haut deuant Madame la Barone de Senas, qu'il suffisoit

de l'appeller Vierge , renouellant l'herreur de Nestorius , condamnée par diuers passages expres de l'Ecriture sainte en S. Luc 1. vers. 43. Math. 2. vers. 13. Iean 19 vers. 25. & par le premier Concile d'Ephese que vous mesme receuez comme Canonique. Cecy m'a esté (ne fait pas long-temps) raconté, comme chose véritable par le Sieur Curé de Senas. Beze a bien osé escrire qu'elle enfanta comme les autres femmes ; Et apres Calvin sur saint Luc chap. 1. vers. 34. qu'elle se fust moquée de Dieu , si se mariant à saint Ioseph , elle n'eust eu la resolution de luy liurer sa Virginité. Qui est luy ravir tacitement & la Virginité de cœur , & la Virginité de corps. Le mesme Calvin assure qu'elle commit plusieurs notables excez en sa vie , ainsi qu'il est aisé de voir en diuers endroits de ses œures , fidellement remarquez & cittez par le Pere Jaques Gautier au Dilemme 77. de son Anatomie du Calvinisme.

L'Eglise Romaine admire la Sainteté des Apostres , des Patriarches , des Prophetes , des Peres & des Conciles , & reuere grandement leurs Escrits.

La vostre Pretenduë Reformée , ne laisse pas échapper vn seul Apostre , vn seul Patriarche , vn seul Prophete , vn seul Concile qu'elle ne couure de quelque iniure. Luther au liur. *des Conciles* , sur celui de Ierusalem & sur tout au liur. de la *Messe particuliere ou priuée*. Et Brence en son *Apologie de la Confession de Vvitemberg* pag. 900. escriuent que

sainct Pierre, le Prince des Apostres avec sainct Barnabé, voire apres auoir receu le sainct Esprit, au iour de la Pentecoste, ont avec toute l'Eglise de Ierusalem erré. Le mesme Luther dit en quelque part. Que son Euangile est plus pur que celuy de IESVS-CHRIST, du temps des Apostres mesmes.

Les Centuriateurs de Magdebourg. Cent. 1. liur. 2. chap. 10. pag 580. condamnent sainct Paul d'une grande erreur, en ce qu'il se purifia comme les Iuifs dans le Temple aux Actes chap. 21. vers. 26. Calvin appelle au liur. 1. de son *Institution* chap. 12. §. 3. & sur le 20. des Actes vers. 25. L'Euangeliste sainct Iean *Inconsideré & condamné.* Et au liur. 4. chap. 8. §. 4. il dit que les Apostres ne deuoient point gasouiller, tout ce qui leur venoit à plaisir. (Notez s'il vous plaist l'insolence de ces Termes) Il vomit quelques autres iniures contre les Apostres, que j'ay recueillies en *l'Irreligion des Religionnaires de nostre temps* chap. 8. Pour les Patriarches & Prophetes, il ne pardonne pas au plus homme de bien d'entre eux. Voyez s'il vous plaist le mesme liur. & chap. sur tout le 152. Dilemme du mesme R. Pere Gautier.

Pour les peres. *Tous les peres (dit Luther) ont esté auengles & ignorans aux saintes lettres. Quand ils escriuoient quelque chose, ils auoient la plume à la main, mais leur Esprit estoit ailleurs. S'ils ne se sont rauisez auant leur mort, ils ne meritēt point le nom de Sainct, qu'on leur donne.* Calvin escrit d'eux, qu'en refutant les

erreurs des Heretiques de leur temps, ils ont tous esté par trop attachez à leurs propres erreurs. Du Moulin en sa Nouveauté liur. 1. chap. 49. decreditte tant qu'il peut la doctrine des Peres. *Ces peres* (disent vos Ministres en Bouffonnant) *nous font deuenir enfans*. Ils disent vray, car la Doctrine solide des Peres fait voir a l'œil, comme ils font en eff. Et des vrais Enfans en Doctrine.

Quant aux Conciles, Luther les appelle, *les grands iours de Sathan & les Assises de l'Antechrist*, & en font & luy & Caluin, non plus d'estat que du plus chef de leurs Consistoires.

L'Eglise Romaine enseigne sur le 10. article du Symbole, que comme nous sommes aydez & soulagez en ceste vie par les oraisons des Saincts, desia bien-heureux au Ciel, que nous pouuons semblablement ayder & soulager, par les nostres les ames, qui sont detenues encore au purgatoire, selon la communion & communication de charité, laquelle doit estre entre les saincts, conformément au dixielme article du mesme Symbole.

La vostre Pretendue Reformée s'acharne avec vne passion desmesurée contre cette Doctrine, receüe en l'Eglise de Dieu, non seulement depuis IESVS-CHRIST, mais encore depuis Moyle mesme: Car non seulement les premiers Chrestiens, mais encore les plus anciens luifs ont creu que les Saincts pouuoient prier pour nous, & nous pour les défunts, ainsi que i'ay monstré clairement ailleurs.

Estimant

Estimant en ceste sorte les Saints Bien-heureux, ou Impuissans enuers Dieu ou Ignorans, ou destituez d'amour & de charité; Et les ames de Purgatoire indignes de toute ayde & secours; le suppose la Doctrine de l'Eglise ancienne Iuifue, & celle de la primitiue Chrestienne (qui sont la mesme en ce point de Foy) comme tres-veritable & Catholique.

L'Eglise Romaine soulage encore les mourants des aydes qui leur sont necessaires pour bien mourir, conferant à toute heure en necessité le Baptesme aux petits enfans, & la Penitence, Eucharistie & Extreme-Onction (à l'imitation de l'Eglise primitiue) aux personnes aageés.


La vostre Pretenduë Reformée refuse tout court à ses sujets ces necessaires Sacremens, qui est vne cruauté ou plustost vne boucherie d'ames, la pire & la plus scythique qu'il est possible de s'imaginer, s'il est vray, comme il est, qu'ils soient absoluëment necessaires à tous & particulierement aux mourans, ainsi que ie le preuerois efficacement, s'il s'agissoit de vuidier ceste controuerse icy.

L'Eglise Romaine recognoit finalement en la nature humaine le Franc-Arbitre, voire mesme aux choses surnaturelles; estant assisté de la Grace diuine, à cause dequoy elle l'esleue bien haut par dessus celle des Bestes.

La vostre Pretenduë Reformée, au contraire, comme vne autre Circé change les hommes de libres & raisonnables en pourceaux, leur rauissant le

Franc-Arbrite aux choses surnaturelles, voire mesme estans assistez de la Grace, c'est à dire, la liberté d'esslire & choisir le bien surnaturel, & la raison, qui les distingue d'avec les pourceaux.

Nous pourrions preuver tout cecy par plusieurs authoritez de l'Escriture & des Peres, si chacun ne l'entendoit desia clairement ainsi, & ne le tenoit aujourd'huy, non seulement comme chose veritable, mais encore comme chose manifeste & cogneuë à chacun :



*DE LA SAINCTETE' DE L'EGLISE
Romaine, & Impieté de la Reformée en leurs
Dogmes, touchant les Mœurs.*

CHAPITRE IX.

A Yant briefuement discouru de la Saincteté des Dogmes de l'Eglise Romaine quant à la Foy, disons deux mots de la Saincteté de ses Dogmes quant aux Mœurs. Et pour commencer. Il n'y a personne tant soit elle rude qui ne scache aujourd'huy, comme elle déteste non seulement les plus détestables pechez contre la Foy, l'Esperance & la Charité, mais, qui plus est, les moindres & les plus legers, mesme ceux de simple pensée ? Et de fait, Il n'y a si petit doute ou curiosité touchant la

Foy, si menuë deffiance ou presumption contre la vraye Esperance & si courte auersion, ou leger deffain des choses diuines contre la Charité, qu'elle ne condamne de peché veniel.

Vostre Pretenduë Reformée au contraire admet ouuertement comme chose licite, 1. L'incrudulité de plusieurs articles de Foy, comme nous venons de monstrier, 2. La presumption manifeste, promettant aux hommes le salut sans aucun trauail, & finalement le mespris des bonnes œuures, ainsi que nous faisons voir bien au long en son propre lieu cy-dessous.

L'Eglise Romaine condamne de peché veniel la moindre petite Superstition & Bigotterie, la moindre Irreuerance & Indiscretion, la moindre Addition, Diminution ou changement volontaire aux Offices Ecclesiastiques & Ceremonies establies par les Apostres, par les Peres, & les Conciles pour le Culte diuin.

La vostre Pretenduë Reformée aduouë tacitement l'Idolatrie, la Magie, & l'Atheisme. Il est vray: Elle aduouë tacitement l'Idolatrie, lors qu'elle transfere l'honneur qui est deu à la seule Verité au Mensonge, ou si vous voulez l'honneur qui est deu à la seule Foy diuine, à des manifestes Heresies, lesquelles ne sont en effet que des Idoles spirituelles, selon Origene, saint Ierosime, & saint Augustin. Voyez les preuues de cecy en l'*Irreligion de la Religion Pretenduë*, en l'Impieté 21. Que vostre Doctrine

soit vn Ramas de manifestes Heresies , on le vous a desia cent & cent fois preuue par toutes sortes de preuues. Elle aduouë encore tacitement la Magie & l'Atheisme , tenant le chemin ordinaire de tous les Heretiques , lesquels comme chacun sçait , degenerent à la Fin en Magiciens ou Athée. Je m'en rapporte à saint Irenée liur. 1. chap. 9. & liur. 2. chap. 57. des Heresies. En effect , on n'auoit iamais veu tant de Sorciers à Geneue , en Suisse , en Allemagne , au Pays bas , en Dannemarc , en Suede , & tant d'Athées en France , qu'apres que vostre Doctrine y a esté preschée ; Et cecy est si vray & si manifeste , que vous n'auriez pas le courage de m'en dementir : Car les Histoires foisonnent en preuues & tesmoignages solides de ceste verité.

Luther, Carlostad , Zuingle & Calvin'n'ont pas sceu taire & cacher la communicatiõ qu'ils auoient eu plusieurs fois avec les Demõs. Luther au liure *de la Messe angulaire*, fol. 228. & ailleurs confesse d'auoir aprins du Diable cinq arguments contre la Messe priuée, qu'il a depuis fort souuent preschez en diuers lieux ; *Et in Colloq. Mensal. fol. 273.* il se vante d'auoir mangé & couché plus souuent avec le diable , qu'avec sa Nonnain deuoilée. Carlostad faisoit mestier d'achepter & vendre des Esprits familiers. Zuingle se loüe d'auoir aprins le sens de ces paroles. (*Hoc est corpus meum,*) d'vn Esprit , la couleur duquel il ne sçeut iamais bien discerner, si blanche , ou noire. Calvin repris par Buccer des Im-

precations qu'il vomissoit d'ordinaire contre toutes sortes de personnes, en reiette toute la coulpe sur son Genie: *Non tam ingenij, quàm Genij culpa est.* Genie, qui ne pouuoit estre autre, que quelque Lutin; Car les Anges ne sont point aigres & mordans, comme estoit ce noble Genie.

L'Eglise Romaine condamne de peché veniel, l'omission, voire, qui plus est le delay d'un seul *Ave Maria*, promis à Dieu par vœu formel, conformément au Texte Sacré, dans le Deuter. chap. 23. (*Tu garderas diligemment ce qui est vne fois sorty de ta bouche*) si telle omission ou delay se fait sans cause legitime; Et de peché mortel, l'inobseruation d'un vœu de chose importante, & d'une promesse faite à quelqu'un avec iurement selon les Canons; *Cap. si vero, &c. Cap. verum de Iure iurando &c.* voire mesme faite avec violence & contrainte à des voleurs, si celuy qui l'a faite auoit l'intention de l'accomplir en la failant; Telle est la reuerance qu'elle porte au tesmoignage de Dieu, que nous employons d'ordinaire dans nos iuremens. Et c'est vne intolerable Imposture d'escrire, comme fait auiourd'huy le Ministre du Moulin, que nous enseignons; *Qu'on ne doit point garder la Foy donnée aux Heretiques*: Car cela ne fust, ny ne sera iamais, mais tout le contraire, Dieu aydant.

En vostre Pretenduë Reformation, outre que vous ne faites aucun scrupule de conscience de violer tous les iours les iuremens par vous prestez en

vos Contrats ciuils ; (car vous n'en demandez point de dispense, n'y a vos Ministres, ny au Consistoire, ny au Synode, auparauant que de les violer.) Vous preschez & pratiquez encore d'ordinaire la rupture des promesses, que les hommes ont faites à Dieu quoy que bonnes en leur substance, & possibles avec sa grace *Parce* (dit maistre Iean Calvin) *qu'elles sont autant de filets de Sathan* ; Ce qui est horrible à dire, voire mesme à penser ; Estant l'observation de telles promesses de droit naturel & diuin. Et il n'y a reformation, non pas mesme aucune puissance Ecclesiastique, ny Politique au monde, quoy que gasouille ignoramment vos Ministres, qui les puisse annuler, comme sçauent fort bien les Sçauants, ou seroit que leur obseruation causast quelque vray mal, qu'on ne peust humainement euitter, ou empeschat quelque plus grand bien.

L'Eglise Romaine condamne de peché toute œuvre manuelle, notable, faite le iour de Dimanche, sans aucune nécessité ; Comme encore la moindre distraction volontaire, assistant à la Sainte Messe, ou priant en particulier, telle est la sublimité de l'Esprit Religieux, avec lequel elle sert Dieu.

La vostre, non contante d'enseuelir toutes les Loix qui soustiennent le Culte d'un si saint iour, tient encore, comme doctrine reformée qu'il ne doit estre obserué que pour la police externe. Ainsi enseigne Calvin en son Institution liur. 2. chap. 8. §. 33. D'où il est aisé d'inferer, ou que vous tra-

uaillez, ou que vous croyez, de pouuoir librement traualler le iour du Dimanche, du moins en cachete, voire sans aucune sorte de necessité.

Continuation du presant Chapitre, touchant la Saincteté des Mœurs de l'Eglise Romaine, & Impieté de celle de la Pretenduë Reformée.

L'Eglise Romaine condamne de peché mortel la desobeyssance aux legitimes Superieurs, Parans, Prelats, Princes & semblables, en chose de quelque importance, voire en chose de peu, si elle est accompagnée d'un notable despit, ou mespris contre la personne qui commande. En sorte que faire quelque chose deffenduë, ou obmettre quelque chose commandée, avec despit, ou mespris du legitime Superieur, c'est chose digne de l'Enfer, selon la Theologie, qu'elle enseigne & professe encore auiourd'huy.

La vostre Pretenduë Reformée ne recognoit ny Roy, ny Prince, ny Prelat, ny Magistrat iusqu'à luy deuoir obeir par conscience, sur tout, s'il est d'une autre Religion que la vostre. Luther escrit en sa Captiuité Babylonique; *Qu'il n'y a point de moyen de remettre la Liberté Euangelique, qu'en abolissant la Loy des hommes.* Item; *Qu'il n'y a point de Magistrat, non pas mesme d'Ange au Ciel, qui puisse prescrire vne Loy au Chrestien, autre que celle qu'il voudra receuoir.* Et ailleurs. *Où est le Seigneur* (dit-il à ses Sectaires) *qui te puisse ren-*

dre esclave de ses volontez. La Nature t'a mis en main la Liberté, laquelle tu dois conseruer au prix de ta vie. Et Calvin en son Institut. liur. 4. chap. 20. §. 1. La Liberté de l'Euangile (dit-il) ne recognoit, ny Roy, ny Magistrat entre les hommes. Paroles que vous nous auez commentées avec dix mille rebellions & felonies en ce seul Royaume, depuis leur premiere publication. Luther adiouste à la desobeissance volontaire, le desdain & le dépit. Si le Pape te deffend de manger de la chair au Vendredy, ou Carefme (dit il à tous ceux qu'il auoit desia seduits) garde bien ta liberté & ne luy obeys point, mais en dépit de luy fais tout le contraire, & dis luy; En dépit de toy, i'en mangeray. Fais ainsi de toutes choses. Prends exemple à moy, Car si le Pape, ou quelqu'autre me veut faire porter ma chappe en dépit de luy ie la quitteray: S'il me l'a deffend, ie la porteray, & feray ainsi de tout le reste à mon plaisir. Est-ce pas rompre frain, sangles & poitral que cela, pour courir en cheual eschappé çà & là? Et au liure, de formula Missarum, il proteste, qu'il fera tout le contraire de ce que le Concile prochain auoit à decreter, encore qu'il reuint à son goust. Bien loin de l'esprit de l'Apostre Saint Paul, qui ne nous recommande rien tant aux Rom. chap. 13. vers. 1. & 5. que d'obeir aux legitimes Superieurs, non seulement pour le chastiment (dit-il) mais qui plus est, pour la conscience, voire mesme aux plus fascheux & difficiles d'entr'eux. Mais plus encore loin de celuy du Prince des Apostres, Saint

Pierre, qui nous exhorte viurement en sa 1. Epist. ch. 2. vers. 13. d'estre sujets à toute creature pour l'amour de Dieu.

Ne parlons pas des vieux temps, puisque les Edicts ont tout enterré: Est-il pas vray, que depuis la mort du grand Henry, vous n'avez rien obmis, pour faire de ceste Monarchie, vne Anarchie & confusion, ou plustot vn petit Enfer, à l'imitation de vos Freres en Christ des Prouinces vnies, tant l'obeyssance vous est à contre cœur, & tant la Rebellion & la felonie sont incarnées dans vostre Reformation Pretenduë. Est il pas vray, que vous rompites l'Assemblée Politique de Grenoble de l'an 1615. à cause que ce Sage Nestor, le Duc de l'Esdiguieres vous dissuadoit de ioindre vos armes à celles des Princes mescontans. Ce que vous desiriez desesperement de faire; Et vous en allates tenir aussi-tost vne autre à Nismes, pour conclurre cela mesme, que vous desiriez tant. Au lieu de suiure le party du Roy, comme les plus gens de bien d'entre vous se le permettoient assurement. Est-il pas encore vray, que pour comble d'insolence vous fistes non seulement lire sur le Theatre, l'Arrest que vous en auiez donné, mais le fistes encore crier apres à son de Trompe par toute la ville. *Au nom du peuple.*

Vous n'oseriez pas à mon aduis nier, qu'en l'Assemblée generale de la Rochelle de l'an 1621. (laquelle vous conuoquates contre la volonté du Roy) vous n'y forgeastes les Articles de la guerre,

& les enuoyates aussi-tost par toutes les Prouinces, comme s'ils eussent esté des Edicts du Roy, & qui est le pis, que vous ne fistes chercher les Deputez, qui auoient charge de parler de la paix, en resolution de les ietter dans la Mer; Vous n'oseriez pas non plus nier que vous n'y sommates les Marechaux de l'Esdiguieres & de Chastillon de se ressentir du manquement de promesse, que vous pretendiez leur auoit esté fait par sa Majesté, afin d'exiger de vous la separation de l'Assemblée de Loudun, laquelle vous osates continuer en mutins & Rebelles nonobstant ses commandemens reiterés, durant plusieurs mois.

Vous n'oseriez pas non plus nier, que vous ne résolutes en vostre Assemblée d'Vsez de l'an 1627. de ioindre vos armes à celles du Roy d'Angleterre, contre celles de sa Majesté Tres-Chrestienne vostre legitime Prince.

Il ne faut pour la preuue parfaite de toutes ses insolences reformées, que les Escrits de la Miletiere, vostre Aduocat General. *Quiconque* (dit ce Boute-feu de Rebellion) *veut embrasser la deffence de IESVS-CHRIST & de son Eglise,* (c'est à dire de vostre Reformation) *n'a besoin d'autre qualité, pour estre authorisé en cela, que d'estre fidele seruiteur du mesme IESVS-CHRIST,* c'est à dire Reformé. Voyez le Mercur François tom. 8. pag. 192. qui remarque ces paroles avec plusieurs autres de mesme trempe, dignes de punition exemplaire.

Vos Ministres, tous chetifs qu'ils sont, qu'est-ce qu'ils n'ont pas fait dans leurs Synodes, & nommément en celuy d'Alez de l'an 1620. pour empêcher les Apels, comme d'Abus, des Sentences de leur Consistoire, Colloques, & Synodes aux Parlemens, ou pour mieux dire, vsurper, sous le faux pretexte de conseruer entiere leur Discipline Reformée, sur l'authorité du Roy, & de ses Parlemens ? Tout ce qu'ils ont peu, iusques à menacer les appellans de l'excommunication. Tesmoin le procès d'entre Canieron & Primerose, Ministre de Begle, proche de Bourdeaux, & Sainct Angel & l'Auuergnac, Aduocats Huguenots au Parlement de ceste ville là. Il y a bien plus, c'est qu'ils ont autrefois concerté de vous faire opposer à l'establissement des grands Iours, que sa Majesté fust sur le point de resoudre en l'année 1608. parce seulement que la puissance des Chambres de l'Edict en eust receu du dechet au grand preiudice du party.

Enfin on en auroit plustot fait d'autres, que de vous rendre obeyssans & souples au vouloir de sa Majesté, si ce n'est lors que vous ne pouuez pas faire autrement, & que la necessité de vos affaires vous y porte, comme elle a fait depuis la prinse de la Rochelle. Car auparauant vous estiez aussi mutins, que le Roy estoit debonnaire.

L'Eglise Romaine ne deffend pas seulement le meurtre de fait, mais encore celuy de volonté, voire les approches, & s'il faut ainsi dire l'ombre & l'i-

mage mesme du meurtre. En effect les Saincts Canons, *Distinct. 50. Cap. Si quis viduam, & Cap. aliquos. Et Distinct. 51. Cap. clericis & Cap. sententia sanguinis*, declairent Irreguliers, tous ceux qui le treuvent entachez de la moindre petite goutte de sang, quoy qu'innocemment & sans coulpe. Comme font d'ordinaire les Iuges Criminels, leurs Assesseurs, Greffiers & Executeurs, comme encore l'Instigateur, l'Accusateur, les Tesmoins, & finalement tous ceux qui peuvent auoir causé, ou occasionné la mort à quelqu'un, ou la mutilation de quelqu'un de ses membres (hors de leur propre deffence) quand mesme la chose seroit arriüée sans crime, ou casuellement & par mal-heur, comme il arriue souuent.

La vostre Pretenduë Reformée presche & pratique tout ouuertement comme doctrine canonique, le meurtre d'autorité priuée. Car, qui vous a (ie vous supplie) donné celle que vous auez si souuent vsurpée, tuant les Catholiques, que vous auez tuez? Ce n'est pas Dieu. Car comment auroit-il destruit vn Ordre, qu'il a si sainctement, si vniuersellement & depuis si long-temps estably dans le monde, sans le faire entendre & sçauoir par des signes & des marques euidentes & extraordinaires aux humains? Ce ne sont pas leurs Majestez Tres-Chrestiennes: Au contraire ils vous ont expressement deffendu, cent & cent fois ceste vsurpation. Ce n'est pas la necessité de sauuer vostre vie; Car ceste necessité ne

peut auoir lieu du Sujet au Souuerain, deuant lequel il faut necessairement fuir, ou souffrir ses leueritez, selon l'Axiome, *Aut fugere aut pati.*

L'Eglise Romaine condamne de peché veniel, la moindre action, la moindre parole, voire la moindre pensée charnelle volontaire, mesmes aux personnes mariées hors de l'acte coniugal, & de peché mortel, si l'action, la parole, ou la pensée est occasion prochaine à quelque peché mortel, quoy qu'il ne s'ensuiue rien de mortel apres. O hauteffe & sublimité de la Religion Catholique.

La vostre Pretenduë Reformée leue en reformée toutes ces estreiffures par la necessité de l'acte venerien, qu'elle presche publiquement apres Luther; Lequel a permis, non seulement de bouche, mais lencore par escrit à ses Sectaires, qu'en cas d'empeschement de mariage, on puisse recourir à la fornication: à cause dit-il (*que cét acte est plus necessaire que le manger, boire, dormir, &c.* Ce n'est pas tout; Il permet encore au mary, refusé de sa femme sur le deuoir coniugal, de recourir librement à sa chambriere, *Si nolit vxor, accedat ancilla* (dit cest Asmodée Reformé) & à la femme mariée de s'accoster secrettement des freres de son mary, s'il deuiant impuissant, afin dit-il en Iuif) de luy susciter lignée. Il permet en outre la Poligamic, & qui pis est, le Sacrilege formel, lors qu'il permet que les Religieux & Religieuses s'accostent & s'accolēt ensemble, sans scrupule à son exemple, nonobstant

tous les sentimens contraires de l'Apostre (en sa 1. aux Cor. ch. 7.) des Saints Peres , des Conciles, & de toute l'Eglise en corps , voire mesme du Droit Naturel. Qui veut que nous obseruions ce que nous auons volontairement promis à Dieu , quand la chose est bonne de soy , & possible avec sa grace. Chefs de Doctrines , que Calvin & tous vos Ministres approuuent ouuertement selon l'axiome. *Qui tacet consentire videtur*: Car où est-ce que Calvin, ou quelque autre Ministre reprimanda iamais Luther, de ceste abominable Doctrines.

Surius raconte sur l'an 1563. qu'un certain de nos Apostats , deuenu Ministre , accusé , & déjà conuaincu d'auoir voulu tuer sa femme, & familièrement enquis par le Magistrat de la raison , respondit librement qu'il pretendoit de se remarier à vne autre, parce (dit-il) que la concupiscence d'un Reformé ne s'estaint, ny ne s'assoupit pas en se mariant. Plusieurs de vos Principaux Chefs de guerre ont souvent permis le violencement public à leurs Soldats en Allemagne, en Hongrie, en Flandres, en France; iamais toutesfois, à mon advis, qu'apres en auoir profondément consulté Messieurs les Ministres, qui suiuoient leurs armées. Je pourrois aisément marquer le temps, les lieux & les Autheurs de ces abominations, si ie le voulois faire, mais vous en estes assez asseurez, quand vous n'aurez que le recent exemple du Comte Mansfeld, deuant les yeux, qui permit il y a quelques années à ses soldats, tout,

hors de bien faire, & particulièrement sur ce Crime.

Autre continuation du mesme Chapitre.

L'Eglise Romaine, outre qu'elle condamne de peché mortel le moindre larcin, voire la moindre detention iniuste du monde (& fust-ce d'une chose treuuee, si le maistre vient à souffrir à son occasion quelque notable incommodité, comme feroit sans doute vn pauvre Couturier d'une aiguille, ou se plaisoit grandement à la posseder, comme feroit vne Damoiselle vnerose, ou vn œuillet.) Elle condamne encor le larron ou l'iniuste detenteur à la restitution, conformément à la Doctrine de S. Augustin, & s'agist-il du bien d'un Payen, Iuif, ou Heretique, qu'on auroit pillé d'autorité priuée.

La vostre Pretēduë Reformée, tout au contraire, non seulement fait ieu de mille & mille iniustes vsurations du bien des Catholiques, mais qui plus est, elle vous encourage encores à la fraude, au larcin, au vol, à l'vsure & au sacrilege. Il ne faut pas des preuues en cecy, la chose estant si manifeste, qu'elle est, à tous ceux qui sçauent vos déportemens passés. Pour le larcin & le vol, ie n'en veux autre témoin, que le Sieur de la Nouë au 26. de *ses Discours Politiques*, dans lesquels ils vous charge d'estre de vrais Picoueurs. Vous ne sçauriez recuser ce braue Tel-

moin ; Car il est des plus Reformez. I'ay riere-moy les Actes en leur original du Consistoire d'Vsez de l'an 1575. dans lesquels c'est vn plaisir incroyable, de lire entre autres matieres propres de la farce, les disputes ariuées sur les Partages des Butins, faits par l'Ordre du Consistoire, chacun y voulant auoir la meilleure part & sur tout les freres zelés, Car qui a plus de zele reformé parmy vous, a plus de droit sur les biens des pauures Papistes.

Pour l'Vsure vos Ministres n'ont iamais apprehendé de la pratiquer tout ouuertement, puis que selon Calvin en son Opuscule, intitulé, *Responce des Vsures*, elle ne touche point la conscience. En effet à Geneue ils baillent l'argent à iour, à dix pour cent, & ceux d'Orange à huit & tiers, encore qu'ils ne souffrent aucun dommage actif ny passif, à l'occasion de leur prest. Qui est combatre ouuertemēt la Doctrine expresse de IESVS-CHRIST en S. Luc 6. Exemples, dont Chauue Ministre de Nismes, s'est sans doute fortifié pour ramasser plus aisément & pluſtot les quarante mille francs, qu'il a donnez de doüaire à sa fille ; Dequoy ayant esté censuré a respondu, se mocquant ouuertement de ces Censures, qu'il s'en rapportoit à la conscience de Madamoiselle sa femme, laquelle a tousiours pratiqué l'Vsure, & non pas luy. Je parle selon mes memoires.

Pour le Sacrilege ou larcin des choses sacrées, Luther apres auoir permis aux Princes Protestans d'Allemagne, le pillage des biens de l'Eglise en son

liure du *Fisc commun*, imprimé l'an 1523. les entretient dans leur sacrilege retention par ces paroles. *Si l'on vous demande la restitution des biens de l'Eglise, demandés les ames perduës, & quand on aura satisfait à cela, nous verrons du reste.* Belle compensation, & bien fondée à la verité. Des reuenus Ecclesiastiques avec des ames. Mais c'est ainsi que les Impies & Sacrileges se moquent de Dieu & des hommes.

Et pour étouffer toutes vos Repliques en la bouche, & vous faire tomber le front, est-il pas vray, qu'en vostre Discipline, tesmoignant vn, ie ne scay quel desdain au chap. 14. art. 2. à ceux qui exigent les reuenus d'un Prieuré, comme Rentiers, c'est à dire, pour les rendre au legitime Possesseur & Maître; elle a tousiours fait les doux yeux à ceux qui les ont exigez pour les retenir; Tant vous auez en horreur la Restitution des biens d'autruy? le ne veux, que produire le penultiesme & dernier articles de la derniere Assemblée de la Rochelle, iettés sur le moule de ceux que vos freres d'Allemagne forgerent en leur derniere Rebellion contre l'Empereur Ferdinand, selon lesquels vous disposez absolument, à leur imitation des biens & reuenus de l'Eglise & du Roy, comme des vostres propres, pour faire voir à tout le monde, comme fuyant la qualité de petits larrons, vous affectez celle des gros, laquelle vous eschapera du foüet ou de la Galere, pour vous ietter plus profondement dans l'enfer si vous n'auetz recours à la restitution.

Q

L'Eglise Romaine deffend le mensonge, apres l'auoir vniuersellement condamné de peché, pour quelque cause & raison qu'il soit dit, & fust ce pour sauuer, non seulement la vie du corps, mais encore celle de l'ame de plusieurs, voire de tous les hommes qui furent & seront iamais, mesme pour estendre la Religion Catholique par tout l'Vniuers, attendu que le mensonge est simplement mal & s'oppose formellement & directement à la premiere Verité, qui n'est autre, que Dieu mesme.

La vostre Pretenduë Reformée, outre qu'elle presche tout haut apres Calvin, la menterie & la detraction, comme choses supportables aux Ministres mesmes, selon les Ordonnances de Geneue, en la page 10. elle fait encore mestier d'accumuler Imposture sur Imposture, & Calomnie sur Calomnie, pour flestrir la reputation des plus gens de bien d'entre nous. Et si son estenduë & dilatation dependoit du mentir & calomnier, il n'y eust iamais Eglise plus estenduë & dilatée au Monde qu'elle. Car elle en fourniroit à charetées, s'il en estoit de besoin. Le bon est, que personne n'a plus, graces à Dieu, de Foy, pour croire ce que vous dites.

Et ne repartez pas icy, que ie vous impose: Luther a esté conuaincu de 874. mensonges en son seul *Liure des Vœux*. Voila pourquoy en la preface de ses œuures, il supplie bien fort ses Lecteurs de les lire avec compassion. Sleidan, son Historien, est chargé d'auoir fourré dans son Histoire Onze

mille menteries de compte fait. Les Escrits de Calvin en formillent presque par tout, remarquées par les celebres Cardinaux Bellarmin & du Perron dans leur doctes Labeurs. Lisez son Institution au liur. 4. ch. 7. §. 27. & vous treuuez qu'il nous y charge en trois lignes d'escrit, d'enseigner trois espouventables Impietez qui sont autant d'impostures diaboliques. La premiere est; *Qu'il n'y a point de Dieu*, La deuxiesme, *Qu'il n'y a point de CHRIST*, & la troisieme, *Qu'il n'y a point de Resurrection*. Gabriel Poëlus escrit en son liure premier de l'Antechrist chap. 17. Que nous enseignons, comme le Pape peut 1. dispenser contre le vieux & nouveau Testament, 2. creer de rien quelque chose. 3. changer la substance des Sacremens, sçauoir est la matiere & la forme, & 4. qu'il y a plus de mal à manger de la chair à Rome aux iours deffendus que de paillarder. Impostures que le Diable mesme auroit honte de nous mettre sus, & pour lesquelles assurez comme vous faites, il faut auoir essuyé toute honte.

Et pour vous faire voir, comme ces fourbes ont des Successeurs, est-il pas vray que vostre Patriarche du Plessis fust meritoirement accusé, deuant le grand Henry, de glorieuse memoire, par l'incomparable Cardinal du Perron, d'auoir espicé son Mystere d'Iniquité de 500. faussetez, neuf des moins apparentes & manifestes furent ^{d'equitez} verifiées en presance de ce grand Monarque, par des Iuges equitables & sçauans pris des deux Partis, afin de rendre ceste

Verification plus authentique & celebre. Dont l'acusé pensa mourir de honte & de confusion au veu & sçeu de toute la France? Est-il pas encore vray que vostre Rossignol du Moulin, outre plusieurs celebres Impostures & calomnies que i'ay refutées en *l'Innocence de l'Eglise Romaine*, nous accuse d'enseigner ouuertement. 1. *Qu'il y a plusieurs Dieux.* 2. *Que IESVS-CHRIST meurt tous les iours en la Messe.* 3. *Qu'il y a de la vertu dās les Images, à cause dequoy il croit que nous mettons nostre confiance en icelles.* C'est ainsi que le luy a reproché avec plusieurs autres crimes, vn de ses Disciples secrets, conuerty depuis peu à la Foy Catholique. Il veut qui plus est, faire accroire que nous ne disons pas dans nos Litanies à nostre Dame. *Frie pour nous*, comme nous faisons à saint Pierre, mais, *Aye misericorde de nous*, comme à Dieu mesme. Le Ministre du Crest, preschant le 15. Aoust de ceste année 1642. à Nyons, durant le Synode Prouincial des Ministres, asseura, *Que nous attribuons tous les priuileges de IESVS-CHRIST à sa Mere*; Et que nous ne faisons aucune differance entre IESVS-CHRIST, & *Saint François que du froc.* Qui sont non seulement calomnies des personnes sans front & sans ame, mais encore Impostures, pires que Diaboliques. Enfin qui voudroit oster de vos liures les calomnies, les faussetez, les corruptions & les desloyales explications & applications, il ne luy en demeueroit que les seules couuertes entre les mains.

Finalemēt l'Eglise Romaine, non contente de lier la main & la langue aux Catholiques, elle leur lie encore la pensée & l'imagination, pour ne leur laisser pas mesme penser au mal. Car elle condamne de peché veniel la moindre pensée volontaire, contre l'humilité Chrestienne, contre la Patiance, contre la Iustice, contre la Temperance, la Continence, & sur tout contre les vertus Theologales, la Foy, l'Esperance, & la Charité enuers Dieu & le Prochain.


La vostre Pretenduë vous destache au contraire & la main, & la langue & l'imagination mesme, afin qu'elles puissent courir sur toute sorte de Sujets avec moins de scrupule & plus de Liberté de conscience. Luther dit tout net au Sermon de Moysse. *Que le Decalogue ne concerne point les Chrestiens, Et sur le Psal. 51. Qu'il le veut bien recevoir, mais avec vne Liberté, toute Reformée, c'est à dire avec la liberté de n'y point obeir.* Et en la Preface sur la version du Nouveau Testament & sur les Gal. chap. 2. il soustient fort & ferme, *Qu'en l'Euangile, Dieu ne nous commande rien plus que de croire.*

Au reste, ne venez point me donner le change icy, m'obiectant les execrables pechez, qui se commettent à Rome; puis que tant s'en faut que nous les appreuions, & soustenions comme choses faisables, ainsi que vous faites, tous ceux que ie viens de vous reprocher, qu'au contraire nous les abominons, nous les detestons, & condamnons aux

flammes d'Enfer. Et vous sçavez bien que les Garçons y sont excommuniées & iettées à la voirie, mourant dans leur deplorable estat. Vous appelez Rome *dissoluë*. (Je parle à vos Ministres icy,) mais avec quelle conscience, ie vous supplie, sçachant tres-bien, que vos plus legeres dissolutions y seroient punies de la prison? Vous l'appellez *Infame*, mais avec quelle sincerité, sçachant asseurément qu'elle condamne au feu les Infames ravissements, des Vierges, que vous avez long-temps pratiqués en mille endroits de l'Europe? Vous l'appellez *le receptacle du vice*, mais avec quel front sçachant indubitablement que ce n'est qu'à cause de vos crimes, que vous vous en tenez depuis vostre origine de loing? Vous l'appellez *Idolatre*, mais avec quelle impudence, apres auoir cent & cent fois appris, comme c'est elle seule, qui delegue tous les iours aux Indes, en la Chine, au Japon & en l'Amérique, des hommes qui combattent par toute forte de trauaux & deffors, l'Idolatrie?

On permet le Bourdeau à Rome, comme on permet l'Herésie en France, & comme on permet vn cautere au corps humain, c'est à dire par necessité, & pour obuier à des crimes plus grands que la fornication. Qu'est-ce que n'ont pas fait, ie vous prie, Adrian VI. Pie V. Gregoire XIII. Sixte V. & Clement VIII. pour escarter ce Scandale de vos yeux. Voyez s'il vous plaist, Surius, qui raconte sur l'année 1566. les seueres peines, decretées contre

les Garces de ceste ville par Pie V. (qu'on est sur le point de declarer Bien-heureux, en suite de la sainteté de sa vie, & de la verité de ses Miracles.) Testimoignage inuincible, que les Papes ne les approuvent point, comme vous leur imposés. Et pleust à Dieu, que vous fussiez aussi seueres aux Garces de Geneue, de Vytemberg, de Londres & sur tout à celles d'Amsterdam, (lesquelles surpassent & en nōbre & en impudence, celles de Rome, que vous nous reprochez,) que les Papes le sont enuers celles de ceste grande Ville. plusieurs des vostres mesmes ne s'en plaindroient pas si souuent qu'ils font.



DE LA SAINCTETE' DE L'EGLISE
Romaine, & Impieté de la Reformée
touchant les Vertus Theogales.

CHAPITRE X.

L'Eglise Romaine ne s'arreste pas à l'observation des Commandemens de Dieu seulement; elle monte iusques à la pratique des Conseils, & des plus excellentes Vertus Chrestiennes: Tout au contraire de la vostre pretendue Reformée, laquelle s'exerce à les mespriser, & qui est le pis sans amendement aucun. Je vous supplie bien-humblement de prendre garde à ce que ie m'en vay fournir, pour

ce regard, afin que vous ne disiez point que ie vous impose.

Et pour commencer par les Vertus Theologiques, les plus importantes de toutes les Vertus Chretiennes : Il est tout constant & manifeste aujourdhuy à chacun, comme les Catholiques Romains professent & pratiquent ouvertement la vraye & formelle Foy. 1. Parce qu'ils croient tout ce qu'ils croient sur la seule & nuë autorité de Dieu, & sur le tesmoignage que son Eglise leur donne de la volonté de sa diuine Majesté là dessus. 2. Parce qu'ils croient ne plus ne moins que ce que IESVS-CHRIST nous a reuelé par ses Apostres, & par les Pasteurs de la mesme Eglise. 3. Parce qu'ils croient non seulement de cœur, mais professent encore de parole & d'œuvre au besoin ce qu'ils croient, selon que le veut l'Apostre aux Rom. chap. 10. *On croit de cœur pour estre iustificié, & on confesse de bouche pour auoir salut.* Et finalement parce qu'ils croient simplement & fermement ce qu'ils croient, c'est à dire sans en douter & sans en disputer en sorte quelconque; sçachant fort bien que les veritez de la Foy se desrobent aux yeux de la raison : *Nous n'auons affaire de curiosité apres IESVS-CHRIST, ny d'inquisition & recherche apres la publication de l'Euangile.* dit Tertul. lib. de prescript. au nom de tous les Catholiques.

Mais pour vous, *Messieurs*, vous ne sçauriez iamais raisonnablement vous glorifier de la vraye Foy. 1. Parce que vous ne croyez point ce que vous

croyez, sur la seule & nuë authorité de Dieu, d'autant que si vous le croyez, vous croiriez aussi bien cest article, qui vous a esté proposé par les Pasteurs de son Eglise, lequel vous rejetez que c'est autre, que vous receuez. D'où s'ensuit que vostre Foy n'est fondée que sur vostre goust & sentiment particulier, & par consequent qu'elle est purement humaine. 2. Parce que vous ne croyez pas tous les Articles de Foy, qui doiuent necessairement estre creus, pour auoir la vraye Foy, ainsi que ie l'ay fait voir clairement au premier Discours du *Pretendu Chrestien*. 3. Parce que vous n'osez point d'ordinaire professer ouuertement vostre Foy, dans les hazards & perils de la mort, ainsi que ie vous ay desia fait voir en la 6. de mes Antitheses, sur plusieurs exemples arriuez en diuerses occasions, lesquels vous mesme scauez, finalement, par ce que, non seulement vous disputez, mais qui plus est, doutez presque sans cesse des matieres de la Foy. Ce que ie preuue efficacement de ce que vous n'oseriez auoir ouuertement condamné aucune des erreurs des autres Heretiques de nostre Temps. De grace, où est la Congregation Chrestienne, hors de laquelle on soit damné, selon vostre Creance. Nulle part du monde. Or qu'est cela, comme ie vous ay desia dit cy-dessus, que douter tacitement, de la vostre. Car comme il n'y a qu'une seule Eglise, & qu'un seul Dieu, il n'y a aussi qu'une seule Foy au monde.

Quant à l'Esperance, les Catholiques Romains

la preschent & la pratiquent encore, telle quelle doit estre preschée & pratiquées parmy les Chrestiens.

1. Parce qu'ils esperent tousiours de pouuoir obseruer la Loy de Dieu, & de son Eglise, assistez & secourus de sa grace, laquelle il ne refusa iamais à personne, qui la luy demanda, comme il faut.
2. Parce qu'ils attendent, qui plus est, de paruenir à la perfection Chrestienne, dont fait mention l'Euangile, chacun selon la vocation, & condition de vie, à laquelle il a esté appellé, moyennant l'ayde de la mesme grace.
3. Parce que plusieurs d'eux entreprennent mille œuures arduës & heroïques, voire surnaturelles & comme diuines, pour la plus grande gloire de Dieu, telles que sont l'Abnegation de toutes choses, la Chasteté cenobiale, & l'obeyssance vniuerselle à vn autre homme, comme eux, pour toute leur vie. Autres entreprennent la Conuersion des Payens au peril de mille & mille martyres. Finalement, parce qu'aux grandes persecutions ils attendent d'ordinaire leur deliurance de Dieu seul. En effect ils ne recourent point à des moyens desesperés, à des sousteuemens & Rebelions pour s'affranchir des Tyrannies, & cruautez qu'on leur fait souffrir encore auiourd'huy en plusieurs Royaumes d'Afrique, des Indes, & du lapon, où les Princes sont encore Payens, quoy qu'ils ayent souuent de puissances humaines en main pour bouleuerfer tout l'Estat, Scachant tres bien, comme cela est formellement repugnant à l'esprit du Chri-

stianisme, que de se rebeller contre le Souuerain legitime, quoy que Payen.

Vous, tout au contraire, ne sçauiez que c'est, de ceste excellente Vertu. 1. Parce que vous n'attendez point de pouuoir obseruer durant ceste vie, la Loy de Dieu, voire mesme avec toute l'ayde & le secours de sa Grace. Mais comment attendriez vous cela, preschant à toute occasion le contraire, nommément dans le *Catechisme des petits Enfans*. Moins encore attendez vous d'arriuer à la Perfection Euangelique, propre à chacun de vous. 2. Parce que vous n'entreprintes iamais rien de grand & de releué pour Dieu, tout ce que vous auez fait iusques icy estant fort bas & rampant, & commun, mesmes aux plus foibles & chetifs d'entre les Chrestiens. Et finalement, Parce qu'estans viuement esprouuez vous recourez d'ordinaire à des moyens desesperes & damnables, à des souleuemens & Rebellions pour vous deliurer de l'espreue. N'y ayant Loy humaine, & diuine, voire naturelle, que vous ne violiez, si on vous pince tât soit peu de pres. Je ne veux, que ce que nous mesmes auons veu souuent de nos propres yeux. Or d'alleguer aucune possession immemorale icy, pour excuser & deffendre les mesmes souleuemens & Rebellions, vous ne le sçauriez faire avec verité. Moins encore la necessité de defedre vostre vie, puis qu'une telle necessité ne peut auoir lieu du Sujet au Souuerain legitime, la main pesante duquel il faut

nécessairement, ou fuir, ou souffrir, selon l'axiome,
Aut fugere aut pati, comme i'ay desia dit cy-dessus.

Quant à l'amour enuers Dieu, les Catholiques Romains y sont encore tres-excellens; Ce que ie preuue. 1. De ce que plusieurs d'eux prennent vn singulier contentemēt à penser à luy & à parler souuent & longuement de luy. Telsmoin m'en seront, quant au premier, les presque perpetuelles Meditations des Chartreux, des Recolez, des Capucins, des Iesuites & de plusieurs autres Saints Religieux, Prestres Seculiers & celebres Prelats de ce tēps. Et quant au deuxiesme, ie ne veux que sainte Catherine de Sienne, & de nostre temps saint Ignace, & le B. pere Cesar de Bus, nostre fondateur, qui ne pouuoient se saouler de discourir de ceste infinie Majesté, lors qu'ils treuuoient quelqu'un, qui les voulut escouter; En quoy ils receuoient encore plus de plaisir & de goust mille fois, qu'un vray & parfait amy n'en reçoit à parler de son plus cher & cordial amy. 2. De ce qu'un grand nombre d'eux s'estudient, non seulement à garder soigneusement les Commandemens, mais encore à suiure les saints Conseils. 3. De ce qu'ils entreprennēt plusieurs choses tres-difficiles pour son saint seruice. Et finalement, De ce qu'ils endurent ioyeusement beaucoup de choses tres-dures & tres-rudes au sentiment pour l'amour de luy, dont les preuues sont manifestes dans les Ordres Religieux Reformez.

Vous au contraire, oseriez-vous bien vous van-

ter d'auoir vn semblable Amour enuers Dieu , sans rougir , mais plustost sans mourir de honte ? Non pas , ou vous auriez entierement perdu le front, 1. Puis que vous n'employez gueres de temps à penser à luy , moins encore à parler de luy. De grace , où sont vos Meditations , où vos discours spirituels , où vos liures de Deuotion ? Il est vray que du Moulin se voulut mesler de bastir des Meditations , il y a quelque temps , ne scachant que faire ; mais s'il n'auoit pas d'auantage de grace à bouffonner , quand il a le vent en poupe , il n'y a celuy d'entre vous , qui daignast lire ses cajoleries. Car ses Meditations rapportent plus à celles de Seneque ou d'Epitecte , qu'à celle de saint Ambroise , de saint Augustin , ou de saint Bernard , plus Philosophiques que Chrestiennes. 2. Puis que vous ne vous peinez pas apres l'obseruation de sa sainte Loy. Mais comment vous peneriez vous apres ceste obseruation , si vous mesmes la preschez tout haut impossible , voire aux plus parfaits & plus Saints d'entre vous ? Moins encore vous penez vous apres la pratique des Conseils. Car qui de vous , quitta iamais sans contrainte & necessité vn seul poulice de terre , pour s'acquerir la Terre des Viuans , le Ciel ? Qui de vous renonça iamais au pouuoir de se marier pour seruir plus saintement à sa diuine Majesté , retiré des tracas du monde ? Qui s'obligea & s'abandonna iamais à la Direction & conduite d'vn autre homme comme luy , pour


l'honneur & la gloire de sa mesme Majesté? 3. Puis que vous n'entreprenez point d'affaires pour elle ou il n'y a qu'à souffrir, & sur tout s'il y va de la vie. Tesmoin Luther, Zuingle & Calvin, le premier desquels ne voulut iamais sortir de Vvitemberg sans Sauf-conduit: le deuxiesme de Zuric, qu'environné d'une armée preste à combattre: & le dernier de Geneue, ny d'une, n'y d'autre façon. Pour les Ministres de haute lisse, vous n'en treuveiez gueres autresfois, que dans quelque forteresse, ou Ville d'Ostage; Finalement, si vous endurez quelque chose pour le soustien de vos Resueries, excusez moy s'il vous plaist, c'est à la maniere des Repreueez, c'est à dire, avec la rage au cœur, la menace à la bouche, & la vengeance toute preste à la main; Dequoy i'appelle vostre conscience & l'experience à tesmoins.

Quant à l'Amour du Prochain, les Catholiques y font encore des merueilles & des miracles. Car plusieurs d'eux distribuent leur bien aux pauvres, avec vne profusion incroyable. Autres luy donnent tout leur trauail, comme font plusieurs bons Religieux, qui yaquent continuellement à la Predication, à la Confession, à l'Instruction de la Jeunesse, tant aux lettres humaines, qu'en la Doctrine Chrestienne. Autres luy font part du merite de leurs Oraisons, Ieufnes, Disciplines, & autres Austeritez, comme les Chartreux, Recolez, Capucins, Feuillās, Carmes deschaux. Et plusieurs autres passent en-

core plus avant, car ils exposent tous les iours leur vie aux Indes, au Iappon, & en l'Amérique, pour la Conuersion des Infidelles. Preuve demonstratiue, qu'ils sont veritablement enfans de Dieu, puis qu'ils s'approchent de plus pres de la Charité qu'aucune condition & profession d'hommes du monde, en ce qu'ils communiquent tout ce qu'ils ont, & qu'ils sont, comme Dieu, le propre duquel est de communiquer tout ce qu'il a, & tout ce qu'il est, pour nostre Salut.

Mais quant à vous, où sont les Aumosnes considerables que vous fistes iamais? A peine payez vous bien les gages de vos propres Ministres, à cause dequoy la pluspart d'eux recourent à l'Alchimie, à la Medecine, à la Pedanterie, à l'Usure &c. Qui de vous donna iamais tout son temps à procurer le salut du prochain? Les Ministres. C'est bien dit. Et pourquoy prennent-ils donc de gages? C'est vendre non pas donner que cela. Qui de vous chastia iamais son corps par Oraisons, Ieunes, Disciplines & autres Austeritez pour ses freres? Personne, puis que vous condamnez tout à fait les œuures de surerogation, & qui plus est la communication des Merites & des bonnes œuures comme satisfactoirs parmi les Chrestiens? Qui de vous enfin, alla iamais aux Indes, en la Chine, au Iappon, en l'Amérique esprendre son sang pour sauuer les ames? Et comment cela, si l'an 1616. La Contagion estant dans Geneue, il fallut contraindre les

Ministres d'assister les pestiferez , aucun d'eux ne se presentant à ce charitable Office de son plain gré; Il fallut mesme , tant les Messieurs sont ardans en la Charité du prochain , qu'ils recourussent au sort, car on ne sçauoit iuger, qui d'entre eux refuyoit plus viuemēt de s'exposer le premier à ce manifeste peril. Le mesme en ont fait les Ministres de Nismes, dās la cōtagion de l'an 1640. Du Moulin, qui a esté long-temps l'Archiduc des Ministres de France entendāt seulement le Tābour à Paris , s'enfuit à la Rochelle, puis en Angleterre , puis à Sedan , prest à passer en Suede , & en cas de besoin en Purgatoire mesme, quoy qu'il ne le croye pas , sans que le salut spirituel de ses freres peut toucher tant soit peu son cœur. Telle est la peur qu'il a , depuis long-temps de laisser sa deuxiesme femme vefue , laquelle est encore dans la fleur de son âge. Il y a bien plus. C'est qu'il abandonna tout a fait , non seulement d'aydes temporelles , mais encore d'aydes spirituelles les pauvres freres du Bear, dans leurs plus grandes alarmes, au Synode National d'Allez, ou il presidoit, ne daignant pas mesme de faire ordonner des prieres publiques pour eux, quelque instance & requeste qu'ils luy en fissent alors.



De la mesme Saincteté de l'Eglise Romaine,
& Impieté de la Pretenduë Reformée, touchant
les Vertus fondamentales du Christianisme,
l'Humilité, la Mansuetude, &
la Patiance.

CHAPITRE XI.

Que si nous passons aux Vertus plus propres
des hommes deuots & parfaits, ie veux dire
l'Humilité, la mansuetude & la Patiance, nous treu-
uerons que les meilleurs Catholiques les pratiquent
encor en plusieurs cas. Ouy, ils pratiquent l'humili-
té Chrestienne, 1. En ce qu'ils ne se confient point
à leur propre iugement, touchant la Doctine, de
la Foy, mais s'en rapportent tout a fait à leurs Supe-
rieurs spirituels, les Lays à leurs Curez, les Curez à
leurs Euesques, les Euesques au Pape, le Pape aux
Canons des Conciles & decrets de ses deuanciers,
& en affaires nouvelles à son Consistoire, atten-
dant vn Concile general. 2. En ce qu'ils se confes-
sent à leur propre Pasteur, de tous leurs pechez,
iusques aux plus secrets, honteux, & vergogneux,
bien qu'ils soient Riches, Doctes, Princes, Prelats,
Cardinaux, Papes, & mesmes tenus d'vn chacun
pour Saincts. 3. En ce qu'ils se iettent humblement

à genoux deuant les Images des Saints, ia canonisez, & les honorent relativement à leur prototype, d'un honneur religieux, quelques chetifs qu'ils ayent paru durant leur vie aux yeux du monde, & qui plus est se iettent aux pieds des Prestres en plusieurs occasions & rencontres. Et finalement, en ce que plusieurs d'eux s'exercent au profond mespris d'eux memes, disans de cœur & de bouche, mais plus encore par œuvre avec l'Apostre saint Paul. *Ja Dieu ne plaise que ie me glorifie en autre chose qu'en la Croix de IESVS-CHRIST mon Seigneur*, Et prennent à l'exemple des Apostres plus de goust en la confusion, que les plus vains dans l'exaltation. *Eux donc s'en alloient deuant le Conseil, ioyeux de ce qu'ils auoient receu, c'est honneur de souffrir opprobre pour son nom, aux Actes 5 vers 41.*

Mais pour vous, vous pratiquez au contraire tout ce qui repugne à cette sainte Vertu. Car 1. Vous vous defiez de tous les hommes du monde, en matiere des principes de Foy, pour vous confier, chacun à son Esprit particulier, c'est à dire, à son Jugement propre, car chacun de vous se porte pour suffisant Maistre & Docteur de soy mesme, en matiere des principes de Foy. Vous ne pouuez pas mesme endurer qu'on vous allegue vostre Ministre, lors qu'on dispute avec vous, non pas mesme vostre patriarche Calvin, quelques ignorans & rudes que vous soyez. Ce que i'ay cent & cent fois remarqué parmy vous. 2. Vous n'auz garde de vous

confondre en la descouuerte de vos crimes & forfaits. Trop desplaisans & marris estes vous, si quelqu'un les peut descouurer & sçauoir. 3. Vous ne reconnoissez parmy vous aucune excellence, digne d'honneur religieux, non pas mesme aux plus grāds Saints qui furent iamais. Et finalement, vous abhorrez les humiliations volontaires des pauvres Religieux, non seulement en vous, mais encore en eux mesme, les estimans à cause de celles qu'ils pratiquent d'ordinaire, des vrays Idiots, tesmoin les Bouffonneries recueillies en partie dans le Capucin du Ministre du Moulin, que la Cour de Parlement de Tholose à fait brusler par la main du Bourreau comme vn libelle Impie & diffamatoire, fait contre les Loix diuines & humaines. De la vient que les Ministres ne veulent iamais se treuuer aux Sepultures de vos freres, lors que quelque Officier du Roy, ou quelque Seigneur de qualité s'y rencontre, pour ne s'y voir precedés d'aucun. N'y plusieurs d'entre vous, prendre la Cene, lors que quelqu'un de leurs inferieurs leur a gagné le deuant; Ce qui arriue aussi souuent que vous la celebrez. A Orange, Messieurs les Ministres prennent par humilité reformée, place dans l'Vniuersité immediatement apres Monsieur l'Euesque (qui est le Chancelier) & Messieurs les Conseillers de Parlement, c'est à dire auant plusieurs autres, qui les deuantent & par la qualité de Docteur, & par l'ordre de la reception là dedans; Qui est vne espece d'humilité digne

des seuls Ministres de Jean Calvin.

Pour la Mansuetude & debonnaireté, plusieurs Catholiques la prisent & pratiquent ordinairement sur l'exemple & la recōmandation de leur Maistre IESVS-CHRIST, disant, *Aprenez de moy, qui suis doux & humble de cœur*, Ce que ie preue en premier lieu de ce que l'Eglise Romaine leur deffend tres estroitement à tous sans exception, & sous quelque pretexte & raison que ce soit le meurtre, a peine d'encourir l'Irregularité portée par les sainets Canons. De la vient que les Iuges Criminels & leurs Assesseurs & tous leurs Officiers & Ministres, avec les Acteurs, Accusateurs, & Tesmoins en causes Criminelles, ne peuuent point sans dispense du Pape, estre promeus au Sacerdoce, voire mesme à la simple Tonsure, ores qu'ils eussent veſcu d'ailleurs sans coulpe & sans crime quelconque dans leur profession, ainsi que i'ay desia dit cy-dessus. 2. De ce qu'elle leur deffend tres estroitement les Duels & la guerre, non seulement entre eux, ou feroit qu'ils y fussent contraints & forcez, mais encore contre les Infidelles, excepté que ces peuples violassent manifestement la Loy naturelle, ou le Droit des Gens, comme faisoient il n'y a pas encore vn siecle entier les Indiens, les Affriquains & les Americains. 3. De ce qu'ils pardonnoient, non seulement plus facilement à leurs ennemis, mais traittent plus humainement leurs criminels & coupables de mort, qu'aucune autre Societé d'hommes du monde. Charles

le grand pardonna douze fois aux Saxons leurs Rebellions & felonies. Charles Quint plusieurs fois aux protestans d'Allemagne, les leurs, & nos Tres-Chrestiens Roys encore plus souuent à vos peres, & à vous, les vostres. Et finalement, parce qu'ils apriuoient & domestiquent les plus barbares Nations du Monde avec leur esprit de Mansuetude & douceur. Et de fait, Il n'y auoit rien de si barbare & brutal, que les Anglois, Allemands, Danois, Suedes, Gots & autres peuples du Septentrion, auant que l'Eglise Romaine les eust domestiqués, avec son esprit tout de sucre & de miel. Rien encore de si Anthropophage & desnature, que plusieurs peuples des Indes Orientales & Occidentales auant leur Conuersion à la Foy de l'Eglise Romaine. Aucuns desquels deuroient les prisonniers encore tous viuans, leur coupant vn membre apres l'autre, qu'ils faisoient rostir, & mangeoient apres à leur propre veüe.

Mais pour vous, *Messieurs*, vous estes bien esloignez de cét Esprit de mansuetude & douceur. 1. Parce que vous ne rebutez point du Ministere, ie ne veux pas dire les Iuges Criminels, & leurs Officiers, mais non pas mesme leurs Criminels, quoy que tous couuerts du sang de leurs meurtres. Combien, ie vous prie, auez vous autresfois eu de Ministres, dont i'en pense auoir veu quelques vns, si ie ne me trompe, que la seule qualité de Ministre à guaranty du Gibet, & qui n'eussent pas vescu si

long-temps, qu'ils ont fait sans icelle. 2. Parce que vous avez fort souuent prins les armes contre nous; Non pour auoir violé les Loix Naturelle, Diuine & Humaine, ny le Droit des Gens ny pour vous auoir fait aucun tort, ce n'est point faire tort à des Heretiques, que de les chastier & punir, autrement Calvin & les Seigneurs de Geneue auroient mal fait, de faire brusler Seruet, le Senat de Basle de faire brusler les os de Dauid George, & vos freres d'Angleterre ceux de Buccer. Escusez-moy donc si ie dis que ce n'a esté que pour satisfaire à la cruauté de vostre esprit Arabe, Antropophage & desnature, que vous l'avez fait. Car de grace, qui vous mettoit lors de vos fureurs les armes en main contre nous. Non le droit naturel & diuin; Car ils detestent la Rebellion & la felonnie contre le Prince legitime & ses Magistrats. Non le Droit humain; Car il n'y en a point au monde qui fauorise aux Heretiques 3. Parce que vous avez commis d'estranges cruantez & barbaries, mesme sur les plus doux, humbles & pacifiques, voire, qui plus est, sur plusieurs simples prestres & Religieux, (tesmoin le Puis de l'Euesché de Nismes) qui ne vous auoient iamais offensé, ny de fait, ny de parole, ny peut-estre de pensée mesme.

Est-il pas vray, que vous avez gagné le deuant à Neron, à Domitian, à Caligule, à Maxence & tantost aux Margajats du Peru, aux Amouques du Malabar, ou plustot aux Tygres & aux pantheres de

la Sablonneuse Lybie, Car outre que vous avez fait faire dans l'huile, les bras d'un prestre viuant? vous avez encore esuentré des hommes & fait manger, cōme dans vne Créche l'auoine à vos cheuaux, dans leur estomac? Vous avez encore coupé les parties honteuses à vn Cordelier, ja vieux, & les luy avez fait frire à luy mesme, puis aualler par force, & qui plus est fait mourir; Et comme il alloit rendre l'ame vous l'avez ouuert, pour voir, ou estoit passé ce que vous luy auiez fait aualler. Ainsi l'a laissé par escrit du Preau en l'année 1562. & 1569. Barbarie, que vous avez renouvellee l'an 1620. à vn village proche de Montpellier, nommé Clapiés, ou vous fistes tout le mesme à deux honnestes prestres & puis les pouffates dans vn grand feu, où ils acheuerent leur martyre.

Et afin que vous ne vous excusiez point sur le desordre du temps, voulutes vous pas, dans le plus calme de la paix de ce Royaume, assommer le Sieur Ferrier à Nismes, & le trainer apres par la Ville, sur le point de sa Catholisation. Et ne le pouuant attraper, arrachates vous pas ses vignes, coupates vous pas les arbres de ses vergers, bruslates vous pas ses meubles deuant le Temple? Et sans la preuoyance des Magistrats, eussiez vous pas bruslé sa Mere, sa Femme, & ses Enfants, iusques à ceux qui pendoient encore au sein de leur Nourrice?

Pendā votre derniere Rebelliō, ne menaçates vous pas cēi fois de massacrer les Catholiques à Montpel-

lier? Ny emprisonnates vous pas les Ecclesiastiques? Ne tirates vous pas du Sepulchre, non seulement le corps de ceux qui s'estoient catholisez, & les trainates par les ruës, mais qui pis est, celuy d'une Religieuse, que vous exposates sur vn bastion, couverte de ses habits, pour servir de sujet de risée à vos gens? Dont l'Instrument principal en receut le chastiment meritè sur le champ mesme, comme vous sçavez. Vous fistes encore pis que cela, car vous abbatites les Eglises & les Autels, trainates le Crucifix par la ville, la corde au col, foulates le Sainct Sacrement aux pieds, contraignites plusieurs Catholiques à renier leur croyance; Qui est vn forfait propre à vous, & digne de vous seuls; Et pour courõne de l'œuure, Assassignates-vous pas le Sieur President du Cros, quoy que des vostres, & qui plus est deputé vers vous par feu Monsieur le Marechal des Diguières, (lors que vous le teniez encore des vostres) parce seulement qu'il estoit Ambassadeur de paix? Assassinat dont les principaux executeurs ont esté rouiez tous vifs, & le troisieme pendu, & les trois Ministres, qui donnerent le Conseil, Oliuier, Paulet & Suffren, porté la peine de leur forfait. Car Oliuier s'empoisonna soy-mesme, Suffren fut pendu en effigie, & pour l'autre, ie ne sçay qu'il est deuenue.

Je laisse à part plusieurs autres semblables actions commises durant la mesme Rebellion contre le droit de Nature & des Gens, qui font mal au cœur

de les repasser par la memoire : l'ay riere moy diuerses Histoires de vos dernieres cruautez plus que desnaturées, lesquelles tant s'en faut, que i'aye eu le courage de coucher icy, que ie n'ay pas mesme eu l'assurance de les lire, & qui ont fait horreur à Monsieur le Marechal de Chastillon mesme.

Au Diocese de Rieux vous auez arquebuzé le Crucifix, & à Thonnains vous l'avez trainé à la queue de vos cheuaux, vous n'avez pas moins fait paroistre vostre rage en plusieurs autres endroits de ce Royaume, & nommément à saint Gilles en Languedoc, où vous n'oubliastes aucune sorte d'impieté, que vous ne committes, iusques à tirer les corps morts de leurs Sepultures pour les mal traiter.

Ne pouuant plus auiourd'huy nous faire du mal, toute vostre barbarie se termine & resout à nous en souhaitter. Tesmoin le Ministre du Crest, lequel preschant à Nyons c'este année 1642. durant le Synode des Ministres du Dauphiné, finit son presche avec des horribles imprecations contre nous, appellant les maledictions & les foudres du Ciel, pour nous aneantir comme des Sophistes & des Athées; A l'instar des Iuifs, que le Talmud oblige tous de nous maudire trois fois le iour, & prier Dieu qu'il nous confonde & destruisse.

Et pour vn tesmoignage inuincible de vostre rage & fureur, auez vous pas desia rendu les peuples du Septénion, que l'Eglise Romaine auoit adoucis,

ciuilisez & comme humanisez, presque aussi cruels & barbares qu'ils estoient auparauant leur Conuersion à la Foy Catholique? En effet l'Angleterre l'Allemagne, le Dannemarc & la Suede sont desia presque retournez à leur anciēne Ferocité en ce dernier Siecle. Qui veid iamais rien de si cruel que Henry VIII. Roy d'Angleterre, qui faisoit mourir le fils ne pouuant apprehender le Pere, & le pere ne pouuant apprehender le fils? Que le Marquis de Brandebourg, qui faisoit remplir les Eglises des hommes & des femmes de petits enfans & de bestail avec quantité de fagots, tout pesse & mesle, puis y faisoit donner le feu, & prestoit apres l'oreille à leurs espouuantables cris, comme à quelque melodieuse musique? Que Christierne second Roy de Dannemarc, qui comme vn autre Neron fit massacrer tous les habitans d'vne grosse ville par maniere de passe-temps & de ieu?

Pour la Patiance, plusieurs Catholiques la cherissent encore extraordinairement voire la pratiquent avec beaucoup de perfection au besoin. 1 Parce que l'Eglise Romaine, qu'ils recognoissent comme leur Mere & Maitresse, leur enioint & cōmande de la part de Dieu à peine de la mort eternelle, de souffrir tous les maux du monde, auant que souffrir la perte d'vne si excellente Vertu. 2 Parce que la mesme Eglise les oblige souz la mesme peine à plusieurs choses tres-dures & tres-difficiles, comme sont la Descouuerte de leurs pechez en la Confession Sa-

eramentales, les Austeritez du Ieufne de plusieurs
moys, & bon nombre d'autres choses difficiles, inse-
parables du Culte diuin qu'elle pratique, Et par con-
sequant à la patience, sans laquelle il est, (humai-
nement parlant) impossible de souffrir des choses
dures & difficiles. 3. Par ce que iamais gens du
monde ne furent plus prests & plus prompts au
martyre, y estans appelez de Dieu. La seule ville
de Rome se peut meritoirement louer d'auoir don-
né trois cens mille Martyrs à IESVS-CHRIST és pre-
miers Siecles du Christianisme. Mais qui scauroit
iamais nombrer les Euesques, Prestres, Religieux &
Lays qui ont souffert le Martyre, ce dernier Siecle
en Angleterre, en Dannemarc, en Suede, en Hon-
grie, en Allemagne, en Flandres, en France, aux
Indes, & nommément au lappon, où l'on à veu les
vingt-mille personnes se presenter ioyeusement en-
semble à la mort, pour le soustien de la Foy Catho-
lique ? Personne, car le nombre en est presque in-
nombrable aujourdhuy. Finalement parce que ia-
mais gens ne s'exercerēt d'auantage en ceste sainte
Vertu, traueillans apres la Conuersion de tout l V-
niuers, les vns avec la predication, & instruction
de la Doctrine Chrestienne, les autres avec l'orai-
son presque continuelle, les autres par la mortifica-
tion, & mille bons exemples de leur sainte vie.

Mais pour vous, Premierement vous n'avez au-
cune Loy, Ordonnance, n'y Constitution qui vous
oblige à la Patience, sous la peine de la damnation,

c'est à dire à souffrir quelque chose de dur & de difficile, dont il vous faille necessairement recourir à ceste vertu. Car il n'y a riē d'aspre & de dur à la chair, ny d'espineux à l'esprit chez vous. Tout y est au contraire facile, ordinaire & commun. Pour le Martyre, vous en fuyez, non seulement l'aproche, mais qui plus est l'ombre, voire l'Idée, voire le nom; Temoin du Moulin, lequel nonobstant toutes les assurances qui luy furent données à son despart de Paris, par Messieurs les Officiers de sa Majesté, laissa neantmoins son Eglise de Charenton à l'abandon, pour fuir à la Rochelle, puis en Angleterre, puis à Sedan & s'il eust esté de besoin en Suede, en Dannemarc, & si vous voulez en Vtopie, (Region descouverte par Rabelais) pour n'entendre pas mesme le nom de persecution; Imité des ministres de Begle, proche de Bourdeaux & de plusieurs autres ailleurs. Et pourquoy les forteresses & Villes de feurté, que vous auiez autresfois, que pour eschapper vos Ministres de la Malepeur, qu'ils ont d'ordinaire de grossir vostre Martyrologe.

Pour porter leur Doctrine aux Antipodes, qu'on ne s'y attende pas, puis que le cœur & les iambes leur manquent pour la porter à trois iets d'arbaleste de leur demeure, faute de resolution de patir aucune chose pour Dieu. Et iamais Gens n'abhorrent dauantage les souffrances que ceux-cy, plus grands ennemis encore des Croix spirituelles, que des materielles.

Il y a bien plus, c'est que vous estimez d'estre persecutez, lors qu'on vous veut reduire & ranger au deuoir & à la raison, lors qu'on vous presse à rendre gorge des choses par vous iniquement & iniustement vsurpées sur les Catholiques, lors qu'on vous fait rebastir les Eglises, que vous avez abbatuës, pour en faire des Bastions, comme à Nismes, & à Montpellier, & sur tout lors qu'on chastie les Seditieux & Boutefeux d'entre-vous, & qu'on ne vous souffre pas de faire tout ce qu'il vous plait. Quelle patience Chrestienne?



*De la mesme Saincteté de l'Eglise Romaine,
& Impieté de la Pretendue Reformée
touchant les Vertus Penitentielles.*

CHAPITRE XII.

LEs Catholiques Romains sont encore excellens en la pratique des Vertus qui regardent la dernière Partie de la Penitence, la Satisfaction; le veux dire, l'Oraison, le Ieufne, & l'Aumosne; Pour l'Oraison, outre la Voale (laquelle est d'obligation aux Prestres,) plusieurs d'eux pratiquent encore la Mentale, & la proposent, comme tres necessaire à quiconque desire monter au sommet de la perfection Chrestienne, & deuenir habituellement de-

uot. Et tiennent comme chose impossible de paruenir à la Saincteté sans icelle. 2. Ils en font, comme vn Art & Science pour y auancer, & plus aisement, & plustot, tous ceux qui souhaitent de se rendre parfaits. Je m'en rapporte aux celebres Escrits de plusieurs grands Contemplatifs, Carmes & Augustins, deschauffés, Chartreux, Recolez, Capucins, Feuillans, Iesuites & signalez Prelats de cét aage. 3. Ils prient, les vns, ou les autres sans aucune intermission & parentheze, conformément au Conseil de l'Apostre en la 1. Thess. chap. 5. *Priez sans intermission*, & à celuy de IESVS-CHRIST en saint Luc. 18. *Il faut tousiours prier & ne se laisser point.*

Et afin de pratiquer sans cesse ceste sainte Vertu, outre qu'ils ont fait bastir vne infinité d'Eglises, d'Oratoires, de Conuents, de Monasteres, & d'autres lieux de pieté par tout l'vniuers, erigé des Croix, affiché des Images, & planté des signes de Religion en nombre innombrable pour esleuer à tous momens nostre cœur à Dieu, les Ordres Religieux d'hommes & de femmes ne cessent iamais, les vns ou les autres, de vaquer à l'exercice de ceste sainte Vertu. Voyez Thomas Bosius au liur. 11. des *Signes de l'Eglise*. chap. 12.

Mais quant à vous, ne scachans ce que c'est, de la vie spirituelle & deuote, vous ne vous enquerez ny souciez gueres par consequent des moyens necessaires pour y paruenir. 2. Vous ne scauez, ny

n'avez affaire de sçauoir, autre Art de prier Dieu, que celui des Charretiers. Il vous suffit de leuer les yeux au Ciel, & de prononcer l'Oraison Dominicale, & peut estre quelque autre de Iean Calvin, vne seule fois dans le iour. De Meditation, & de Contemplation, à peine en sçauiez-vous le nom, & rien du tout de la chose. D'ailleurs vos Temples, ne vous sont pas autrement lieux d'Oraison, que vos Tauernes, ou que les Sales des pas perdus des Palais de Iustice. Vous n'y priez iamais en particulier aussi. Et celui la seroit tenu comme Idolatre parmi vous, qui s'y ietteroit tout seul à genoux, pendant que plusieurs y bouffonnent librement, comme vous sçauiez. Iamais mesme on n'y voit Ministre ministrant, les genoux en terre, tant ils ont peur de deuenir Deuots, ou pour parler selon vostre iargon Bigots.

Touchant le ieusne les Catholiques le pratiquent d'un grand courage en diuers cas. 1. En ce qu'ils s'abstiennent tous, iusques aux enfans, qui sont arriuez à l'aage & vsage de raison, presque les six mois entiers de l'année de la chair. 2. En ce que la plupart d'eux ieusnent exactement presque la moitié de ce temps là. 3. En ce qu'ils ont plusieurs ordres Religieux, qui ieusnent à rigueur, les vns la moitié de l'année, les autres deux tiers, comme font les Chartreux. Et finalement, en ce qu'ils ont tousiours eu de personages, lesquels ont esclarté en ceste excellente Vertu, & qui ont passé plusieurs Caresmes

en leur vie , sans prendre aucune nourriture, non plus que Moÿse, Elie & IESVS-CHRIST, voire mesme de nostre aage, nommément saint François de Paule & la Bien-heureuse Fœlise de Barbarano, dont fait mention Bosius sur la fin du liur. 11. chap. 4. des Signes de l'Eglise, laquelle à surpassé tout cecy, ieusnant trois Caresmes entiers tout de suite avec la mesme rigueur, & sans prendre chose quelconque pendant iceux.

Le R. Pere Antoine Roa, Religieux Augustin Deschaux, dont la vie & la mort sont admirables, traittoit avec tant de rigueur son corps dans ses fonctions Apostoliques aux Indes, qu'il n'y pouuoit subsister, que par miracle: Il n'vsa long temps que de seules herbes cruës pour toute nourriture. Il marchoit pieds nuds, dormoit sur des ais, prenoit tous les iours la Discipline iusques a effusion de sang, deuant vn Crucifix, brusloit sa chair avec des flambeaux allumez, & portoit vne ceinture de cuiure dentelée sur la chair nuë, qui luy caufoit de grandes peines.

Le Reuerend Pere Iean Baptiste de Moya, son compagnon fust encore si ennemy de sa chair, qu'il n'est pas croyable à ceux, qui ne scauent pas qu'elles sont les forces de la grace diuine. Car outre qu'il s'abstint vne fois quinze iours entiers de boire dans des Climats les plus chauds de la terre, il passa vn Careme entier avec cinq petits pains pour tout entretien, & tascha d'imiter entierement son Patron
saint

sainct Iean Baptiste dans ses austeritez.

Ie laisse à parler du B. Iean de sainct Guillaume, Religieux du mesme Ordre, non moins austere que son Patron de nom, sainct Guillaume; en sa nourriture, en son coucher, & en son vestir, pour dire comme le Pere Mathieu de saincte Françoise, qui fut le premier des Augustins Deschaux, qui vindrent en France, & qui est mort dans Auignon avec vne grande reputation de saincteté, embrassa vne vie si austere, & vne pauureté si extreme, qu'il tesmoignoit ne desirer rien plus que d'imiter les anciens Anachorettes, meslant d'ordinaire des cendres parmy ces viandes, lors mesme qu'il estoit malade, & presque au bord du Sepulchre.

Le Pere André de la Valée, Espagnol, Religieux de l'Ordre de S. Dominique, de la Prouince de S. Vincēs de Chiapa au Mexique, passa vingt ans avec des Ieusnes estrāges, & tout autant de Carefmes entiers, sans manger chose quelconque, prenoit tous les iours deux fois la discipline iusques au sang inclusiuement, & s'employoit à l'Oraison mentale la plus grande partie de la nuit.

Le Pere Ierosme Baptiste de la Nufa, Religieux du mesme Ordre, le Phœnix des predicateurs de son Siecle, estoit non moins excellent & celebre en ses Ieusnes, disciplines & autres austeritez corporelles qu'en ses predications, car il sembloit ne se nourrir que d'abstinence & de mortifications.

I'en pourrois dire presque autant de plusieurs

autres du mesme Ordre , qui ont encore vescu dans ce dernier Siecle , mais il suffira du Pere Pierre de Portugal. Lequel estoit si seueré à sa chair , qu'il sembloit l'auoir en horreur. En effect on trouua apres sa mort , son corps reuestu d'un rude Cilice, si fortement attaché à sa chair , qu'il en sembloit estre la propre peau. Les merueilles que tous ces grands Personnages , & ceux dont nous allons encore parler , ont fait au seruice de Dieu , & les miracles que sa Majesté diuine à fait par eux , pour les glorifier parmy les hommes apres leur mort, tesmoignent euidentement , que les austeritez de leur vie luy ont esté grandement agreables.

Le B. Martin de Valence , Recolé , outre ses ieusnes presque continuels , ne mangeoit d'ordinaire que du pain & des legumages , qu'il saupoudroit de cendres , portoit iour & nuict le Cilice , alloit pieds nuds, se disciplinoit tous les iours, & d'ormoit d'ordinaire sur vn peu de paille. Le pere André de l'Olme du mesme Ordre en fit beaucoup d'auantage , car il se reduisit au pain & à l'eau , & à des racines d'herbes. Le B. pere d'Alcantara ne mangeoit, de trois en trois iours qu'une seule fois , au reste si peu , quoy que ce ne fut que du pain & des herbes (qu'il saupoudroit encore de cēdres) qu'on s'estonnoit comment il pouuoit viure. Quelquesfois il demeueroit huict iours entiers sans prendre aucune nourriture.

Le Pere Antoine de Montficard , Capucin passa

trente ans avec du pain & de l'eau sans rien plus ; Le Pere Mathieu de Leonisse , encore Capucin demouroit souuent plusieurs iours sans manger. Vne fois il demeura dix-sept iours entiers dans ceste abstinence , & saupoudroit encore ses viandes avec la cendre. Et le pere Anselme de la Prouince de la Marque , Religieux du mesme habit ne mangeoit de trois en trois iours qu'une seule fois.

Autant en a fait souuent saint Xauier aux Indes. Vne fois il demeura sept iours entiers sans manger, aussi bien que son pere saint Ignace. Il ont passé l'un & l'autre plusieurs années , sans viure , que de morceaux de pain ramassez par les portes. Thomas Sanchez Iesuiste ne voulut iamais vser, ny de l'huile ; ny du vinaigre, ny du sel, ny des espices , ny d'aucunes choses semblables. Saint Charles se reduisit dans sa propre maison , comme vn chien dans la maison de son maistre , au pain & à l'eau , & sa couche à vn peu de paille. Saint Philippe Nerio demouroit trois iours entiers sans manger. Le Reuerend Pere Cesar de Bus, ieusna plusieurs années deux ou trois iours de la Semaine au pain & à l'eau, voire mesme en preschant les Caresmes entiers, & n'auoit pour tout mets qu'un potage d'herbes aux bonnes festes ; Outre ce il portoit d'ordinaire la haire , & durant vne année il porta vne chemise de maille sur la chair , couchoit sur la seule paille , se disciplinoit toutes les nuicts , & pria la plus grande partie d'icelles , durant plusieurs années , ainsi que

ie l'ay desia dit en sa Vie.

Vous tout au contraire, pour faire voir à tout le monde, que vous ne vous dittes pas Reformez à fausses enseignes, n'avez-vous pas changé tous les Vendredis Saints de ces Gens de bien, en des Mardis gras d'Allemans, quand vous l'avez peu faire? Car c'est assez parmy vous, que de ieusner, c'est à dire de differer vostre disner environ deux heures apres l'heure ordinaire, d'olympiade en olympiade vn seul iour. Duquel Ieusne, au reste, vous ne bannissez point les chapons & les perdrix. *Si nous sommes predestinez à quoy sert de nous crucifier, & mettre nostre vie à la cadene; dit Luther au Tom. 4. folio 319.*

Pour vos Ministres, il n'y eust iamais rien de plus goulu, si mes memoires ne me deçoient: Car elles portent, que si ces Messieurs craignent de n'estre point du festin, que vous pratiquez au Baptesme de vos Enfans, ils dilayent & presque refusent à les baptiser, ainsi que ie l'ay desia touché cy-dessus. I'ay leu autresfois que Federic, Successeur de Christerne II. Roy de Dannemarc, faisant de l'aduis de ses Ministres, chere à creuer le Vendredy Saint, pour contrecarrer la sainte coustume des Catholiques, mourut, comme vn autre Balthasar, le mesme iour sur le soir; Et qu'un autre festinant comme par despit du Careme (institué par les Apostres mesmes,) & de la coustume perpetuelle de l'Eglise Catholique, vn semblable iour, aualla tout gaussant

vn petit os de Lieure dans vn Ciuié, qui luy perça le gosier, dont il rendit l'ame peu de iours apres.

Je laisse à part l'intention, que vous auez en ieufnant, laquelle est d'ordinaire pire en la pluspart de vous, que le ieufne mesme. Vous seuls en estes les Iuges & les Tesmoins : Ce que nous en soupçonnons n'est fondé que sur les suites de ces beaux ieufnes, lesquelles sont pour l'ordinaire tragiques; Voila pourquoy on les comparoit autresfois aux Cometes, lesquelles presagent tousiours quelque mal-heur. Je ne veux pas dire icy, que quatre ou cinq Ministres d'Orange ou de Courtésou desquels i'ay le nom & surnom riere moy, ayent esté veus yures plusieurs fois; car ie croy que tout le monde le sçait desia comme moy.

Touchant l'Aumosne, les Catholiques triomphent d'ordinaire en la pratique de ceste Vertu. Ce que vous n'oseriez pas nier sans impudence. Mais qui sçauroit iamais ie vous prie, faire le Catalogue des Eglises Parrochiales, Collegiales, Cathedrales, Metropolitaines & Patriarchales, des Conuents, Monasteres, Chappelles & autres lieux sacrés, qu'ils ont richement basty, & plus richement encore renté par tout l'Vniuers, les reuenus desquelles assemblés, esgalent, voire surpassent ceux des plus grands Monarques du monde. Liberalité, mais plustot magnificence, qu'ils continuent encore auourd'huy. Ce n'est pas tout; Ils fournissent, qui plus est à l'entretien d'vn monde de Religieux, qui font

professiō ouuerte d'extreme pauureté, tāt en general qu'en particulier. D'ailleurs ils ont basty, meublé, & renté vn nombre sās nombre d'Hospitiaux, les rentes desquels accumulées vont bien loin au delà de la croyance des plus credules. Il ne faut qu'entendre dire celles du seul Hospital du saint Esprit à Rome pour tomber dans le rauissement & l'extase: Finalement ils ont fondé des Vniuersitez & des Colleges pour l'Entretien des Professeurs ou Regens, & pour l'entretien de leurs Escholiers, en tel nombre & si bien rentez, qu'il y a dequoy s'estonner. On en conte aujourd'huy 64. de tels dans la seule ville de Paris, selon le calcul de Thomas Bosius en ses liures. *des Signes de l'Eglise.*

La Splendide & magnifique liberalité des Catholiques paroît encore d'auantage en ce qu'il n'y a Roy Chrestien, qui n'ait cōme consacré son Royau-me à Dieu. De grace, où est celuy d'entre tous eux aujourd'huy, qui osast se dire Roy du sien, sans l'auoir au prealable receu de Dieu, dans son Sacre, par la main du Pape, ou de quelque Archeuesque de l'Eglise Romaine? Ce n'est pas tout. Il y en a plusieurs d'eux, qui non contents de ceste commune liberalité se sont encore rendus homagers & feudataires du Pape & de l'Eglise Romaine. Les Royau-mes de Naples, de Sardaigne, de Sicile, de Corse-gue, de Maiorque, de Minorgue, d'Aragon, de Grenade, de Portugal, de Castille, de Leon, des Canaries, de Pologne, de Suede, de Dannemarc,

de Noruege, d'Hongrie, de Ierusalem, d'Angleterre, d'Hybernie, des Indes Orientales & Occidentales tiennent & meuent du Pape, selon Baronius au Tom. 11. an. 1062. & Polidore Virgile en son Histoire d'Angleterre. D'ailleurs combien y a-t'il des Prelats, qui n'on pas seulement le tiltre, mais encore les reuenus des plus grands Princes, & sur tout en Espagne, en Allemagne, en Pologne, &c.


Mais pour vous, vous ne fustes iamais magnifiques qu'à fortifier & munitionner quelque Ville de Seurté, du temps que vous en auiez de telles en France. Qu'à l'enceindre de doubles foussez, de bastions, de rempars, de casemates, de tranchées, de demy lunes, &c. Qu'à la munir d'armes, de poudre, de viures, & sur tout d'hommes enclins (par vostre propre Doctrine) seulement au mal, & inutiles à toute sorte de bien. Encore estoit-ce aux despens des pauvres Catholiques, & particulièrement des Ecclesiastiques, voire du Roy mesme, (quand vous pouuiez luy enleuer ses deniers) que vous faisiez ces frais & despens. Pour vos Temples vous n'en auez que deux au plus, en quelques vnes de vos principales Villes. Lesquels vous auez bastis, au reste avec le plus de mesnage & d'espargne que vous l'auiez peu. Car le plus excellent ne vous scauroit iamais auoir gousté guerres, plus qu'un ieu de paume ou qu'une belle Escuyerie.

Pour vos Ministres, outre qu'ils sont en petit nombre auiourd'huy, (car c'est assez, si les meilleu-

res de vos Villes en ont quatre ou cinq) vous les traitez encore en vrays Ministres, trois ou quatre cens escus pour les plus huppez, en font la raison; De sorte que la pluspart d'eux meurent presque d'ordinaire de faim. Et n'estoit l'Alchimie, la Pharmacie, la Pedanterie, où le cent pour cent, où plusieurs d'eux ont leurs recours pour pouuoir viure, nommément Banfillon Ministre d'Ayguemorte, la Motte Ministre de Vals, &c. Ils auroient desia depuis long-temps quitté le mestier, sur tout ceux qui Formillent en ministrillons. Tesmoin le Ministre de la Motte Chalencou du Dauphiné, qui pour n'estre point payé de ses gages, voulut faire accroire, d'auoir esté volé de quelque somme d'argent qu'on auoit commis à sa fidelité pour la rendre à Grenoble, où il s'en alloit, afin de se tirer de la necessité, dans laquelle il se trouuoit. Affaire qui est venu pardeuant Messieurs de la Chambre de l'Edict à Grenoble, il y aura tantost trente ans. Vous auez force Seigneurs, qui ne sont à leur aise auourd'huy, que par le benefice de la liberté de Conscience, que vos Ministres leur ont preschée; Où sont neantmoins, ie ne veux pas dire les Comtés, les Baronies & Terres nobles, mais mesmes les possessions roturieres & taillables, que personne d'eux leur ait iamais encore donné, en consideration de leur qualité de Ministres? Ils sont encore plus chiches que riches. Argument inuincible, ou de vostre peu de charité, ou du peu de merite des

mesmes Ministres. Choisissez ?

Pour l'Instruction de vostre Ieunesse, vous avez quelques quatre ou cinq demy Colleges en France, en partage avec les Reuerends Peres Iesuites depuis vostre dernier souleuement. Et voila tout. Mais pour l'entretien de vos pauvres Escholiers, ie n'entendis iamais en ma vie en parler ; Il peut bien estre, que vos Eglises fassent estudier quelque douzaine de telles personnes, en intention qu'ils les seruent vn iour en qualite de ministres ; Car pour autre fin, il n'en faudroit pas parler ; Mais c'est tout. Et ie ne dis rien icy que chacun ne sçache desia tres-bien.



*De la mesme Saincteté de l'Eglise Romaine
& Impieté de la Pretenduë Reformée, touchant
les Vertus plus Heroïques, la Pauvreté,
la Chasteté & l'Obeissance
perpetuelles.*

CHAPITRE XIII.

FInissons ceste matiere des Vertus par les plus Heroïques de toutes, propre seulement de ceux qui pretendent à la plus haute perfection, dont l'homme est capable en ceste vie, assisté de l'ayde du Ciel, ie veux dire la Pauvreté volontaire, la Chasteté

Religieuse, & l'Obeysance vniuerselle à vn autre homme iusques à la mort pour l'amour de Dieu.

Quant à la premiere, il appert qu'elle est heureusement en pratique parmy les Catholiques. 1. En ce que plusieurs d'eux la professent ouuertement dans les Ordres Religieux, les vns en particulier, comme les Reuerends Peres Chartreux &c. Les autres en particulier & en commun, cōme les R. peres Recolés & Capucins, &c. 2. En ce que, ceux qui ne l'embrassent point, fournissent splendidement aux autres, qui l'embrassent avec verité, tout ce qui est necessaire pour leur entretien. 3. En ce que les hommes pieux, qui ne peuuent fournir aucune chose à leur entretien, les honorent, reuerent, & loüent hautement aux occasions. Finalement en ce que les Escriuains & predicateurs, & les personnes plus signalées approuuent grandement ceste excellente Vertu, voire y exhortent, & portent tous ceux qui sont en quelque disposition & dessein de l'embrasser.

Mais parmy vous, on y a tousiours veu tout le contraire de cecy, depuis que vous parutes au monde. 1. Car il n'y eut iamais vn seul d'entre vous tous, qui daignast d'embrasser à temps, & moins de professer par veu perpetuels ceste Heroique Vertu. Tous vos pauures sont tels de viue contrainte, & comme on dit à force forcée. 2. Vous n'avez garde d'aumosner, ou ce seroit par vanité ceux qui se sont rendus volontairement tels à l'imitation de

IESVS-CHRIST, & pour luy tesmoigner leur Amour. Vous ne loüez pas mesme ceste sorte de vie. Au contraire vous en riez & raillez à tout ren-contre. Et s'il ne tenoit qu'à vous, ceste Vertu, vrayement Apostolique, seroit bien tost incogneüe au monde. Car vous ne cessez de larder de mille petits sobriquets de Tauerne les pauvres Recolez, Capucins, & autres Religieux mandians; Finalement il ne se trouua iamais ministre, qui loüiat ceste loüable Vertu, non pas mesme au Fils de Dieu, aux Apostres & premiers Chrestiens. Ce n'est pas tout. Si quelqu'un de vos ministres la vouloit pratiquer (preschant, par exemple, sans salaire au peuple) les autres luy cracheroient au visage, ou le casseroient aussi tost, comme scandaleux & refractaire à la Discipline, qui le deffend expressement au chap. 1. art. 4. Ce que vous ne pouuez pas nier. Le Presche est aussi de la nature des farces parmy vous, desquelles on n'a point le plaisir sans payer, dit vn certain, fort de chez vous.

Il y a bien dauantage, si les Eglises ne fournissent aux frais de messieurs vos ministres allans s'esgayer, ou briguer quelque meilleur rastelier aux Synodes, elles sont tout à fait priuées de ministre & de ministriere, comme ingrats, ainsi que l'a decreté la Discipline au chap. 8. art. 5. Rigoureuse Discipline, qui laisse à l'abandon ceux qui ne payent pas à ces messieurs les frais de leurs promenades à point nommé. Voila pourquoy il ne s'en trouue pas vn seul entre

tous eux aujourdhuy, qui veuille passer en l'Amérique : N'ayant point encôre esté payés du voyage que Richier & quelques autres ministres firent sous la conduite de Villegagnon, l'an 1555. en la Floride, s'ils ne se sont eux mesmes payez de leur propres mains en les pillant, comme il est probable, qu'ils l'ayent fait.

Quant à la Chasteté Religieuse; les Catholiques en font encore plus d'estat & d'estime, se conformans au sentiment de l'Apostre en cecy, lequel ne scauroit porter plus haut cette Angelique Vertu en sa 1. aux Corint. ch. 7. v. 28. & 40. Vous le pouuez vous mesme iuger, de ce qu'ils la louënt & prisent, côme vne Vertu toute celeste & presque diuine. Je m'en raporre aux recômendations de bouche & par escrit, que les Predicateurs en font d'ordinaire dans leurs Chaires, & les Escriuains dans leurs liures de pieté, & plus encore aux honneurs que les vns & les autres rendent aux personnes veritablement chastes & continentes. 2. De ce qu'ils bastissent, meublent, & rentent magnifiquement tous les iours plusieurs Conuents & Monasteres à cette sorte de personnes. 3. De ce que plusieurs d'eux la promettēt irreuocablement à Dieu pour toute leur vie. Sainct François de Paule, S. François Xauier, S. Charles S. Philippe Nerio & le Deuot François de Sales Euesque de Geneue, les Bien-heureux Louys Bertand Espagnol, avec Alexandre Capochi Florentin, tous deux Religieux de l'Ordre de S. Dominique, qui

moururēt l'an 1581. le B. Ange du Pas, & le B. Pascal Baylon Recolez, le B. Fœlix de Cantalice, le Pere Antoine de la Prouince de la Marque, & le Pere Ierosme de Nouare Capucins avec quelques autres Religieux & Religieuses de ce Siecle, ont non seulement promis, mais qui plus est conserué toute fraiche la fleur de leur Virginité des le Berceau iusques au Tombeau, en despit du Diable, du Monde & de la Chair, ses capitaux ennemis.

Vous, tout au contraire, detestez en Asmodées Reformez ceste sur-humaine & sur-celeste faueur de Dieu. Car qui de vous la louia iamais vne seule fois en sa vie, ny de bouche, ny par escrit? Ou sont vos Sermons & vos liures pour ce regard? Qui de vous legua iamais cinq sols aux Continans, en contemplation de leur Continence? Qui de vous eust iamais le courage de consacrer & de vouër à Dieu sa Chasteté pour toute sa vie, voire pour trois ans seulement? afin de le seruir avec plus de perfection & de saincteté?

Mais cōment est ce que vous entreprendriez de vouër à Dieu ceste excellēte Vertu, si vous tenez cōme vous faires, qu'elle vous est absoluēment impossible? Et partant que vous estes tous obligez à vous marier, le Mariage vous estant, non seulement vn Commādement absolu, mais plus que Commande mēt, comme veut Luther, & qu'il vous est autāt necessaire d'exercer l'acte de la chair que de manger, boire & dormir. Ce sont les propres termes de ce

Tison de Luxure, que Calvin appreuue assez ouuertement, puisque, *Qui tacet consentire videtur*. En effet il ne reprint iamais en la vie ces manieres de parler, quoy qu'impudiques. Au contraire, il a escrit, que *c'est vne folie fantaisie de s'imaginer, que c'est vne vertu de viure hors de Mariage*. C'est en son Harm. sur S. Math. chap. 19. vers. 12.

Et pleust à Dieu, que les frequentes impudicitez des Ministres mesme, ne vous confirmassent point ceste detestable Doctrine. Impudicitez, dont i'ay de bons memoires, & des tesmoins tres-dignes de Foy, notamment contre quelques Ministres d'Orange, du Dauphiné, de Prouëce & du Languedoc; Espagne Ministre d'Orange, estant encore garçon, se faisoit vestir ses bas de chausses à sa Seruante, assis sur son liët, tout en chemise, & presque à demynud. Je n'ay appris autre chose, depuis ces priuauitez reformées, si ce n'est, que la pauvre fille ne tarda pas long temps apres d'estre enceinte. Vn iour ce Ministre s'informant du nom d'une nouvelle fiancée, & luy ayant esté dit, qu'elle s'appelloit Anne, il fit vne Replique, non pas d'un Ministre, mais d'un Bordelier, & qui est le pire en presence de plusieurs personnes d'honneur; Làquelle i'aurois honte de coucher icy, crainte d'offencer les oreilles du chaste Lecteur. Je laisse qu'il alloit souuent rouler en fol amoureux la nuit par la ville, & fit si bien par ses nuitées, qu'il transforma l'un de ses Collegues en vray Cerf. Je tais pour diuerses raisons, le nom d'un

de ses predecesseurs, lequel alloit ouuertement voir les Garces estant à Paris, & voulut vn iour, comme forcer la femme d'un pauvre Maistre d'Escole de Geneue, selon que le Sieur Correge Aduocat d'Orange m'a dit. Je ne veux rien dire de son petit Ismael, pour ne donner courage à ses Collegues d'imiter sa débauche.

Marmet Ministre du Duc de Rohan, ne pouuant repudier sa femme en France, s'en est fuy en Angleterre avec Isabeau Fauchere, seur de Iean Faucher, ministre de Nismes, laquelle il a espousée, & tient comme sa femme en ce pays-là. Le ministre de Cleves preschant l'année passée 1642. durant le Synode Prouincial des ministres du Dauphiné, tenu à Nyons, soustint ouuertement qu'il ne failloit point mettre la Chair au nombre de nos Ennemis. Et partant que les Mortifications & les Croix volontaires des Religieux estoient dignes d'horreur. De la vient que de trois paroles qu'un des vostre die, il y en a d'ordinaire vne sensuelle & charnelle, comme ie l'ay cent fois remarqué.

Touchant l'Obeissance, les Catholiques en font encore vne profession tres-expresse, puis qu'ils nous font tous les iours voir, 1. Qu'ils obeissent avec vn grand courage à leurs legitimes Superieurs spirituels & temporels, quels qu'ils soient de present, ou qu'ils ayent autresfois esté, quand aux biens de nature ou de fortune. 2. Qu'ils veulent encore obeir à tout ce que les mesmes Superieurs leur scauroient

iamais commender à l'aduenir , pourueu que la chose ne soit manifestement repugnante , & contraire à la sainte volonté de Dieu. 3. Qu'ils obeissent contre leur propre advis & iugement particulier, voire contre l'advis & le iugement de tout autre, que de leurs mesmes Superieurs : Finalement qu'ils obeissent constamment iusques au dernier soupir de leur vie, petits & grands, indoctes & sçauans, proches & éloignez. Je laisse à part l'incomparable & non iamais assez hautement louée Obeissance de plusieurs saints Religieux, qui obeissent à l'aueugle, & contre leur sentiment, & contre leur iugement, & contre le sentiment & le iugement de plusieurs autres ensemble. Obeissance si agreable à Dieu, qu'elle a esté bien souuent couronnée de plusieurs signalés Miracles, lesquels ne peuuent proceder que de Dieu mesme.

Mais parmy-vous, c'est tout le rebours, Car où est le Reformé, qui daigna iamais de recognoistre pour Superieur Spirituel de soy, que soy-mesme; si quelque respect humain, ou quelque crainte du chastiment ne l'y a contraint & forcé. Tant s'en faut que vous obeissiez contre vostre sentiment & iugement propre, vniuersellement & iusques à la mort à vos Ministres, quelques huppés qu'ils soiēt, qu'au contraire vous ne leur obeissiez pas mesmes aux choses, qui sont formellement de leur Iurisdiction, pour ne faire tort à la liberté de conscience, ou plustot au Libertinage, qu'ils vous ont sottement

tement mis entre les mains. Je dis plus ; Vous vous meslez bien souuent de leur commander, de les reprendre, corriger, chastier & casser au besoin ; Et i'apporterois icy les propres paroles de vostre Discipline Ecclesiastique, & cent exēples confirmatifs de ceste verité manifeste, si vous mesmes ne le confessiez librement, en estant requis & priez. Il ne fairoit pas bon pour le pauvre Ministre, qui se seroit hazardé de commander absoluëment quelque chose de difficile au plus Teigneux de ses Consistoriaux, ou freres en CHRIST. La vraye & parfaite Liberté de conscience ne recognoit aussi, ny bride, ny caueçon, ny Loy, ny Precepte, ny Prince, ny Magistrat iusqu'à la conscience, selon Maistre Iean Caluin en son Inst. liur. 4. chap. 10. §. 5.

Pour les Superieurs temporels, vous leur obeysez avec vn, *Moyenant*, digne de remarque, car il ne ressent n'y peu, n'y point le sujet, mais plustot le pair & le compagnon, ou pour mieux dire le maistre & le Seigneur. Et nous n'auons besoin d'aucun autre Commentaire de ce, *Moyenant*, que ce que nous mesmes auons veu de nos yeux, dans vos dernieres Rebellions & felonies. Est-il pas vray que vous auez fait souuant des Serments d'vniõ dans vos Assemblées generales, & nommément en celle de Loudun, de l'an 1619. par lesquels vous vous promettez les vns aux autres, de ne vous despartir point des Conclusions, prinies en icelles, pour quelque cause & raison que ce soit. C'est à dire ; Et fust-

ce contre le Roy mesme, à peine d'estre declarez pariures & deserteurs. Et que fit iamais de pire autresfois la Ligue, contre laquelle vous avez si souvent & si furieusement declamé. Vous ne nierez pas d'auoir traité de la ruine de vostre Patrie avec le Roy d'Espagne, contre la soumission & fidelité que vous deuez par toute sorte de droit à sa Majesté Tres-Chrestienne. Et si les Bearnois eussent voulu bailler quatre places fortes en Ostage à ce Prince; l'Espagnol fust assurement entré dans la France: Ce qu'estant reproché vn iour au Duc de Rohan, il respondit tout court, que plustot que laisser perdre son party, il eust volontiers prins le Turban, & vous encore par compagnie avec luy. Quelle obeyssance. Je ne veux rien dire des causes particulieres des vos mutins & felons que vous avez souvent generalisées dans vos Synodes afin de les garantir plus aisément de la corde & leur donner plus de courage de continuer leurs mutineries & felonies. Qui est vne Audace insupportable.



*Puissante Confirmation des
choses que dessus.*

CHAPITRE XIV.

MAis comment ne seroient pas les Catholiques grands Professeurs de la Vertu, si l'Eglise Romaine, qu'ils reuerent comme leur Mere & leur Reyne Regente, les destourne incessamment du mal, & les porte par toute sorte de motifs & d'aydes au bien. Ouy l'Eglise Romaine destourne tout autant qu'elle peut ses enfans du mal. 1. Par l'incertitude du salut, qu'elle leur presche en general & à chacun d'eux en particulier au besoin apres le Texte sacré en plusieurs parts. *Tu es debout par foy, ne sois point trop sage: mais crains,* aux Rom. 11. 20. & aux Philip. 2. vers. 12. *Employez vous à vostre salut avec crainte & tremblement.* 2. Par la penitence qu'elle leur propose, & qui plus est, leur impose, à mesure qu'ils se laissent aller au mal. Et finalement par les peines de l'Enfer, ou du Purgatoire, dont elle les espouuante & menace à tout propos.

Et non contente de destourner ses enfans du mal, elle les exhorte & porte par toute sorte de voyes au Bien & à la Vertu. 1. Par la possibilité & facilité de bien operer & de se rendre veritablement

vertueux & Saints, assistés de la grace de Dieu
 Possibilité qu'elle leur enseigne & presche apres
 l'Escriture en plusieurs parts. 2. Par les recompens
 tes, qu'elle promet aux bonnes œuures, apres la
 mesme Escriture encore en plusieurs parts. 3. Par la
 necessité de les pratiquer, qu'elle leur enseigne, pres
 che & persuade encore apres IESVS - CHRIST, en
 saint Math. 19. *Si tu veux entrer en la vie eternelle*
garde les Commandemens. Et finalement par les
 grands honneurs, qu'elle rend tous les iours à ceux
 qui sont decedez oculairement en la pratique du
 Bien & de la Vertu, & sur tout aux Saints, esta
 blissât des Ieufnes, des Veilles, des Festes, des prieres
 publiques, & consacrant des Temples, des Autels
 & des Images à la Majesté diuine, en leur honneur
 & memoire.

Mais comment ne seriez vous pas tout au con
 traire des Catholiques, des Contempteurs du
 • Bien & de la Vertu, si vostre Pretenduë Reformée
 vous en destourne tacitement à toute occasion &
 rencontre, & vous pousse, porte & precipite tacite
 ment à toute sorte de mal & de vice. Il est vray, & ie
 ne me m'esconte point, disant que vostre Reforma
 tion vous destourne tacitement du Bien de la Ver
 tu, puis qu'elle vous presche tout haut, que les
 bonnes œuures ne sont ny meritoires de grace &
 de gloire, ny necessaires pour obtenir le salut, non
 pas mesmes possibles, voire avec l'ayde du Saint
 Esprit selon le petit Catechisme des enfans; Au

contraire qu'elles sont inutiles, voire qui plus est, preiudiciables a quiconque les croit meritoires & necessaires pour obtenir le salut. *Eglise à la verité bien monstrueuse, si son salut se perd par les bonnes œuures; Car que luy reste-il, que de le chercher parmy les mauvaises,* s'escric à ce propos le Sieur Ferrier contre vous en son *Antechrist* fol. 642. & non sans raison & Iustice.

Et comme si ce n'estoit pas assez, que d'aliener les hommes du Bien, vous les poussez, portez & precipitez encore tacitement au Mal; En effect, refusez vous iamais le Ciel, voire mesme aux plus detestables pecheurs d'entre vous, pourueu qu'ils veüillent seulement auoir la Foy? *Tant plus tu es meschant, tant plus tu es proche de Dieu, pourueu que tu retiennes la Foy,* dit Luther. Point d'apprehension, ny de crainte de perdre le Paradis parmy vous, puis que les bonnes œuures n'ont aucune part en nostre Iustification, dit Calvin en son *Instit.* liu. 3. chap. 19. Imposates vous iamais quelque peine & satisfaction voire mesme à vos plus insignes voleurs? 3. Honorates-vous iamais les Saints, que vous mesme reconnoissez pour Saints, tels que sont ceux des premiers Siecles de l'Eglise? Au contraire, vous prophanez vniuersellement leurs Festes, abbatez leurs Temples, & leurs Autels, bruslez leurs Reliques, brisez leurs Images, & dittes par derision, contre le recours que nous auons à eux, dans nos grandes necessitez: Qu'ils n'ont pas les oreilles li

longues, qu'ils puissent entendre du Ciel nos Oraisons & nos Requestes, comme si les Bien-heureux n'auoient point à present vne autre maniere de voir & d'entendre que celle qu'ils auoient estant encore icy bas. O Ignorance brutale!

Il y a bien plus, c'est que vous loüés les pires & plus execrables pecheurs, qui sont parmy vous. Luther fit vne Apologie pour vn Citoyen de Torgauie, en laquelle il excuse & deffend le rauissement de neuf Vierges, fait par ce Sacrilege au Monastere de Nimice, l'vne desquelles fut Catherine de Bore, sa Concubine. Il en fit vn autre à la recommandation & loüange eternelle d'vne certaine Isabelle ou Isbelle Florentine, laquelle estoit sortie de son Monastere pour se liurer à l'incontinence des Escoliers Reformez des Vniuersitez d'Allemagne. Pantaleon a mis dans le Catalogue de vos Martyrs, non seulement plusieurs Apostats, qui par leurs crimes auoient merité la corde parmy nous; Mais (qui est pour faire perdre patience aux plus moderez & constans) ceste Furie d'Enfer, Poltrot, qui en traistre assassina le Duc de Guise, son maistre proche d'Orleans. Beze a releué dans ses pourtraits des hommes infames & sans Religion: Et de fresche datte Cameron ministre de Begle, proche de Bourdeaux, à fait vn liure à la gloire de Blanquet & Gaillard, insignes Corsaires Rochelois, qui par leurs crimes furent rompus sur la rouë & leurs associez (en nombre de 16.) pandus par Arrest

du Parlement dudit Bourdeaux l'an 1617. Liure
qu'il intitule, *Constance, Foy & resolution à la mort de
Blanquet, Gaillard & ses associez*; lequel a esté brulé
de la main du Bourreau par Arrest de la mesme
Cour.

Vous passez encore plus avant, puis que vous
dites avec Calvin (que vous reconnoissez apres
Beze, pour vn Prophete, & comme la bouche du
Seigneur) que nous n'auons point de Franc Arbi-
tre, & que c'est Dieu qui veut & commande, & qui
est le pire, qui opere tout ce qui s'opere en nous,
soit de bien soit de mal. Qui sont Propositions hor-
ribles & detestables, mesme à penser. Or qu'est
tout cecy, que porter, pousser & precipiter tacite-
ment les hommes au mal, & preparer par ce moyen
les voyes à l'Antechrist.

Et afin qu'aucun de vous ne m'accuse pas de vous
accuser à faux icy. Je vous prie d'entendre de vos
propres Docteurs, quels vous estes non seulement
aujourdhuy, que vous estes estrangement defor-
mez, selon du moulin mesme, en son *combat Chres-
tien*, mais au temps de vostre plus grande Refor-
mation.

Luther en ses postilles, sur l'Euangile du premier
Dimanche de l'Aduent. *Le monde deuiet tous les
iours pire par ceste Doctine (dit-il.) Maintenant cha-
cun de ceux qui la professent sont obsedez de sept Demons,
ou auparauant en la Papauté ils n'estoient obsedez que
d'un seul. Les Diables entrent maintenant à troupees dans*

les corps des hommes, puis qu'ils sont en ceste grande lumiere de l'Euangile, plus fins, plus iniques plus cruels & proterues qu'ils n'estoient en la Papauté. Aurifaber aux Propos de la Table du mesme Luther fol. 623. assure que cest homme souloit dire fort souuent, qu'apres la reuelation de son Euangile, la Vertu auoit esté estainte, la Iustice oppressée, la Temperance & la Deuotion perduë. Acte de son dire, Messieurs ?

Muscule au liure de Nouissimo die, dit. Qu'il n'y a gens au monde plus adonnez à fraude, à usure, Lubricité, &c. que les Euangeliques. Smidelin au Serm. 4. sur le 21. de saint Luc. Et afin que tout le monde reconnoisse que nos gens ne sont point Papistes, & qu'ils ne se fient point à leurs bonnes œures, ils n'en font aucune. Au lieu du Ieufne, ils vaquent aux yurongneries, & dissolutions iour & nuit. Et où il seroit necessaire de faire bien aux pauvres necessiteux, ils les despoüillent, ains escorchent. Ils conuertissent leurs prieres en Iuremens, Blasphemes & Execrations, iusques à surmonter mesme les Turcs. Enfin au lieu de l'Humilité, la Superbe, l'Orgueil & le fast regnent parmy ces gens. Calvin sur Daniel 11. vers. 34. Entre ce petit nombre, qui se sont soustraits & retirés de l'Idolatrie, de la Papauté, la plus grand part est pleine de fraude. Et sur la 2. de S. Pierre chap. 1. vers. 2. A peine en treuuerons nous vn, qui ait embrasse l'Euangile à autre intention, que pour se donner plus librement à la lasciueté. Du Moulin en son Combat Chrestien, apres auoir amplement descrit vostre Irreligion dès la page 41. iusques à la 123. Bref, dit-il, nos Eglises ressemblent

à ceste Statuë de Nabuchodonosor, dont la teste estoit d'Or, l'estomac d'Argent, le ventre d'Airain, les cuisses de Fer, & les pieds meslés de terre. Car plus nous descendons plus nous empirons. Acte de la Confession.

Tout ce que vous pouuez repartir icy, pour ruser & dōner le change, c'est qu'il y a plusieurs Catholiques qui sont aussi meschans que les pires de tous vos Confreres, lesquels sont tolerez encore aujour-d'huy parmy nous. Quand cela seroit, comme vous le dites, ce que ie n'accorde point, il y a bien de la differance entre vos pechez & les nostres; Car outre que les vostres, & nommément ceux que ie viens de vous reprocher, coulent des maximes de vostre doctrine erronée, & de l'esprit general de vostre Reformation pretenduë, vous les approuuez & louste- nez encore comme choses iustes, faisables & raison- nables, selon les principes de vostre Cabale. Les nos- tres au cōtraire ne procedent que de nostre ignoran- ce, ou infirmité, ou à tout rōpre de nostre volōté de- prauée, laquelle nous mesmes condānons, la fureur de nostre passiō apaisée, voire qui plus est, en faisons penitēce, & souffrōs encore d'en estre repris & cha- stiez par nos Superieurs spirituels & tēporels; Aucun desquels tāt s'en faut qu'il tolere en tiltre de Religiō nos forfaits personnels, cōme font vos ministres les vostres, qu'au cōtraire il nous en reprend, corrige & chastie, lors qu'ils sōt venus à la cognoissance; Tes- moin la Galere du Pape, qui n'est remplie que de mauuais Prestres & Religieux, ainsi que vous me- mes scauez.



D E

L' APOSTOLICITE D E L' E G L I S E.


Q V A T R I E S M E M A R Q V E.

C H A P I T R E I.



YANT discouru iusques icy des trois premieres Marques de la vrāye Eglise, il nous faut entretenir iusques à la fin de ceste Recherche de la quatriesme, sçauoir est l'Apostolicité. De preuuer icy d'entrée que l'Eglise de Dieu doine estre Apostolique, ce seroit abuser du temps, (qui au dire de S. Bernard, *Ser. ad Scholares*, est la chose la plus precieuse du monde) puis que vous mesmes nous accordés libremēt que les Apostres l'ont saintement fondée apres IESVS CHRIST. Il est seulement question, de sçauoir quelle de nos deux Eglises, la Romaine, ou la P. Reformée est veritablemēt & visiblemēt Apostolique en son Origine, en sa Doctrīne, en ses Mœurs, en son Culte externe, en sa Hie-

rarchie, & finalement en ses Graces & Faueurs diuines.



DE L' APOSTOLICITE' DE L' EGLISE
*Romaine, & Apostasie de la Pretendue
Reformée, touchant l' Origine.*

CHAPITRE II.

Que l'Eglise Romaine soit Apostolique en tous ces diuers Chefs, & premieremēt en son Origine, il est aisé de le recueillir, de ce qu'elle ne souffrit iamais aucune interruption & parenthese en sa durée visible depuis les Apostres iusques à nous. De la vient que nos Euesques du iourd'huy, se disent les vrais & directs Successeurs de ces premieres Colomnes du Temple de Dieu, non seulement quant à la succession de Doctrine, de laquelle vous-vous vantez quelquesfois, quoy que sans fondement & raison, ainsi que nous preuuerons au Chapitre suiuant, mais encore selon la succession personnelle, de laquelle se pourroient en quelque sorte vanter les Nestoriens, Eutychiens, & Grecs du Leuant & Midy, s'ils ne l'auoient perduë & par le Schisme & par l'Herésie.

En preuue de cecy plusieurs des mesmes Euesques & nommément les Patriarches & Primats

d'Occident, & sur tout le Pape de Rome produisent le Catalogue de leurs Deuāciens, sans interruption, & sans Eclipses depuis IESVS-CHRIST, iusques aujourd'huy, lequel ils ont recueilly des Archiues & Registres de leurs Chapitres. Ils produisent encore leur Chaires, leurs Temples, & plusieurs autres indubitables Monumens de leur Apostolicité, outre le glorieux Eloge d'Apostoliques, qu'ils ont par vne propagation spirituelle, successiuement, sans dispute, & priuatiuement à tous autres, conserué iusques à maintenant. Argument inuincible, & duquel se sont déjà seruis auant eux, Sainct Irenée, Tertullien, S. Optat, S. Epiphane, S. Augustin & quelques autres, allegant aux Heretiques le Catalogue des Euesques de Rome, iusques à celuy qui siegeoit de leurs temps. Tertullien *lib. de prescript. c. 32.* *Que les Heretiques produisent les fondemens de leurs Eglises (dit il) Qu'ils produisent l'ordre de leurs Euesques? S. Optat lib. 2. cōtre Parmenian. Rendez-nous maintenant compte de l'Origine de vostre Chaire, vous qui vous voulez vendiquer le tiltre de l'Eglise de IESVS-CHRIST. S. Augustin sur le Psal. 102. contre la part. de Donat. Comtez les Prelats despuis le Siege de S. Pierre, & en cet Ordre là des Peres, voyez qui sont ceux qui ont succedé les uns aux autres. Je laisse S. Cyprien de l'Vnité de l'Eglise, & S. Chrysostome sur l'Epistre aux Ephesiens, qui font les mesmes interrogats aux Heretiques de leur temps.*

Mais pour vostre Pretendue Reformée, elle est

à la fin du monde, quand remontant à sa source, elle rencontre Calvin & Luther, ses deux Colomnes d'Hercule. *Non plus ultra*. De répondre que les Albigeois & Vaudois estoient des vostres, comme plusieurs d'entre-vous ont ozé faire, outre que la chose est encore plus fausse que la fausseté mesme; Car ces honnestes gens n'enseignoient pas tout ce que vous enseignez aujourdhuy, ny vous n'enseigniez-pas tout ce qu'ils enseignoit iadis, comme vous sçavez tres-bien, il ne se pourroit faire que vous ne tiniez aussi-tost le loup par les oreilles, comme l'on dit. C'est à dire que vous ne fussiez cōtraints, ou de reduire l'Eglise invisible de mil ans, dans laquelle vous allez vous tapir aussi tost qu'on vous demande vostre Origine, à cinq cens ans, ou de vous declarer Heretiques formels. Car les Vaudois tenoient. 1. Que durant la concupiscence toute conionction estoit licite. 2. Que les Dignités temporelles se perdent en pechant. 3. Que le Symbole des Apostres est digne de mespris. Les Albigeois tenoient. 1. Que Dieu crée les ames, & le Diable le corps. 2. Que les ames passent par Metempsychose d'un corps à un autre. 3. Qu'il n'y a point de Resurrection, & plusieurs autres, non moindres erreurs, que vous ne tenez pas encore publiquement, que ie sçache.



De l'Apostolicité de l'Eglise Romaine, & Apostasie
de la Pretenduë Reformée, touchant
la Doctrine.

CHAPITRE III.

Que la Doctrine de l'Eglise Romaine soit Apostolique, ie l'infere necessairement, de ce qu'elle est, non seulement conforme à la Doctrine des Apostres : mais est encore sa consanguine, c'est à dire, venuë par vne dériuation perpetuelle & par vne propagation continuë, & comme de bouche en bouche, & de main en main des Apostres iufques à nous.

Que sa Doctrine soit conforme à celle des Apostres, outre le Sacré Texte, duquel il est aisé de les recueillir, ie le preuue de ce qu'elle est conforme & semblable à celle des quatre premiers Siecles du Christianisme, ainsi que l'ont clairement fait voir Estienne Durant en son liure de *Ritibus Ecclesie*, le celebre Cardinal du Perron en sa *Replique à la Responce du Roy de la grande Bretagne l. 1. c. 18.* Le R. Pere Gaultier en sa *Table Chronographique*. Le R. P. Alexandre Regourd en ses *Demonstrations Catholiques*; *Demonstration septième* de Monsieur de Fenouillet Euesque de Montpellier, disputant contre Banfillon,

Ministre d'Aiguemortes à Montpellier, & plusieurs autres doctes & celebres Autheurs de ce Siecle.

Or que celle des quatre premiers Siecles fust conforme & semblable, voire la mesme que celle des Apostres, ie n'en veux autre Témoin que le grand S. Augustin *De Baptismo* l. 2. c. 7. & l. 4. c. 24. & l. 5. c. 23. *contra Donatistas*. Tout ce que l'Eglise Catholique (dit cet incomparable Docteur) a uniuersellement observé, & qui n'a point esté institué par les Conciles Oecumeniques; mais a esté auparauant uniuersellement practiqué, cela est de Tradition Apostolique. Calvin mesme au l. 1. de son *Instit.* ch. 11. §. 12. & au liu. 4. ch. 2. §. 3. accorde, Qu'il n'y eust iamais aucun changement de Doctrine en l'Eglise Romaine, depuis les Apostres iusques aux Peres, entre lesquels il marque Sainct Augustin. C'est à dire durant les cinq premiers Siecles de l'Eglise: Or il n'y en a point eu despuis. Donc il n'y en eut iamais point du tout. La Mineure de ce Syllogisme a esté déjà preuuee par les plus celebres Escriuains de ce Siecle, Cardinaux, Euesques & Religieux. C'est à dire, qu'il n'y a iamais eu rien de changé en la Substance de la Foy parmy nous, & que nous en sommes aux mesmes termes que les premiers Chrestiens en matiere des choses essentielles à la Religion, quoy que vous ne le croyés pas ainsi.


Que sa Doctrine soit consanguine de celle des Apostres, il appert en ce qu'elle deriue & descend de bouche en bouche, & de main en main des A-

postres iusques à nous par vne propagation spirituelle, sans aucune interruption & parentheze, & par vne chaine perpetuelle de Baptisans & de Baptisez, d'Enseignans, & d'Enseignez, de Docteurs & des Disciples en suite de la promesse que Dieu a faite à son Eglise en Ilaye ch. 59. v. 21. *Mes paroles ne partiront iamais de ta bouche, ny de la bouche de ta posterité, ny de la bouche de la posterité de ta posterité (dit le Seigneur) des maintenant iusques à iamais.*

En effect nous croyons tout ce que nos Peres immediats ont creu. Nos Peres immediats ont creu tout ce que leurs Peres immediats auoient creu. Les Peres de nos Peres ont creu tout ce que leurs Peres immediats auoient creu, & ainsi iusques aux Apostres. Et il ne faut point d'autre Témoin de cette verité, que les Docteurs, qui ont escrit de Siecle en Siecle, depuis les mesmes Apostres iusques à nous; La Foy & creance desquels, il sera bien aisé de voir dans la Table Chronographique du mesme Pere Gautier sur les douze principales Controuerses que vous auez remuées en ce dernier Siecle. Témoignage qui a conuaincu & conuerti plusieurs bons Esprits d'entre-vous, comme vous sçauiez assez.

Mais pour vostre Doctine, elle ne sçauroit estre en sorte quelconque Apostolique, luittant appertement, en plusieurs Chefs, avec celle des Sainctes Apostres. Le seul saint Paul suffiroit à l'entiere preuue de ceste Proposition. Car il *prefere le Celibat au Mariage* en la 1. aux Corinth. 7. *Ordonne à tous les Chrestiens*

Chrestiens d'obeyr à leurs legitime Superieurs aux Rom. 13.
destruit vostre pretēdue certitude du Salut aux Rom. 11.
& en sa 1. aux Corinth. 9. & aux Phil. ch. 2. ensei-
gne que la foy se peut perdre en la 1. à Timot. chap. 1.
establit les Traditions en la 1. aux Theff. chap. 2. pres-
che le Franc-Arbitre de l'homme aux actions plus saintes,
moyenant la grace de Dieu ; ~~est~~ en la 1. aux Corint. 7.
tient que la Loy se peut accomplir avec la mesme grace, aux
Phil. 4. Que la Foy sans la Charité n'est rien, en la 1. aux
Corint. 13. Que Dieu veut sauuer tous les hommes, en
sa 1. Tim. 2. Que le Baptesme est neecessaire à Salut, à
Tite 3. Qu'en l'Eucharistie est le vray Corps de I E S U S-
CHRIST, 1. Corint. 11. Que l'Eglise ne peut errer, 1.
Tim. 3. Que la peine reste apres la remission de la coulpe
Rom. 6. Qu'il y a un Purgatoire, 1. Cor. 3. Que les sa-
tisfactions des Saints sont utiles à l'Eglise, aux Col-
loss. 1. Que le Mariage est Sacrement, Ephes. 5. Et s'op-
pose à plusieurs autres points de vostre nouvelle
Doctrin ailleurs. Enquoy il est exactement imité
de tous les autres Apostres, qui ont escrit, Que le
seul desir d'estre brief me fait passer sous silence icy.



*De l'Apostolicité de l'Eglise Romaine, & Apostasie
de la Pretenduë Reformée, touchant
les Mœurs.*

CHAPITRE IV.

Que l'Eglise Romaine soit encore Apostolique en ses Mœurs, il n'y a rien de plus evident & de plus manifeste; Car comme les Apostres sont allez prescher l'Euangile par tout l'Vniuers, selon la prediction du Roy Prophete au Psal. 18. *Leur son est allé par toute la Terre, & selon le commandement de IESVS-CHRIST en saint Math. 16. Allans par tout l'Vniuers preschez l'Euangile à toute creature. Commandement qu'il repete tacitement aux Actes chap. 1. Vous me serez Tesmoins en Ierusalem (dit-il) & par toute la Iudee, & iusques au bout de la Terre.* Ainsi les Predicateurs Catholiques sont allez prescher en diuers Siecles: & nommément en cestuy cy, le mesme Euangile par tout le monde. Mais qui a ie vous prie conuerty à la foy de IESVS-CHRIST, de nostre temps, le Royaume de Congo l'Empire de Monomotapa, l'Empire d'Etiopie, les Indes, les Isles Philipines, le Iappon, la Chine, l'Amerique, le Brasil, le Peru, le Mexique, la nouvelle Espagne, la nouvelle France, & cent autres grandes Prouinces,

que nos Religieux & prestres zelés? Je m'en rapporte aux solides preuues de Thomas Bosius en son liur. 4. *des Signes de l'Eglise*, & de tous les Historiens de ce temps : Ausquelles il n'y a que respondre entre personnes d'entendement.

Mais pour vous, allastes vous iamais, ie ne veux pas dire aux Antipodes, en Afrique, en Asie, voire mesme aux Espagnes, aux Italies, en la Franche Comté, au Comté d'Auignon? Et vous n'oseriez le dire; non pas mesme le penser sans reuer. Pour aller en Picoueurs apres quelque riche Butin sur terre, ou apres quelque Vaisseau Marchand sur mer, plusieurs des vostres donneroient, comme ils ont fait, & font encore souuent iusques au Japon mesmes. Mais pour aller à l'Apostolique, ou si vous voulez à la Iesuitique, ou à la Capucine apres la Conuersion, voire mesme de ceux qui ne sont qu'à trois iets de pierre de vous, il ne s'en treuue pas vn seul parmy vous.

2. Comme les Apostres renoncèrent à toutes leurs commoditez temporelles à ce portés par les paroles de IESVS-CHRIST, en S. Marc. 6. & en saint Luc 9. leur recommandant de ne posseder ny Or, ny Argent, traueillans apres la conuersion de tout le monde. En suite dequoy ils firent vœu de perpetuelle pauureté, selon saint Thomas en sa 2. 2. quest. 186. art. 6. *ad 1.* Ce qu'il preuue par saint Augustin, de *Consensu Euangelista* liur. 2. chap. 17. Ainsi la pluspart des Predicateurs de l'Eglise Rô-

maine, non seulement des premiers Siecles, mais encore de celuy auquel nous viuons, ont renoncé en effet à tout ce qu'ils possedoient au monde, tant pour se conformer de plus pres à l'esprit, vie & mœurs des Apostres, que pour exercer la Predication avec plus de liberté, de zele & d'efficace. Tels ont esté, Sainct Ignace de Loyola parmy les Chrestiens, & sainct Xauier parmy les payens; Lesquels ont vescu plusieurs années questant & mandiant de porte en porte leur pain, accompagnés de plusieurs hommes Apostoliques, & d'un monde des saincts Religieux, de sainct Augustin, de sainct Benoit, de sainct Dominique, de sainct François & semblables.

Mais ie ne pense pas d'auoir en ma vie veu, leu, non pas mesme entendu dire qu'aucun de tous vos ministres, pour deuenir meilleur se rendit iamais de riche, pauvre, & d'abondant, disetteux. Au contraire, il n'y en eust peut-estre iamais vn seul d'entre tous eux, qui ne se rendit ministre, pour pouuoir manger tout son saoul, la pluspart de telles gens, estans sortis du Taudis d'Erisicton, ou de quelque chetive Cabane; Car vn Enfant de bonne naissance ne daigneroit pas de s'auillir à vn si bas Office, que celuy de ministre, Tesmoin Horace Dolabella au chap. 3. de son Apologie, quest. 38. & l'experiance de tous les iours.

3. Comme les Apostres professerent le Celibat, ce qui se recueille necessairement des paroles de S.

Pierre à I E S V S - C H R I S T en saint Math. 19. Voicy nous auons quitté toutes choses, & t'auons suivis, & de celles que le mesme I E S V S - C H R I S T dit en saint Luc 19. Si quelqu'un vient à moy, & ne hayt son Pere, sa Mere, & sa femme &c. il ne peut estre mon Disciple, Verité que Tertullien au liur. de *Monogamia*, vers le milieu, & saint Ierosme au liur. I. *contr. Iouinian*. chap. 4. & en l'Epistre 22. *ad Eutochium* preschent assez haut; assurant qu'il n'y eust iamais autre Apostre marié, que saint Pierre, encore quitta-il sa femme, en receuant l'Apostolat. Et le zeile, que ces Anges terrestres auoient de conquerer tout l'Vniuers à leur Maistre I E S V S - C H R I S T, & l'austerité de leur vie ne leur pouuoit honnestement permettre les voluptez du mariage, quoy que legitimes. Ainsi nos Euesques, Prestres & Religieux, de cent les quatre vingts dix, s'abstiennent tout a fait de femme, quoy que fassent tous les Diabes d'Enfer, & quoy que forgent tous les Suposts & Ministres. Nous auons mesme plusieurs Vierges en ce Siecle, entre autres saint François de Paule, saint Xauier, saint Charles, saint Philippe, le B. François de Sales, Euesque de Geneue, le B. Louys Bertrand, Alexandre Capochi & plusieurs celebres Religieux de l'un & de l'autre sexe, ainsi que i'ay desia dit cy-dessus.

Mais pour vos predicans, ils vont tout au rebours des Apostres, & des Euesques & prestres de l'Eglise Romaine, puis qu'ils se marient (O lubricité

sans exemple & sans excuse) non seulement vne, mais plusieurs fois , si leurs femmes viennent à mourir. Ils font non seulement au rebours de nos Euesques & prestres en cela, mais encore des Euesques & prestres Grecs. Car les Eglises Grecques n'admirent iamais en la promotion , ny en l'exercice du Sacerdoce, pour Euesques, des hommes, qui ayent esté mariez, ny pour simples Prestres, des hommes, qui le soient en effet, ou qui l'ayent esté deux fois, ou Maris de femmes vefues. Ce qui est si vray, que ie rougis de honte & pour eux & pour vous, qui les approuuez en leurs Charnalitez. Pour nous, nous deuons ou n'auoir iamais esté mariez, ou estre Vefues, si nous auions desia esté mariez, pour pouuoir estre promeus à l'Ordre de prestrie. Vos ministres tout au contraire attendent ordinairement de prendre femme, qu'ils ayent esté promeus au ministere, parce qu' auparauant ils ne treueroient pas vne seruante d'hostellerie; ou apres ils choisissent presque entre les Damoiselles de la dernière impression.

4. Comme les Apostres ieusnoient, & viuoient tres austerement. Ce que nous lisons dans saint Ambroise Serm. 25. & 34. de *Quadragesima*, dans saint Ierosme *Epist. ad Marcellam*. dans saint Augustin, au *Serm. 62. de tempo.* & en l'*Epist. 118. ad Ianuarium*, & dans saint Epiphane, & saint Leon, qui ont escrit que le Caresme estoit d'Institution Apostolique. Saint pierre ne viuoit que de legu-

images, selon saint Gregoire, *Oratione de amore pauperum*, saint Jacques le frere du Seigneur ne mangeoit point de chair, ny ne beuvoit point de vin, selon Eusebe en son *Histoire Eccles. liur. 2. chap. 22.* Saint Mathieu n'vsoit pour toute nourriture, que de seules herbes, selon Clement Alexand. *in Pedago. liur. 2. chap. 1.* Ainsi plusieurs des Enfans de l'Eglise Romaine, nommément les Reuerends peres Minimes, Chartreux, Recolez, Capucins, & plusieurs autres Religieux & seculiers pratiquent des Ieufnes & des austeritez, qui vous effarouchent & vous estourdissent, lors que vous les lisez, ou les entendez raconter. Saint François de paule, la Bienheureuse Felise Vierge, natiue d'un village proche de Rome, laquelle a fait trois Carefmes tout de suite sans prendre aucune sorte de nourriture, & quelques autres encore ont égalé, voire surmonté (selon que nous le pouuons recueillir de l'Histoire) les Ieufnes & les austeritez des Apostres mesmes. Entre lesquels sont dignes de remarque les peres Recolez d'une certaine prouince d'Espagne, nommée Rabida, qui sont aussi austeres que les anciens Anachorettes de la Thebaïde.

Mais sur tout ceux là, l'ont esté le pere Martin fils du Comte de saint Estienne Castillan; Car il a presque esgalé les austeritez de saint Jean Baptiste, & le Pere Pierre de Mont, avec luy, lequel a passé vingt ans entiers en la solitude dans l'une des isles Canaries avec une poignée de farine d'orge qu'il treuuoit


miraculeusement tous les iours dans vn petit sac. Tous deux Religieux de la mesme Religion & Recollection. Adioustés à cecy, ce que ie viens de dire au chap. 12. de la marque troisieme.

Mais pour vous, nous sçauriez vous bien nommer vn seul homme dans toute vostre Reformation Pretenduë, qui s'allast coucher vne seule fois en sa vie sans souper, pour subiuguer la chair à l'Esprit: Non pas que ie croye. Car si quelqu'un de vous auoit esté si feruent que cela ce seroit assez pour se faire declarer vn vray Caphard parmy vous. Pour vos Ministres, c'est vn plaisir Royal, que de les voir ruër en Cuisine, quand ils sont de festin, ou sur les champs, aux despens de leurs pauvres Eglises. Iamais aucun d'eux ne ieusna par deuotion vn pauvre iour en toute sa vie, de peur de scandaliser sa famille, & d'estre cassé comme papiste: Le Ieusne estant vne Tradition humaine & comme Heretique parmy vous.

Finalemēt, Comme les Apostres souffrirent tous le Martyre, iusques à saint Iean l'Euangeliste, lors qu'il fut ietté dans la Chaudiere d'huile bouillante. Ainsi la pluspart des Euesques de l'Eglise Romaine, sur tout en Angleterre, en Escosse, en Danemarck, en Suede & ailleurs, où vous auez gagné le dessus, ont esté couronnez de la glorieuse couronne du Martyre en ce Siecle: Suiuis d'vne multitude incroyable de Chartreux, d'Augustins, de Benedictins, de Dominicains, de Franciscains, de Iesuites,

de Prestres Seculiers, & d'autres Laiques de tout sexe, estat & condition de personnes; Le seul nom desquels suffiroit pour remplir vn volume semblable à cestuy-cy, si grand en est le nombre aujour-d'huy.

Mais pour vous, il est vray, que vous auez vn gros martyrologe, que vous monstrez à tous ceux qui daignent le voir, Auquel par paranthese ie n'ay iamais encore sçeu treuuer ~~par~~ Luther, Melancton, Carlostad, Zuingle, Calvin, Beze, ny aucun autre de vos ministres fameux. Mais si vous en vouliez sans dispute rayer. 1. Les Hussites, qui sont, comme vous sçaez bien differans & bien dissemblables de vous. 2. Ceux qui furent bruslez sous François premier & Henry deuxiesme, plustot Lutheriens que Calvinistes. 3. Nos Apostats, que les Tournelles ont fait mourir sur la potence ou sur la rouë, non tant pour leur Apostasie que pour des autres crimes execrables qu'ils auoient commis parmy nous. 4. Les Rebelles & criminels punis du mesme supplice, à cause de leurs soustèuemens, rebellions & voleries. Si dis-je vous en vouliez oster toutes ces honnestes gens là, i'estime, & non sans raison, qu'il ne vous demeurera de vostre Martyrologe, que les seules couuertes entre les mains, pour vous seruir de memoire de vostre insigne effronterie, ou que vous le treuuez, comme disoit Apollodorus des Escrits du Philolophe Chrysippus, (osté ce qu'il y auoit inferé d'autruy) tout à fait en blanc.



De l'Apostolicité de l'Eglise Romaine, & Apostasie
de la Pretenduë Reformée, touchant
le Culte.

CHAPITRE V.

L'Eglise Romaine, outre qu'elle est apostolique en son Origine, en sa Succession, en sa Doctrine de Foy & de mœurs, elle l'est encore en son Culte & ceremonies, ce qui sera fort aisé de voir, dans les Canons des apostres, dans les Constitutions apostoliques de saint Clement Pape, & chez les peres & premiers Historiens de l'Eglise, fidellement recueillis par Estienne Durand, en son liure de *Ritibus Ecclesie*.

Pour les Sacrements, quant à leur Substance, nous les tirons de l'Ecriture sainte; Et quant à leurs Ceremonies, nous les tirons de la Tradition apostolique. Ce que ie m'en vay briefuement monstres de quelques vnes d'icelles par les premiers Peres de l'Eglise. Pour le Baptesme, on faisoit renoncer dès les premiers Siecles, au Diable & à ses pompes, à tous ceux qui s'y presentoient, ou par eux, ou par leurs parrains selon Tertul. de *coron milit.* c. 3. On vloit d'une triple immersion ou aspersion, selon le mesme au mesme lieu. On touffloit sur les

petits enfans, qui deuoient estre baptizez, & les exorcisoit-on encore selon S. Augustin au li. 2. *du peché Originel contre Pelage* ch. dernier. On oignoit le baptisé de Chresme, selon Tertul. *lib. de Baptif. cap. 9.* On faisoit le Signe de la Croix sur luy, & luy mettoit-on du sel en la bouche, selon S. Augustin *liur. 1. Confess. chap. 11.* On luy nettoyoit les oreilles, disant *Epheta*, selon S. Ambroise *liur. 1. de Sacram. cap. 1.* Et finalement on luy donnoit vne robe blanche, selon S. Denis *en sa Hierarchie Ecclesiastique part. 2.*

Pour la Penitence, les Pecheurs Penitents confessoient leurs pechez aux Prestres, selon saint Irenee *lib. 1. de Hæresib. c. 9.* Tertul. *de Pœnit. cap. 8.* S. Cyprien *Serm. de lapsis*, & S. Augustin *hom. 47. des cinquante. ~~Il se confessoient~~*, & sur tout au temps de Pasques, selon S. Chrysostome *hom. 30. in Genesim*, & saint Gregoire de Nisse *Epist. cano. ad Episco. Mytilens.* les Prestres donnoient l'absolution selon S. Cyprien *Serm. de lapsis.* Et les vrais Penitents accomplissoient les Penitences qu'on leur auoit impostées, selon Tertul. *lib. de Pœnit. c. 9.*

Pour l'Eucharistie, on la prenoit à ieun, selon Tert. l. 4. *ad uxorem c. 5.* & selon saint Augustin, *Epist. 118. ad Ianua c. 5.* On la gardoit souuent en la maison, selon le mesme Tertulien l. 1. *de Orat. c. 14.* On la portoit aux malades selon le premier Concile de Nicée, can. 13. & finalement on l'adoroit, selon Saint Augustin sur le Psal. 98.

Pour le Sacrifice de la sainte Messe, on y disoit le

Kyrie eleyson, selon S. Augustin Epist. 178. On y offroit le pain & le vin, selon saint Iustin Martyr *Apol.* 2. & saint Ambroise, l. 4. de *Sacram.* c. 5. On s'y seruoit d'Hosties rondes, selon saint Epiphane in *Anchorato circa medium*. Le Prestre y lauoit le bout des doigts, selon S. Denis en sa *Hierar. Eccles.* p. 2. & S. Cyrille en sa 5. *Cathech. mystag.* Il y disoit la Preface avec *Sursum corda*, & apres *Sanctus, Sanctus, Sanctus*, selon S. Cyrille & S. Ambroise aux mesmes lieux. Il y consacroit & benissoit le pain & le vin, selon saint Ambroise de *ijs qui myst. init.* Il y monstroit la sainte Hostie au peuple selon S. Denis *Hierar. Eccles.* c. 3. & c.

Touchant l'Ordre, il y auoit des Euesques, des Prestres, des Diacres, & Souddiacres selon saint Hierosme *Epist.* 13. ad *Rust. Epis. Narbon.* On impositoit les mains sur les Euesques, Prestres & Diacres, selon saint Ambroise l. de *dignit. Sacerd.* ch. 5. On consacroit avec onction tous les trois, selon saint Denys, *Hierar. Eccles.* c. 4. & saint Pacian *Epist.* 3. ad *Sempronium*.

Je pourrois encore preuuer par les Peres des cinq premiers siecles, toutes les autres Ceremonies Ecclesiastiques, qu'on pratique auiourd'huy parmy nous, touchant les autres Sacremens, touchant les Eglises & les Autels, touchant les Images & les Sepultures, avec l'usage du signe de la Croix, & les Festes: Mais ie serois sans doute trop long pour vostre patience reformée. C'est pourquoy ie briseray icy. Et pour cela que nous practiquons, dont nous

n'auons aucun Auteur expres en l'Antiquité, nous le tenons de la Tradition Apostolique apres le grād saint Augustin, li. 5 de *Bapt. cont. Donatist.* c. 32. Il y a plusieurs choses (dit cet incomparable Docteur) que nous practiquons, lesquelles sont creuës à bon droit venir de la Tradition Apostolique. Voyez Estienne Duranti, de *Ritib. Ecclesie*, qui vous satisfaira parfaitement en toutes les demandes que vous scauriez faire sur le Culte de l'Eglise Romaine, & sur toutes ses autres coustumes & practiques. Voyez encore les authoritez des Peres, que ie viens de vous alleguer; Et quand vous les aurez veuës en leur source, demandez (s'il vous plaist) à Messieurs vos ministres, qu'est ce qu'ils ont à respondre de raisonnable contre de si puissans témoignages. Et comment est ce qu'ils osent nous reprendre de ce que nous faisons les mesmes choses, qui se practiquoient en l'Eglise primitiue, apres l'auoir declarée exempte, quitte, & pure de toute erreur, durant les cinq premiers siecles du Christianisme, comme ils ont souuent fait. Et vous les verrez aussi-tost chez Guillot le songeur.

Continuation du present Chapitre.

MAis pour vostre pretenduë Reformée, elle ne peut point se dire Apostolique, ny en son Culte, ny en sa Discipline; Car de grace, De quel Apôstre tenez vous, Que le propre nom des Pasteurs

de l'Eglise doive estre celuy de *Ministre*? (Nom qui bien souvent est prins, voire mesme dans le sacré Texte, pour celuy de Sergent ou Bourreau.) Je sçay bien que les Apostres en ont vsé quelque fois, non pas comme d'un nom propre, mais comme d'un nom general & commun. Aussi l'applique t'on à toute sorte d'Officiers & Seruiteurs, tant Populaires qu'Ecclesiastiques, comme vous sçavez. L'Apostre saint Paul donnant le propre nom à chacune des principales Dignitez de l'Eglise en son Epist. aux Eph. ch. 4. vers. 11. appelle les vns Apostres, les autres Prophetes, les autres Euangelistes, les autres Pasteurs, les autres Docteurs, mais il ne fait aucune mention des *Ministres*, comme de personnes, qui fassent un ordre en l'Eglise, ainsi qu'ils font chez vous.

De quel Apostre, tenez-vous le 30. 31. & 32. articles du chapitre premier de vostre Discipline Ecclesiastique, dans lesquels vous permettez à vos Eglises de prendre les Ministres à l'espreuve, ou de les troquer pour d'autres, rendant le surplus, lors qu'un d'eux vaut mieux que l'autre, comme il fut fait au change du Faucheur, dont l'Eglise d'Annonay eut ~~les~~ trois cens escus de retour de celle de Montpelier, pour l'auoir du Synode d'Aubenas, tenu l'an 1612. Procedé directement contre la stabilité des Pasteurs, tant recommandée au 15. Canon des Apostres?

De quel Apostre tenez-vous le 39. article du

mesme chapitre, auquel vous ordonnez que cette Eglise ne doit point auoir de Ministre nouueau, qui n'aura bien payé les gages du vieux, contre la pratique des Apostres, qui ne laisserent iamais de prescher aux Payens, bien qu'ils n'exigeassent d'eux pour tous salaires que des prisons, des fouëts, des Croix & des Martyres. Rigoureuse Discipline, qui laisse à l'abandon & comme en proye les ames, faute de satisfaire aux gages d'un Ministre. Les Indiens de la Floride peuuent donc bien attendre vostre retour aux Calendes Grecques; Car à ce que i'ay appris de vous-mesmes, ils ne payerent point les gages de Richier & des autres Ministres, qui les allerent prescher l'an 1555. souz la conduite du sieur de Ville-gaignon.

De quel Apostre tenez-vous l'article suiuant, où vous permettez que le Consistoire (composé des hommes Laiques) casse quant à l'exercice vn pauvre Ministre, s'il iuge qu'il ait erré? Contre la Hierarchie Ecclesiastique establie par les Apostres, selon laquelle cette sorte de personne n'institua, ny ne destitua iamais prestre, Diacre, ny Clerc en l'Eglise de Dieu. Je m'en rapporte aux preuues du Doctissime Bellarmin *lib. 1. de Clericis c. 3. & 7.* car qu'est cela qu'vsurper le Sacerdoce, ainsi que fit Saül, mettre la main à l'Arche avec Oza, & prendre l'Encensoir, comme Ozias?

De quel Apostre tirez-vous, que le nom d'Euëfque ou de Surueillant (car c'est le mesme) doiue

estre donné à des fendeurs de bois, ou à des reuendeurs de tripes, comme vous faites en plusieurs villages? Contre la Tradition Apostolique, selon laquelle, on ne conféra iamais ce releué nom, qu'aux seuls Princes des Prestres, leurs successeurs. Voyez le mesme Bellarmin *au l. 1. de Clericis c. 14.* & particulierement le 40. Canon des Apostres.

De quel apostre tirez-vous le 3. article du cha. 3. de vostre Discipline, où vous donnez vos Eglises à garder à des Tambours & Trompettes, en commun avec leur Ministre? Contre la Tradition Apostolique, se'lon laquelle on n'establit iamais autres, que les seuls Euesques, Prestres & Diacres à la direction & conduite de l'Eglise & des ames. Ainsi que le preuue amplement le mesme Cardinal au liu. 3. *de verbo Dei*, depuis le 3. chap. iusques au 9. du mesme liure. Vous-vous trompez, *Messieurs*; Car si tous les Chrestiens estoient égaux, comme on est parmy vous, iamais l'apostre n'eust dit en son Epist. 1. aux Corint. ch. 12. v. 29. *Tous sont-ils Apostres? Tous sont-ils Prophetes? Tous sont-ils Docteurs? Tous sont-ils Predicateurs ou Interpretes?*

De quel apostre auez-vous tiré l'article 6. du mesme chapitre, où vous permettez en plusieurs villages à des écorcheurs de cheures, de dire leur avis, sur les principales matieres de Theologie dās le Consistoire? Eux qui par la Tradition venuë des apostres n'eussent pas mesme eu le credit d'entrer anciennement au Chœur avec les moindres Clercs,
pour

pour y Psalmodier, ainsi qu'apert au 69. Canon du 6. Concile general. Lisez Bellarmin au liu. 1. des Conciles ch. 15. qui vous fera voir par l'antiquité tout le contraire de vostre procedure en cecy.

De quel apostre tirez-vous le 5. article du chapitre 5. de la mesme Discipline, où vous deffendez que le pere soit en mesme temps du mesme Consistoire que le fils, & le frere du mesme Consistoire que le frere ? Contre la pratique des Apostres. Car saint Pierre, saint André, saint Iacques & saint Jean freres, se sont treuuez en mesme temps du Consistoire Apostolique (qui valoit bien les vostres) ne vous desplaise.

De quel Apostre auez vous apris le 4. art. du 8. chap. de la mesme Discipline, où vous ordonnez que les promenades de Messieurs vos ministres aux Synodes se doiuent faire aux despens de leurs Eglises, quoy que pauures & disetteuses ? Et l'article suyuant, où vous priuez de ministres & de Ministrie celles qui refuseront à fournir ausdits voyages, contre la mesnagerie & frugalité de saint Paul, qui proteste en sa 2. Corint. chap. 12. de n'auoir esté a aucune charge aux Eglises ? La premiere chose aussi que ce saint homme demādoit à ses hostesses, entrant dans les Hostelleries n'estoit pas s'il y auoit des perdrix, comme font d'ordinaire messieurs les Ministres, marchans aux despens de leurs Eglises, accablées aujourdhuy de misere.

De quel Apostre auez vous apris l'art. 8. du mes-

me chapitre, auquel vous permettez que vos Deputés ayent Voix Deliberatiue dans vos Synodes, où l'on traite bien souuent des matieres de la Foy ? contre la pratique de tous les Conciles anciens & modernes, ausquels on ne leut iamais la souscription d'aucun autre, que des seuls Ecclesiastiques. *Quand est-ce, que cela a esté ouy de memoire d'homme, que les Iugemens de l'Eglise ayent pris leur authorité, voire mesme de l'Empereur ?* dit saint Athanase en son Epist. *ad Solit. vitam agentes.*

De quel Apostre tenez vous l'art. 5. du chap. 10. où vous deffendez estroitement d'vser des Prieres, des Discours funebres & d'Aumosnes publiques aux sepultures de vos freres en CHRIST ? Contre la pratique de l'antiquité, que le mesme Cardinal Bellarmin preue amplement au liur. 2. *de Purgatorio* chap. 19. Et de fait saint Cyprian fait mention des prieres & sacrifice pour les morts en son Epist. 66. *ad Clerum.* Saint Ambroise a declamé plusieurs Discours funebres en sa vie, nommément pour les Empereurs, Theodose, & Valentinian & pour son frere Satyre. Saint Ierosme sur le 11. chap. des prouerbes, & saint Chrysostome en *l'Homil. 32. in Math.* parlent amplement des Aumosnes publiques, qui se faisoient de leur temps au Sepultures des Chrestiens.

De quel Apostre tenez vous, qu'il vous faille chanter en rithme vulgaire les Psalmes de David au presche, hommes & femmes, pelle m. lle, voire met-

me les ieunes hommes vis à vis de leurs maistresses & bien souuent les Adulteres tout ioignant leurs Garçons & concubines.

De quel Apostre tenez vous l'article 1. du ch. 11. de la mesme Discipline, où vous dites que le Baptesme conferé par tout autre, que par vn Ministre accompli, doit estte declaré nul? Contre la pratique de l'Apostre saint Pierre, qui commanda à ses freres aux Actes 10. lesquels n'estoient encore, ny ministres accomplis, ny ministres à demy, ny en chemin de le deuenir iamais, de baptiser Corneille & toute sa famille? Seroit ce rien pour estre trop indulgens à leurs ventres, que vos ministres ont dressé ce Canon. Car ie me suis laissé dire, que s'ils craignent, de n'estre point du festin, que vous pratiquez és Baptesmes de vos enfans, ils dilayent & presque refusent de les baptiser.

De quel Apostre tenez vous, qu'il faille prescher au Baptesme, & laisser plustot mourir les petits enfans, sans ce Sacrement que de les baptiser sans presche? Contre le Decret de saint Victor Pape, qui viuoit au 2. Siecle de l'Eglise, & sur tout contre la Doctrine de saint Augustin, qui preuue le Baptesme des petits enfans sans presche, de la Doctrine des Apostres au liur. 2. chap. 7. *de Baptismo contra Donatistas?*

De quel Apostre tenez vous, qu'il ne faille admettre pour parrains au Baptesme, que ceux qui ont desia fait la Cene chez vous?

De quel apostre auez vous appris, qu'il ne faille imposer au Baptesme autres noms, que ceux qui se treuvent dans le Texte Sacré? Contre le procedé des apostres, qui permirent à plusieurs les noms de Line, de Clete, de Clement, d'Hierothée, de Denys, de Martial, de Policarpe, & contre celuy de leurs Successeurs, qui permirent encore le nom de Cyprian, d'Athanasie, d'Hilaire, d'Ambroise, de Ierosme; d'Augustin. &c. Noms, qui ne se treuuent point, n'y dans l'ancien, ny dans le nouueau Testament. Que si vostre pratique estoit si bonne que vous l'estimez, pourquoy est-ce que vous ne changez pas les noms de ceux d'entre nous, qui se caluinisent attendu qu'il y a la mesme faute d'entretenir vne erreur que de l'introduire?

De quel apostre auez vous appris, que le mot de Cene soit plustot le propre & formel nom du Sacrement du Corps & du sang de IESVS-CHRIST, que celuy de l'Eucharistie, l'Escriture sainte ne luy en donnant aucun; comme vous scauez tresbien, si tant est que vous en ayez leu les preuues chez le Docte & Elcquent Coëfeteau dans son œuure de l'Eucharistie?

De quel apostre auez vous appris, que iusques à des Bouchers puissent donner la belle moitié de la Cene. Je veux dire le vin, & boire apres les premiers, voire au partir d'enfler vne cheure, comme il est assez souuent arriué en plusieurs villages dans les montagnes du Dauphiné, & du Viuares?

De quel apostre auez vous appris, qu'il faille faire la Cene en reueuë, & comme les soldats qui font la monstre & prennent la paye, les apostres l'ayant pris assis en Table, ou en Terre ?

De quel apostre auez vous appris, que les Abstemmes, & qui pis est, que les delicats & desdaigneux (qui sont en assez bon nombre parmy vous) puissent sans crime, s'exempter de prendre la Coupe, comme ils font ordinairement, si elle est (ainsi que dit du Moulin) la iuste moitié de la Cene, & par consequent de commandement diuin, comme porte vostre Doctrine? O qu'il y a de la peine de soustenir vne erreur!

De quel apostre auez vous appris, qu'il faille porter pour tesmoignage assure d'une condigne preparation à la Cene, vn petit morceau de Carte, marqué du cachet du ministre.

De quel apostre auez vous appris, que les ministres doiuent prendre la Cene autant de fois qu'ils la donnent aux autres? c'est à dire deux fois, aux iours qu'ils l'administrent deux fois, comme il arriue lors qu'ils la donnent le matin & l'apresdinée en diuers villages, I E S V S- C H R I S T ne l'ayans pas mesme prinse vne seule, selon quelques vns de vous.

De quel Apostre auez vous appris qu'il faille lire le 11. chap. de la 1. aux Corinth. faisant la Cene, ny ayant aucun exemple en l'antiquité de cela ?

De quel apostre auez vous appris, que les Bigames & remariez puissent estre promeus à l'Ordre Ec-


clesiastique & Ministerial, premierement contre le
 texte expres de l'Apostre à Tite ? contre l'Ordon-
 nance des Apostres au 17. & 18. de leurs Canons,
 Secondement contre la pratique de l'antiquité au
 raport de Tertul. lib. 1. *ad uxorem*, lequel escrit que
 la Bigamie repugne à la Discipline Ecclesiastique à
 la prescription des Apostres, & à toute l'antiquité,
 & finalement contre le procedé de l'Eglise Grecque,
 Assyrienne, Africaine & de toutes les autres du Le-
 uant & Midy, que du Moulin renga souuent en son
 Bouclier de la Foy entre les Eglises Chrestiennes;
 Lesquelles n'admirent iamais, non plus que la Ro-
 maine, vn seul Bigame, tant en la promotion, qu'en
 l'exercice du Sacerdoce, non pas mesme les Mono-
 games à l'Episcopat. Procedé capable de faire rou-
 gir les plus effrontez mesmes. Procedé, qui a don-
 né sujet à quelques vns d'appeller vos Ministres, les
Parties honteuses du Christianisme, puis qu'ils ne scau-
 roient se passer de femme.

De quel Apostre, de quel Pere, de quel Autheur,
 & de quel Historien Catholique, Schismaticque,
 voire Heretique, auez vous appris, qu'il y ait au-
 tresfois eu dans le monde vne Eglise (grande ou
 petite) semblable en tout & par tout à la vostre, &
 qui portat la mesme face, & la mesme forme exte-
 rieur, qu'elle porte auiourd'huy ? le vous en deffie,
 pour deictes ou hardis que vous soyez. Argument,
 au reste, si fort, qu'il a ramené dans l'Eglise Catho-
 lique plusieurs des plus capables d'entre-vous, &

particulierement le sieur Scharpius, Escossois de nation & Professeur de Medecine en l'Vniuersité de Montpellier, lequel ayant veu, comme Michel le Faucheur Ministre de la mesme ville, n'y sceut iamais respondre, il vous dit à Dieu dès l'heure mesme, l'anné 1618.

Fust-ce pas le mesme Argument qui fist encore refoudre Daniel Peyrol, Ministre de la mesme ville, d'aller faire sa Confession de foy, chez les R. Peres Iesuistes à Beziers ? Dont s'estant mis en chemin, apres auoir laissé vne longue lettre à sa femme & à ses enfans, (qui a esté imprimée à Paris,) par laquelle il les exhortoit à le suiure, voila que son fils courut aussi-tost apres luy, & l'ayant atteint, le coniuira, par mille & mille raisons de chair & de sang, de s'en retourner à Montpellier; La plus forte desquelles fut, que s'il executoit son deffain, que sa Mere ne pouuoit pas manquer d'estre tenuë pour Garce, & luy pour Bastard; En sorte qu'il accorda de retourner, mais non pas de tenir vos Erreurs. Car il est mort Catholique, quoy que vous en iugiez.

Fust-ce pas encore le mesme argument, avec lequel Monsieur Suares, Euesque de Vaison mit en desordre les trois principaux Ministres du Synode Prouincial de Nyons de l'anné 1642. chascun d'eux donnant vne responce diuerse, la derniere autant & plus impertinente que la premiere?



DE L'APOSTOLICITE' DE L'EGLISE
Romaine, & Apostasie de la Pretendue
Reformée, touchant la Hierarchie.

CHAPITRE VI.

L'Eglise Romaine est encore Apostolique en sa Hierarchie, Car du temps des Apostres il y auoit des Euesques; C'est à dire de *Considerans* ou veillans sur les autres. 2. des *Prestres*, c'est à dire des Anciens. 3. des *Laiques*, c'est à dire des Plebées, ou populaires; Ce qui se peut recueillir de la 1. à *Timothée* ch. 5. *Ne veuille receuoir l'accusation contre aucun Prestre qu'avec deux ou trois Tesmoins*, dit le grand Apostre à ce sien Disciple, qu'il auoit fait Euesque d'Ephese.

S. Denis qui viuoit encore au mesme temps des Apostres, fait voir clairement en sa Hierarchie Ecclesiastique la mesme distinction. S. Ignace son contemporain escriuant à ceux de Philadelphie en son Epistre 8. veut que les Laiques obeissent aux Diacres, les Diacres aux Prestres, les Prestres aux Euesques, & les Euesques à IESVS-CHRIST, ou à son Vicaire. Mais quelle autre plus puissante & plus violente preuue scauriez-vous iamaïs demander de nous en ce sujet, que celle que nous tirons du 40.

Canon des mesmes Apostres, où il est tres-expres-
sément deffendu aux Diacres & aux Prestres, d'en-
treprendre rien de nouveau sans l'Euesque. Ce tri-
ple ordre, d'Inferieurs, des Moyens & de Supe-
rieurs, qui respond non seulement à celuy des An-
ges, diuilsés en trois Hierarchies, mais encore à ce-
luy des Astres, où nous voyons les Estoilles, la Lune,
& le Soleil avec vne subordination admirable de
lumiere, se treuve encore auiourd'huy en l'Eglise
Romaine, ce qu'il n'est point besoin de preuuer,
puisque chacun le void assez, ouurant les yeux du
corps seulement.

Mais pour vostre Pretenduë Reformée, y veit-on
iamais vn Ministre Superieur de quelque autre Mi-
nistre, vne Eglise Superieure de quelque autre Egli-
se? Nullement. C'est la raison pour laquelle le Se-
renissime Roy d'Angleterre appelle en son Apolo-
gie, vostre Discipline, *pure Anarchie & Confusion*,
& louë la Hierarchie comme Apostolique, ce que
vous ne sçauetz que trop. Et non seulement vous
detestés la Superiorité, mais encore le nom, qui res-
pire tant soit peu la Superiorité. Ce que vous tes-
moignez ouuertement en vostre Discipline, ainsi
que i'ay desia remarqué cy-dessus, où vous anathe-
matisez toute sorte de Prelature & de Primauté per-
petuelle tant vous aymez l'humilité l'obeyssance &
la soumission.




De l'Apostolicité de l'Eglise Romaine, & Apostasie
de la Pretenduë Reformée, au regard des
graces & faueurs Diuines.

CHAPITRE VII.

L'Eglise Romaine est finalement Apostolique en
les graces & faueurs diuines, c'est à dire aduan-
tagée de graces & faueurs de Dieu, toutes Apostoli-
ques en la personne de plusieurs de ses sujets, qu'au-
tre Congregation du monde ne receut iamais de sa
diuine Majesté, en la personne d'aucun des siens,
Graces & faueurs qui sont doubles, les vnes regar-
dent le Salut, & sont d'une tres-grande vtilité, les
autres regardent l'esclat, & sont admirables aux
yeux des hommes. Je comprendray les premieres,
qui sont en grand nombre sous ces quatre, comme
sous les principales, *Les Consolations diuines, la Liber-
té de l'Esprit, la Paix interieure de l'ame, & les Soulas
aux tribulations.* Les deuxiesmes ie les comprendray
toutes sous ces quatre, *le Don de conternplation, le Don
de Langues & de Science, le Don de Prophetie, & finale-
ment le Don des Miracles.* L'ombre de la moindre des-
quelles graces & faueurs, il vous seroit impossible
de nous faire voir dans vostre Reformation Preten-
duë, & eussiez vous la Lanterne de Diogene en

main & nous les yeux d'Aigle ou de Lynx au lieu des nostres.



Touchant les Consolations Diuines.

ARTICLE I.

Que les Apostres ayent iouy, dés ceste vie, de ces premieres graces & faueurs, ce seroit perdre le temps, que de le preuuer, attendu l'euidence de la chose. Il n'y a point de danger toutesfois, d'en apporter quelque tesmoignage en passant. Et pour commencer par les Consolatiōs diuines; L'Apostre sainct Pierre, exhorte en sa 1. Epist. chap. 1. vers. 8. tous les vrays Chestiens à se resiouyr (auec luy) d'une ioye inenarrable & glorieuse en IESVS-CHRIST. L'Apostre sainct Paul en fait tout le mesme, escriuant en son Epist. aux Phil. chap. 4. vers 4. non seulement de se resiouyr, mais de se resiouyr derechef. Le mesme sainct Apostre confesse en la 2. aux Corinth. 7. vers. 4. d'estre remply de consolation & de surabonder de ioye, mesme au milieu de ses plus grandes tribulations. Ce qu'il atteste, non seulement au chapitre precedent, vers. 9. (comme mourans, & voicy nous uiuons) mais encore au chap. 1. de la mesme Epistre verset 4. Mais quelle doit auoir esté la consolation des Apostres, si celle des beaucoup moins fa-

uorisez qu'eux, est si grande, que la conçoit le Roy Prophete au Psalme 30. vers. 20. s'escriant à Dieu. *O Seigneur, que la multitude de ta douceur est grande, laquelle tu as cachée pour ceux qui te craignent; Tu l'as parfaite à ceux qui ont eu esperance en toy.*

Or que semblables consolations soient goustées par plusieurs des sujets de l'Eglise Romaine, il n'y a rien de si manifeste: Mais comment est-ce que Dieu fevreroit iamais si facilement des delices & contentemens de la chair & du monde, ceux qu'il en fevre tous les iours. Je veux dire les Chartreux, Minimes, Recolez, Capucins, Feuillans, Augustins & Carmes deschauffés, & semblables Religieux austeres? Et eux, comment est-ce qu'ils supporteront avec tant de courage & de ioye les aspretés de leur sainte vie, s'ils ne receuoient de temps en temps de tres grandes consolations de la diuine Majesté, & s'ils n'estoient confortez & resiouys par ces auangousts du Paradis, & par ceste Manne du Ciel? Saint François Xauier, & saint Philippe Nerio, ont souuent receu de si grandes consolations spirituelles dans leurs plus grands traux & souffrances aux seruice de Dieu, que n'en pouuant porter les Exces ils s'escrioient par fois doucement à Dieu. *C'est assez Seigneur, c'est assez.* Pour celle du R. Pere Cesar de Bus, elles ont souuent esté telles parmy ses plus grandes douleurs corporelles, qu'il luy a fallu passer outre, *C'est trop mon Dieu, c'est trop,* disoit-il par fois à nostre Seigneur durant icelles. Saint Fran-

çois de Paule, saint Ignace, saint Charles, le Bien-heureux François de Sales, le Bien-heureux Thomas de Iesus Augustin deschaux, & cent autres grands Seruiteurs de Dieu de ce siecle, & tous les Religieux de tous les premiers Ordres de l'Eglise, qui se sont employez à la Conuersion des Infidelles aux Indes, ont souuent receu de si douces carettes du saint Esprit parmy leurs plus aspres trauaux, austeritez & souffrances, qu'ils tomboient en extase & rauissement. I'ay cogneu diuers Religieux, qui receuoient quelquefois tant de liesse spirituelle dans la priuation vniuerselle des sensuelles, qu'ils ne la pouuoient presque plus supporter: Aucuns mesmes ont apprehendé de faire tout leur Paradis en ceste vie, & que ces delices spirituels ne feussent l'entier payement de tous les trauaux qu'ils prenoient tres volontiers pour l'amour de Dieu.

Mais pour vous, ie ne pense point, que vous eussiez la hardiesse de vous vanter de semblables visites diuines. La Manne du Ciel n'est pas aussi pour les Incirconcis, non plus que pour ceux qui ont encore de la farine d'Egypte, ie veux dire pour ceux qui sont dans les consolations de la chair. Et Dieu qui nous commande de ne semer point les Marguerites aux pieds des pourceaux, comment départiroit-il le nectar & l'ambroisie de ses plus succrées douceurs à ses ennemis, & à des ames toutes de lard & de graisse. Iamais aucun de vous (& ie n'en veux que vostre propre conscience à tesmoin)

ne reçoit la moindre miette de ce pain des Anges. Vous ne l'avez pas jamais osé dire aussi, ny de bouche, ny dans vos escrits. Je sçay bien, que Luther, Calvin, Beze, & tous les autres Apostats de ce siecle, ont ressenty quelque fausse & trompeuse douceur, se voyant au large, & dans la pleine Liberté de tout faire; Mais outre qu'il y a naturellement du plaisir à suiure ses caprices, & faire ses propres volontez, le Diable augmentoit par vne seuerie permission de Dieu, ce charnel & traistre contentement, pour les retenir plus efficacement dans leur Apostasie, & s'en seruir pour la perte d'un million d'ames, comme il a fait: Estans ses Repudiez du Ciel, du nombre de ceux, dont parle le Prophete qui disent en Ieremie 6. vers. 14. *Pax, Pax, & non est Pax. Paix, Paix mais il n'y a point de vraye Paix.*



De la Liberté de l'Esprit.

ARTICLE II.

Quant à la Liberté de l'Esprit, il n'y a point de doute, que les Apostres ne l'ayent encore heureusement & parfaitement possedée. Je ne veux pas recourir à la Prophetie, couchée au Psal. 90. v 3. laquelle se peut, non seulement accommoder aux Apostres, mais encore à tous les Saints & Parfaits.

Tu marcheras sur l'Aspic & le Basilic, & fouleras le Lion & le Dragon. Je me contente du tesmoignage du seul saint Paul en sa 2. aux Corint. chap. 3. v. 17. *Or le Seigneur est Esprit (dit il) & la ou est l'Esprit, là est liberté.* Liberté qui consiste en la rupture de tous les liens, dont les creatures sçauroient nous tenir attachez en cette vie, pour pouuoir aisément voler apres au gré de la seule volonté de Dieu. Liberté en laquelle les Apostres ont surpassé tous les hommes du monde, comme estans les Mignons du Ciel, & les Brillans parmy les plus grands Saints de l'Eglise. Ils parloient aussi si librement, & mesmes aux plus grands de la Terre, apres qu'ils eurent receu le S. Esprit en langues de feu le iour de la grande Pentecoste, qu'il n'est pas possible de plus.

Or que l'Eglise Romaine ayt des Successeurs des Apostres encore auiourd'huy en cette excellente grace & faueur de Dieu, il n'y a que les ignorans en l'Histoire des choses, qui se sont passées au siecle dernier, qui osassent le nous disputer & debatre. En effect qui parla iamais plus haut à Henry VIII. Roy d'Angleterre, à Christierne II. Roy de Dannemarc, à Gustaue Roy de Suede, tous Roys & tous Nerōs qu'ils estoient, que les Euesques de leurs Royaumes. Qui sans en excepter vn seul, aymerent mieux (comme l'escrit Sanderus) quitter leurs Eueschez, & se retirer pauurement à Rome, ou mourir dans les prisons, ou passer par le Martyre, que de dissimuler les Impietez de ces Princes, & flatter indi-

gnement leur fureur? Qui parla iamais plus librement à François premier, que le Cardinal de Tournon, aussi-tost qu'il eust accordé par l'importunité de la Reyne de Navarre, sa Seur, & de quelques autres Dames curieuses, vn Saufconduit à Philippe Melancton, pour venir à Paris, l'année 1535? Qui parla iamais plus hardiment à Henry III. que le celebre Edmōd Auger Iesuite, au mesme temps qu'on commença d'apprehender qu'il fauorisoit vos Erreurs, pour auoir, par Regle d'Estat, pris la Ville de Geneve souz sa protection? Qui parla iamais plus courageusement à Henry le grand de glorieuse memoire, que ^{le} Pere Gontier Iesuite, peu de iours apres que vous eustes resolu en Article de foy en vostre Synode de Gap, *Que le Pape de Rome est l'Antichrist*, à ce qu'il vous contraignit de le supprimer, comme il fit aussi-tost apres.

Et afin que vous n'appelliez point cette espece de liberté *Zele indiscret de Religion*; Qui parla iamais plus clairement aux Roys de France & de Naples, que le grand S. François de Paule? *Vous fairiez beaucoup mieux* (leur disoit-il, lors qu'ils luy enuoyoient quelque chose de prix) *de restituer le bien que vous auetz d'autruy, que d'en faire des presens & d'aumosnes*. Il n'y eut iamais rien de plus genereux que sainct Ignace & que sainct Xavier, lors qu'il leur falloit reprendre les plus grands Seigneurs de quelque ~~Vite~~ notable.

Mais vous ferois-ie point ennuyeux, si ie vous
racontois

racontois icy la centième partie des traits d'une incroyable liberté d'esprit de nos plus celebres Predicateurs de ce temps, en Espagne, en Italie, & sur tout en France? Qui vid iamais Predicateur plus libre & plus genereux que le Pere Ierosme de la Nuza, Dominicain, lequel estonnoit les Roys d'Espagne dans les Sainctes reprehensions, qu'il leur faisoit en chaire? Qui en vid iamais vn pareil au Pere Alphonse Lupus Capucin qui prescha si puissamment contre vn Edict du Roy d'Espagne, qu'il le luy fit reuoker, par vn autre Edict tout contraire? Qu'est-ce que le mesme Pere ne dit pas à Rome aux Papes qui ont assisté à ses Predications? Qui vid iamais encore, des hommes si sainctement libres en chaire, que les Peres, Suffren, Margastaud & Arnoux Iesuistes, Apostrophans les Roys, les Princes, les Prelats, & les Presidans, qui les font allez quelquefois entendre?

Et pour acheuer. Qui parla iamais plus resoluement aux Estats generaux de l'an 1515. que le grand Cardinal du Perron, accompagné des premiers Prelats de France, haranguant contre le Tiers Estat (qui vouloit faire passer en qualité d'Article de Foy; *Qu'il n'y a aucun cas, auquel les Sujets puissent estre absous du Serment de fidelité, qu'ils ont presté à leurs souuerains?* Et non seulement contre le Tiers Estat, mais encore contre le Roy mesme, toutesfois avec tout le respect deu à Vne si haute Majesté. Qui apprehenda iamais moins que l'Euesque de Lieux, preschant contre la tolerance de quelques abus, introduits en France,

& que l'Euesque de Bellay preschant à Dijon contre quelques vns des Messieurs de la Cour? Le Pere Iean Suffren aduertiy, comme la Reyne Mere, Marie de Medicis, l'auoit choisi pour son Confesseur, respondit apres plusieurs refus, qu'il en fit, qu'il luy obeyroit à la verité, mais qu'elle ne creut pas, qu'il voulut engager & moins perdre sa liberté de traiter avec ses Penitents.

Le R. Pere Cesar de Bus, menacé par vn grand Seigneur, que i'ay veu souuent dans Auignon, de se ressentir de quelque iuste refus qu'il luy auoit fait. *Vous m'en donnez bien* (luy respondit-il.) *Je ne voudrois pas dire vn seul Aue Maria, pour auoir la bonne grace du plus grand Monarque du monde, s'il n'y auoit autre chose à gagner.*

Mais quant à vous; Il est vray, que Luther, Zuingle, Calvin & Beze, & tout le reste de vos Ministres ont tousiours esté les premieres gens du monde pour iapper de loin & desgorger mille iniures contre les Roys & les Princes Catholiques, dans vne bonne Ville de seurté. Mais pour aller en personne, portez d'vne vraye & solide liberté d'esprit & d'vn sainct zele de l'honneur de Dieu, leur dire en barbe ce qu'ils auoient desia dit en leur absence, cela n'arriua iamais.

Luther accusé de plusieurs insolentes Propositions, deuant le Cardinal Caëtan, Legat du Pape Leon 10. en Allemagne, se treuant encore mal monté, fait le chien couchant; Escrit au Pape, avec

vne humilité n'ont pareille. Depuis continuant en ses insolences, il est citté à Rome, deuant Syluestre, Religieux de saint Dominique. A ceste citation il implore honteusement le secours du Duc de Saxe, qui luy obtint vn Renuoy au mesme Cardinal. Le Cardinal le presse de se dedire. Il chancelle là dessus, & demande, afin de se sauuer, vn delay; Vient apres avec vne abiuration de ses erreurs en main. Le Cardinal luy commande de se retracter de viue voix. De ce commandement absolu du Cardinal, il en appelle au Pape, & du Pape, (qui le declara bien-tost apres Heretique,) il appelle au Concile futur, en intention d'appeller du Cōcile futur à l'Escriture sainte, expliquée à sa mode, c'est à dire, à soy mesme, & ainsi se rendre Iuge Souuerain en son propre fait. Tant-y a qu'il se sauue laschement encore ceste fois.

Quelque temps apres il est citté deuant Charles Quint à Vvormes, où arriué, sous le Sauf-conduit, qui luy fut accordé, il est derechef sommé de se dedire de viue voix. Il tergiuerse encore & demande derechef vn delay. Et fait si bien qu'il eschape pour la troisieme fois, sans iamais produire en aucune de ces espreues vn seul acte de parfaite liberté d'Esprit. Apres tant d'iniures qu'il vous plaira de loin eschapé des perils de la vie, ou de la prison; En quoy nous pouuons clairement voir à l'œil, Qu'il n'y a rien de plus lasche & pusillanime qu'un homme Superbe.

Pour Zuingle ayant fait tout le mesme en Suisse,

que Luther en Saxe, il est pareillemēt citté à Rome. Il s'humilie & proteste de vouloir obeir au Pape, iusqu'à ce qu'il fust capable de luy desobeyr sans courir aucun hazard de la vie, car deslors, il ne fut plus question d'humilité, ny d'obeyssance, mais d'insolence & de forcenerie.

Pour Calvin, il cacha tousiours ses pensées iusqu'à ce qu'il fut absolu dans Geneue, non seulement à Noyon, à Paris, à Angolesme, à poictiers, mais encore en Saxe, voire en Suisse, contrefaisant le Lutherien avec les Lutheriens, & le Zuinglien avec les Zuingliens; Tesmoin la confusion qu'il receut à Berne, où vn certain Zacharie Flamand, le fist rougir à bon escient, lors qu'apres auoir donné mille louüange à Zuingle, il luy fist lire aussi tost vne lettre qu'il auoit escrit à quelqu'vn de ses amis, dans laquelle il vomissoit mille iniures contre le mesme Zuingle.

Tout le monde sçait la trouffe que Beze bailla l'an 1556. au Comte palatin, luy faisant entendre qu'à Geneue, en France, & en Suisse on croyoit la Cene à la Lutherienne, afin d'obtenir quelques lettres de faueur de ce prince au Roy Tres-Chrestien pour le soulagement de ses freres en CHRIST, seuerement poursuiuis alors en France, à cause de leurs reueries.

Vos Ministres faisant faire auourd'huy reparation aux Gentil-hommes Reformez dans le Consistoire, dissimulent tout a fait en icelle les crimes

& les scandales qu'ils ont commis, se contentans de dire fort simplement, *Voicy Monsieur, qui est marry de tout ce qui s'est passe.* Et voila tout. Il y a bien d'avantage, plusieurs des vostres ont souvent changé de Foy & de Religion, pour agreer aux princes dans les Estats, desquels ils se treuvoient domiciliez, non seulement au palatinat, mais encore en Angleterre, en Escosse, en Dannemarc, en Suede & ailleurs. Verité si manifeste, que vous ne scauriez la refuter. Je m'en rapporte à ce que j'ay desia dit cy-dessus sur la premiere Marque, & à l'establissement de la Hierarchie d'Angleterre, que le Serenissime Roy de la grande Bretagne fit, il n'y a pas long-temps dans l'Escosse, contre l'égalité des Pasteurs, laquelle les Escossois ont depuis peu remise au premier estat qu'elle estoit, c'est à dire en tiltre d'article de Foy, aussi bien que vous. Des cent de vos premiers peres, les nonante neuf ont dextrement dissimulé leur croyance, les quinze & vingt ans entiers, portant leurs corps, à l'Eglise, à la Messe, à la Confession, à la Communion, & aux autres exercices de la Religion Catholique, apres avoir laissé leur cœur au logis, & protesté tout le contraire de ce qu'ils alloient pratiquer en public.


Il est vray que quelques vns de vos Ministres ont voulu contrefaire autresfois nos Eueques & plus celebres predicateurs en leurs Corrections Reformées; Mais, comme ils ne parloient pas avec la Liberté que Dieu communique ordinairement à les

seruiteurs, c'est la raison pour laquelle ils ont esté tousiours repris, pensant reprendre, & renuoyez à coups de pieds à leur Presche. Le Ministre Chamier, voulant, contre la pratique introduitte desia dés long-temps parmy vous, faire valoir vn iour sa noble Ministrerie à Grenoble, & prendre à l'imitation de nostre Clergé le premier rang en l'assemblée Polytique Huguenotte, ou la Noblesse preside qui s'y tint l'an 1615. comment y fut-il traité (ie vous prie) par quelques Gentil-hommes du Dauphiné? En Seditieux, tel qu'il estoit par excellence. Et ie ne dis rien icy, dont plusieurs personnes d'honneur, desquelles i'ay appris l'histoire ne s'en souuiennent encore auiourd'huy.

Les Ministres de Montpellier, ayant vn iour tanté, non pas de censurer, mais de prier Monsieur le Mareschal de Chastillon, de s'abstenir de quelque coustume fort contraire à leur Pretenduë Reformation, quoy que peut-estre tolerable de foy. Messieurs (leur respondit-il) vous plaist il de venir danser, Pour moy, ie m'y en vay; Mais sur tout est digne de memoire le remerciement que le sieur de Gouuernet fit à Perrin, Ministre de Nyons de sa correction Pastorale, luy faisant passer son cheual sur le ventre, dont ce pauvre Ministre faillit à mourir de despit & de rage apres.

Le ieune Rossel Ministre d'Orange, reprenant vn iour en chaire le Sieur Barry, Docteur, de ce qu'il auoit permis à ses filles d'aller au Bal. *Vous estes*

un ieune fol, luy repartit touchant ledit Sieur de Barry, sortant au mesme temps du Temple, dont le pauvre Ministre & tout le Consistoire en furent outrageusement escornez.



De la Paix interieure.

ARTICLE III.

Touchant la Paix interieure, que Dieu communique ordinairement à ses plus fauoris, il apert qu'elle estoit remarquable au cœur des Apostres, puis qu'il n'y eust iamais accident qui peut alterer la leur & les mettre hors de posture. Au contraire des méchans, qui tremblent encore dans vne bonne ville d'ostage; *Le méchant s'enfuit, où il n'est pas mesme poursuiuy; mais le Iuste est assuré comme vn lyon* (dit le Sage aux Prouerbes 28.) *Il a semblé aux yeux des fols* (dit le mesme en la Sapience ch. 3.) *qu'ils mourroient &c. mais ils sont en paix*, sçauoir est les Iustes. Et de fait, parmy la plus rude guerre qu'on liuroit à ces hommes diuins, ils ne parloient que de cette excellente paix, ainsi qu'il est aisé de voir à l'entrée de presque toutes leurs Epistres.

L'Eglise Romaine a tousiours eu plusieurs semblables hommes, & mesmes en ce Siccle dernier. Aucune chose ne pouoit troubler S. François de Paule, quelque estrange & extraordinaire qu'elle

fust. Pour S. Ignace il disoit quelquesfois, que quand sa Compagnie (laquelle il aimoit cent fois mieux que sa vie propre,) viendroit à se dissoudre tout à fait, il esperoit d'estre dans vn^e quart d'heure apres aussi tranquille d'esprit qu'auparavant. S. Xavier se mouuoit non plus de voir renuerser s'en dessus dessous l'Ocean, lors mesme qu'il s'y trouuoit à demy noyé, que si vn autre l'eust veu d'un Port, ou de quelque Promontoire. Quand à S. Charles, il se remua non plus du coup d'arquebuzé que luy lacha de quelque pas vn mal-heureux & detestable Religieux, que s'il eust esté à dix lieuës delà? continuant aussi tranquillement & deuotement sa Meditation, qu'il souloit faire les autresfois. Le R. Pere Cesar de Bus disoit souuent, qu'il ne croyoit pas qu'il y eust nouvelle au monde, laquelle eust de quoy l'esbranler. Parce, disoit-il, que ie me suis mis au plus bas lieu. Et nous n'auons pas faute, graces à Dieu, d'un monde de semblables Personnages en ce Siecle (aucuns desquels i'ay veu souuent) qui s'alteroient non plus de ce qu'ils entendoient & voyoient d'extraordinaires que s'ils eussent esté des Statuës, priuées de tout sentiment.


Mais pour vous, vous estes bien loin de posseder vne telle Paix & tranquillité, le moindre petit accident, mettant hors de selle, & faisant perdre les estrieux à vos plus Rodomonts & Rollands. Je ne veux que les Escrits de vos Fondateurs, Luther, Zaingle, Calvin & Beze, pour faire voir à tout le

monde les frequentes allarmes de leur cœur, & les secouffes, que souffroit ordinairement leur pauvre ame, disans & se dédisans à tout coups, de ce qu'ils auoient déjà dit en iceux. Mais quelle Paix intérieure pourroient iamais auoir ceux qui font la guerre ouuerte à Dieu. *Qui a iamais resisté à Dieu, & a iouy de la Paix?* dit Iob ch. 9. Luther pensa perdre le sens & renuerfer sa ceruelle, se voyant presque aussi-tost abandonné, que suiuy de Carlostad, de Zuingle & de plusieurs autres tels Apostats. Ce qui se preuue par les adiurations, qu'il faisoit tous les iours aux Princes, aux Villes & tantost à toutes les creatures, de le venger d'un si cruel affront. La mort de Zuingle arriuéé parmy les armes & dās la chaleur du combat, témoigna clairement quelle estoit la guerre, qu'il nourrissoit dans son Esprit. Calvin estoit d'ordinaire aux grosses alteres contre quelqu'un. Quelques-vns racontent, qu'il pensa creuer de rage, de ce qu'on fit donner le foüet dans Geneue à sa Niepce, pour vn adultere qu'elle y commit. Du Plessis faillit à mourir de l'escorne qu'il receut à Fontainebleau, en presence du Grand Henry. Chamier hurtoit d'ordinaire aussi rudement ses amis que ses ennemis. Le ministre du Moulin a scuffett de violentes tranchées d'esprit en ses fuites à la Rochelle, en Angleterre, à Sedan, & ailleurs; ce qu'il confesse ingenuëment luy-mesme en son Combat Chrestien.

Mais ie vous supplie de nous dire, quelle est la

rage & la forcenerie de plusieurs des vostres, lors que quelqu'un d'entre-vous embrasse la foy Catholique chez-nous. I'en laisse mille exemples, que ie pourrois apporter icy, pour remarquer celle du Ministre Codur, & sur tout celle de sa femme en la catholisation & entrée en Religiō de sa fille aisnée, qui fut telle qu'on ne la scauroit exprimer sans les offenser : la où leur fille iouit tousiours d'une paix & d'une tranquillité incroyables. Ce que i'ay appris de sa propre bouche avec beaucoup de consolation.

Et ie puis dire encore avec verité, que ie ne veis iamais Ministres aux prises avec Iesuite, Capucin, ou autre Religieux, voire avec moy, tout petit Escollier que ie suis, qui ne changeast plusieurs fois de front & de face, rougissant, blemissant, pallissant, extrauagant & perdant toute modestie & contenance à la fin. Indice infallible des Tourmentes, & Tempestes, qui bouleuersent leur interieur; ou leurs aggresseurs pourtoient continuellement vn mesme visage, les aucuns rassis & reposé, les autres gay & riant. Vn Gentilhomme de merite m'a raconté, comme témoin oculaire, que le pauvre Ministre du Moulin apres quelque Conference qu'il eut vn iour avec le Pere Seguiran, proche de Paris, fut si troublé & si éblouy, qu'au départ, il print le chapeau du Pere au lieu du sien, & le porta quelques cent pas, sans s'en donner garde, mais non pas sans causer cent éclats de risée, tant aux vostres qu'aux Catholiques presans.



Du Soulas dont Dieu recrée les siens.

ARTICLE IV.

ET quant au Soulas, dont Dieu recrée, fortifie, releue le cœur affligé de ses Seruiteurs, entre lesquels les Apostres tiennent le premier rang, il nous est, non seulement témoigné par cent autoritez du Texte sacré, mais encore par mille & mille exēples arriuez en diuers temps. *Quand tu passeras par les eaux, ie seray avec toy, (dit Dieu par le Prophete Isaye chap. 43. à tous les fauoris,) & les fleues ne te couuriront point, Quand tu chemineras par le feu, tu ne seras point bruslé, & la flame ne t'offencera point. Car ie suis le seigneur ton Dieu. Sainct Pierre & Sainct Paul échappoient ordinairement tous les pieges, qu'on leur tendoit, iusques à ce qu'il pleust à Dieu les appeller à soy, pour les coronner, apres tant de combats, & de victoires par eux emportées sur la Chair, le Monde, & l'Enfer. Il ne faut que lire le ch. 11. de la 2. aux Cor. pour apprendre le soin plus que paternel, que Dieu a pris du dernier, l'ayant tousiours arraché des Griffes des Voleurs, des dents des Viperes, des Precipices, des Charybdes, des Scylles, des Naufrages & de mille perils, en la ville, au desert & dans les voyages qu'il faisoit souuent, tant sur la*

terre, que sur la mer; Et ce que ie dis de cettuy-cy, ie le pourrois dire encore de tous les autres; Ce que que i'obmets à cause de briefueté.


L'Eglise Romaine ne peut elle pas à iuste raison se louer, d'auoir eu cent & cent homme au Siecle dernier, fauorisez de Dieu, iusques là, qu'ils estimoient leurs trauaux beaucoup moindres, que les foudras, qu'ils receuoient en iceux de sa paternelle Bonté, quoy qu'ils fussent insupportables à tout autre qu'à eux. En effect les douleurs corporelles les plus sensibles, & les austeritez les plus rudes qu'ils ont endurées, n'ont (s'il semble) seruy, que pour faire esclatter & reluire plus viuement en eux ceste mesme Bonté. La mort mesme ne leur a semblé, que comme vn beau Pont, tapissé de fleurs, pour passer du Paradis de la grace, au paradis de la Gloire. Tesmoin le B. Isaac polonois, Augustin deschaussé, en la mort duquel on entendit la musique des Anges. Tesmoin le Sçauant François Suarez Iesuite, qui treuua la mort si belle qu'il en fut rauy. *Je n'eusse iamais pensé que la mort eust esté si douce,* disoit-il, s'aprouchant de sa fin. Et plusieurs autres telles personnes, ayant preueu le propre iour de la leur, long-temps auparauant qu'elle aduint, tant s'en faut qu'il s'en soient affligés, qu'au contraire ils s'en sont singulierement resiouys, ne plus ne moins que les princes lors qu'on leur a marqué précisément le iour qu'ils doiuent prendre la possession de quelque grand & puissant Empire. Ie pourrois ap-

porter icy leurs propres paroles , mais il ne faut qu'ouuir les Histoires qui racontent leur heureuse mort , pour en sçauoir beaucoup plus que ie n'en dis pas icy.

Mais quant à vous, de grace, de quel soulas pouuez vous iouyr dans vos afflictions & calamitez, recourans à des remedes si desesperes, que ceux auxquels vous recourez d'ordinaire, pour vous en deliurer; Violant bien souuent en iceux toute sorte de Droit & de Loy, dont ie ne veux en preuue de ceste verité, que ce que nos propres yeux ont veu ces ans passez, tant en Allemagne, qu'en ce Royaume. Et quel doit estre, ie vous supplie, le soulas que peuvent receuoir, vos plus chetifs freres en CHRIST, rendant l'ame dans vostre Heresie, si vos Fondateurs ont esté si visiblement abandonnez de Dieu en leur mort. Mort plus semblable à celle de Pharaon, & de Saül, de Balthasar, d'Antiochus, d'Herode, de Iudas, de Simeon le Magicien & des autres Heresiarques, leurs deuanciers, qu'à celle des Saints laquelle il estime si precieuse. Luther apres auoir soupé à creuer, bien bouffonné, & maudit plusieurs fois le Pape, voulut se deffaire soy-mesme, pressentant approcher la sienne. Ce que Thomas Bosius assure au liur. 23. chap. 96. *des Signes de l'Eglise*, d'auoir aprins d'un seruiteur de cét Heresiarque, presant en icelle, conuertý depuis à la Foy Catholique.

Carlostad fut visiblement estranglé par vn De-


mon, s'il en faut croire les Ministres de Basle, qui l'asseurent ainsi selon Bellarmin Oecolampade, au rapport de Luther fut encore estrangé la nuit dans son liét, par vn autre Demon. Zuingle finit en frenetique à la teste d'vn Bataillon, la picque à la main. Buccer fut precipité par vn autre Demon, de son liét sur le paué, où il luy rendit sa malheureuse ame. Calvin apres auoir esté rongé durant quatre ans entiers des poulx, & souffert vne infinité d'estranges effrois, en presence de plusieurs, expira comme dit Bolsée en sa vie, inuoquant les Demons & maudissant l'heure, qu'il entreprint d'estudier & d'escire, Beze mourut fou formé, c'est à dire, long-temps apres auoir perdu tout à fait l'entendement, comme chacun sçait. Je ne dis que ce que i'ay leu dans les plus fidelles Historiens de ce Siecle. Je ne sçay pas si la mort de Chamier a esté la pire de toutes celles de ses Confreres, vn des Canons du Siege de Montauban, qui fit voler son gros corps en cent pieces, du Rempart qu'il visitoit, dans la ville, ne luy ayant pas donné le temps & le loisir de se repentir de sa desesperée malice contre sa Majesté Tres Chrestienne. Le mesme Dieu tousiours bon & tousiours pere, à ceux qui desirent luy estre tres-humbles enfans, veuille donner vne autre fin à du Moulin, que celles cy par les entrailles de sa plus que paternelle misericorde.



*Des Dons gratuits de l'Eglise Romaine,
incognus à la Reformée.*

CHAPITRE VIII.

ET pour acheuer ces Discours par les quatre
dernieres graces , dont Dieu a fauorisé plu-
sieurs de ses Seruiteurs , ie veux dire , *le Don de
Contemplation, le Don des Langues & de Science, la Pro-
phetie & les Miracles*, i'estime qu'il n'y a celuy , tant
impudent soit-il , qui les voulut nier aux Apostres.
C'est pourquoy i'employeray le papier, qui me reste
pour cét escrit, à preuuer par Histoires indubitables,
comme ces mesmes graces gratuites ont esté com-
muniquées à plusieurs des enfans de l'Eglise Romai-
ne en ce Siecle dernier.



Du Don de Contemplation.

ARTICLE I.

TOuchant le *Don de Contemplation* , qui consiste
en vne sublime esleuation de nostre esprit à
Dieu, accompagnée d'Illustrations & cognoissances

des veritez eternelles, d'ardeurs amoureuses enuers Dieu, de delices spirituels ineffables, fuiuis bien souuent des Torrens de larmes, des Visions, Apparitions & Reuelations diuines; Il n'y a si reuesche & rebours d'entre vous, qui voulut auoir nié cette excellente faueur à plusieurs de nos saincts de ce Siecle; apres auoir leu les Histoires de leur vie, & de leur mort, qui ne sont pas apocryphes & des Legendes, comme vous bouffonnez, mais des Veritez attestées par des hommes, pour le moins aussi dignes de foy, que vous, ne vous desplaise.

Pour les larmes, sainct Ignace, sainct Philippe Nerio, le Pere Antoine Roa Augustin deschaux, le Pere Cesar de Bus, & quelques autres saincts Personnages de nostre aage, en ont versé si souuent, qu'il ne se passa presque iour depuis leur Conuersion iusqu'à la mort, qu'ils ne pleurassent tendrement au veu & sçeu, (quoy que contre leur gré) de plusieurs personnes dignes de foy: Pour les Visions, Apparitions, & Reuelations, sainct François de Paule, sainct Ignace, sainct Xauier, sainct Philippe, le B. Pere de sainct Guillaume, & le Pere Ange, Augustins deschaux, la saincte Mere Therese & cent autres semblables, en ont receu de Dieu, pour bastir des Tomes entiers. De Rauissemens; Saint François de paule en a eu quelques vns de plusieurs iours entiers. Sainct Ignace en eut vn au commencement de sa Conuersion de 7. iours entiers. Sainct Xauier & sainct philippe Nerio en ont eu plusieurs de


de quatre ou cinq heures de suite. Le B. Martin de Valence de l'Ordre de saint François en a eu plusieurs aux Indes, mesme en preschant, restant souvent tout droit, immobile, & quelquefois si longtemps, qu'il falloit qu'on le portast de la chaire dans sa petite Cellule, le mesme B. Jean de saint Guillaume estoit encore fort souvent rauy dans ses oraisons. Et pour parler de chose plus proche de temps & de lieux, qui de nous, n'a ouy parler des frequentes extase de Monsieur Bernard de Paris.

Touchant les Esleuations du corps. Saint François de paule fust souuent esleué plusieurs coudées de terre à Tours, voire mesme en la presance des Tres-Chrestiens Roys, Louys XI. & Charles VIII. & de plusieurs Princes & princesses de leur Cour; Le B. Martin de Valence, & la sainte mere Therese furent encore diuerses fois esleuez de terre, tenant les bras estendus en Croix avec admiration de tous ceux, qui les regardoient. Autant en pourrois-je dire du B. Pere Jean Baptiste de Moya, Augustin deschaux, & de quelques autres semblables.

Quant aux splēdeurs externes & sensibles, S. François de paule dardoit bien souuent de grands rayōs de lumiere de tout son corps, & quelquefois paroissoit estre, comme enuironné d'un Soleil. Diuerses personnes ont veu saint Ignace en diuers temps, ayant la face toute esclattante & lumineuse. Le B. Martin de Valence a esté veu quelquefois enuironné d'une si grande splendeur & clarté, qu'on le per-

doit comme de veüë : Le mesme lisons nous de quelque autres de ses Correligieux, comme encore du B. Louys Bertrand, de l'Ordre de saint Dominique, du mesme pere Jean Baptiste de Moya, Augustin deschaux, & du pere François Lopez Iesuite, lors qu'ils disoient la sainte messe, du R. pere de Bus & de marie de Toledé de l'Ordre de sainte Claire. Je serois ennuyeux, si ie voulois dire tout ce que ie treuve bien aueré chez les meilleurs & plus fidelles historiens de ce temps, touchant ces celestes faueurs.

Mais ie ne croy pas que vous eussiez le courage de vous vanter, non pas mesme de l'ombre, voire de l'Idée du moindre de ces grands Dons. Aussi bien manqueriez vous de preuue solide, en estans requis & sollicitez apres.



Du Don des Langues & de Science.

ARTICLE II.

TOuchant le Don des Langues & de Science, accordé, non seulement aux Apostres, mais encore à plusieurs autres, presque en tous les siecles de l'Eglise, selon la promesse de IESVS-CHRIST en saint Math. chap. 10. vers. 19. vous ne doutez pas à mon aduis, que l'Eglise Romaine ne s'en

puisse veritablement & iustement glorifier encore aujourdhuy en la personne de plusieurs de ses enfans. Je laisse à part, qu'elle parle toutes les Langues du monde, comme ayant à instruire toutes les Nations, & tous les peuples du monde, ainsi que vous sçavez fort bien. Je laisse encore à part, qu'elle vient de produire des hommes, les plus Doctes & Sçauans en Hebreu en Chaldée, Grec & Latin, qui furent iamais. Vous n'ignorez pas combien excellens ont esté en ces quatre diuerses Langues Genebrard & les celebres Cardinaux Bellarmin, & du Perron, avec le Pere Humblot Minime, & le Pere Gautier Iesuite. Vous n'ignorez pas que Sanctés Pagninus de l'Ordre de saint Dominique, Espagnol, à surpassé tous les premiers Rabbins du monde en la cognoissance de la langue Hebraïque, mesme selon la Confession des plus doctes d'entre eux. Que Guillaume Budée n'a iamais eu son esgal en la langue Grecque, & que Muret à gagné le deuant aux mieux versez en la Latine, & finalement que le Pere Bonaventure, Minime, que i'ay veu souuant dans Auignon, ne parlat couramment vingt diuerses langues, aussi bien que Mitridates, tant loué par l'antiquité, vingt deux; Je viens donc à saint Vincent Ferrier, decedé cent ans seulement auant la naissance de Luther, & Catholique Romain, si iamais homme du monde le fust; Lequel sans perdre le temps apres l'estude de diuerses langues de l'Europe, prescha neantmoins dans tous les Royaumes

de ceste grande partie de la Terre, avec l'intelligence & l'estonnement de tous ses auditeurs.

Pour le grand saint François de Paule, sa vie porte qu'exorcisant le Demō, dont l'un de ses Novices fut quelque temps possédé, il entendoit tres-bien, quoy qu'il n'eust jamais aprins en sa vie, non pas mesme à lire tout ce que disoit cēt Esprit malin, parlant tantost Hebrieu, tantost Syriaque, puis Grec, & d'autresfois Latin. Le B. Louys Bertrand, Religieux de l'Ordre S. Dominique, les BB. Martin de Valence & Jean de S. François Religieux de l'Ordre de S. François, ont tous trois presché ce dernier Siecle au Mexique, les deux premiers en leurs langue Espagnole, se faisans neantmoins aussi aisément entendre aux Mexiquains, que s'ils eussent parlé la propre langue du Mexique, & le troisieme parla soudain & sans estude quelconque toutes les diuerses langues du Mexique avec le rauissement de tous ceux, qui ont esté tesmoins d'une si grande merueille. Le frere Bernard de la Mere de Dieu, Augustin deschaux, parloit diuerses langues, sans aucun estude; Le Pere Ierosme de Milan, Capucin, preschant en Italien fust estimé parler François par ses Auditeurs à Lyon & ailleurs. Finalement le grand saint François Xavier, aprit comme en moins de rien, & presque sans aucun estude & travail la langue de diuerses Nations, aux Indes Orientales, au Iappon & ailleurs, en telle sorte, qu'il preschoit par tout, où il alloit quelques temps apres son arriué, avec

l'intelligence de ses auditeurs. Mais comment eust-il peu apprendre sans miracle dans dix ans, qu'il fut aux Indes dix ou douze diuerses & diferantes langues, ayant de si grandes occupations, que celles qu'il auoit d'ordinaire sur les bras, & de si grands & frequents voyages à faire parmy ces vastes contrées; veu qu'il faut presque les dix années entieres à vn homme de son aage, pour en apprendre suffisamment vne seule. Verité que Bosius tesmoigne, apres diuers autres Historiens au liur. 7. chap. 1. & au liure 12. chap. 21. *des Signes de l'Eglise.*

Et pour le regard du Don de Science, laissant à part celle qui s'acquiert par estude & par vn labeur assidu, incomparablement plus excellente & releuée chez nous, que chez vous (vos plus doctes Ministres n'estans tout au plus que des Escholiers; cōparez à nos Docteurs Scolastiques. Je vous supplie bien fort de considerer celle que Dieu communiqua à saint François de Paule & à saint Ignace, le premier desquels respondit tres pertinemment, quoy qu'il ne sceut pas mesme lire, aux plus arduës & difficiles questions de Theologie, que luy firent deux celebres Docteurs de Sorbonne, pour luy causer de la confusion. Et le deuxiesme entendit le tres-haut Mystere de la sainte Trinité, lors mesme qu'il ne scauoit encore que lire & escrire, beaucoup plus parfaitement que plusieurs Theologiens confonmez.

Je vous supplie encore de considerer la Science qu'il

a desparty à la saincte Mere Therese, & au frere paschal Baylon Recolé, comme encore celle qu'il a desparty au frere Bernardin de la Prouince de saint François, & au frere Sauueur de la Prouince de la Marche, tous deux Capucins & à quelques autres Religieux, qui ont vescu au Siecle que nous venons d'acheuer. Telle au reste qu'elle à mis en admiration tous les premiers Theologiens, qui les ont ouys & frequentés.

Pour la Science de la Mere Therese, elle fut si sublime, que les plus sublimes Theologiens s'y perdent, s'ils ne sont grandement spirituels & deuots. Tesmoins nous en seront les cinq liures entiers, qu'elle a composez, sans premeditation & comme sans peine & trauail. Ausquels il est aisé de voir comme Dieu luy a descouuert des Secrets sur les principaux Mysteres de la Religion Chrestienne, de la saincte Trinité, Incarnation, Transsubstantiation, Assomption de la Vierge, &c. qui passent la cognoissance des plus sçauants.


Et quant au B. Paschal, il deuint sans aucun estude, si grand & si celebre Theologien mystique, Scholastique, voire Positif, que les premiers Docteurs d'Espagne, qui l'entendoient quelquefois si pertinemment proposer, arguer, distinguer & respondre en toute sorte de questions Theologiques, ne s'estimoient pas mesme dignes d'aller à son Eschole. Car iamais Docteur ne parla plus hautement & plus clairement que luy de l'Essence diuine

& Trinité des personnes, & de plusieurs autres mysteres de nostre sainte Foy.

Mais nous sçauriez vous bien nommer quel-
qu'un d'entre vous tous, qui receut iamais de Dieu
ce grand Don des Langues & de Sciences; Quel-
qu'un dis-je, qui sans maistre, sans liure & sans estu-
de, se rendit docte aux langues estrangeres, & aux
plus sublimes sciences du monde. Et ie ne le pense
pas, quelques ventards, que vous foyez. Pour des
Docteurs de Carrefour, vous en avez à milliers.
Car parmy vous, chacun y tranche du sçauant, &
fait du ministre: N'y ayant si chetif frere en CHRIST,
qui n'ait peut-estre souuent attenté d'appeller en
dispute ouuerte nos plus celebres Docteurs & pre-
dicateurs. Ie ne veux pas coucher icy les plaisans
contes, qui se font desja depuis long-temps sur ce
sujet. On vous cognoit mesme parmy les Catho-
liques au gazouiller seulement: A propos dequoy
i'ay veu autresfois vn petit paquetier Huguenot, le-
quel interrogé par vn de nos Peres, tres-bon Philo-
sophe & Theologien, qui s'entretenoit avec luy,
faute de meilleure occupation. En quoy consiste
l'Eglise de Dieu, sa Definition, & ses principales
proprietes. Vous voudriez, peut-estre, monsieur,
que ie le vous enseignasse, luy respondit ce petit
morueux, dont tous les assistans, qui cognoissoient
le Pere se prindrent à rire & moy avec eux.

Vn homme d'honneur m'a protesté d'auoir appris
comme euiron l'an 1611. vn Payfan Huguenot

des Seuenes se rendit à Montpellier, pour reformer vostre Reformation Pretendue, & vouloit en despit des Ministres mesmes prescher. Mais partie par argent, partie par menaces, il fut tout doucement renuoyé chez soy. L'ay cogneu dans mon enfance vn Charpentier à Orpierre en Dauphiné, lequel tenoit des discours d'un vray Libertin, capables, au reste, de faire suer à grosses gouttes son pauvre Ministre, voire en plein hyuer, pour ne sçauoir respondre aux instances naturelles, qu'il luy apportoit, contre ce qu'il auoit presché



Du Don de Prophetie.

ARTICLE III.

IL n'y a celuy là, qui ne sçache, que les escrits des Apostres sont tous remplis de propheties, & comme l'Eglise Catholique doit estre fauorisée iusqu'à la fin du monde, de ce grand Don. Telle est la Doctrine du grand saint Paul au chap. 12. de son Epist. aux Rom. vers. 6. & au 12. de sa premiere aux Cor. vers. 10. Don, à l'occasion duquel elle est merueilleusement illustrée entre les mortels. Il n'appartient aussi qu'à elle seule, & priuatiuement à toute autre Societé du monde, d'auoir des sujets, qui preuoyent de loin les choses qui sont à venir, lesquelles

n'ont aucune Cause en la Nature, n'y mesmes aucune apparence ou probabilité. C'est pourquoy les fidelles disoient jadis par la bouche d'Isaye chap. 4. vers. 33. aux Pretendus Prophetes des Idolatres & Payens. *Annoncez nous les choses qui doivent venir au temps futur, & nous croirons, que vous estes Dieux, ou enuoyez de la part de Dieu.*

Or que ce grand Don se treuve manifestement en plusieurs des enfans de l'Eglise Romaine encore auionrd'huy, ce seroit vne impudence intollerable que de le nous disputer & debattre. Saint François de Paule predict à Alphonse Roy de Naples, qui regnoit de son temps, qu'il ne mourroit point Roy, Ce qui arriua, comme chacun sçait; Charles VIII. Roy de France l'ayant priué, quelque temps auant qu'il mourut, de son Royaume: Il predict à Louys XI. (qui l'auoit fait venir de Calabre en France) qu'il mourroit asseurement de la maladie dont il pensoit tousiours échapper. Il predict encore à Charles VIII. son fils, tout ce qui luy advint en son voyage de Naples. Il predict encore au Cardinal de Rouiere, Neueu du Pape Sixte IV. qu'il seroit vn iour Pape, ce qui arriua, montant sur la Chaire Apostolique le quatrieme apres son Oncle, & fut appellé Iules II. Il predict finalement à deux celebres Docteurs de Paris, lesquels estoient les plus grands aduersaires, que son Ordre eust en France pour lors, qu'ils seroient à peu de mois delà, les deux premiers & plus zelés deffenseurs, qu'il y auroit de long temps.

Ce qui arriua encore. Bref il voyoit les choses futures comme les passées, & les absentes, comme les presantes, & les plus cachées, comme les évidentes & manifestes.

Le grand Sainct Ignace a fait plusieurs semblables predictions, ainsi qu'il est aisé de voir en sa vie. Il nous suffira de deux seulement. La premiere sera celle, dont il predict sans apparence quelconque qu'un certain Pierre Quarré, Marchand, Flamand seroit un iour l'un des plus grands Bienfacteurs de sa Compagnie. Ce qui arriua vingt cinq ans ou environ apres. La seconde sera celle dont il predict, comme François Borgia Duc de Gandie, long-temps avant qu'il quittat le Siecle, seroit un iour General de sa Compagnie. Ce qui arriua encore long temps apres, car il fut le troisieme apres luy. Sainct François Xavier aduertit & pria fort un Marchand Portuguais aux Indes, qui se treuvoit en tres bonne santé pour lors, qu'il se resolut à faire au plustot des grosses aumosnes, parce que nostre Seigneur l'appelleroit dans peu de temps de ceste vie à l'autre, comme il fit.

Sainct Philippe Nerio, voyant un iour entrer deux ieunes hommes dans un Ordre Religieux (lesquels ils ne cognoissoit point du tout) predict comme l'un d'eux (qu'il monstra au doigt) perseueroit & l'autre non. Ce qui fut treuvé bientoist apres veritable. Bien souuent il descouuroit à ceux qui l'alloient visiter la raison, qui les auoit portez vers

luy. Ce qu'a fait encore fort souuent le R. Pere Cesar de Bus.

Le B. Martin de Valence predict ponctuellement le iour de sa mort dix ans auant qu'elle arriuar. Quelques autres & particulièrement le R. Pere de Bus ont marqué plusieurs iours auparauant leur deces le propre iour qu'ils mouroient. Le B. Thomas de Iesus, Augustin deschaux à predict plusieurs choses remarquables, qui sont veritablement arriuées. La sainte Mere Therese à predict encore plusieurs choses notables, qu'il n'y auoit que Dieu seul, qui les peut scauoir.

Le mesme R. Pere de Bus predict sans apparence ny probabilité quelconque comme la femme d'un Bourgeois d'Auignon, ieune & pleine de santé, mourroit dans peu de temps, & que son mary se rendroit homme d'Eglise, & qui plus est embrasseroit son Institut, & se rangeroit avec luy, ce qui arriua de point en point, comme il l'auoit specifié. Il predict encore si precisément le temps de la mort de deux Prelats, enuiron vn an auant qu'elle arriuat, qu'il ietta dans l'admiration les personnes, ausquelles il descouurit ceste prediction.

Mais entre tous fut admirable en ce Don le B. Louys Bertrand, dont nous auons desia souuent parlé cy-dessus. Car outre qu'il descouuroit clairement à ses Religieux tout ce qu'ils disoient & faisoient en son absence de plus secret & caché, il predict encore à plusieurs autres, des choses qu'il n'y

auoit que Dieu seul, qui les peut sçauoir. Il predict à vn Gentilhomme Espagnol, que de quatre enfans, encore fort petits, qu'il auoit, les trois se rendroient Iesuites, & l'autre se marieroit, ce qui aduint encore ponctuellement, comme il l'auoit predict. Cecy, non plus que la pluspart de ce que ie viens de dire, ne dependoit d'aucune cause naturelle, mais de la volonté de Dieu & du franc Arbitre de ceux, ausquels telles choses sont arriuées, car elles estoient purement morales & volontaires. Il predict encore à vne femme, laquelle auoit vn mary grandement fascheux, qu'il deuiendroit extremement debonnaire & doux; Mais qu'elle ne viuroit pas long tēps apres. Enfin il disoit si assurement la bonne fortune à chacun qui l'abordoit, qu'il faisoit estonner les plus sçauans hommes des Espagnes. Voyez-en d'auantage chez Bosius liu. 6. chap. 2. *des Signes de l'Eglise*. La B. Catherine de Raconis en Piedmont, qui mourut l'an 1542. predict precisément le temps de la mort de Iules 2. le voyage de François premier en Italie, & le mal-heur qui luy arriua depuis à Paue.

Je laisse à part les Predictions admirables de Thomas Morus, & d'vn autre Thomas de l'Ordre de S. François en Guyenne, appellé le Bon-homme, dont ils nous ont parfaitement bien dépaint les miseres que vostre Heresie à caulées depuis en l'Europe; Et pour finir avec le Peré Dominique de *Iesus Maria*, celebre Carme deschauffé; il n'y a celuy qui ne sca

che, comme il promit assurement à plusieurs la Victoire qu'emporta le Comte de Buquoy (General pour l'Empereur) sur le Comte Palatin du Rhein, le 8 Septembre de l'an 1622. en la Bataille de Pragues. Je ne diray rien des Propheties du Pere Claude Bernard de Paris, & du Frere Fiacre Augustin deschaux, touchant la Grosseffe de la Reine Regente, parce qu'il n'y a personne qui l'ignore aujourd'huy en France.

Mais pour vous. Il est vray que vous avez eu plusieurs Prediseurs; Mais ce sont de ceux, dont parle Moyse au deteron, ch. 18. ver. 22. *Quand le Prophe- te parlera au nom du Seigneur, & que la parole n'aduie- dra point, le Seigneur n'a point dit cela; mais le Pro- phete là controuvé par arrogance de son esprit. Et pour ce n'aye point crainte de luy.* Car vous ne nous pouuez pas nier, que Luther, Montzer, Zuingle, Calvin & semblables, n'ayant trompé tous ceux qui ont ad- iousté foy à leurs Almanachs. Pour le premier il escriuit l'an 1525. que s'il preschoit encore deux ans entiers, que le Pape, les Cardinaux, Euesques, Prestres, Religieux, & tous les Catholiques ensemble s'esvanoüiroient deuant luy, comme les brouil- lards deuant les rayons du Soleil du Midy durant la Canicule. Mesmes que nos Eglises, Conuents & Monasteres s'en iroient en fumée avec vn seul petit soufflé de sa bouche. Il a presché depuis environ 22. ans: (car il mourut seulement l'an 1546.) on n'a toutesfois rien veu de cette belle Prophetie accōply.

Mais pour n'estonner pas ses Disciples, à cause de cette intollerable erreur & méconté, il les asseura, que ce qu'il n'auoit pas fait viuant, qu'il le feroit en mourant. *Pestis eram viuens, moriens tua mors ero, Papa.* I'estois en viuant ta peste ô Pape; mais en mourant ie seray ta mort. Ceste Prediction, n'a toutesfois eu non plus de verité, que la precedente. Au contraire, par vn faux Catholique, qu'il nous a débauché, Dieu nous en adonné les mille, vrais & solides aux Indes, en la Chine, au Iappon, en l'Amérique, & au Mexique, comme i'ay fait voir déjà cy-dessus, & confirmé le double des Catholiques, qui chanceloient en la foy dans l'Europe.

Thomas Montzer, son Disciple, promit il pas aux deux cens mille Rustaus, qu'il fit rebeller contre les Princes Allemands, que le Saint Esprit descendroit visiblement à leur ayde, le iour qu'ils liureroient la bataille contre-eux, & leur donneroit la victoire entiere. Mais quel éuenement eut cette belle Prediction ? Tout le contraire de ce qu'elle portoit; Car ce Prediseur & tous ces forcenez, sauf bien peu, passerent ou par les mains de leurs ennemis en la bataille, ou par celles des Bourreaux sur vn gibet apres.

Zuingle fit, la mesme Prediction à ceux qu'il auoit mutinés en Suisse contre les Catholiques Romains, & la mesme fin, que Thomas Montzer, car il fut tué comme luy au combat, & ses gens furent entierement rompus & défaits, ainsi que nous

auons déia dit cy-dessus.

Caluin ne rencontra pas mieux que ceu-cy, promettant l'an 1560. vn heureux succez à la Coniuration d'Amboise, & mille Triomphes à vos Peres sur les Catholiques Romains, s'ils resoluoient de decider les differans de la Religion avec eux par les armes, comme ils ont voulu faire depuis fort souuent, tant aux quatre grandes Batailles, qu'en plusieurs gros combats, Mais vous y auez tousiours eu du pis, comme vous sçauetz.

Beze, qui selon Genebrard, fut consulté de Poltrot sur l'assassinat du grand Duc de Guise, (la Terreur & l'espouuante de vostre Heresie) ne trahit-il pas ce mal-heureux Traistre, luy promettant vne Legion d'Ange pour le garantir de la prise de corps qu'il apprehendoit, apres le coup fait. Vous en sçauetz assez particulièrement l'Histoire, sans la vous déduire par le menu sur ce papier.

Vn fou & faux Euesque de Lubec, nommé George D'aol, surpassa tous ces Pronostiqueurs en réverie, car croyant que c'estoit déia fait de l'Eglise Romaine, il fit enterrer avec pompe solemnelle le Missel Romain.

Et pour acheuer vos Pronostics; Deux Ministres Allemans, l'vn d'vn village proche de Vvitemberg, l'autre d'vn village proche du fleuve Rura, dans la Duché de Cleues, marquerent avec la mesme assurance à leurs Auditeurs le propre iour & l'heure que le iugement final deuoit arriuer, de sorte qu'ils

leur firent souz cette croyance deuorer en festins tout ce qu'ils auoient de comestible dans peu de mois ; d'autant que le terme qu'il leur auoit assigné, estoit fort court. Ainsi l'escriu Tilman Bredembach, au liu. 7. c. 32. & 33. de ses *Collations sacrées*. Napeir en sa *Proposition* 14. & du Moulin en l'*Accomplissement de ses Propheties*, fol. 198. aussi fols que ces deux derniers, assignent-il pas précisément le iour de la fin du monde à qui les veut croire ? S'esleuans ainsi pardessus le Fils de Dieu, qui ne l'a point voulu faire. A cause dequoy Calvin le condamne en son Harmonie d'ignorance selon son Humanité.

Vn certain qui scait bien tout ce qui se passe chez vous, m'asseura il y a quelque temps, comme vous teniez que Chamier vous auoit predict le Siege de Montauban, long-temps avant qu'il arriuaist, dequoy ie me prins à rire, Comment, luy disie, Chamier auoit-il fait son apprentissage à presager souz Rabelais ? Car Rabelais, à ce que i'ay aprins, a fait plusieurs semblables Predictions en sa vie: Comme lors qu'il predict qu'il y auroit quantité de Raues en Lymosin & Sauoye, quantité de Chastaignes en Perigord & Dauphiné, quantité d'Oliues en Prouence & bas Languedoc, beaucoup de Poissons en la mer, grand nombre d'Oseaux parmy l'Air, & force Estoilles au Ciel, que l'Hyuert seroit froid & l'Esté chaud : Mais qui n'auroit deuiné que le Roy voudroit vn iour estre le Maistre de ses villes. Il ny a crocheteur sur le Pont neuf de Paris, qui n'en eust bien dit autant.



Du Don des Miracles.

ARTICLE IV.

Pour le Don des Miracles, ce seroit auoir perdu toute honte que de le disputer à l'Eglise, que les Apostres nous ont secondairement fondée, puis que c'est par cette faueur qu'elle a tousiours esté, non seulement en veüe de tous les mortels, & distinguée de toutes les autres Societez, qui se disent Chrestiennes, mais a (qui plus est) authorisé sa celeste Doctrine par son moyen. *Eux aussi estant partis d'avec IESVS-CHRIST preschoient partout* (dit S. March. 16. ver. 20. *Le Seigneur operant avec eux, & confirmant leur parole par les signes qui s'ensuiuoient* Et l'Apostre aux Hebr. chap. 2. ver. 4. *Dieu leur rendant témoignage par signes & Miracles, & diuerses puissances.* C'est à dire que la Foy Chrestienne deuoit estre authorisée entre les hommes par des Miracles, qu'autre que Dieu seul ne peut operer, selon le prophete au psal. 135. *Lequel seul fait les grandes merueilles.*

Ouy les miracles sont si necessaires pour plier les Esprits rebelles des hommes à croire ceste Doctrine, en confirmation de laquelle ils sont faits, que IESVS-CHRIST mesme n'eust iamais condamné les Iuifs d'incrédulité, comme il a fait, s'il n'en eust

tout premierement fait vn grand nombre à leurs
 yeux mesmes, ainsi qu'il le dit en saint Iean 13.
 vers. 24. *si ie n'eusse fait les œuvres entre eux, qu'au-*
cun autre n'a fait, ils n'auroient point de peché, mais
maintenant &c. Il est vray, que les Miracles qui
 s'operent en l'Eglise Romaine, ne rendent pas la
 Doctrine, qu'elle nous enseigne euidente d'vne
 euidence naturelle, comme nous auons desia dit
 cy dessus. Mais il est bien tres-assuré, qu'ils la
 rendent euidente d'vne euidence morale, ou pour
 parler avec les Theologiens, euidentement croyable
 & forcent en quelque sorte les hommes bien faits à
 la croire: Parce que Dieu, qui seul fait les miracles,
 n'a garde d'en faire en faueur du mensonge, pour
 n'autoriser point vne chose qui luy est si formelle-
 ment & si directement opposée, en tant qu'il est
 l'Essentielle & premiere Verité, comme il le dit par
 la bouche de son fils en saint Iean 14. 6. *Je suis la*
Voye, la Verité & la Vie, & pour n'exposer point les
hommes à prendre le mensonge pour la verité.

Et c'est vne Impudence insupportable, que vous
 auez empruntée d'vn Arrien effronté, sous le nom
 de saint Chrisostome, de dire que les Miracles ont
 desia depuis long-temps cessé, laquelle destruit &
 renuerse ce que IESVS-CHRIST mesme dit au
 chapitre precedent du mesme Euangile vers. 12.
Qui croit en moy fera les œuvres que ie fais & des plus
grandes. Promesse qu'il neliuite d'aucun temps, mais
l'ested iulques à la fin du monde.

Mais de grace quelle raison auez vous de des-
 pouiller l'Eglise Chrestienne de cet excellent Don,
 la Synagogue en ayant esté favorisée iusques à la
 venue de Messie, comme il est aisé de le preuuer
 par les Miracles d'Helie & des autres Prophètes, ve-
 nus apres luy, & par les dix, tous diuers, qui se fai-
 soient ordinairement dans le Temple, selon Pierre
 Galatin lib. de *Arcais* chap. 10. & par ceux qui se
 faisoient en la Piscine Probatique. Du Plessis mes-
 me escrit aux *Traité de l'Eglise* chap. 13. *Qu'il ne se*
deura pas treuuer estrange, quand Dieu aura fait des mi-
racles es terres nouvellement treuues pour conuaincre le
Diable, qui y regnoit. Ce sont ces propres paroles.
 Et Chemnice *in locis commun. de Ecclesia*, escrit il pas
 en termes dilerts contre vous. *Que toutes les vocations*
extraordinaires doivent estre confirmées par des miracles.
 Ce qui est si veritable que les Fondateurs de tous les
 Ordres Religieux de l'Eglise, saint Benoit, saint
 Bruno, saint Bernard, saint Dominique, S. Fran-
 çois d'Assise, saint François de Paule, saint Igna-
 ce en ont fait, & qui plus est, deu faire plusieurs,
 non pour authoriser leur Doctrine, puis qu'elle ne
 fut iamais autre que celle de l'Eglise Catholique,
 mais pour authoriser la forme de vie & de mœurs,
 qu'ils font venus establir pour plusieurs de ses Sujets
 en ce Siecle, & nous enseigner les chemins assurez
 du Ciel & du Salut, non tant par parole, que par
 exemples. Les Miracles n'ont donc pas encore ces-
 sé, comme vous gazouillez à tout propos.

Or qu'en l'Eglise Romaine, s'operent encore aujourd'huy de tres grand miracles, par la vertu diuine, non seulement aux Indes, au Iappon, en l'Amerique, au Mexique, mais encore en l'Europe, voire en ce Tres Chrestien Royaume de France, c'est chose qu'il ne faut plus reuoquer en doute; Plusieurs ayant esté operez en la presance de force personnes dignes de Foy, qui viuent encore. Il n'y a que ceux qui ont essuyé toute honte, qui nous osassent debattre les Miracles, operez par saint François de Paule.

Miracles si grands & si frequents, & tesmoignez par tant & tant d'hommes dignes de foy, qu'il semble que Dieu ait suscité ce grand Thaumaturgue en ce dernier Siecle pour confondre vostre Heresie & luy faire tomber le front. Il a porté plusieurs fois de charbons ardans long temps dans ses mains, & marché pieds nuds sur la braise, sans en estre offensé, il a allumé des cierges dans ses Eglises sans feu, voire est entré dans vne fournaise ardante, comme dans vn doux Bain. 2. Il a destourné diuerses fois en sa vie la tempeste, l'orage & la pluye. 3. Il a passé de Calabre en Sicile avec son compagnon sur son pauvre manteau estendu sur la Mer, comme vn autre eust fait dans vn Nauire bien cal-feutré, & pourueu de Patron, de Matelots, & de tout ce qui est requis pour la Nauigation. Il a fait sourdre des fontaines nouvelles & tarir des anciennes, comme il vouloit. 4. Il a reculé de leur place deux Rocs, qui

l'empeschoient de bastir commodement ses Conuents de Paula & de Paterne. 5. Il a guery de toutes les sortes de maladies & d'infirmitez du monde, des fièvres, hydropisies, paralysie & perclusions de membres, de Letargies, escrouelles, pestes, lepres, voire mesme des folies, frenesies, sortileges, & autres semblables maux de corps & d'esprit. 6. Il a merueilleusement multiplié deux ou trois fois le pain, donnant à manger à deux ou trois milles personnes avec cinq ou six pains seulement. 7. Il a rendu la parole à trois muets dès le berceau, la veuë à six aueugles, deux desquels estoient tels de naissance, & la vie à huit morts, dont l'un auoit esté (comme vn autre Lazare) priué de vie par l'espace de trois iours entiers, & l'autre escrasé par vne poutre tombée sur luy. Enfin ça esté vn autre Moyse en ce dernier temps.

S. Ignace a operé de toutes les sortes de Miracles, & resuscité deux morts, S. François Xauier en a fait encore vn monde de tres-grands aux Indes, & resuscité 24. morts. Le B. Iean de S. Guillaume, Augustin deschaux a resuscité trois morts durant sa vie & fait vn monde d'autre Miracles, qui continuent encore à present. Pour saint Philippe Nerio, le B. Louys Bertrand de l'Ordre de S. Dominique & le B. Martin de Valence Recolé, outre plusieurs signalez miracles qu'ils ont faits, ils ont encore chacun d'eux resuscité vn mort. Pierre de Cordouë Dominicain cōmandoit à baguette aux Elemens, & sem-

bloit en estre le maistre absolu. André de l'Olme Religieux de l'Ordre de S. François, estant poursuivi des Indiens, les flèches qu'ils décochent contre luy, reculent & rebroussent à demy chemin contre les tireurs. André de Spolete du mesme Ordre sortit sans aucun dommage du milieu d'un grand feu en Mauritanie, dans lequel il s'estoit ietté en presence du Roy de Fez, pour authentifier par cette merueille la Foy Catholique qu'il prechoit. André d'Oriedo, Iesuite secha vn fleuve en Ethiopie. Le Pere Joseph Anchieta, Iesuite. Le frere Saviour de Horro, Recolé, & le Pere Honoré de Champigny, Capucin, ont encore fait vn si grand nombre de miracles, qu'il y en a pour remplir des liures entiers, & pour meriter à ces Hommes diuins, d'estre appelez les Thaumaturgues de ce dernier siecle, apres le Grand saint François de Paule.

Je ne veux rien dire des Miracles operez à la gloire du Pere de Bus, de François de Sales Euesque de Geneue, de Claude Bernard, de Jean Baptiste le Gaur, Euesque de Marseille, &c.

Combien des Miracles sont operez tous les iours en suite des Vœux faits à nostre Dame, aux Apostres & autres grands Saints en mille endroits de la Terre. Il faudroit des Volumes entiers pour les contenir. Combien d'embrasemens ont esté promptement estaints & de deluges calmez en ce siecle par la vertu des Agnus Dei? Combien de fois les Reliques des Saints nous ont obtenu dans l'extre-

me necessite, tantost la pluye & tantost le serain? On
voit rarement en procession celles de sainct Gene-
vieve à Paris, celle de saincte Marthe à Tarascon
en Provençe, & celles de plusieurs autres Saincts
ailleurs, sans que les villes où elles reposent n'ob-
tiennent le mesme temps qu'elles demandent à Dieu,
par les merites des memes Saincts, appuyez sur
ceux de I E S U S - C H R I S T, qui les a fait Saincts.

Combien avons nous des Corps Saincts, encore
tous entiers? Celuy de S. François de Pise, fut trou-
vé l'an 1562. c'est à dire 55. ans apres son glorieux
decez, non seulement entier, mais encore tout frais.
Merveille qui devoit absolument destourner la
barbarie, exercée par vos Deuociers à Tours sur cette
sacree Relique, s'ils eussent eu quelque bluete d'hu-
manité dans l'ame. Celuy de S. Xavier fut treuvé 15.
mois apres son heureux trespas tout entier & frais,
voit ensevely dans la chaux vive. Le Cardinal Bel-
larmín assure en son livre des Reliques chap. 3. d'a-
voir veu le Corps de la B. Catherine de Bologne
Vierge, tout entier & sans aucune corruption cent
ans apres son bien heureux trespas. Celuy du B.
Martin de Valence fut encore treuvé 33. ans apres
sa mort, aussi entier & frais que le propre jour qu'il
mourut. Je laisse à parler de celuy du B. Jean de S.
Guillaume Augustin deschaux, qui fut treuvé tout
entier plusieurs années apres sa mort, & de plusieurs
autres semblables corps, pour dire comme de ce-
luy du B. Pere Cesar de Bus, outre qu'il a esté con-

noiffable 15. ans apres sa mort , continuë encore aujourdhuy en son integrité depuis 35. ans. qu'il est decedé, nonobstant l'hydropisie aqueuse dans laquelle il mourut , & plusieurs autres notables causes de corruption, dont j'ay parlé dans sa vie. Mais il ne faut pas obmettre icy celui de Marie de Toledé, Vierge de l'Ordre de saint François, lequel a esté treuvé tout entier & flexible 83. ans apres sa mort. Et qui en voudra sçauoir d'auantage, qu'il lise Bosius au liure 15. chapitre 7. *des Signes de l'Eglise.*

Non seulement les Corps de plusieurs de nos Saints sont demeurez tous entiers, beaucoup d'années apres leur decés ; mais quelques vns d'eux ont encore rendu long temps apres vne celeste odeur: Entre autres ceux de saint François de Paule, de la sainte Mere Therese, de S. Xauier, de S. Philippe, du B. André de l'Olme, & de quelques Vierges, dont parle Bosius au l. 12. ch. 21. *de Signes de l'Eglise.* Ce n'est pas tout. Il y a plusieurs saints Corps, desquels vne liqueur precieuse découle continuellement, tres propre pour la guerison de toute sorte de maladies, nommément de ceux de saint André, & de saint Mathieu Apostres, de saint Nicolas Tolentin, de saint Fœlix de Nole, &c.

Mais qu'est-ce qu'il y a de plus digne d'admiration, que les Miracles annuels, qu'on voit. 1. A S. Maximin en Prouëce, où tous les Grands Vendredis sur l'heure du Midy, la sainte Ampoule deuiët peu

à peu de grifaſtre rouge comme ſang, dont i'ay eſté
teſmoin oculaire avec admiration l'année 1615.
2. à Naples où le Sang de S. Iean Baptiſte ſe liquifie
tous les ans au 29. iour d'Aouſt, ſur la meſme heure
que ce grand Sainct euſt la teſte coupée en Hieruſa-
lem; Autant en fait daus la meſme Ville celuy de S.
Ianiuer, à meſure qu'on l'approche de ſon glorieux
Chef. 3. à Meliapor aux Indes, où l'on voit vn
Marbre, autrefois tainct du ſang de l'Apoſtre ſainct
Thomas, qui diſtille pluſieurs gouttes de ſang tous
les ans, lors qu'on lit en la Meſſe le ſainct Euangile,
le iour de ſa Feſte qui eſt le 21. de Decembre.

Mais de grace, où eſt celuy d'entre vous? qui nous
oſaſt conteſter & debatre auiourd'huy la guerifon
toute miraculeuſe des eſcroüelles, operée mille &
mille fois par nos Roys Tres Chreſtiens, apres quel-
ques Ieunes, & apres la Cōfeſſion & Communion,
pratiquées ſelon la creance & l'eſprit de l'Eglise Ro-
maine?

De grace, où eſt celuy d'entre-vous, qui nous
oſaſt conteſter & debatre la guerifon toute miracu-
leuſe de la morſure des animaux enragez, operée
encore mille & mille fois en pluſieurs lieux du Lan-
guedoc, de Prouence, du Comté d'Auignon, &
ailleurs, ſans autre remede, que l'application des
choſes ſacrées par les Preſtres de la meſme Eglise ſur
les perſonnes offencées par telles morſures?

Où eſt encore celuy d'entre-vous, qui nous oſaſt
conteſter & debatre la fuitte, que nos Eueſques ou

leurs Vicaires, ont mille & mille fois baillé au Sauterelles, Chenilles, Hanetons & autres animaux qui gastent souuent les bleds, les Vignes & les arbres dont il suffit des trois exemples suivants.

Plusieurs milliers de personnes scauent, comme le Sieur Guillini, Vicaire de Pernes, homme craignant Dieu & veritablement digne de sa profession député par son Prelat, purgea l'année 1619. la Forest de Saut en Prouence des Chenilles, lesquelles en couuroient entierement les chesnes & gastoiert desia le gland, qui commençoit à naistre, les faisant tomber morts à terre par la seule force des adiuurations de l'Eglise, dont il se seruit.

Plusieurs milliers de personnes scauent encore, comme l'an 1616. les Sauterelles, ayant couruert toute la Campagne d'Arles, dont les bleds en estoient notablement endommagez, elles en furent vniuersellement chassées aussi tost que l'Illustrissime Archeuesque & son Clergé se furent seruis des mesmes adiuurations de l'Eglise, allans toutes se precipiter dans vn Estang, hors les limites du Terroir de ceste grosse Ville.

Plusieurs milliers de personnes scauent encore, comme quantité de Dauphins s'estans iettez sur le port de Marseille environ l'an 1609. ou ils brisoient les filets des pescheurs, & renuerloient plusieurs barques presque sur le port, les habitans de ceste belle Ville, n'yferent d'aucun autre remede, que de recourir à nostre S. Pere afin qu'il luy pleust de les

deliurer de ceste infestation, laquelle continuoit
desia depuis plusieurs mois, Dont il commit l'illuf-
trissime François Bordin, Euefque de Cauillon,
& depuis Archeuefque d'Avignon, l'un des pre-
miers Disciples de saint Philippe Nerio, lequel
bailla la fuite à tous ces animaux par la force des
mesmes adiurations de l'Eglise, aussi tost qu'il s'en
fust leuy. Ce ne font pas contes forgez à plaisir, que
ce que ie viens de dire, mais histoires tres vrayes, &
desquelles plusieurs pourront porter tesmoignage
encore aujourd'huy en cas de besoin.

Continuation de ce dernier Article.

Que si vous avez manqué de foy pour croire
tous ces grands miracles que ie viens de re-
marquer icy, comme en courant, ie croy que vous
n'aurez pas faute de sentiment pour sentir ceux que
ie m'en vray seulement vous remettre en memoire
pour les auoir desia rapportez avec plusieurs autres
au long dans la *Reprobation diuine du Calvinisme*, ch. 7.
ou vous seriez plus adres, que ne fut iamais Naaman
Syrien.

Vous souuient-il de ce qui arriva a Souley sur
Loire l'an 1576. aux trois soldats Huguenots de
Monseigneur le Duc d'Alençon, qui firent long
temps de l'Image de saint Antoine vn Faquin, &
la bute de leurs Arquebuzades; Vn desquels mourut
soudainement, en s'escriant. *Je bruste*, l'autre s'alla

precipiter dans la riuere, proche de là, qui l'eust aussi-tost suffoqué, & le troisieme se catholisa le iour mesme. Spectacle arriué en presence de trois mille tesmoins, & rapporté par plusieurs Historiens, & nommément par du Preau, l'vn des premiers de nostre aage.

Vous souuient-il de la punition, dont furent chastiez l'an 1595. vos freres Rochelois, allans au Brasil, pour s'estre impudemment mocquez de l'Image en relief de S. Anthoine, dit de Padouë, pendant toutes les Nauires de leur flotte entre icy & là, excepté vne qui enfonça presque sur le port. Dont le Pere du Iarric Iesuiste fait mention au l. 3. ch. 28. *de son Histoire des Indes Orientales.*

Vous souuient-il de ce qui arriua il y a environ 30. ans en Sauoye à quelques soldats Reformez, pour auoir mangé vne fricassée le Vendredy, dans vne Eglise, & bien gaussé du Crucifix, lesquels furent soudainement épris de rage, dont ils se ruerent les vns sur les autres, l'vn desquels mourut sur la place; Histoire, rapportée sur des témoignages indubitables par le celebre François de Sales, Euesque de Geneue au liu. 2. ch. 14. *de la Deffence de la Sainte Croix.*

Vous souuient-il du chastiment, dont Dieu punit la sacrilege cruauté du sieur de Fougères du Languedoc, (lequel auoit coupé la teste au corps, encore tout entier depuis 200. ans de S. Foulcran à Loudeue) luy faisant souffrir le mesme traitement

qu'il auoit fait au Corps Sainct; En ce que sa teste luy fut miraculeusemēt enleuée vn an apres au mesme iour & heure, & sur le mesme lieu. Histoire que i'ay aprinse, non seulement des premiers Peres Recolets de la Prouince de S. Bernardin, mais encore de la voix publique.

Vous souuient-il de la vengeance, que Dieu print de cette femme Huguenote de la Mottefurlon, en Perigord, pour auoir poussé du pied dans le feu l'Image de S. Anthoine, qu'on faisoit brusler avec plusieurs autres; Laquelle se sentit brusler à mesme temps, sans pouuoir iamais treuuer aucune sorte de remede en son embrasement; Dont vous treuueriez le Discours au long au liure *des Marques de la vraye Eglise*, de Messire Anthoine Sorbin, Predicateur ordinaire de Henry troisieme.

Vous souuient-il du foudre, qui tua l'an 1609. vne Dame Huguenote dans son propre Chasteau en Charolois, au milieu de ses filles de Chambre, pour s'estre par deux fois moquée d'elles, comme elles faisoient le signe de la Croix à tous les éclairs, qu'elles apperceuoient, dequoy fait mention le Pere Iacques Gautier au dix-septieme siecle *de sa Table Chronographique*, colonne des euenemens remarquables.

Vous souuient-il d'une semblable foudre, qui tua ce vostre frere en Christ, qui allant en compagnie d'un Catholique, se gauffoit de qu'il faisoit encore le signe de la Croix, toutes les fois qu'il voyoit

éclairer. Histoire que le sieur de Remond écrit en la
Naissance de l'Herésie liur 8. chap. 4. après Bredemba-
 chius en ses *Collations sacrées*. Vous souvient-il de la mort fondaine de la Fe-
 nestre, President au Présidial d'Angoulesme, lequel
 pour auoir impudemment dit, qu'il s'enalloit ren-
 dre la Messe dans son Garderobe, vuida ses entrail-
 les, mourant comme vn beau petit Arrius Reformé,
 dont ledit Messire Antoine Sorbin rapporte encore
 l'Histoire au mesme liure *des Marques de l'Eglise*.

Vous souvient-il de la punition, dont fut châtié
 ce moqueur, duquel parle Erasme, (escriuant à
 l'Euesque de Leyden) pour auoir voulu contrefaire
 dans vn Cabaret les prestres, lors qu'ils consacrent
 l'Hostie en la sainte Messe, esleuant vne assiette en
 haut à la place d'vne Hostie.

Vous souvient-il de la punition de Poltrot, qui
 ne sceut iamais sortir de la Sphere d'vne arquebuse,
 de loin du Parricide par luy commis à la suggestion
 de Belzebuth & de Beze, sur la personne du grand
 Duc de Guise. Punition de laquelle tous les Histo-
 riens François font ample mention.

Vous souvient-il de ce qui arriva à vn Notaire
 Huguenot de Ville-neufue de Berg, pour auoir sou-
 uent comparé les Prestres qui chantent aux Enter-
 remens, à des Asnes, qui brayent, lequel estant
 mort & porté en terre vn gros Asne paroit, qui braya
 long-temps apres luy, sans qu'on le peut iamais
 chasser, ny faire taire, iusqu'à ce qu'il s'esuanoût,

l'enterrement du Notaire fait.

Vous souuiet-il de la prise de vos deux Vaisseaux, chargés d'Armes, proche d'Aiguemortes, dont vous cuidates enrager durant vn long-temps apres; Qu'en dittes vous, fast-ce point vn chastiment diuin à vostre aduis?

Vous souuiet-il de l'accident, qui arriua l'an 1623. à Monsieur de Soubize, la veille de son depart d'Angleterre, pour reuenir en France, faire du pis contre son Souuerain, perdant au Port mesme par vn orage miraculeux neuf de ses Vaisseaux avec 800. hommes, & pour 25. mil escus de munitions de guerre.

Vous souuiet-il de ce qui arriua au fils du Congierge du marché au bled de Montpellier, qui auoit pillé l'Eglise de nostre Dame de cette ville, lequel tomba peu de temps apres en desespoir, se coupa la main, dont il auoit fait le pillage, se creua l'vn de ses yeux avec vn couteau, & se fut encore tué, sans qu'il en fut empesché; Desespoir dans lequel il mourut peu de iours apres.

Vous souuiet-il de ce qui arriua l'an 1641. & le 9. d'Octobre au Regent de l'Humanité de Die, nommé Coaquin, iadis Religieux de l'Ordre de S. Dominique, lequel apres auoir souffert long-temps des extremes remords de conscience à raison de son Apostasie, ne les pouuant plus supporter, se tua soy mesme, avec vn pistolet, l'appliquant en desespéré contre sa teste.

Vous souvient-il de la Terreur panique, qui arriva le 10. de May de l'année 1601. sur les onze heures du matin à vos freres de Nismes, de Montpellier, d'Vzes, & autres lieux du bas Languedoc, celebrans vn leune general dans leurs Temples; Desquels à cause de leur Terreur plusieurs voulans sortir precipitément par les portes furent estouffez, plusieurs autres se rompirent le col, ou blessèrent notablement voulans sauter par les fenestres, en iuste punition de leur hypocrisie, ou de leurs iniques desfains, & nommément à Nismes & à Montpellier.

Auez-vous iamais pris garde au chastiment, dont Dieu a puny vos trois Fondateurs, Calvin, Viret, & Beze, les priuant de posterité legitime, voire mesme selon vostre estime erronée, Qu'vn Prestre Ministerisé puisse auoir des enfans legitimes. Marque euidente de l'horreur, que Dieu a eu de leurs conuictions sacrileges.

Mais laissons ces Miracles & cent autres semblables, qui vous cuisent encore, que dites-vous des premiers, dont ie viens de vous parler? Tenez-vous que ce soient des Illusions de Sathan, ou bien des Miracles formels; Si vous tenez que ce soient des Miracles formels, en voilà de reste, pour vous ramener en vostre bon sens; Car n'est-ce pas Dieu mesme, qui parle avec ce langage muet en nostre faueur contre vos Impietés & Sacrileges insupportables, vn vray Miracle estant à n'en point mentir vn Arrest du Ciel, prononcé de Dieu mesme en Rouge.

Si vous tenez que ce soient des Illusions de Satan & des prodiges de l'Antechrist, vous estes les plus iniustes gens du monde, excusés moy, s'il vous plaiet. Premièrement; Par ce que ces hōmes par le Ministère desquels Dieu les a voulu faire, sōt pour l'ordinaire, les plus charitables, les plus humbles, les plus debōnaires, les plus patians, les plus obeissans, bref les plus irreprehensibles & les plus Saints personnages, qu'on ait iamais veu, parmy tous ceux qui se disent Chrestiens 2. Parce qu'ils les ont faiet aux tempts, aux lieux & sur les personnes, & dans des circōstances qu'ils n'eussent iamais pensé, Signe evident qu'ils ne procedoient pas, ny d'eux, ny du Diable, mais de la seule Ordonnance de Dieu, qui sçait qu'and, où, en qui, par qui, & comment ils doivent estre operez pour sa gloire & le bien de ses Seruiteurs. 3. Parce que les Miracles qu'ils ont faiets surpassent de bien loin les forces, non seulement de l'homme & du Diable, mais encore celles de tous les Anges du Ciel ensemble, comme sçauent tres bien les sçauans d'entre vous, ny ayant Ange au Ciel, quel qu'il soit, qui peut par sa propre vertu faire voir vn auengle, entendre vn sourd, & parler vn muet de naissance & moins faire reuiure vn mort, comme on la veu souuent parmy nous 4. Parce que ces Merueilles n'ont iamais sçeu estre conuaincuës d'illusion & de Piperie par aucun de vous, quelque recherche & quelque exa-

men dont vous vous soyez seruis pour cet efaict. Je parle seulement de celles que nous appreuons & proposons comme veritables. Et finalement parce que si le Diable operoit ces grands effets parmi nous, pour nous entretenir dans nos pretendues erreurs, comme vous gazouillez, il est bien a croire quil en feroit le mesme parmi les Juifs, Turcs, Payens pour les entretenir encore dans les leurs, que vous mesmes estimez estre beaucoup pires que les nostres, & eux dans le grand chemin de la Reprobation. Cequ'il ne faict toutesfois pas, comme vous ne scauez que trop, à vostre condemnation: Nottez, ie vous supplie ces raisons, auxquelles ie vous defie charitablement de respondre en vostre vie à propos.

BRIEFVE CONCLVSION
DE TOVTS CES DISCOVRS

VOILA *Messieurs* la Recherche que ie viens de faire, pour scauoir plus asseurement, laquelle des deux, l'Eglise Romaine, ou la vostre Reformée, est la vraye Eglise, à fin de terminer & resoudre vne bonne fois les Querelles de Religion, qui regnent despuis si long temps parmi nous. Recherche, que vous treuuez intelligible tout ce qui se peut, mais beaucoup plus encore

veritable & solide en ses preuues, car ie nay rien
escriu qu'avec des bonnes authorities & raisons

Que si l'*Vnité*, l'*Vniuersalité*, la *Saincteté*, & l'*A-*
Postolicité, Marques inseparables de la vraye Eglise,
 comme vous mesme confessez à toute occasion
 lesquelles ie viens de vous faire toucher au doigt
 en l'Eglise Romaine, ne vous appellent point
 dans sa Communion, apres vous auoir separé de
 vostre Schisme, (dans lequel vous n'en treuuez
 pas mesme l'apparence, l'ombre, voire l'idée),
 ie ne scay, pour moy plus d'autre remede, si ce
 n'est de vous recommander de tout mon cœur
 aux paternelles entrailles de la Misericorde de
 Dieu, qui ne vous a créés, que pour vous sauuer,
 si vous voulez prester l'oreille du cœur a la voix
 secrette de ses inspiratiōs laquelle vous auez sou-
 uent enteduë durant la lecture de ces discours.

Que si ie vous semble vn peu trop aspre & se-
 uere en quelques endroits, excusez l'ardeur de
 mon zele, sil vous plaiët, sur les authorities &
 raisons que ie vous ay apportées en la Preface de
 ceste *Recherche*. ie me suis accoustumé despuis
 long temps à dire ce que ie sens en matiere de
 Religion. Mon cœur, auresste, que i'offre à dieu
 pour vous, est tout autre que ma plume ne vous
 paroist pas. C'est le seul desir de la gloire de Dieu
 & de vostre salut qui ma faiët escrire si ouuerte-
 ment, & non la haine, que i'aye contre aucun
 de vous pour le salut de l'Ame du moindre des-

quels, ie suis au contraire tout prest & apareillé
despendre iusqu'a la derniere goutte de mon
Sang. à Dieu. FIN



TABLE DES CHAPITRES

CONTENVS EN CHACVNE
des quatre marques de l'Eglise de ce Liure

MARQUE PREMIERE

De l'vnité de l'Eglise en general C. 1. p. 9.

De l'vnité de l'Eglise Romaine & multiplicité de
la pretendue Reformée en leurs Autheurs
C. 2. p. 19.

De la mesme vnité & multiplicité en leurs chefs
visibles C. 3. p. 23.

De la mesme vnité & multiplicité en leur corps
C. 4. p. 29.

De la mesme vnité & multiplicité en leurs cre-
ances C. 5. p. 33.

Dissensions des pretendus en matiere de foy
C. 6. p. 38.

Suite des mesmes dissensions C. 7. p. 47.

Contradictions manifestes de ces messieurs en
touts leurs principaux points de leur creance
C. 8. p. 51.

De la mesme vnité, & multiplicité en leurs Vo-
lontés C. 9. p. 56.

De la mesme vnitè & multiplicité touchant leurs
baptêmes C. 10. p. 58

De la mesme vnitè & multiplicité en leurs Cultes
externes C. 11. p. 62.

MARQUE DEUXIEME

De l'vniuersalité de l'Eglise en general C. 1. p. 69.

De l'vniuersalité De l'eglise Romaine & particula
rité de la reformeé selon le temps C. 2. p. 76.

De la mesme vniuersalité & particularite Selon les
lieux C. 3. p. 80

De la mesme vniuersalité & particularite Selon
les personnes C. 4. p. 85.

De la mesme vniuersalité & particularité selon
les faueurs diuines C. 5. p. 87.

De la parole de Dieu art. 1. p. 89.

Des vies de Iesus christ & de ses saincts art. 2. p. 93.

Des sacrements art. 3. p. 95.

Des conseils art. 4. p. 96.

Des oraisons art. 5. p. 98.

Des merites infinis de Iesus christ & de ses saincts
art. 6. p. 99.

Des ceremonies art. 7. p. 101.

Des graces gratuites art. 8. p. 103.

De la mesme vniuersalité & particularite Selon
les aides diuines C. 6. p. 104.

Contre les Tirans art. 1. p. 105

Contre les Heretiques a. 2. p. 109

Contre les schismatiques & factieux a. 3. p. 117.

Contre les scandaleux a. 4. p. 119.

Contre les bouffons a. 5. p. 121.

Contre les faux christes a. 6. p. 124.

Contre les incredules a. 7. p. 126.

Contre la multitude des infideles a. 8. p. 128.

MARQUE TROYSIEME

De la Saincteté de l'Eglise en general c. 1. p. 131.

De la saincteté de l'Eglise Rōaine & impieté de la reformee en leurs fondateurs & reformateurs

c 2, p. 134

Abregè De la vie des cinq premiers auteurs des erreurs de ce temps C. 3. p. 142.

De la mesme saincteté & impieté en leurs principaux officiers & ministres C. 4. p. 150

De la saincteté de l'Eglise Romaine en son efficace a cōuertir les hōmes C. 5. p. 150

La conuersion des payens & Iuifs art. 1. p. 156.

Le Retour des heretiques & appostas a l'Eglise Romaine art. 2. p. 162,

Le Retour des schismatiques a la mesme Eglise art. 3. p. 167.

L'heureux retour des pecheurs a la grace a l'Eglise Romaine art. 4. p. 176.

La perfection des Iustes Consummée dans la mesme Eglise art. 5. p. 181.

de La mesme Saincteté & impieté en leurs moyens d'acheminer les hommes a Dieu C. 6 p. 185.

De la mesme Saincteté & impieté en leurs fins 7. p. 195.

De la mesme Saincteté & impieté en leurs dogmes touchant la Foy C. 8. p. 201.

De la mesme Saincteté & impieté en leurs dogmes touchant les meurs C. 9. p. 210,

De la mesme saincteté & impieté touchant les vertus theologales C. 10. p. 231.

De la mesme saincteté & impieté touchāt les vertus fondamentales du christianisme C. 11. p. 241.

De la mesme saincteté touchant les vertus pœnitentielles C. 12. p. 253

De la mesme saincteté & impieté touchant les vertus plus heroiques C. 13. p. 265.

puissāte cōfirmatiō des choses q. dessus c. 14. p. 275

MARQUE QUATRIEME

De l'apostolicité de l'Eglise en general c. 1. p. 282.

De la postolicité de l'Eglise Romaine & apostasie de la Reformée touchant l'Origine C. 2. p. 283

De la mesme apostolicité & apostasie touchant la Doctrine. c. 3. p. 286.

De la mesme apostolicité & apostasie touchant les meurs C. 4. p. 290.

de la mesme apostolicité & apostasie touchant le culte C. 5. p. 298.

De la mesme apostolicité & apostasie touchant la hierarchie C. 6 p. 312.

De la mesme apostolicité & apostasie touchant les graces & faueurs diuines C. 7. p. 314

Touchant les consolations diuines art. 1. p. 315.

De la liberté de l'Esprit art. 2. p. 318.

De la paix interieure art. 3. p. 327.

De la foy des gens de bien art. 4. p. 331.

Des dons gratuits de l'Eglise Romaine incognus

Tables

375

ala reformée C. 8. p. 335

Du don de Contemplation art. 1. p. 335,,

Du don des langues & des sciences art. 2. p. 338.


Du don de prophetie art. 3. p. 344

Du don des miracles art. 4. p. 353

FIN

ERRERIS A CORRIGER en ce Liure auant
que le lire

- p. 96. lig. 15. ostés *douper* & mettez *couper*
 p. 106. lig. 16. ostez *est* mettez &
 p. 110. lig. antepenult. ostez *mar orat* & mettez *marlorat*
 p. 116. l. 7. ostez *en* mettez *de* & l. 16. adioustez apres du
 monde, *lesquels*
 p. 192. l. 19 adioustes apres *faueurs* &
 p. 204. l. 25. ostes *peut* & mettes *peu*
 p. 209. l. 24. ostes *assiste* & mettes *assistée*
 p. 214. l. 13. ostes *gasouille* & mettes *gasouillent*
 p. 227. l. antepenult. adioustes apres *manifestes*, *desquelles*
 p. 240. l. 3 ostes *ses* & mettes *ces*
 p. 243. l. 25 adioustes apres *qui en*
 p. 263. l. 26 ostes *gouste* & mettes *consté*
 p. 267. l. 25 ostes *ingrats* & mettes *ingrates*
 p. 276. l. 24. adioustes apres *Bien* &
 p. 285. l. 9 ostes *enseignoit* & mettes *enseignoient*
 p. 289. l. 7 ostes *cest*
 p. 297. l. 9. ostes, *que*
 p. 299. l. 15. ostes *ils se confessoient*
 p. 302. l. 24. ostes *lors*
 p. 313. l. 19 ostes *la* & mettes *sa*
 p. 320. l. 13 adiouste apres *que le* & l. 27 ostes *dire* & mettes *vice*
 p. 354. l. penultieme ostes *qui* & mettes *quil ne*
 p. 362. l. 8. ostes *1633*. & mettes *1619*



Sur pages 228. 249. 271. 320
et 311. il est parlé de rions.
à la page 284. de la Motte -
Chalencou.

EA 644
M 314 m



